




Oivis SCB Section 1.876 No. V.412



Digitized by the Internet Archive in 2010 with funding from University of Ottawa

LA MORALE CHRESTIENNE

MONSIEVR

DE

VILLARNOVL

SVITE DE LA QUATRIEME Et dernière Partie.

Par MOYSE AMYRAVT.



A SAVMVR,

Chés ISAAC DESBORDES, Imprimeur & Libraire.

M. DC. LX.

The way the first ver and the state of the state

STANDER OF PRINCIPLES Company in the second of the s

TO A TOP OF THE REAL PROPERTY.



LA MORALE CHRESTIENNE, MONSIEVR

DE

VILLARNOVL

SVITE DE LA QUATRIEME ET DERNIERE PARTIE.

PREFACE.



E ne veux pas, MONSIEVR, accomparer l'allegresse auec laquelle ie me mets à composer ce dernier volume de ama Morale, au

mouuement naturel des corps composés des elemens, dont Aristote dit qu'ils

4 SVITE DE LA DERN. PART. vont plus viste & plus deliberément à mesure qu'ils s'approchent de leur cen-tre ou du lieu de leur repos. Car puis qu'il a ainsi pleu a Dieu, ma vie est tellement agitée, que ie ne me propose point de repos sinon dans le sein d'Abraham: & quand il platroit à nostre Seigneur m'en donner quelque peu dauantage que se n'en ay eu par le passé, ce n'est pas mon dessein de demeurer les bras croisez apres que l'auray mis la derniere main à cet ouvrage. l'ay encore dans l'entendement l'idée de quelques autres trauaux que i'ay promis au public, & dont ie desire d'autant plus m'acquitter le plustost que ie pourray, que ie ne puis pas desormais esperer vne longue vie. Car tant s'en faut que pour auoir passé cette année qu'on nome climacterique, ie m'en estime plus affeuré de viure encore long temps, que desormais toutes celles qui viendrotapres me semblerot me deuoir estre fatales. le fais donc comme ceux qui reuiennent d'vn voyage de long cours, & qui quand ils déconurent le port, iettent des cris de ioye, & semblent prendre nouuelles forces

DE LA MORALE CHREST. pour tirer à l'auiron. Non qu'ils soyent resolus de demeurer oiseux quand ils seront arriués, & de se promener le reste de leurs iours fur la rade leurs mains dans leurs poches. Leur dessein est ordinairement de faire quelque nouuelle entreprise à la premiere occasion, & d'aller charger quelques marchandises aux cos stes de l'Orient ou de l'Occident, pour les debiter puis apres entre leurs concitoyens, s'il plaist à Dieu leur faire la grace de retourner en leur patrie. Ils se réjouissent seulemet de ce qu'ils se voyent prés d'acheuer ce qu'ils s'estoyent propolé, les commencemens & les progrés de quoy que ce soit, n'estans ordinairement guere estimez, si l'on ne paruient à la fin que l'on s'estoit establie. Bien donques que i'espere qu'apres ce dernier volumeicy, ie parcourray Dieu aydant toute l'Escriture sainte, pour en ramasser la Theologie que ie veux reduire en vn corps, afin de le faire voir à nostre nation dans vn air qui luy donnera peut estre quelque nouvel aggréement, ie ne laisse pas de sentir beaucoup de contentement de me voir approché si prés du

SVITE DE LA DERN. PART. but auquel ie visois en cette Morale des puis tant d'années. Et ie ne vous celeray pas, MONSIEVR, qu'yne autre consideration m'empesche encore de differer plus long-temps l'accomplissement de ce dessein. Apres tant de maladies qui vous ont tenu depuis quelques années entre la vie & la mort, l'estat auquelie vous vis arriver dernierement à Loudun, m'auoit fait conceuoir l'espes rance que vous iouïriez à l'aduenir d'vne santé ferme & vigoureuse. Car il me sembloit à voir vostre teint, & vostre allure, & l'embonpoint que vous auiez en quelque façon repris, qu'il ne vous restoit plus rien de ces incommoditez qui nous àvoyent donné tant d'alarmes. Tellement qu'estant encore comme en la fleur de vostre aage, & au deçà de cinquante ans, ie me promettois que desormais vous allongeriez vos iours selon le cours ordinaire de la Nature. Ets'il plaist à Dieu exaucer les vœux de tant de gens de bien qui vous connoissent & qui admirent vostre vertu, & particulierement les miens, qui sont d'autant plus ardens, que ie vous connois mieux

De La Morale Chrest.

qu'aucun autre, & que ie me puis vanter d'auoir autant de part que qui que ce soit en l'honneur de vostre amitié, le Public & l'Eglise de Dieu nommément, iouïront encore d'icy à soixante ans de l'auantage de vos bons exemples. Neantmoins, cette fieure qui vous prit à l'heure mesme que ie vous croyois au meilleur estat, & qui vous ayant obligé de vous en retourner sur vos pas en vostre maison, vous mit en peu de iours iusques sur le bord du sepulchre, m'a fait faire vne nouuelle reflexion sur la fragilité de nostre vie, & m'a fait apprehender ou d'estre preuenu par quelque accident qui m'empesche de vous payer en cet egard ce que ie vous dois, ou, ce que nostre bon Dieu ne vueille, qu'il vous suruint quelque chose qui vous empeschast de le receuoir. Or à qui que ce fust de nous deux que l'infirmité de la Nature, & la necessité de la mort, ostast le moyen de voir cette dette acquittée, ie vous aduouë, MONSIEVR, que ce me seroit vn fort sensible déplaisir. Ie benis le Ciel de tout mon cœur, de ce qu'il vous a redonné à nos prieres, & le sup-

plie qu'il rende vostre conualescence acheuée, & qu'il me face la grace de venirà bont de ce tranail, & cependant ie vous diray icy brieuement ce que ie me propose de faire en ce dernier tôme. Tous les preceptes de pieté & de charité que i'ay donnés dans le precedent, sont figeneraux, & conviennent tellement à tous les Chrestiens, qu'ils ne regardent presque aucune de leurs conditions & de leurs vocations particulieres. Car i'ay en cela suiui les formes vniuerselles des vertus Chrestiennes, telles qu'elles peuuent estre tirées de la coparaison de l'Euangile auecque la Loy, & auecque les autres Dispensations sous lesquelles les hommes ont vescu. Ce qui ne requeroit pas que le particularifasse beaucoup les denoirs ausquels nous sommes tous obligés. En effect, de quelque condition que nous soyons, & à quelque vocation que la Providence de Dieunous ait appellés, chacun selon qu'il luy a pleu nous destiner à seruir à son conseil tandis que nous sommes en la vie, il y a quelque chose de si commun pour nous tous dans les enseignemens que l'Euangile

DE LA MORALE CHREST. nous fournit, qu'il n'y a personne de nous qui n'en puisse retirer des vtilités incomparables. Toutesfois, comme on dit que les astres sont des causes vniuerselles, dont les influences n'ont rien de particulierement determiné à telles ou à telles productions, de sorte qu'elles se limitent, & s'il faut ainfi dire, elles prennent leur specification des diuerses dispositions qui se trouuent en la matiere; d'où vient qu'icy elles produisent de l'or, & là elles produisent de l'argent, & ailleurs elles engendrent des perles, ce qui sert à l'viilité & à l'ornement de l'Vniuers: ainsi cette essicace generale des preceptes Euangeliques, se determine ordinairement par les vocations des particuliers, pour produire en vn endroit la vertu d'vn Ministre de l'Euangile, en vn autre celle d'vn Seigneur ou d'vn Gentilhomme, en vn autre celle d'vn Capitaine ou d'vn foldat, en vn autre celle d'vn Magistrat ou d'vn home de Palais, en vn autre celle d'vn homme qui exerce quelcune des parties de la Medecine, en vn autre celle d'vn Marchand, & en vn autre celle d'vn Arti-

SVITE DE LA DERN. PART. san ou d'vn Laboureur; d'où resulte enfin le système des qualités qui rendent l'Eglise de Dieu la plus belle & la plus recommandable societé qui soit sur la fase de la terre. Or est il bien vray que comme c'est la divine Providence qui addresse les influences des astres sur les diuerses matieres sur lesquelles elles doiuent agir, & qui par vneactiuité secrette & imperceptible aux yeux des hommes, les gouverne, & les applique, & les mesnage en telle sorte, qu'elle en fait resulter ces diuerses formes de metaux & de pierreries qui accomodent & qui embellissent la societé du genre humain: aussi est-ce l'Esprit de nostre Seigneur Iesus Christ, lequel il dispense à tous ses fidelles, qui leur applique à chacun en la vocation à laquelle il a esté appellé, ces enseignemens generaux quele Christianisme nous fournit. Tellement que c'est à sa divine vertu, qui se desploye interieurement dans les cœurs & dans les entendemens des hommes, qu'il faut attribuer la production de toutes ces belles & neantmoins differentes qualisés qui reluisent dans l'Eglise, & qui

DE LA MORALE CHREST. rendent admirable la communion des Saints. Neantmoins, ainsi que les Apostres de nostre Seigneur ne se sont pas contentés de nous donner des enseignemens generaux, mais ont pris le soin d'instruire chacun des fidelles à pratiquer la Pieté, la Temperance & la Charité, chacun selon la condition en laquelle ila pleu à Dieu de le colloquer, comme vous saués, MONSIEVR, que les Escrits de S. Paul sont pleins d'instru-Aions de cette nature, i'ay creu que cette Morale ne seroit pas acheuée si elle n'imitoit en cela ces saints seruiteurs de Iesus Christ. C'est donc ce que ie me propose de faire icy, en y suivant à peu prés l'ordre selon lequel ie viens de distinguer les diuerses conditions de ceux qui composent l'Eglise. Et l'on me feroit tort si l'on croyoit que i'eusse voulu me rendre l'arbitre des dignités des diuers ordres des hommes, pour leur partager l'honneur à ma volonté. Si ie mets au commencement ceux qui ont part dans le Ministere de l'Eglise, c'est qu'ils doiuent estre en exemple à tous les autres, & qu'ils sont en lieu plus eminent pour estre

12 SVITE DE LA DERN. PART. regardés. Comme les Chaires sur lesquelles on les esseue leur donnent & de la commodité pour parler, & mesmes de l'autorité enuers ceux à qui ils parlent, aussi les exposent elles dauantage au iugement de leurs auditeurs. Et comme la persuasion qu'on a de leur pieté & de leur probité, aide beaucoup à faire reces uoir l'impression de leurs enseignemens & de leurs exhortations, aussi n'y a t-il rien qui en ruine dauatage l'efficace, que quand on en a conceu quelque mauuaise opinion. Comment, dit-on d'vn Predicateur que l'on n'estime pas homme de bien, veut-il faire croire à autruy ce qu'il ne croid pas luy-mesme? Ou quelle grace a-t-il à nous porter à la pieté, à nous exhorter à la charité, à nous inciter à la temperance, à la verité, à la sincerité, puis que sa vie dément sa predication, & que sa conversation est comme ·d'vn fourbe, d'vn desbauché, d'vn in v juste & d'vn profane ? C'est pourquoy ie veux mettre le caractete d'vn fidelle Ministre de l'Euangile à la teste de ces discours, non par la prerogative de leur dignité, mais par l'obligation qu'ils ont à

De LA MORALE CHREST. estre plus gens de bien que les autres. Car comme il est raisonnable de tenir les sources publiques, desquelles tout le monde puise, les plus nettes que l'on peut, parce que si elles estoyent infe-Aées de quelques notables immondicités, elles empoisonneroyent les habitans de toute vne ville ou vne contrée, il faut que ceux qui doiuent fournir d'exemples à tous les Chrestiens, soyent eux-meimes tellement constitués, qu'ils n'en donnent que de bons, & capables de porter à toutes choses louables ceux qui les regardent. Quant aux Nobles, c'est à peu prés vne pareille raison qui m'oblige à les placer immediatement apres les Ministres de l'Euangile. Car comme ceux cy sont des estoiles dans le Ciel de l'Eglise, ceux-là sont des astres dans celuy de l'Estat; & come les astres sont lumineux, la Noblessea vn grand eclat de dignité qui reluit autour de ceux qui la possedent. Mais ne plus ne moins qu'il y a des astres qui ont la lumiere douce & agreable, & d'autres qui l'ont en quelque façon terrible & menaçante, & que des vns les aspects sont

SVITE DE LA DERN. PART. benins & bien-faisans, d'où vient la serenicé de l'air & la fertilité de la terre. & des autres, ils sont mauuais & nuisibles, d'où viennent les intemperies du ciel, & mesmes les mortalités & les pestilences, ainsi y a-t-il des Nobles de la dignité desquels descendent sur leurs inferieurs toures sortes de bien-faits, & d'autres qui remplissent les contrées de leur habitation, de desordres & de violences. Si les Gentilshommes estoyent ordinairement asses curieux de lireles liures qui pourroyent seruir à les former à la vertu, peut estre ne seroit-il pas beaucoup necessaire que l'insistasse sur ce chapitre. Ils pourroyent tirer de de fort beaux enseig emens de la vie du Cheualier Bayard, & de celle de Bertrand du Guesclin & du Connestable de Lesdiguieres. Ils y verroyent plusieurs exemples des vertus morales, politiques & militaires dont on peut beaucoup profiter; & quant à ce qui est de la prudence Chrestienne, de la Temperance, & de la vraye pieté, ils la y suppleeroyent, MONSIEVR, de la vie de feu Monsieur du Plessis vostre

DE LA MORALE CHREST. grand-pere. Car ie ne croy pas que depuis que le monde porte des Nobles, il y en ait eu vn en qui ces deux qualités se soyent rencontrées en vn degré plus eminent, ny qui les ait plus constamment ny plus inuariablement maintenuës. Si la vie de cet autre heros, la Nouë Bras-de-fer, que i'ay escrite depuis quelque temps, void bien tost le iour, comme ie l'espere, elle seruira beaucoup à cela, parce qu'encore que les memoires m'ayent manqué, l'Histoire de France pourtant, & celle des Payse bas n'a pas laissé de me fournir, auecque diverses lettres qui se sont trouvées çà & là, quantité de conseils, de propos, & d'actions, qui sont sortis de sa teste, de sa bouche, & de sa main, d'où il paroist qu'il auoit vne ame extraordinairement grande, & tout à fait noble & Chrestienne. Et si vostre modestie me permettoit de dire cela, i'y voudrois encore ioindre la vostre. Car vos actions militaires, bien qu'elles soyent en grand nombre, & qu'elles ayent toute la fermeté & toute la solidité de la vertu que l'on desire en ceux qui sont vrayement nourrissons 16 SVITE DE LA DERN. PART! de Mars, n'ont pas neantmoins à la verité tant d'éclat que celles de ces illustres Capitaines. Et la raison en est que l'on ne vous a pas donné les commandemens & les emplois proportionnés à la capacité qui estoit en vous de vous en acquitter, ou plustost que vous les aués fuïs à l'heure qu'ils commençoyent à vous suiure. Car nostre siecle n'a point porté d'homme qui meritast plus de paroistre ny qui le desirast moins; de sorte que vous estes vn bel astre à la verité, mais qui neantmoins. s'est allé confiner & enuelopper dans les broüillards du Bas-Poitou, comme s'il vouloit cacher sa lumiere. Si est-ce que quant à l'inclination à bien faire, quant à la charité vrayement Chrestienne, quant à la vraye pieté, quant à la temperance de la vie, & enfin quant au soin d'esseuer vostrebelle & nombreuse famille, à toutes sortes de nobles & recommandables qualités, ceux qui vous connoissent particulierement, sauent qu'il n'y a point de Gentilhomme en France qui vous deuance. Et pour ce qui est du sçauoir, c'est encore vne autre forte

DE LA MORALE CHREST. 17 sorte d'espée, aussi belle & aussi luisante que l'autre, dont vous pouuiés vous signaler extraordinairement si vous eufsiés voulu. Mais vous l'aués aussi mise dans le fourreau, d'où vous ne la tirés qu'à demy, quand il est question de la faire voir aux aduersaires de la Religion que vous aués embrassée. Si donc on auoit recueilli l'histoire de vostre conuersation, ce seroit vn merueilleusement beau modelle pour celle des Gentilshommes. Mais, Monsieur, vous ne voudriés pas qu'on vous mist ainsi en veuë. La vie de Monsieur de la Nouë n'est point encore entre les mains du Public : celle de Monsieur du Plessisne se lit pas assés; les autres se lisent peutestre encore moins', & en fin, sie laissois icy cette matiere sans y toucher, ce seroit vn grand defaut au dessein de ma Morale. Pour ce qui est des Capitaines & des gens de guerre, s'ils doiuent tenir quelque lieuicy, il les faut colloquer incontinent apres les Nobles, à cause de l'affinité qu'ils ont entr'eux. Car d'ordinaire la noblesse est la recompense de la vertu militaire, la guerre est le mestier,

E

18 SVITE DE LA DERN. PART. des nobles, & ceux là mesmes qui ont acquis la noblesse par d'autres voyes que par les armes, la constituent pourtant au droit de porter l'espée, & se glorifient d'auoir sous la soutane vn cœur belliqueux & martial. Maisie crains que d'efcrire du deuoir d'vn homme de guerre, ce soit chose qui passe la portée d'vn Escrivain qui n'a iamais veu d'armée en bataille, & qui n'a iamais espandu que de l'encre, ny point connu d'autre poussiere que celle d'vn cabinet. Et veritablement s'il estoit question de donner des preceptes aux gens de guerre pour en exercer le mestier en cette qualité, ie ne pourois attendre autre chose de mon entreprise, que ce qu'Annibal dit autrefois de ce vieux Declamateur, qui osa parler deuant luy de l'Art de conduire des armées & de donner des combats : c'est qu'il auoit veu plusieurs resueurs, mais que celuy là estoit le plus impertinent qui fust venuà connoissance. Et c'a esté presque la seule chose que l'ay redoutée, lors que i'ay mis la main à la plume pour composer cétouurage duquel ie viens de fairemention : c'est que ie serois neces-

DE LA MORALE CHREST. 19 sité de parler de sieges de places, de batailles & de rencotres, & d'autres choses semblables, qui sont esloignées de ma connoissance, comme elle le sont de ma profession. Neantmoins, il faut sans doute bien distinguer entre faire la guerre comme homme de guerre, & la faire comme homme Chrestien. En cette premiere façon l'on pent auoir pour precepteur Xenophon & Iules Cesar. En cete te seconde il n'y a rien qui empesche que l'on ne tire de bonnes leçons des Epistres de S. Paul & des liures de l'Euangile. Or est ce en cette derniere qualité que ie veux considerer ceux qui ont les armes à la main, pour leur apprendre comment il les faut manier, non comme vn maistre de sale, ou comme vn Sergent Major, ou comme vn Colonnel de gens de pied oude cheual, auecque cette seule intention de defendre sa personne & d'attaquer celle de l'ennemy, & pour sortir victorieux d'vn combat, mais comme vn Ministre de la Parole de Dieu, pour s'en seruir iustement & en bone conscience. Si la dignité des emplois des hommes se mesuroità l'excellence des vertus qui se

Bi

20 SVITE DE LA DERN. PART. pratiquent en les exerçant, l'estimerois la Charge des Magistrats & des officiers ordinaires de la Iustice preferable à celle des Capitaines. Car la vertu militaire a bien sans doute quelque chose de grand & de releué, mais la instice est indubitablement plus recommandable. Parce que comme disoit autresois quelcun, celle-là, sans l'assistance de cellecy, n'est que barbarie, violence & inhumanité : celle - cy pourroit estre fans celle-là, si les hommes se laissoyent gouuerner à la Raison, comme elle deuroit estre la conduite de toute leur vie. La vertu militaire donques n'est necessaire qu'à cause du desordre que le Vice a causé dans le genre humain : la Iustice l'est en tout temps, & en toutes occasions, & en quelque estat que le genre humain se trouve. C'est pourquoy Aristote dit qu'il n'y a rien qui la puisse egaler en beauté, & que la lumiere de l'Estoile du matin n'est pas si belle ny si agreable. Neantmoins, soit que la vertu militaire soit estimée plus illustre, dautant qu'elle est plus difficile à exercer,

ou qu'estant armée, elle ait contraint la

DE LA MORALE CHREST. iustice à luy laisser la preserence & l'auantage du rang, ou qu'on ait estimé raisonnable de la recompenser de cet honneur, parce que c'est le rempart de la iustice, sans quoy elle ne se pourroit maintenir, cette sorte de Magistrature qui s'exerce sous la Robe, l'a toussours cedé à la profession des armes, quoy qu'en ait peu dire Ciceron. Mais aussi aucune autre profession ne luy a telle iamais disputé, qu'apres le mestier de la guerre, celuy de l'administration de la Iustice ne sust de beaucoup plus le noble. Ie mettray donc en suite des autres, les enseignemens que le Christianisme fournit aux gens de Palais, pour se bien acquitter de leur devoir, non comme le feroit vn Iurisconsulte, mais comme le doit faire vn Theologien qui explique la Morale. Car peut estre que le mestier de Tribonien n'est pas si loin au delà de ma capacité, que celuy de Iules Cesar. Mais ce n'est pour cant pas du Code ny du Digeste que le pretends tirer les instructions que ie veux donner à ceux qui ont l'administration de la Iustice en la main: c'est des propos de Iesus Christ,&

B iij

22 SVITE DE LA DERN. PART. de la dostrine de ses saints Apostres. Et ce sont choses rellement diffinctes qu'vn homme peut estre bon Iuge, parce qu'il prononce selon les loix, & vn autre peut estre bon Aduocat, parce qu'ilentend bien le Droit & les Rubriques du l'alais, que pour cela ils ne seroyent pas gens de bien, ny dignes du nom de Chrestiens, comme on le doit porter selon ma Morale. De sorte que ie laisseray aux Escoles de Iurisprudence, à donner à ceux qui les frequentent; la teinture de la science de lustinien; mais ie tascheray de leur sournir de la Discipline de Iesus Christ, les reigles de s'en seruir à la satisfaction de leur conscience. l'ay creu que ie ne deuois pas oublier la profession de ceux qui pratiquent la Medecine en toutes ses parties, & bien qu'elle ait esté comme inconnuë à diuers Estats bien fleurissans, & que quand elle a commencé à semettre en vogue entre les Romains, l'exercice en estoit presque sans honneur, & mesmes commis aux Esclaues, si est-ce qu'en soy c'est vn Art, à mon aduis, des plus excellens, & qui merite le plus qu'on en face vne consi-

DE LA MORALE CHREST. 23 deration honorable. Son but est la conservation & le restablissement de la santé; la chose du monde la plus precieuse apres la bonne constitution de l'ame. Le sujet sur lequel il s'exerce, c'est le corps humain, dont la construction est plus belle que celle d'aucun autreanimal; dont les parties & leur vsage sont dignes d'vne souveraine admiration; & dont enfin la noblesse est au delà de toute estimation, en ce qu'il sert de domicile à vn esprit immateriel, & immortel, & qui approche de la nature de la Divinité, en ce qu'il est intelligent & raisonnable. Les connoissances necessaires pour bien pratiquer cet art, s'eftendent, outre toutes les parties corporelles qui sont en nous, aux passions mesmes de nos esprits, aux plantes, aux mineraux, aux qualités des elemens, aux astres mesmes des cieux, & genera. lement à toutes les choses de la Nature. Les vtilités qui en reuiennent regardent vniuersellement toutes sortes de personnes sans distinction de sexe, ny de condition, ny d'aage, & concernent tous les ordres & toutes les parties des

B iiij

SVITE DE LA DERN. PART. Estats: & bien que ç'ait esté vn trait de la vanité & de la superstition Grecque, que d'en rapporter l'origine à Appollon, ie croy pourtant qu'elle ne s'est point miseen auantsans quelque particuliere inspection, & mesmes sansquelque infpiration de la Prouidence diuine. Asseurément qui considerera bien le long aage qu'Hippocrate a vescu dans vne parfaite santé; l'application constante & inuariable d'esprit qu'il a apportée à la consideration du corps humain, & des choles qui luy arrivent; sa vigilance admirable à espier les symptomes des maladies & leurs indications; la connoissance incomparable qu'il a euë de la Physique, en vn temps où la Philosophie estoit encore toute informe & pleine d'obscurités & d'embarras; la clairuoyance auecque laquelle il a penetré dans les causes de toutes choses, & en a obserué les effects; la hardiesse & la certitude auecque laquelle il a prononcé sur leurs suites & predit leurs euenemens, aduouëra sans aucune difficulté que Dieu a suscité extraordinairement cet home-là pour l'establissement de cet

De LA MORALE CHREST. Art, & pour le bien de la race humaine. Il est pourtant vray que le vice & l'infir-mité de l'homme se messe par tout, & qu'elle empesche l'effect des meilleurs institutions & des arts les plus salutaires. Car pour ne dire point maintenant que quelque lumiere qu'Hippocrate & apres luy Galien ayent donnée à la Medecine, il s'y trouue toujours des difficultés & des profondeurs que la foiblesse des hommes les empesche de sonder, & que souuent la complication des maux en rend les indications ambigues & les signes equiuoques, & que la diuersité des temperamens & les inegalités qui se trouuent en la conduite de la Nature, sont des choses où la pointe de l'esprit s'émousse ou se reboûche tout à fair, quelles tenebres & quel desordre la farfanterie n'ont-elles point mis dans la Medecine? Combien souvent est-ce que les Medecins & ceux qui trauaillent sous eux, visent plustost à euacuer les bourses de leurs malades, que leurs mauuaises humeurs? Combien peu y en a-t-il qui se proposent comme ils deproyent en l'exercice de cer art, l'ytilité 26 SVITE DE LA DERN. PART. du Public, & non leurs affaires particulieres? Il est donc necessaire de doner aussi quelques instructions à ceux qui se messent de remettre la santé dans le corps de leur prochain, afin qu'ils s'y comportent de telle façon qu'ils y fassent quant & quant le salut eternel de leurs ames. La societé humaine est tels lement composée, qu'il y a ordinairement plus de marchands que d'autres gens : ce qui monstre non seulement le besoin que nous auons de diuerses cho-ses pour les necessités & pour les commodités de la vie; mais aussi nostre vanité & nostre luxe, qui paroist en ce que d'ordinaire nous prisons plus les choses comme absolument superfluës,& quine servent que d'inutiles ornemens, que nous ne faisons celles que Dieu & la Nature ont ordonnées seulement pour nostre vsage & pour nostre commodité. Cela fait que les villes maritimes sont pleines de gens qui entreprennent des voyages perilleux, pour apporter des richesses des vnes & des autres Indes, & les debiter dans leurs ports: que les villes assises sur les riuieres sont

DE LA MORALE CHREST. remplies de négotians, qui tirent des lieux maritimes ce qu'on y apporte des Indes, pour le distribuer à qui on veut : que celles qui sont absolument mediterranées sont peuplées de gens qui detaillent ce que le commerce des autres leur a fourni plus en gros, & qu'il n'y a si petit village où il ne se trouve quelque pe-tite portion de l'Orient & de l'Occident: sans conter maintenant ceux qui trafiquent des choses que leurs propres pays produisent, & des manufactures qui s'exercent dans les villes de leur demeure, & qu'ils distribuent par le commerce tant au regnicoles qu'aux estrangers. C'est bien sans doute vne des plus belles choses de la societé humaine que l'exercice du trafic. Car chaque Estat est comme vn corps, dont la Police & l'autorité du gouvernement est l'ame, & les autres ordres sont comme les membres desquels il est composé: mais le commerce, & ceux qui l'exercent, sont comme les veines qui portent par tout la nourriture & le sang, de la circulation & distribution duquel viennent la vie, & la vigueur, & l'embonpoint, &

28 SVITE DE LA DERN. PART. la fleur mesme de la beauté, à toutes les parties qui le constituent. Neantmoins, non plus que les autres, cette partie des Estats n'est pas exempte de corruption. En effect, comme il arrive quelquesfois au corps humain, qu'il se remplit tellement de suc & de sang, que ses vaisseaux ne le peuuent contenir, de sorte qu'ils en regorgent ou qu'ils s'en rompent, ce qui cause de grandes incommodités & mesmes la mort : ainsi la tropgrande abondance des choses que le commerce apporte quelquesfois dans vne Republique, la rend incommode à elle-mesme, & y cause des desordres & de funestes accidens. Hippocrate dit que lors qu'on est paruenu à cette grande plenitude d'embonpoint que l'on voyoit dans les athletes, il faut necesfairement attendre quelque alteration en la santé: parce que quand la Nature a amené les choses au dernier point de leur vigueur, elle ne s'y peut pas maintenir, & faut qu'elle retourne en arriere. Et cela, ce me semble, se peut appliquer aux corps politiques des Estats,

que leur propre richesse incommode, &

De LA MORALE CHREST. 29 en qui l'abondance estouffe les esprits qui donnent l'alegresse & le mounement. Mais c'est à ceux qui ont le gouuernement des Estats, à pouruoir à ces inconueniens: pour moy, ie me propose seulement de donner en cette Morale aux Marchands, quelques instructions touchant la façon dont ils se doiuent gouuerner pour accorder le trafic auec le Christianisme. Quant aux Artisans & aux Laboureurs, qui sont le dernier ordre de ceux dont i'ay cy-dessus fait le denombrement, si il n'y auoit que ceux qui lisent les Liures de cette nature qui en peussent profiter, il seroit comme inutile que le fisse icy aucune restexion sur la manière de laquelle ces deux sor, tes de gens se doiuent conduire. Car ou bien cet Escrit ne leur tombera iamais entre les mains, ou s'il arriuoie qu'il y tombast, il y en a beaucoup donc on peut douter s'ils se moyent capables de tirer aucun auantage de sa lecture. Ie ne laisseray pourtant pas d'en dire quelque chose à la fin. Parce qu'encore que les Predicateurs qui les enfeignent, trouueront assés d'eux-mesmes en la Parole de Dieu, les aduertissemens qu'il faut qu'ils leur donnent, sans que ie me messe de les y aider, il se pourra faire neantmoins que queleun d'entr'eux ne sera pas marry de voir mes pensées là dessus, & quoy qu'il en soit, cet ouurage n'auroit pas autrement toute la plenitude que ie luy ay destinée.

DV DEVOIR DVN

Minstre de l'Euangile, selon les precept es du Christianisme.

E soin que quelques-vns ont pris d'escrire la vie de S. Paul, est à mon aduis digne de grande louange. Car out tre qu'elle contient quantité de notables euenemens qui seruent à la connoiss sance de l'histoire de la naissance du Christianisme, & que toutes sortes de personnes en peuvent tirer des vtilités incoparables, par l'imitation des vertus de ce grand homme de Dieu, c'est le plus beau patron qu'vn Ministre de l'Euangile se puisse proposer pour regler

De LA MORALE CHREST. 31 toute sa conduite. La vie des autres Apostres ne nous est point si exactement rapportée dans la l'arole de Dieu: & quand on l'en pourroit recueillier plus complette que l'on ne fait, ie doute qu'elle nous peust fournir vne si grande varieté de beaux & memorables exemples. Deux choses pourtant m'empeschent de renuoyer mes lecteurs à ceux qui y ont trauaillé, pour sauoir quelle doit estre la conduite d'vn ministre de l'Euangile. La premiere, qu'en cette forte d'ouurage le trauail de quelquesvns s'est principalement employé à demesser des questions d'histoire & de Chronologie, dont la solution est bonne à rendre les hommes sauans, mais qui au reste est peu vtile à les rendre gens de bien; qui est le seul but auquel cette Morale tend. La seconde, que la charge d'Apostre, laquelle S. Paul a exercée, estant fort differente de celle des Ministres de maintenant, il y afait diuerses choses qui ne leur sont pas imitables. Tellement que comme si le Capitaine d'vne Compagnie de gendarmes, ou le Colonel d'vn Regiment, se

32 SVITE DE LA DERN. PART. proposoit, pour se bien acquitter de son deuoir, d'imiter Alexandre le Grand, ou lules Cesar, il se rendroit en quelque façon ridicule, à cause de la difference comme infinie qui est entre vn simple Officier d'armée, & vn terrible Conquerant; de mesme, si vn Ministre de l'Euangile prenoit pour modelle de son administration en toutes choses ce grand Apostre de Iesus Christ, il trouueroit qu'il y a vne merueilleuse distance entre la conduite d'vn troupeau particulier,& le soin de l'Eglise vniuerselle de nostre Seigneur: entre la conuersion de quelque peu de personnes qu'il peut procurer par son zele & par ses soins, & les conquestes des Nations que la predication de S. Paul a soumises à la Croix du Savueur du monde. Et toutesfois, bien que ie prenne icy vne autre tablature que celle là, ce sera pourtant S. Paul qui fera la principale partie de ce que ie diray icy, parce que d'vn costé c'est luy qui me fournira la description des qualités qui doiuent estre en vn Euesque, qu'il a eu le soin de mettre fort exacte & fort particuliere dans ses Escrits; & que

que de l'autre, quoy qu'il foit bien loin au dessus de nous en toutes sortes de vertus, si est-ce que ce sera principalement des exemples de sa conversation, que l'explication que ie seray de ces qualités, sera, s'il faut ainsi dire, comme rehaussée & enluminée. Car puis qu'il a dit à tous les fidelles, soyés mes imitateurs, comme aussi ie le suis de Christ, il faut bien, quelque haut qu'il soit au dessus de nous, qu'il y ait en sa vie quelque chose qui puisse estre ramenée à l'vsage de celle de tous les Chrestiens, & particulierement des Ministres de l'Euangile.

Vn homme qui veut porter cette qualité, doit premierement voir s'il a la faculté de l'exercer, afin de n'entreprendre pas vne chose qui ne luy appartienne pas, ou qui soit au dessus de sa portée. Et cette faculté là consiste aux dons qui luy sont necessaires pour cela, & en la vocation par laquelle il est appellé de Dieu, & selon l'ordre de son Eglise. Pour ce qui est des dons & des talens qui sont absolument necessaires pour l'exercice de cette charge, les Ca-

Ç

34 - SVITE DE LA DERN. PART. nons de l'Ancienne Eglise, les Reiglemens de la Nouvelle, & les Liures qui ont esté escrits depuis quelque temps touchant la vocation des Pasteurs, peu-uent apprendre à chacun iusques où il est besoin de les posseder : & ie n'ay pas oublié de m'en expliquer au sixieme liure du Traitté que l'ay fait de cette matiere. La Nature y doit sans doute contribuer: car il faut auoir quelque fertilité d'imagination, quelque lumiere de iugement, quelque force de memoi-re, quelque facilité à s'exprimer, quelque fermeté dans la voix & dans les costés pour fournir à la prononciation, & n'estre pas absolument destitué des graces de la personne & de la decence du geste. Tellement que ceux en qui ces choses là ne se trouvent pas, ne doiuent pas estimer qu'ils ayent esté formés pour vn tel employ, auquel ils se-royent inutiles. C'est pourquoy entre les qualités d'vn Euesque S. Paul met expressément qu'il doit estre propre à enseigner, ce qu'il ne seroit pas s'il n'auoit esté assés fauorablement partagé de ces dons de la Nature. Et ie pense que

DE LA MORALE CHREST. quand cegrand Apostrea dit aux Galates, que Dien l'auoit mis à part dés le ventre de sa mere, pour reueler son Fils en luy, afin qu'il l'euangelizast entre les Gentils, il a en partie eu egard à ce que dés sa premiere conformation, il luy auoit donné & dans le corps les organes, & dans l'ame les facultés propres pour yn si grand ministere. Caril a bien eules vertus intellectuelles & morales de l'inspiration de l'Esprit de Dieu: mais il paroist assés par ses escrits, & par l'histoire de son Apostolat, qu'il auoit naturellement des parties fort auantageuses. Le soin & l'estude doit auoir beaucoup adjousté à cette sorte de talens, & ce d'autant plus que les connoissances que nous auons ne nous viennent pas maintenant comme elles faisoyent aux Prophetes & aux Apostres. Il doit auoir acquis quelque raisonnable connoissance des trois langues principales, & n'estre pas ignorant de la Philosophie, & sur tout il doit estre bien versé en l'intelligence de la Parole de Dieu, afin qu'il puisse estre capable, comme S. Paul le demande encore, d'admonester

Çij

36 SVITE DE LA DERN. PART. par bonne doctrine, & de conuaincre les contredisans. Car sans ces aides il ne pourroit ny bien enseigner la verité à ceux qui sont dociles à l'escouter, ny la defendre contre ceux qui se monstrent ses aduersaires. Et plus vn honneste hommea d'un costé de dons naturels, & de l'autre de pieté, plus, s'il se sent appellé à prescher l'Euangile de Iesus Christ, taschera-t-il de s'auancer & de prositer en l'acquisition des choses necessaires pour exercer cet incomparable mestier, afin de le pouvoir saire à son propre contentement, & à la gloire de son Maistre. Ie diss'ils'y sent appellé; en quoy consiste la seconde partie de la faculté qu'il a de le faire. Et cette vocation est ou interieure, ou exterieure. Quant à celle cy, elle consiste en l'installation au ministere par les voyes ordinaires qui sont establies en l'Eglise. Ce que ie dis ainsi generalement, parce que les reiglemens en sont differens en

diners lieux, & que ce n'est pas icy le lieu de les expliquer. Il me suffic de dire que quand il y a vn ordre establi, ceux qui s'ingerent dans les sonctions

DE LA MORALE CHREST. 37 du ministere sans l'auoir subi, commettent vn attentat qui ne peut estre approuué de Dieu ny des hommes. Car c'est Dieu qui a donné les uns pour estre Apostres, les autres pour estre Prophetes, les autres pour estre Enangelistes, les autres pour estre Pasteurs & Docteurs ; & permettre à toutes sortes de gens indifferemment, comme quelques vns s'imaginent qu'on le peut, de prescher l'Euangile, & d'administrer les Sacremens, c'est introduire vne estrange confusion dans l'Eglise. Dans toutes les autres choses, les vocations des hommes sont distinctes, & dans les Republiques bien policées, il n'est permis à personne d'entreprendre sur les fonctions de son compagnon. Combien est-il plus conuenable à l'Eglise de nostre Seigneur, qui de toutes les societés est sans doute la plus excellente, & doit estre la mieux reiglée, de dispenser tellement à chacun ce qui est de son deuoir pour s'en acquitter, que l'vn ne se fourre pas indiscretement dans la station de l'autre? Mais il y a cela de particulier au Ministere de l'Euangile, qu'il se doit exercer auec

SVITE DE LA DERN. PART autorité, tant pour annoncer de la pare de Dieu la remission des pechés à ceux qui se repentent, que pour seeller en eux en son Nom la verité de ses promesses par l'administration des Sacremens, & pour corriger par la seuerité des censures Ecclesiastiques, ceux qui ne viuent pas couenablement: ce qui est vne partie de l'vsage des Cless qui ou urent & qui ferment le Royaume des Cieux aux hommes. Or qui peut faire cela auec autorité sans commission? Et qui se peut vanter de l'auoir sinon ceux à qui elle a esté donnée selon l'ordre de l'Eglise? L'autre vocation, que l'ay appellée interieure, doit estre considerée diversement, selon les diverses conjonctures dans lesquelles on se rencontre, Car si l'on se trouue en lieu & en temps auquel on puisse passer par les formes ordonnées & establies pour exercer le Ministere public, cette vocation du dedans ne consiste qu'en l'affection que Dieu donne à quelques vns d'embrasser plustost cette forme de vie qu'vne autre. Car il semble bien à la verité que les hommes naissent tout d'vne mesme

DE LA MORALE CHREST. façon, & qu'ils apportent au mode mesme conformation de membres, & mesmes organes des sens. Mais les facultés interieures sont bien differetes. Les vns sont propres à vne chose & les autres à l'autre, & tous n'ont pas les dos necessaires pour reussir auantageusement dans l'estude des leures&des sciences,&pour s'y rendre viiles au bien du Public. De ceux qui y sont propres il n'y en a que quelques-vns qui soyent bons pour l'eloquence; & de ceux qui ne sont pas entierement destitués des parties necessaires pour demesser les actions oratoires auec quelque honneur, les vns se portent au Barreau, & les autres à la Chaire. Et comme c'est Dieu qui distribuë à chacun les talens de la Nature qui sont auantageux pour cela, aussi est-ce luy qui determine les inclinations des hommes, & qui fait qu'à celuy-là plaist dauantage le Palais, & à cer autre la Chairedel'Eglise est plus agreable. Ce que ie n'auance pas seulement sur cette verité generale, que c'est Dieu qui par sa Prouidence, gouverne toutes les choses qui

arrivent dans le monde, & qui donne

40 SVITE DE LA DERN. PART. particulierement aux entendemens des hommes & à leurs affections, les impressions & les impulsions qu'il luy plaist; ce qu'Homere mesme a remarqué; mais encore sur des experiences particulieres & manifestes. Car il y a eu tel que ses parens auoyent destiné à la Iurisprudence, comme Caluin, & qui auoit des dons capables de l'y faire reuffir, s'il s'y fust entierement attaché, qui dans les Escoles de droit pensoit à la Theologie, & vacquoit à la lecture de la Parole de Dieu; de sorte que Iustinien estoit son divertissement, ou l'occupation à laquelle ils s'adonnois par complaisance seulement, pour ne mécontenter pas ceux qui le desiroyent ainsi de luy: mais S. Paul estoit son Do-Aeur, & les liures de Religion son occupation ordinaire. D'où enfin il est arriué qu'il a tout à fait renoncé à cette autre profession, pour suiure celle du Ministere de Iesus Christ; & s'il n'y a pas reuffi si admirablement que Caluin, tant ya qu'il a en cela suiui son exemple. Cependant, quand ie dis qu'il faut fentir cette vocation, ie n'entends pas

DE LA MORALE CHREST. que les inclinations qui portent vn homme à vouloir estre Predicateur de l'Euangile de Christ, soyent determinées par les motifs qui ont accoustumé de gouuerner les esprits & les estudes des autres hommes. Car ordinairement ce sont les seuls interests de la vie presente, & le soin de faire ses affaires & sa maison, qui porte l'vna estre Medecin, & l'autre à estre Aduocat, & l'autre à quelque autre chose. Et si quelcun a des sentimens sigenereux que dans ce qui le concerne en particulier, il messe quelque consideration de l'vtilité du Public, c'est chose qui n'arriue pas fort communément, & qui encore ne predomine pas dans ses affectios quand elle arriue. Vn homme qui se propose d'estre Ministre de l'Euangile, seulement afin d'en faire vn mestier, ou en qui preuaut la consideration des auantages humains sur celle du seruice de nostre Seigneur & de l'edification de l'Eglise, n'est pas digne de ce caractere, & il feroit beaucoup mieux d'embrasser vne autre profession. Comme il n'est pas defendu que ces paroles de S. Paul ne luy vien42 SVITE DE LA DERN. PART. nent dans la pensée, c'est qu'il est iuste que ceux qui seruent à l'autel, viuent de l'autel, aussi la principale chose à laquelle il doit viser, c'est la gloire de Dieu, l'auancement du regne de Christ, le salut des ames des hommes, & l'auantage qui luy reuiendra, d'auoir serui au conseil de Dieu en vne chose de telle importance que celle-là, & de s'estre attaché à vne estude qui doit remplir son entendement des plus belles connoissances que les miserables mortels puissent acquerir icy bas, & engagé dans vne forme de vie qui l'oblige à se separer des coustumes de ce present siecle & des corruptions du monde. Celuy qui sent ces mouvemens en son cœur, a sans doute les marques ordinaires de la von cation interieure. Mais si les lieux & les temps se rencontrent estre tels qu'il ne soit pas possible d'estre installé dans le Ministere par des formes regulieres, il faut quelque chose de plus que ces inclinations-là, pour induire vn honneste home à en entreprendre les fonctions. Premierement, il faut qu'il voye vne necessité ineuitable de le faire, ou de

DE LA MORALE CHREST. 43 manquer à la gloire de Dieu & à son propre deuoir. Car si quelcun se trouue au milieu des Barbares dans les Indes, comme Frumentius, ou dans vne Eglise si corrompuë qu'il soit impossible d'y faire son salut sans la reformer, si làil n'y a personne qui ait vocation à prescher, ou si ceux cy qui l'ont, au lieu de reformer l'Eglise, la corrompent de plus en plus, il semble que Dieu l'appelle à cette fonction, bien que ce ne soit pas par la voix ordinaire & accoustumée. Apres cela, il fant qu'il y voye quelque esperance de pouvoir faire du fruit. Car ce seroit, pour exemple, vne grande temeritéà vn Chrestien, d'entreprendre de faire le predicateur de l'Euangile entre les Chinois, ou au milieu des Tarta. res, & de troubler pour cela leurs assemblées & leurs superstitions, s'il n'y voyoit ny aucune preparation à receuoir la verité, ny aucun sujet d'attendre autre chose que quelque facheuse bourrasque. Les Apostres ont bien fait quelque chose de semblable. Mais ils en auoyent vn commandement exprés, & dans ce commandement estoit tacite-

SVITE DE LA DERN. PART. ment enclose vne promesse de recueillir quelque fruit de leur predication. Autrement, où Dieu auoit resolu de ne donner aucune efficace à la publication de la verité, il a desendu de l'annoncer, comme à Paul & à Timothée, en Bithynie. Il faut aussi que celuy qui entreprend quelque œuure de cette nature, se sente auoir des dons extraordinaires, & qui soyent pour respondre à quelque chose de grand. Car il arriue bien quelquesfois que Dieu fait de grandes choses par des instrumens qui paroissent foibles, & auoir peu de proportion auec l'ouurage qu'il produit. Mais ou bien il employe ces instrumens là, par maniere de dire, sans qu'ils y pensent, de sorte qu'ils se trouuent eux-mesmes surpris de voir qu'ils ont fait cela à quoy ils ne s'attendoyent nullement : ou bien, si on examinoit ces instrumens vn peu particulierement, il se trouueroit qu'ils auroyent eu quelque chose de plus grand qu'il ne sembloit en apparence. Et ces deux choses se sont, à mon aduis, rencontrées en Luther, qui s'engagea beaucoup plus auant dans la Reforma-

DE LA MORALE CHREST. mation de l'Eglise, qu'il ne pensoit au commencement, & qui enfin se trouua auoir des qualités qui ne paroissoyet nullement lors qu'il se mit la premiere fois à combattre les Indulgences. Mais pour entreprendre quelque chose de semblable de propos deliberé, & former le dessein, ou de conuertir les Sauuages en exerçant parmy eux quelque espece d'Apostolat, ou de ramener la ville de Naples ou de Rome à la pureté de l'Euangile, en criant hautement dans les Temples contre l'autorité du Pape & contre la Transsubstantiation, sans se sentir muni des choses qui sont necessaires pour faire vn si grand effort, c'est ce qui ne passera iamais que pour vnetemerité fort blasmable. Enfin, il faux auoir vn courage heroïque & determiné contre les difficultés, de quelque nature qu'elles soyent : tellement qu'on se sente inuincible à toutes sortes de tentations, soit qu'elles consistent en promesses ou en menaces, en esperances qui viennent de la part du monde, ou en occasions d'apprehender sa violence & sa persecution. Et c'est vne

46 SVITE DE LA DERN. PART. pensée de laquelle les Apostres estoyens armés, comme il paroist par leur histoire. Comment qu'vn homme vienne au ministere de l'Euangsle, soit par les voyes accoustumées ou par vne extraordinaire vocation, les fonctions en consistent en la predication de la Parole, en l'administration des Sacremens, en la pratique de la Discipline, & en l'vsage des Clefs, comme on parle, & enfin, dans les deuoirs particuliers qui se rene dent aux malades, aux affligés, & en toutes autres sortes de rencontres. Or quant à ce qui est de la predication, tous ceux qui ont iamais parlé en public en autres occasions, s'y sont proposés des fins humaines. Ceux qui ont has rangué les peuples dans les Republiques populaires, ont fait profession d'y auoir pour but de persuader les choses qui pouuoyent seruir au bien de l'Estat. Demosthene entre les Atheniens, Ciceron entre les Romains, triomphent ordinairement sur ce chapitre dans leurs actions oratoires. Ceux qui ont plaidé deuant les Iuges, ou pour accuser ou pour defendre, ont dit que c'estoit, ou pour la

DE LA MORALE CHREST. protection de l'innocence, ou pour faire condamner les meschans. Et encore maintenant ceux qui suivent le Barreau, se vantent que leur eloquence est la protectrice de la Iustice, & le moyen de faire rendre à chacun ce qui luy appartient. le ne veux pas le leur contester icy, & ie veux croire que c'est là leur affection predominante. Mais quand il feroit ainsi, il n'y va en cela que des interests de la vie presente, & du bien temporel des personnes particulieres, ou tout au plus des Estats. Dans le mestier d'vn Ministre de l'Euangile, il s'agit de la gloire de Dieu, de l'auancement du regne de Christ, du salut eternel du genre humain, & de l'edification de l'Eglise. Si donc il se veut acquitter de son deuoir, & se monstrer digne de son employ, c'est à cela qu'il doit viser, & se défaire de toutes les passions qui ne gouvernent que trop souvent les esprits des hommes en ces occurrences. Car l'vn s'y propose la gloire de l'eloquence & la reputation: l'autre le credit & l'autorité parmy ceux desquels il est escouté; l'autre l'establissement de ses affaires,&

SVITE DE LA DERN. PART. 48 l'acquisition de quelque notable dignité; & l'autre, en vn mot, quelque autre fin entierement esloignée de la nature de ce ministere. Dans les communions où il y a des recompenses Ecclesiastiques riches & éclattantes, proposées à ceux qui se rendent recommandables, il n'y a rien de si ordinaire que de voir des gens qui font tout ce qu'ils peuvent pour faire grand bruit dans les Chaires, & pour faire parler d'eux dans les Cours des Souuerains: & puis lors qu'ils sont paruenus à l'Episcopat, toute cette ardeur qu'ils auoyent pour la predication, se refroidit, parce que quand on n'affectionne vne chose que pour paruénir à vne autre, on ne l'estime plus desormais quand on est venu à son but. Dans les lieux où la Religion sert de pretexe à la faction, comme cela s'est veu pendant la Ligue en ce Royaume, & en quelques autres occasions, on fait seruir les pulpitres des Eglises comme de theatre à la declamation, & les textes de l'Euangile comme de torches allumées pour enflammer la sedition. Dans les endroits où il se trouue quelques dissentimens

DE LA MORALE CHREST. dissentimens entre les Theologiens sur les points de la Religion, on fait des Temples des champs de bataille, où on ne se contente pas de traitter de la Controuerse, on s'entredeschire les vns les autres de conuices & de calomnies, & ceux d'vne mesme prosession ne s'y entr'espargnent pas. Que ne sont point les lesuites contre ceux qu'on nomme Iansenistes, & bien souuent les Lutheriens contre les Reformés? Et pleust à Dieu qu'il ne fust point arriué aux Reformés mesmes de disputer les vns contre les autres auecque beaucoup de chaleur, & de s'imputer reciproquement des heresies, quand il leur est arriué de n'estre pas tout à fait d'accord. le sçay bien qu'on appelle ordinairement cette violence du nom de zele, & de desir de conseruer la doctrine de la Verité. Et ie ne m'establis icy iuge de la conscience d'aucun, & laisse à chacun de rendre conte de son administration à celuy deuant lequel nous deuons tous comparoistre. Ie dis seulement que si l'on se proposoit en ces actions le vray but auquel elles sont destinées, on verroit

SVITE DE LA DERN. PART. moins en l'Eglise de desordres que l'on n'y en void, & que les predications seroyent plus fructucuses à la consolation des ames. Pour paruenir à ce but là, le Ministre de l'Euangile doit principalement observer trois choses. La premiere est, que puis que c'est la verité de Dieu qu'il enseigne, il se done garde d'y messer quelque chose qui en corrompe la pureté. Ie ne veux pas dire qu'il n'y mesle rien du tout des disciplines humaines. Car non seulement toutes verités s'accordent les vnes auecque les autres, mais encore, celles qui se trouuent dans les sciences, & qui principalement se tirent de la Philosophie Morale & de la lurisprudence, aident à l'eclair-cissement & à la confimation de cette celeste-là. Et comme il y a des essences, qu'il faut, pour les faire prendre, détremper en quelque liqueur, laquelle n'ayant point de qualités qui leur soyent contraires, sont capables de leur seruir de vehicule, & reçoiuent leur efficace, leur couleur & leur odeur; la plus part des sentences de l'Escriture que les Ministres prennent à expliquer dans

DE LA MORALE CHREST. leurs chaires, ont besoin de quelque assistance des autres sciences, pour estre intelligibles aux peuples, & pour produire leur effect. Ec bien que S. Paul se fust proposé de ne sauoir autre chose entré les Corinthiens sinon Iesus Christ & iceluy crucifié, comme luy mesme le témoigne, & qu'il ait resserré dans ses Epistres la substance du Christianisme, beaucoup plus que cela ne se doit saire dans les predications, il n'a pas laissé d'y ioindre quelquesfois diuerses confiderations, qu'il empruntoit tantost de la Politique, & tantost de la Nature, iusques à ne dédaigner pas l'allegation des Poëtes Payens. Car encore que l'on ne presente aux hommes à considerer que la Croix de Christ, il n'est pas defendu de la peindre quelquesfois de quelque teinture dessciences, pourueu que cela ne luy oste rien de sa figure ny de sa force. Ie veux dire seulement qu'il n'y doit rien messer ny de l'idolatrie, ny de la superstition, ny de la tradition humaine, si elle contient quelque chose qui repugne tant soit peu à cette diuine verité; & qu'yn bon Ministre de

SVITE DE LA DERN. PART. 12 SVITE DE LA DERN. PART.
L'Enangile doit toussours prendre l'Es criture pour le modelle sur lequel il se faut mouler, afin de satisfaire à l'exhortation de S. Paul, de retenir constamment le patron des saines paroles. La seconde chose est, qu'encore qu'il luy soit permis de tirer des disciplines humaines, comme l'on fait des metaux & des mineraux de la terre, quelque teinture pour en colorer la Croix de nostre Sauueur, il se doit pourtant bien donner garde de l'embellir de tant d'ornemens, que les hommes s'arrestent plus à les considerer, qu'à comtempler la Croix mesme. l'entends par cela qu'il y a des gens qui apportent à la predication de l'Euangile tant de soin de l'adiuster, & de la rendre capable de contenter des oreilles delicates & chatouïlleuses, & de se faire eux mesmes admirer, qu'il ruinent toute la vertu qu'elle doit auoir pour la consolation & pour la conuersion des ames des hommes. S. Paul dit qu'il a expressement euite les paroles attrayantes de la sapience humaine en sa predication, afin de n'aneantir pas la Croix deChrist. C'est à dire, que si la doctrine de

DE LA MORALE CHREST. l'Euagile auoit de l'efficace en sa bouche pour amener les hommes à la connoisfance de nostre Sauueur, il n'a pas voulu donner la moindre occasion de penser que la gloire de ce grand effect deust estre donnée à son eloquence, comme si ç'auoit esté par elle qu'il se fust insinué dans les cœurs. Il a pretendu que les hommes sceussent que c'estoit la seule force de la verité celeste qui les persuadoit. En effect, il arriue quelquesfois qu'en sortant d'vne predication, l'on n'en remporte autre chose que l'estime de l'eloquence du Predicateur, sans aucungrand fruit d'instruction ny de confolation pour l'ame. Ou si on nes'en va pas du tout vuide de ce qu'on y doit chercher principalement, au moins a-t-on l'ame trop pleine de l'admiration de l'Orateur, & des fleurs dont sa Rhetorique a couronné la passion du Sauueur du monde. Certainement il y a quelquesfois sujet de tristesse & de douleur, lors qu'il se fait quelque concours de divers Predicateurs en vn lieu, de voir qu'il y ait entr'eux quelque espece de combat, à qui remportera

54 SVITE DE LA DERN. PART. le plus de reputation d'auoir fait merueilles dans la Chaire. Et l'inclination des peuples contribuë beaucoup à cela. Car la liberté qu'ils se donnent de prononcer leur iugement, & de faire des comparaisons, & de témoigner leurs dédains ou leurs applaudissemens, fait qu'on est en quelque sorte obligé de tascher à leur satisfaire. La predication de l'Euangile estant destinée à deux fins, l'vne d'éclairer l'entendement par la connoissance de la Vericé, l'autre d'enflammer les affections & la volonté à la Pieté & à la Vertu, ie voudrois qu'il y eust entre les Ministres de la Parole de Dien vne grande emulation à qui le feroit auec plus de fruit & d'efficace. Mais ie voudrois aussi que toute leur emulatio se bornast-là, & que tout le soin qu'ils apportent à donner de l'aggréement à leurs meditations, eust cela seul pour visée. Et ie croy que cet aduertissement est d'autant plus necessaire maintenant, qu'il semble que les ieunes gens se sont tellement laissés prendre à l'éclat de ces escrits qu'on appelle liures dutemps, qu'ils les tiennent non scule-

DE LA MORALE CHREST. ment pour la reigle de bien parler, mais encore pour le magazin des belles pensées. Cela fait que quelquesfois leurs actions ressemblent trop à celles des Declamateurs & des Sophistes d'autresfois, & que la verité de Christ y est trop frisée & trop parfumée. La troisieme finalement est, que pour euiter cet écueil-là, il ne faut pas faire naufrage à l'extremité opposée. Caril y a des gens qui se negligent tellement, soit pour ce qui regarde les pensées, soit pour ce qui concerne l'elocution, qu'il semble qu'ils parlent absolument sur le champ quand ils preschent l'Euangile. Deux sortes de gens reuffissent à parler ainsi sans premeditation: à sçauoir ceux qui y sont ineuitablement engages par vne necessué pressante, & ceux qui ont destalens extraordinaires dans le fonds de la do-Arine, dans la lumiere de l'esprit, dans la facilité de l'expression, & dans l'habitude de parler à toutes rencontres. Mais ceux-là sont extraordinairement assistés de Dieu, qui les ayant appellés à cela par la necessité, les y fauorise de sa grace s'ils la luy demandent ardem-

56 SVITE DE LA DERN. PART. ment: ceux-cy sont des gens rares tout à fait, & des actions desquels il ne faux point faire de reigle. Encore ne sçay-je s'il y en a aucun qui ne donne quelque temps à la preparation auant que de paroistre en public, si les occurrences le luy permettent. Hors cela les actions subites & impremeditées sont confuses, tumultuaires, & dignes de beaucoup de reprehension. Car si Pericles, le plus grand homme de la Grece, & le plus eloquent de son temps, auoit accoustumé, lors qu'il motoit sur la Tribune aux harangues, de demander à ses Dieux qu'ils luy fissent la grace de ne rien dire qui ne fust viile à l'Estat, & digne des Atheniens, quels doiuent estre les mouuemens d'vn Predicateur qui pense qu'il a à parler du Royaume de Dieu, & & à instruire l'Eglise? Il doit donc demander ardemment à Dieu qu'il luy fasse la faueur de s'en bien acquitter; & ce seroit se mocquer de Dieu que de luy addresser de telles oraisons, si cependant celuy qui les fait, se neglige & s'abandonne luy-mesme. Apres cela il n'y a plus d'aduertissement important à don-

DE LA MORALE CHREST. 57 ner en cet egard, sinon celuy qui concerne l'assiduité que chaque Ministre doit apporter à cette partie de sa charge. Mais cela se reigle principalement par deux choses; l'ordre, & la necessité. Quant à l'ordre, il n'y a point d'Eglise qui iou îsse de tranquilité où il n'y en ait quelcun establi touchant les iours & les heures ausquelles chaque Pasteur doit prescher. Et c'est à cela qu'il faut qu'il mesure ses trauaux, pour tascher de suffire à son deuoir, & de remplir les heures qui luy sont ordonnées. Et bien qu'il y a des lieux où la frequence des exercices les rend penibles, si est-ce qu'vn fidelle Ministre de l'Euangile y aura plus d'égard à l'edification publique qu'à son interest particulier, & que s'il n'y ruine point manifestement sa santé, il taschera de ne laisser aucune de ses heures vacantes. Pour ce qui est de la necessité, elle est, comme chacun sçait, imperieuse, & veut que toutes choses luy cedent sans exception. Si donc il y en a quelcune inuincible qui rende impossible à un Pasteur l'execution de son deuoir en cet egard, comme font

SVITE DE LA DERN. PART. quelquesfois les maladies, & les voyages qui ne se peuuent euiter, il s'en peut legitimement dispenser. Et s'il y en a quelque autre qui requiere de prescher ordinairement & extraordinairement, & d'exhorter, comme dit l'Apostre, entemps & hors temps, comme cela s'est fait au commencement de la Reformation, il n'y a difficulté qu'vn bon seruiteur de de Dieu ne doiue rascher de surmonter, pour auancer la gloire de Christ, & procurer le salut des hommes. Car encore que S. Paul ait eu quelque raison particuliere dans la charge de l'Apostolat, de dire, que parce que necessité luy estoit imposée d'Euangeliser, il ne deuoit attendre que malheut s'il ne s'en acquittoit pas, si est-ce que cela convient à tout Pasteur, s'il y a quelque occasion, de quelque nature qu'elle soit, qui l'oblige manisestement à déployer son talent & à faire fructifier l'Euangile. Apostres auoyent cela, entr'autres prerogatives de leur charge, qu'ils n'estoyet specialement attachés à aucun troupeau particulier: tellement que chacun d'eux estant Pasteur de l'Eglise vniuerselle, il

DE LA MORALE CHREST. auoit vocation, & de prescher par tout où il se rencontroit, & d'aller par tour où il pouvoit esperer qu'en preschantil auanceroit le regne du Sauueur du monde. Et si la Providence divine, ou l'Esprit de nostre Seigneur Iesus Christ, leur a assigné quelque departement, comme à S. Pierre les Iuifs, & à S. Paul les Gentils, ou leur a mis au cœur d'aller, celuy-cy vers l'Occident, & celuy-là vers l'Orient, comme la Tradition dit que S. Thomas alla aux Indes, ce n'a pas esté proprement pour limiter le droit de leur Charge, qui s'estendoit à tout l'Univers, mais pour en mesnager l'execution, afin qu'elle fust plus efficace à la conversion du monde. Au lieu que maintenant les Pasteurs ont chacun leur troupeau determiné, comme vne petite portion du champ du Seigneur, qui est recommandée à leur culture. Et tandis que l'ordre qui la leur affigne peut subsister, & que les Puissances souueraines sous lesquelles l'Eglise vit, en permettent l'observation, vn Ministre ne doit point entreprendre de prescher ailleurs que là où il est establi, s'il n'y est

60 SVITE DE LA DERN. PART.

legitimementappellé, & selon les reigles ordinaires. Autrement ce seroit enjamber sur le ministere d'autruy, & faire l'Euesque hors son propre Diocese, ou l'Intendant hors de son departement, ce que S. Pierre blasme en toutes sortes de personnes. Mais quand il n'y a point d'ordre establi, ou qu'il est impossible de l'obseruer alors; comme on disoit dans les Republiques autrefois, que le salut du peuple est la souveraine loy, il le faut aussi dire icy, & en beaucoup plus forts termes. Car làil n'y va que de la conservation de la societé politique & de la felicité du corps: icy il est question du regne de Iesus Christ & du salut eternel des ames.

Quant à ce qui est de l'administration des Sacremens, elle n'est pas si absolument necessaire que la predication de la Parole. Celle-cy est destinée à engendrer la Foy, & ceux-là à la nourrir. Or encore que leur suc soit admirablement vtile & essicacieux pour cela, si est-ce que la mesme Parole qui l'a premierement engendrée, la pourroit bien entretenir, s'il estoit absolument impossible

DE LA MORALE CHREST. qu'on luy fournist la nourriture de ces saintes ceremonies. C'est pourquoy S. Paul a mis vne si grande difference entre ces deux fonctions de son ministere, euangeliser & baptiser, qu'encore qu'à parler absolument, charge luy eust esté donnée de pratiquer toutes les deux, (comme aussi les a-t-il exercées quand l'occasion l'a requis,) si est-ce qu'en les comparant l'vne auecque l'autre il a dit, que Dieu ne l'auoit pas enuoyé pour bas ptiser, mais pour euangeliser, cette dernierefonction estant de beaucoup plus nenessaire que l'autre. Aussi, bien qu'en l'Eglise primitiue l'on celebroit la sainte Eucharistie fort souvent, on preschoir encore beaucoup plus ordinairement: & maintenant dans les Eglises bien policées par la Parole de Dieu, la predication y est incomparablement plus frequente que l'administration de la Cene. Le Baptesme ne se donne à chaque personne qu'vne sois, & bien que l'administration en semble estre plus necessaire que celle de la sainte Cene, parce que c'est l'introduction en l'Eglise visible de Christ, & la naissance du Chrestien, 62 SVITE DE LA DERN. PART. qui ne se fait point autrement eu egard à la profession du dehors; au lieu que sa nourriture & son entretenement n'est pas si inseparablement attachée à l'vsage del'autre Sacrement, qu'il ne se puisse procurer par la predication de la Parole, si est-ce qu'encore n'est-il point si absolument necessaire que l'on ne puisse estre sauvé sans l'auoir receu, si quelque obstacle invincible & inevitable en empesche. C'est pourquoy dans les lieux & dans les Eglises où il y a des temps establis pour la celebration des Sacremens, il est du deuoir d'vn Ministre de l'Euangile de s'assujettir à cet ordre encore plus exactement que lors qu'ils'agit de la Predication. Car comme tout se doit faire en l'Eglise de Dieu honnestemeut, aussi est-il certain que tout s'y doit faire par ordre. Mais lors que l'estat des choses & la condition des temps ne le permet pas, alors la mesme necessité à peu prés, oblige le Ministre de l'Euangile à administrer l'vn & l'autre Sacrement à l'edification des fidelles. Pour cela, il ne les doit pas seulement administrer selon l'institution de

DE LA MORALE CHREST. nostre Seigneur, sans y rien adjouster qui en corrompe la pureté ny qui en diminuë la vertu, mais il y doit estre encore en quelque sorte plus precis qu'en la Parole mesme. Car, comme i'ay dit, la Parole requiert souvent d'estre illustrée & confirmée par les autres verités que l'on peut tirer d'ailleurs; & sans cela elle ne s'entendroit pas commodément. Au lieu que les Sacremens, pourueu que l'on les administre selon l'institution de Christ, sont assés intelligibles sans y rien messer d'ailleurs. Ou si la doctrine qui concerne leur nature, leur vsage, leur vertu, leur nombre, & leur institution, a besoin de quelques plus grands éclaircissemens, cela se fait en la Predication commodément, & non en l'administration du Sacrement mesme. Et de plus, ç'a tousiours esté l'inclination des homes, de s'imaginer que dans ces saintes ceremonies il y a quelque chose d'extraordinaire, d'auguste, & de miraculeux : tellement que tout ce qu'on y pourroit adjouster de l'inuention de l'esprit humain, n'est point necessaire pour y accroistre la deuotion,&

64 SVITE DE LA DERN. PARTS seroit sujet à porter plustost à la super? stition & à engendrer la bigotterie. Encore y a t il cecy à considerer de plus. C'est que la predication de la Parole se reçoit bien par les oreilles: mais elle ne met rien deuant les yeux. De sorte que dans la deuotion qu'elle excite, elle abstrait l'ame des choses sensibles, & l'éleue aux intellectuelles. Mais les Sacremens sont establis en des choses materielles, qui frappent les yeux & les autres sens corporels; tellement qu'on n'y peut rien adjouster pour en augmenter la ceremonie, qui n'attache trop les hommes aux choses materielles, ausquelles ils n'ont desia que trop d'inclination. C'est pourquoy il se faut tres-exactement tenir à ce que le Seigneur en a ordonné, tant pour le nombre des Sacremens que pour la celebration de chacun d'eux; non seulement parce qu'il ne nous appartient pas de rien adjouster à ses institutions, mais encore parce qu'elles ont esté establies s'engagera plus qu'il ne faut dans l'admiration des choses visibles & corporelles,

DE LA MORALE CHREST. relles. Et l'experience n'a que trop monstré la verité de ce que ie dis. Car cette façon scrupuleuse de celebrer l'Eucharistie en la cachant aux yeux des Catechumenes, qui a esté pratiquée entre les Anciens, & ces mysteres de ceremonies qu'on y a adjoustées depuis, de la receuoir à genoux, de la garder religieusement dans les ciboires, de la consacrer auec des gestes extraordinaires & des habillemens inusirés, de la porter auec deuotion aux malades, & enfin de la promener en procession par les rues, & de l'honorer par la genusiexion & les inclinations du corps, y a tellement attaché les esprits des pauures Chrestiens, qu'au lieu qu'auparauant ils cherchoyent Iesus Christ au Ciel, ils s'imaginent à cette heure qu'ils le possedent en la terre. Neantmoins, comme il faut que le Ministre de l'Euangile se garde soigneusement, & d'estre superstitieux en ces choses, & d'y donner occasion aux autres de se laisser aller à la superstition, aussi y doit il allumer la vraye pieté des fidelles par son exemple. Elle doit reluire en luy dans toutes 66 SVITE DE LA DERN. PART. les parties du diuin seruice. Dans la ferueur de ses exhortations en prese chant il doit faire paroistre son zele. Les prieres qu'il prononce comme la bouche de l'Eglise, en doiuent estre tout estincellantes, pour y animer ceux qui ont à dire Amen à son oraison. Si sa poictrine & sa voix luy permettent de chanter, le lieu eminent où il est l'aduertit, non pas tant de conduire ceux de son troupeau à prendre le ton des saints Cantiques, & à legarder regulierement, que d'exciter leur deuotion par la demonstration de la sienne. Si, comme il y en a quelques-vns dont le chant incommode la santé, il ne peut messer sa voix auecque celles des autres fidelles, il faut qu'il paroisse en sa contenance qu'il y melle au moins les mouuemens du cœur, chantant, comme dit l'Apostre, du cœur au Seigneur, s'il ne le peut faire de la bouche. Mais dans l'administration des Sacremens, il y doit encore auoir quelque particuliere gravité, accompagnée de reuerence à l'action qu'il a dans les mains, & toute colorée des témoignages d'yne pieté egalement ar-

DE LA MORALE CHREST. dente & sincere. Ie dis ardente, parce que c'est en cette occasion particulierement qu'il faut satisfaire à l'exhortation de l'Apostre qui veut que nous soyons feruens d'esprit. Maisie dis aussi sincere, d'autant qu'il faut que les demonstrations exterieures qu'il en donne, soyent telles qu'on y puisse reconnoistre qu'elles partent veritablement du cœur, & qu'à cette occasion elles soyent vuides de toute ostentation & de toute affectation, qui est le caractere de l'hypocrisse. l'ay dit que la troisseme partie de la Charge des Ministres de l'Euangile consiste en l'administration de la Discis pline & en l'vsage des Cless: qui est vne chose de souverainement grande importance. Car ils sont bien appellés Pasteurs à la verité, parce qu'ils doiuent donner à l'Eglise de Dieu la pasture de la Parole & des Sacremens, & c'est sans doute la premiere & la principale de leurs fonctions; mais ils sont aussi appellés Anciens, parce que ce sont les Conseillers de l'Eglise, qui composent le Senat par lequel elle est conduite; & Euesques, parce que ce sont les Inten-

68 SVITE DE LA DERN. PART. tendans & les Inspecteurs de son Gouuernement; & Conducteurs, parce que ce sont ceux qui la guident en l'ade ministration de ses affaires & de ses deportemens; & enfin, le nom mesme de Pasteurs monstre que Dieu ne leur a pas seulement mis la pasture mais aussi la houlette en la main, afin de radresser les brebis à qui il arriue de s'egarer, & de les ramener au droit chemin par la correction de la Discipline. Pour leur donner en peu de paroles quelque tablature de leur deuoir, ie pense qu'il les faut considerer eu egard au respe êt qu'ils doiuent aux reiglemens de leurs supes rieurs, eu egard à la façon de laquelle il se doiuent comporter enuers leurs Collegues, & enfin eu egard à la maniere en laquelle ils se doiuent gouverner, tant en ce qui touche leur troupeau en general, qu'en ce qui concerne les particuliers qui dependent de l'autorité des Presbyteres. Quant au premier, les superieurs d'vn Ministre de l'Euangile sont differens selon les diverses sormes que l'on a données au gouvernement

del'Eglise. Car dans les lieux où on a

DE LA MORALE CHREST. 69 retenu les Eucsques, ou quelque chose qui approche de leur charge, comme sont en Allemagne les Surintendans, les simples Ministres les doiuent reconnoistie comme tels, & respecter leurs personnes, & obseruer leurs ordres, selon que leur autorité a esté establie & determinée par les reiglemens publics. Car encore qu'il y puisse auoir en cela quelque chose qui degenere du premier type du Christianisme, où il semble qu'entre les Ministres il y auoit vne entiere egalité, si est ce que cela n'est point tellement essentiel à la Religion, qu'on ne s'y doine assujettir, quand vne fois la coustume ou l'autorité en a introduit l'vsage en l'Eglise. Mais dans les autres endroits où par la Reformation on a reduit les choses à tel point qu'il n'y a qu'vn seul ordre de Ministres, qui comparés les vns aux autres sont absolument egaux, les superieurs sont les Assemblées Ecclesiastiques, qui gouuernent l'Eglise de nostre Seigneur en quelque façon Aristocratiquement. Le deuoir de chaque Pasteur en cet egard consiste à considerer ces As-

70 SVITE DE LA DERN. PART. femblées auec quelque veneration, & 1 obseruer ponctuellement les reiglemens qu'elles establissent pour le gouuernement de chaque troupeau. Car d'vn costé il doit presumer qu'il y a plus de prudence en ces Assemblées, où le nom de Dieu est inuoqué, qu'il n'y en a dans la teste d'yn particulier: & de l'autre, quand il y apperceuroit quelque manquement, comme il est certain qu'elles ne sont pas infaillibles, il doit neantmoins ceder à l'autorité. Car il y a sans comparaison plus de dommage pour l'Eglise de Dieu à pratiquer quelque reiglement incommode, & en la place duquel on en pourroit mettre vn meilleur, qu'à mettre la puissance de ces Assemblées en compromis, & à l'auilir dans l'esprit des peuples. C'est donc vne des plus belles qualités qui puisse estre en vn Ministre de l'Euangile, que d'estre exact & religieux en l'observation des reiglemens publics, pourueu neantmoins qu'il n'y foit pas pontilleux, com-me il arriue quelquesfois à ceux qui en veulent paroistre zelateurs pour seruir à leurs interests & à leurs passions parti-

DE LA MORALE CHREST. 71 culieres. Car aussi bien en l'Eglise que dans le Palais, il y a des gens qui ne parlent que des Loix, & des Ordonnances, & des Arrestés des superieurs, qui menent du bruit pour leur observation, qui forment des oppositions aux resolutions communes sous pretexte de la violation des Reiglemens, qui en pesent tous les mots, qui en examinent les syllabes, & qui crient contre ceux à qui ils s'attachet par enuie ou par quelque autre passió; & qui neantmoins au fonds n'ot rien moins à cœur que de ce dont ils font parade. Ce sont leurs interests qui les meinent, & leurs passiós qui les gouvernent; mais parce qu'il ne l'osent dire, ils se couurent du manteau de l'interest du Public. Quant à ce qui est des Collegues, il est certain que dans vne Compagnie telle qu'est ou vn Synode, ou vn Colloque, ou vn Consistoire, l'autorité des suffrages est egale, à cause de l'egalité de la charge, qui ne donne aucune superiorité à qui que ce soit, sinon celle qui est necessaire pour la conduite de l'assemblée & pour sa moderation. Et toutesfois, il n'est pas moins indubita-

E iiij

SVITE DE LA DERN. PART. ble que les dons y sont differens, & que bien souuent vn l'emporte par dessus l'autre en prudence, en experience, en connoissance de la Discipline, & en addresse à la pratiquer. Et bien que quand l'Apostre fait mention de gouvernement, entre les graces de l'Esprit, il entende parler d'vn don extraordinaire, & de la nature de ceux qui ont rendu le commencement du Christianisme illustre, parce qu'ils estoyent miraculeux, il ne laisse pas de se trouver desgens en qui il y a quelque chose qui s'y rapporte, tant Dieu leur a communiqué de lumiere & de prudence, pour bien conduire l'Eglise de nostre Seigneur. Le deuoir de ceux en qui ces graces là se rencontrent, est de les employer à la gloire du commun maistre de luy & de ses collegues, & à l'vtilité du Public, & non à s'en preualoir à son auantage, pour empieter quelque tyrannie, ou pour l'emporter par autorité. En cela, comme en toutes autres choses, ces paroles de l'Apostre doinent venir en la pensée, Qu'as-tu que tu n'ayes receu? Et si tu l'as receu, pourquoy t'en glorifies tu ? D'vn costé ces

DE LA MORALE CHREST. 73 talens-là ne sont pas proprement donnés à ceux à qui Dieu les communique, afin qu'ils en retirent quant à eux quelque auantage particulier. C'est pour la commune vulité de l'Eglise que Dieu les confere. Seulement, parce qu'il faut que ce soit par l'entremise de quelcun d'entre les hommes qu'il les communique; comme il a esté souverainement libre à Dieu de choisir celuy dont il se voudroit seruir pour cela, ç'a esté vn honneur qu'il a fait à celuy qu'il a esleu pour estre le depositaire de ses dons & l'instrument de sa grace entre ses fidelles. Ie croy que quand Dieu crea le monde, la matiere dont il forma le ciel & les astres, estoit à peu prés toute semblable, & qu'entre les parties de son tout il n'y avoit point de distinction. Mais parce qu'il estoit necessaire pour l'ornement & mesme pour la subsistance de l'Univers, qu'il y eust de la difference entre les estoiles, & que les vnes fussent errantes & les autres fixes, les vnes plus grandes & les autres plus petites: les vnes plus lumineuses & les autres moins; Dieu tira de cette matiere

74 SVITE DE LA DERN. PART. telles parties qu'il luy pleut, pour y mettre la lumiere, ou, comme l'Apo-stre S. Paul dit, la gloire, selon cette merueilleuse varieté que nous y voyos maintenant. De sorte que si les astres auoyent quelque sentiment de leur estre, ils deuroyent reconnoistre en humilité que c'est pour le bien du monde que Dieu les a faits de la sorte, & non pas pour s'enorgueillir ou les vns contreles autres, ou tous ensemble contre le reste des estres qui sont composés des elemens. Il en està peu prés de mesme de la formation de l'Eglise. A la comparer en general auec tout le reste des hommes, elle estoit de mesme nature & de mesme condition auec eux. Et bien que quand la Genese dit qu'au commencement la terre estoit sans forme & vuide, & qu'il y auoit des tenebres au dessus de cet aby/me, elle nous mette dans l'esprit l'idée de quelque horrible confusion, la nature humaine pourtant, à la considerer en elle-mesme, estoit encore plus informe & pl9 semblable à quelque tenebreux Chaos. Ainsi, à comparer les parties de l'Eglise les vnes auecque les

DE LA MORALE CHREST. autres, elles n'ont point de prerogatiue naturelle qui oblige Dieu à les discerner. Si donc il en choisit les vnes pour en faire des estoiles, & si encore entre ces estoiles là il met quelque notable difference de splendeur, c'est vne chose dont toute l'vtilité reuient à l'Eglise en general, & dont au reste elles ne se doiuent point glorifier les vnes contre les autres. D'autre costé ie ne sçay pas si ce don de gouvernement, quand il estoit extraordinaire & miraculeux, estoit en vn sihaut degré que ceux à qui il estoit communique y fussent absolument impeccables. Il a bien esté entierement necessaire que les Apostres fussent infaillibles en la tradition de la doctrine de la Foy, afin que nous fustions asseurés que nous serions exempts d'erreur, quand nous suiurions leurs traces. Il a esté expedient qu'ils ne se trompassent non plus dans les regles generales qu'ils deuoyent donner pour l'establissement de l'ordre de l'Eglise & pour son administration, afin que les Ministres qui viendroyent apres eussent vne tablature certaine à laquelle ils se conformassent,

76 SVITE DE LA DERN. PART! Mais peut estre n'estoit il pas absolument necessaire qu'ils sussent tout à fait exempts de la sujetion à l'erreur dans les cas particuliers où les conseils & les resolutions dependent de diuerses circonstances qui ne sont pas toujours bien connuës. Quoy qu'il en soit, & quelque mesure de l'Esprit que les Apostres eussent receuë en cet egard, (& il ne faut pas douter qu'elle ne sust extraordinairement grande) c'est vne chose de laquelle l'experience nous convainq, qu'il n'y a aucun si auantageusement partagé de l'Esprit de prudence & de bon gouuernement, qui ne bronche quelquefois, & qui n'ait besoin d'estre redressé par l'assistance de ses freres, Tellement que l'entendement le plus lumineux, dans vne deliberation qui concerne le public, doit estre toujours attentif & a loy mesme & a autruy, pour se donner garde de chopper, & pour profiter des ouuertures des autres, s'il se trouue que quelcun en face de meilleures que les siennes. Car pour me seruir encore de cette comparaison, ce n'est pas seulement pour l'ornement de

DE LA MORALE CHREST. l'Vniuers', que Dieu a formé tant d'estoiles que nous en voyons dans les Cieux. C'est afin que seur lumiere & leurs influences se messent, & qu'elles se temperent les vnes les autres, &, peut estre, qu'elles le corrigent, chacune d'elles ne sufficant pas pour la production des choses ausquelles elles sont destinées, & quelques-vns d'entr'elles estans plus capables d'y nuire, si la rencontre des autres n'apportoit quelque notable adoucissement à leurs aspects. Et c'est la raison pourquoy Dieu n'a pas commis le regime de son Eglise à l'autorité d'vn seul, & qu'il a voulu que ç'ayent esté des Conciles qui la gouvernassent, de quoy il nous a donné l'enseignement & le modelle en celuy de Ierusalem. Car il n'y avoit avcun des Apostres qui n'eust assés de lumiere de sapience pour decider la question qui se traina-là. Et toutesfois ils s'y affemblerent tous, de sorte que la determination s'en fit par l'autorité de leur College. Si chacun d'eux n'auoit pas assés ou de suffisance ou d'autorité pour cela, au moins leur College en auoit-il sans doute tres-

SVITE DE LA DERN. PARTI abondamment; & neantmoins ils y admirent les Anciens, c'est à dire, les Pasteurs ordinaires de Ierusalem; afin qu'ils y contribuassent leurs suffrages. 11s n'exclurrent pas mesmes les freres, c'est à dire, les fidelles particuliers, des deliberations qui concernoyent l'ordre & la maniere d'executer ce qui avoit esté resolu : afin de nous donner à entendre, que non seulement l'Eglise en general, mais chaque troupeau en particulier, doit estre gouverné par le concours des aduis de plusieurs, qui se puisfent éclairer, & amender, & corriger respectivement les vns les autres. Mais si c'est là le deuoir de ceux en qui Dieu a mis plus de graces qu'en leurs compagnons, ce n'est pas à dire pourtant que les autres de leur costé ne les doiuent reconnoistre. Non pour suiure aueuglement tout ce qu'ils disent, puis qu'ils se peuuent tromper, mais pour supporter & excuser doucement en eux l'infirmité de la nature, quand il leur arriue de s'e-garer; pour deferer quelque chose à leur autorité & à leur prudence accoustumée, quand ils donnent desaduis en

De LA MORALE CHREST. 79 choses douteuses, & où il est malaisé de sebien determiner; & pour embrasser auec ioye & auec demonstration de satisfaction leurs aduis, quand il paroist manifestement qu'ils sont puisés des sources de la prudence. Car il y a certaines gens que l'enuie, ou quelque autre passion, induit à prendre tousiours le contrepied des opinions de ceux qui sont en reputation d'estre experimentés & clair-voyans, & qui aimeroyent mieux se declarer manifestement contre la raison, que de ne tascher pas à rabbatre le credit de ceux à qui ils en veulent. C'est pieté que de reconnoistre auec gratitude les dons que Dieu a communiques à quelques vns de ses seruiteurs pour l'vtilité du Public. C'est generosité que de ceder à la verité & à la raison, en quelque lieu qu'elle paroisse, & d'y conformer ses sentimens. C'est enfin le caractere d'vne ame modeste, & esfloignée de l'ambition & de la vanité, que de suiure franchement, lors qu'on ne peut aller deuant, & d'embrasser les bons aduis, quand il ne nous est pas arriué de les donner les premiers nous80 SVITE DE LA DERN. PART. mesmes. Mais & les vns & les autres; tant ceux que Dieu a le plus auantagés, que ceux qui ont moins receu de luy, doiuent estre toujours parfaitement disposés à suiure les resolutions qui se prennent à la pluralité des voix dans les Compagnies. Car tout gounernement populaire, ou Aristocratique, se regle par là, & celuy de l'Eglise est aucunement messé de ces deux, de sorte qu'on n'y a iamais veu decider les affaires autrement, soit dans les Assemblées du peuple, soit dans les Synodes ou les Presbyteres. Et de fait, il est de la sagesse &de la modestie d'vn honneste homme, de presumer que la plus grande pru-dence est du costé du plus grand nombre; chacun y ayant contribué ce qu'il a pleu a nostre Seigneur de luy en donner. Et quand vn honneste homme void clairement, comme cela arrive quelquesfois, que le plus grand nombre le trompe; ce qu'il ne defere pas à l'opinion de la prudence, il le doit deferer à l'autorité. Autrement il n'y auroit iamais de fin aux contentions, si le petit nombre le vouloit emporter sus le plus grand, &, ce qui

DE LA MORALE CHREST. ce qui est de tous les desordres le plus pernicieux à la societé, il faudroit necessairement tomber dans vne horrible Anarchie. Car il arriue bien quelquesfois des inconveniens de suiure la pluralité des suffrages dans les deliberations. Mais cela n'est pas perpetuel, & peut-estre mesmes est il rare. Au lieu que de luy contester l'autorité, c'est le renuersement de l'ordre, de quoy les inconveniens sont toujours inevitables & absolument vniuersels. C'est vne des fonctions d'un Ministre de l'Euangile; de presider dans les Assemblées Ecclesiastiques pour les moderer; & en l'Eglise Primitiue c'estoit toujours à vn mesme homme que cet honneur estoit deferé. Car ou bien c'estoyent les Apostres, quand ils se trouuoyent dans les Compagnies, à qui la dignité de leur Charge, & l'eminence extraordinaire de leurs dons, donnoit la premiere place, au dessus mesmes des Euangelistes, qui possedoyent vne espece d'Apostolar, mais affoibli & diminué. Ou bien en l'absence des Apostres, & apres leur depart de cette vie, c'estoyent les Euange-

SVITE DE LA DERN. PART. listes, qui auoyent aussi dans leur charge & dans l'abondance de leurs dons, vn grand auantage par dessus les Pasteurs ordinaires; comme de fait l'Apostre, en l'Epistre aux Ephesiens, les nomme auant eux Ou bien, quand les Evangelistes furent morts, c'estoyent les hommes Apostoliques, c'est à dire ceux qui auoyent eu le bonheur d'estre disciples & auditeurs des Apostres, & qui succedoyent en la place des Euange-listes, lors qu'ils vintent à manquer. Ou bien enfin, c'estoyent les plus anciens des Presbyteres, & les plus aagés des Compagnies, que l'on mettoit en la place des hommes Apostoliques, & que l'on faisoit, autant qu'il estoit possible, heritiers de leur privilege & de leur autorité. Si cet ordre estoit introduit en quelques Eglises, comme il y en a quelques-vnes qui deferent beaucoup aux Surintendans & aux Doyens des Pasteurs en chaque troupeau, leur deuoir à tous seroit bien ailé à regler. Car il faudroit que celuy qui auroit la preéminence en viastauecque moderation, & que les autres portassent cette superiorité en

DE LA MORALE CHREST. patience, parce que l'ordie seroit ainsi establi. Maintenant en la pluspart des Eglises Resormées, l'egalité entre les Pasteurs est si absoluë, que dans les Synodes la moderation depend de l'election à la pluralité des suffrages, & se termineau mesme moment que l'Assemblée se finit: & dans les Consistoires; elle est alternative entre les Ministres, s'il y en a plus d'vn establis à la conduite d'yn mesme troupeau. En cet ordre il est encore plus aisé de se gouverner que das le precedent. Parce que là où la superiorité & l'inferiorité sont dispensées de telle sorte, que chacun y passe à son tour, en celle-là on est aduerti d'estre modeste & retenu, parce qu'elle ne sera pas de longue durée, & en celle-cy on porte plus patiemment de sevoir quelque peu de temps au dessous, parce que la rouë qui tourne sans cesse vous en fait incotinent remonter. En general, la Parole de Dieu ne nous ayant point particulierement determiné comment le gouvernement de l'Eglise se doit reigler en cet égard, c'est assés, comme i'ay desia dir, quelle hous ait aduertis que tout s'y doit faire

F ij

bonnestement, & parordre, & qu'elle ait ordonné à tous les Chrestiens de se preue nir les vins les autres par honneur, parce que ce qui leur est commun à tous, doit estre en particuliere recommandation aux Ministres de l'Euangile.

Quant à l'exercice de la Discipline à l'egard des inferieurs, le premier precepte que l'on se doit proposer à pratiquer, est celuy que S. Pierre donne aux Anciens, qui sont les Pasteurs ordinaires de l'Eglise, de ne dominer point sur les heritages du Seigneur, c'est à dire, de ne s'imaginer pas que la puissance qui leur est donnée, soit semblable aux puissances politiques qui ont esté establies pour le gouvernement des Estats. Car en celle-cy il y a deux chosesentre les autres qui ne conuiennent nullement à la puissance Ecclesiastique. L'vne est que les loix qu'elles font, & à l'ob} servation desquelles elles obligent, regardant les choses corporelles, & qui sont indifferentes de leur nature, elles ne rendent point d'autre raison pourquoy elles les ordonnent, sinon qu'elles le veulent ainsi. Car ce pouuoir leur

DE LA MORALE CHREST. ayant esté mis entre lesmains, d'en disposer comme il leur plaist, c'est à elle à la verité à regarder de bien prés à ne commettre point d'injustice en les commandant, & à y viser plustost à l'vtilité du public, qu'à leur propre satisfaction particulière : mais ce n'est pas à leurs sujets à leur demander la raison de leurs Edits, parce qu'en telle nature de choses ils les peuvent executer sans interesser leur conscience, & que leur obeissance est tousiours agreable à Dieu. Au lieu que les loix Ecclesiastiques doiuent tellement tendre à l'edification commune, que l'on puisse monstrer leur sainteté & leur iustice, par la parole de Dieu, & en persuader suffisamment les consciences des hommes. Dans l'ancienne Allliance Dieu auoit institué grande quantité de choses dont on ne pouvoit rendre d'autre raison sinon que c'estoit son plaisir. Et c'estoit assés aux Sacrificateurs & aux autres Docteurs du peuple d'Israel, de monstrer aux particuliers qu'elles estoyent de divine institution, & qu'elles se trouvoyent. establies par les ordonnances de Moyse.

F iij

86 SVITE DE LA DERN. PART.

Car l'aucorité divine suppleoit assés au defaut de toutes autres raisons. Et de fait, quand elle est claire & sans contestation, elle est plus que suffisamment conuaincante pour les consciences. Sous l'Euangile nous n'auons que quatre sortes de choses. Les dogmes, qui forment l'objet de la Foy: les preceptes, qui reiglent les actions de la sainteté : les ceremonies des Sacremens, qui aident à l'vne & à l'autre; & les ordonnances generales qui concernent le gouvernement. Pout les dogmes, nous ne deuons point imposer d'autre necessité aux hommes de les receuoir, que celle qui depend de l'euidence de leur verité; & l'euidence de leur verité paroist en eux-mesmes, en l'analogie & correspondance qu'ils ont entr'eux, & sur tout dans les enseignemens de la Parole de Dieu, où les Verités Euangeliques nous ont esté expliquées. Quant aux preceptes, nous ne deuons non plus imposer d'autre necessité aux hommes de les pratiquer, que celle qui depend de leur naturelle sainteté: & cette sainteté paroist en eux-mesmes, parce que ce sont la

DE LA MORALE CHREST. pluspart choses ausquelles la Nature mesme consent; & en la liaison qu'ils ont auecque les dogmes, de la verité desquels ils se produisent manisestement; & en l'autorité de Christ, qui nous doit estre en souueraine veneras tion & absolument inuiolable. Pour ce qui regarde les ceremonies des Sacremens, la premiere source de leur sainteté & de leur majesté, est en l'autorité de leur instruction, qui, quand il n'y aurois que cela, suffic pour fonder le pouvoir des Ministres à en demander l'observation & la pratique. Car là où le Seis gneur lesus commande, qui refusera l'obeissance ? Mais qui les examinera bien soigneusement, trouuera qu'ils one esté institués si sagement, qu'ils ont vne telle connexité auecque la verité des dogmes & auecque la sainteté des preceptes qui regardent la Pieté & la Charité, & qu'ils sont si propres, & ont vne si particuliere efficace pour nourrir 85 pour fortifier en nous l'vne & l'autre de ces vertus, que si les Ministres entendent bien la Religion, ils ont en l'vlage des Sacremens, outre leur institutiona

F iiij

SVITE DE LA DERN. PART. 88 de merueilleusement puissans motifs pour induire les hommes par la voye de la persuasion, à pratiquer ces ceremonies auec assiduité, deuotion, & reuerence, Enfin, pour ce qui concerne les ordonnances du gouvernement, la Parole de Dieu ne nous en donne que de generales, qu'il faut appliquer aux circonstances particulieres des lieux, des personnes & des temps. Mais cette ap. plication-là deuant d'vn costé toute tendre à l'edification, & de l'autre n'auoir rien de contraire aux autres parties de la Religion, il est bien aisé de la faire de telle façon, que la conscience des fidelles demeure persuadée de la iustice de la coduite des Ministres del'Euangile en cette occurrence. L'autre chose en laquelle la puissance Ecclesiastique differe de celle à qui a esté commise le gouuernement des Estats, c'est que celle cy a le pouvoir de contraindre à l'obeissans ce par les punitions corporelles, par la prination de choses qui appartiennent à la vie presente, & par la flestrissure de l'ignominie qui rend les hommes incapables d'estre tenus pour des parties

DE LA MORALE CHREST. tant soit peu considerables de l'Estat. Au lieu que l'autre ny n'employe rien de tout cela, ny n'est pas sondée à l'employer, & n'a de peines pour obliger les hommes à leur deuoir, que celles qui consistent en la honte des censures, qui n'impriment point de caractere flestrisfant; en la priuation des Sacremens, qui n'oste rien aux delinquans des choses qui sont necessaires à la vie; & en l'excommunication, qui retranche bien de la communion de l'Eglise, mais qui laisse à l'homme la vie, & la participation de la Republique de laquelle il faisoit part. De sorte que le pouvoir des Ministres de l'Euangile en cet egard est tout à fait different de celuy des Magistrats politiques. Le second precepte est celuy qui touche la fin que les Pa-steurs se doiuent proposer en l'vsage de cette puissance. Car les Magistrats & eux ont bien cela de commun, qu'en la correction des delinquans ils ont egard au bien general de la societé qui leur est commise, à ce que les mauvaises actions des vns ne corrompent pas les autres par l'exemple de l'impunité. Comme tous

90 SVITE DE LA DERN. PART. les hommes ont naturellement quelque pente à la licence, on en verroit incontinent la pluspart s'abandonner au vice & à la dissolution, s'ils n'estoyent retenus par la crainte du chastiment. C'est pourquoy il est besoin, quand il arriueà quelcun d'entr'eux de commettre quelque chose de reprehensible, qu'on donne quelque espece de terreur aux autres, en luy appliquant la correction selon la nature de son delict. Mais les Magistrats s'arrestent là, au lieu que l'vsage de la puissance Ecclesiastique a encore d'autres vilées. Parce que d'vn costé elle regarde à la gloire de Dieu, laquelle toute l'administration du saint Ministere a pour but, & de l'autre elle tend à l'amendement du pecheur, & à luy procurer le salut, en le reduisant dans le chemin d'vne bonne vie. Le Magistrat donques & le Ministre de l'Euangile doiuent estre à peu prés egalement vuides de passion, de colere & de desir de vengeance, en la distribution des censures & des peines, chacun en ce qui luy, est commis: mais outre cela le Ministre doit estre animé de zele à la gloire de

DE LA MORALE CHREST. Dieu & de Christ, & plein de charité enuers les hommes. Et c'est ce dont S. Paul fournit vn merueilleusement bel exemple en l'affaire de l'incestueux de Corinthe. Cartandis qu'il demeure en son peché, & que les Corinthiens y conniuent, il leur en escrit seuerement, il les exhorte viuement à retrancher du milieu d'eux vn homme siscandaleux, il leur represente qu'il est capable de gaster toute leur societé, comme yn peu de leuain fait leuer toute la paste; en quoy il fait paroistre son zele, & le soin qu'il a de conseruer l'integrité de l'Eglise de Corinthe, & la pureté de la reputation del Euangile de Christ. Et neantmoins, auecque toute cette rigueur dont il veut qu'on traitte ce personnage en le liurant à Satan, qui estoit la derniere des corrections qu'on luy pouvoit appliquer, il mesle pourtant cette instruction, que si par ce moyen l'on procure la destruction de sa chair, c'est neantmoins afin que l'esprit soit sauné au iour du Seigneur Iesus, en quoy il fait voir qu'il ne visoit qu'à sa repentance. Et de fait, quand par la peur de cette excommunication il fut reuent,

SVITE DE LA DERN. PART. à son deuoir, & que d'autre costé les Corinthiens eurent témoigné le deplaisir qu'ils auoyent de ne s'estre pas comportés comme ils deuoyent en cette occasion, il remet le chastiment à l'incè-Aueux, il console & louë les Corinthiens des bons mouvemens de pieté & de repentir qu'il voyoit en eux, & fait voir en toute sa façon d'agir, & dans les termes dont il se sert en leur escrivant, vne charité veritablement exemplaire. Le troisseme precepte que lon peut donner aux Ministres en cela, concerne la maniere en laquelle ils doiuent vser de certe puissance. Car on ramene les hommes à leur deuoir par deux voyes opposées, asçauoir la douceur & la seuerité. Et ceux qui estiment que cette derniere est la plus seure & la plus efficace, se fondent sur la puissance que la passion de la crainte a sur l'esprit de la pluspart des humains. En effect, qui examinera bien leurs actions, trouuera que celles que l'on estime louables, procedent ordinairement de ce principe, sinon vniquement & tout à fait, au moins en grande partie. Ou bien ils craignent la cor-

DE LA MORALE CHREST. rection des loix ciuiles, ou bien ils ont peur des censures Ecclesiastiques, ou bien la consideration de la honte des hommes les retient, ou bien ils ont dans le cœur quelque secrette apprehension de la colere de Dieu, s'ils manquent à faire leur deuoir. Et cela est si naturel, que c'est presque le seul motif dont on se sert pour porter les enfans aux choses honnestes, parce qu'ils ne sont pas encore capables d'en connoistre la beauté, & que depuis que nous sommes deuenus grands, & que l'idée de la l'ieté & de la vertu deuroit presque toute seule gouuerner nos mouuemens, Dieu mesme dans l'economie dont il se sert pour nous y former, melle dans sa Parole bien auant la consideration de sa iustice & de sa vengeance. Les autres estiment qu'il est plus conuenable d'y employer la douceur. Leurs raisons sont, que les creatures destituées d'intelligence, doiuent estre gouvernées par le sentiment de la douleur, & par la crainte qu'elle leur imprime; parce qu'il n'est pas possible de leur mettre dans la fantaisse l'idée des choses louables, par la persuasiona

94 SVITE DE LA DERN. PART. Mais que les hommes ayans esté pour neus d'vn entendement, qui d'vn costé est capable de conceuoir l'excellence des choses belles & honnestes, & qui de l'autre a l'empire sur toutes leurs autres facultés, il n'y a rien de si conuenable, pour gouverner leurs affections, que de se rendre par les raisons; maistres de cette principale partie de leurs ames. De plus il y a ce semble naturellement en nous quelque chose qui resiste à la contrainte; soit que le sentiment de l'excellence de nostre estre nous donne raisonnablement cette eleuation d'esprit & cette amour de la liberté, ou que le peché ait mis en nous quelque fierté, qui ne nous permet pas de ceder à quoy que ce soit sinon par vne inclination volontaire. Or comme il n'y a point de doute que les hommes se laissent prendre & manier par ces deux anses, aussi est il certain que la Parole de Dieu apprend aux Ministres de l'Euangile à se seruir de toutes les deux, seulement, comme elle est souverainement sage par tout, aussi en dispense-t-elle l'ysage d'vne maniere tres-conuenable; C'est vne

DE LA MORALE CHREST. chose indubitable que s'il estoit possible d'amener les hommes à leur devoir par la seule voye de la persuasion & de la douceur, & leur nature, & celle de l'Euangile nous obligeroit à ne nous seruir iamais d'vne autre methode. Leur nature : car ils doiuent auoir l'ame noble. Or cette noblesse ne paroist pas seulement à supporter la contrainte impatiemment; mais aussi, & principalement à se laisser conduire par la verité & par laraison, & à obliger ses affections à ceder à la vertu, dont toute ame veris tablement esseuée reconnoist, & venere, & subit volontairement l'empire, Celle de l'Euangile aussi. Car c'estoit bien le genie de la Loy, d'imprimer de la terreur dans les entendemens des hommes, & de gourmander leurs affections par la denonciation de ses maledictions. Quant à la douceur de la Grace, Dieu l'auoit bien à la verité meslée dans l'economie legale; mais elle y entroit comme vne chose estrangere, seulement pour en temperer vn peu la rigueur & l'austerité. A peu prés comme a l'embouchure des grandes

96 SVITE DE LA DERN PART. rivieres dans la mer, l'eau, dont il seroit absolument impossible de boire autrement, devient en quelque sorte potable par l'adoucissement de sa salure. Mais quant à l'Euangile, il en est tout au rebours. De son naturel il n'est propre qu'à remplir les conciences des hommes de consolation, & de paix, & de ioye inenarrable & glorieuse; & s'il employe quelqueseuerité en ses exhortations&en fon administration, ce messange luy est encore plus estranger que ne sont à l'Economie de la Loy, les veines de Grace qui s'y rencontrent. C'est pour-quoy dans l'vsage de la puissance qu'il communique à ses Ministres, ils doiuent non seulement commencer par la douceur, mais y perseuerer aussi longtemps qu'ils auront sujet d'esperer de reduire les pecheurs à la repentance par cette voye. Que s'ils n'en peuuent ainsi venir à bout, S. Paul demandant a quelques-vns s'ils desirent qu'il vienne à eux anecla verge, ou anec va esprit de donceur, monstre qu'il y a certaines occasions où il faut necessairement que la seuerité soit employée. Et de fait, il en aluy-

DE LA MORALE CHREST. à luy-mesme vsé quand la necessité l'a requis, en retranchant de la communion de l'Eglise ceux qui l'auoyent merité, & mesmes en les liurant à Satan, ce qui estoit, comme i'ay desia dit, le dernier degré de rigueur auquel on pouuoit faire monter les censures Ecclessastiques. Seulement ces paroles de ce S. Apostre doiuent tousiours estre deuant les yeux de l'esprit des Ministres de l'Euangile en cette partie de leur administration : c'est que la puissance qui leur a esté donnée n'est pas pour seruir à destruction, mais à edification. Ce qui se doit entendre non seulement à l'egard des Eglises toutes entieres, à la conseruation & à la sanctification desquelles il faut viser en censurant les particuliers: mais aussi à l'egard de ceux là mesmes fur qui ces corrections viennent à romber, parce qu'elles ne doiuent tendre à autre but qu'à leur-amendement & au salut de leurs ames. Et cela regard eles scandales qui arrivent sans qu'il en naisse aucune contestation des fidelles entr'eux: car quant à ce qui concerne leurs demessés, & l'autorité que l'Eglise a de

98 SVITE DE LA DERN. PART. les terminer, c'est vne chose qui merire vne consideration particuliere. Il est certain que là où les offenses que les fidelles reçoiuent les vns des autres, sont de telle nature, qu'on les peut appeller des crimes, dont la reparation consiste en certaines peines corporelles, ou en des corrections infamantes, c'est au Magistrat à en ordonner. Car l'Eglise n'a point de pouuoir sur les corps des hommes, ny sur ce qu'on appelle l'honneur, c'est à dire sur cette reputation de vertu & de probité, dont la perte rend les personnes ignominieuses & incestables. Dans les affaires dont l'interest est pecuniaire, s'il les faut vuider par autorité, de sorte que l'execution de la sentence qui les reigle, se puisse faire par la voye de la contrainte, par l'execution des meubles, par la saisse des immeubles, & par telles autres voyes de Iustice ausquelles il faut obeïr malgré qu'on en ait: c'est encore au Magistrat à en prendre connoissance, parce qu'il n'y a que luy seul qui ait iurisdiction pour cela. C'est pourquoy les Ministres ne doiuent rien entreprendre de cette na-

DE LA MORALE CHREST. ture, s'ils ne veulent passer les limites de leur vocation. Mais quant aux differens qui alterent seulement la charité, ou qui ne font autre mal sinon qu'ils donnent du scandale à l'Eglise, parce qu'ils sont de mauuais exemple, & qu'ils rompent son vnion : ou qui interessent tellement l'honneur, que la reparation & la satisfaction n'imprime à celuy qui la fait, aucune autre flestrissure que la rougeur de la honte d'auoir offensé temerairement son prochain; nostre Seigneur, dans ce passage où il dit, Disle à l'Eglise, autorise les Ministres de l'Euangile, quand ils sont assemblés en Synode, en Colloque, ou en Consistoire, à y apporter le remede auec quelque autorité. Car c'est à eux à procurer le restablissement de la charité, quand elle est interessée; & à repurger l'Eglise de Dieu des scandales, quand il s'en commet quelques-vns au deshonneur de la verité; & enfin, à empescher que les fidelles qui la composent, s'offensent les vns les autres, & procurer à chacun qu'il puisse iouir paisiblement de la re-

FOO SVITE DE LA DERN. PART. putation de sa vertu. Le denoir des Pasteurs en telles occasions consiste principalement en trois choses. La premiere est qu'ils se monstrent iustes, sans, come dicleS. Apostre pancher ny d'on ny d'autre costé. De toutes les choses que Dieu recommande aux luges, il n'y en a point qu'il inculque plus souvent, ny auecque des paroles plus emphatiques, que la iustice & la droiture, pour rendre à chacun ce qui luy appartient. Caril dit que celuy qui instifie le coupable, & qui condamne l'innocent, luy sont ega-lement en abomination. Il defend seuerement d'vser d'acception de personnes, & d'auoir égard à autre chose qu'aux actions mesmes dont ils iugent, & d'y mettre en consideration les choses qui viennent de dehors. C'est à dire qu'il ne veut pas qu'on ait égard au riche à cause de sa richesse, ny au pauure à cause de sa papureté, ny au puissant à cause de son antorité, ny au foible à cause de sa foiblesse, pour prononcer à cette occasion autrement que ne demande la nature de la cause qui est amenée en juge-

DE LA MORALE CHREST. ment. Il veut que la haine, & l'ennie, & la colere, & la pitié, & les autres choies semblables, soyent bannies de deuant ceux qui sont assis sur les tribanaux. En vn mot, il ordonne qu'vn bon iuge soit fans passion, sans interests, sans affection & sans auersion pour l'vn ou pour l'autre des contendans, & qu'il soit, s'il estoit possible, comme seroit vne Loy, s'il y auoit moyen de l'animer & de luy donner vn entendement, sans la reuesir des passions & des perturbations de l'ame. Enfin, il prononce que ceux qui en vleront autrement, ne le porteront pas impunément, parce qu'ils doiuent considerer que c'est sa iustice & non la leur qu'ils administrent. Car comme les fautes des seruiteurs rejaillissent iusques sur leurs maistres, quand ils gerent les affaires qu'ils leur ont commises, autrement qu'il ne faudroit : & comme celles. des Ambassadeurs, quand ils exercent leurs fonctions, sont en quelque sorte imputées aux Princes qui les enuoyenta & comme celles des Officiers & des Magistrats subalternes, sont quelquesa fois attribuées à ceux qui les ont establis

G iij

O2 SVITE DE LA DERN. PART. ceux que Dieu a esseués en autorité pour administrer la justice entre les humains, interessent l'honneur de sa Majesté dans leurs iniquités quand ils en commettent. Et les souverains y dowent prendre garde de plus prés que les autres, princi-, palement pour deux raifons. C'est que fi on reçoit quelque tort d'vn iuge inferieur, le dommage n'en est pas irreparable : parce que celuy qui est au dessus peut corriger ce qui a esté mal iugé. Au lieu que les sentences des souuerains estans sans appel, le mal que fait leur iniquité est de necessiré sans remede, Et de plus, les Magistrats inferieurs sont beaucoup plus esloignés de la Diuinité que les souverains, & ne dependent d'elle finon par vne communication mediate. De sorte que le blasme de leurs mauuais iugemens ne monte pas iusques à Dieu, & s'arreste en grande partie sur la puissance entremoyenne. Aussi Dieu est'il beaucoup plus ialoux de corriger les Arrests des souverains quand ils sont injustes, que les sentences des inferieurs, tant pour reparer le tort qui est fait aux particuliers, que pour se monstrer le

De La Morale Chrest. 103 garend de sa propre gloire. Or est-il bien vray que comme les iugemens rendus par les Magistrats ciuils, sont ordinairement de beaucoup plus grande importance que ceux que les Ministres prononcent sur les differens des fidelles particuliers, aussi semble-t-il que ces des nonciations se font auec plus de seuerité contre eux que contre les autres. Neantmoins, cela ne laisse pas de s'estendre aux Ministres de l'Euangile à proportion de l'importance de leurs iugemens. Car encore qu'il ne s'y agisse ny de la vie, ny des biens, ny de cet honneur dont la perte rend les hommes ignominieux, il ne laisse pas d'y auoir entre les fidelles des differens qui sont d'vne consequence considerable. De sorte qu'on n'y peut negliger le droit sans y faire vn tort signale, dont les juges Ecclesiastiques ont à rendre conte deuant Dieu, aussi bien que les Magistrats de leur administration politique. Ie ne suis pas de l'opinion des Storques, qui pour prouuer que tous les pechés sont egaux, alleguoyent cette raison, qu'vn Pilote qui par sa mauuaise conduite, fait faire

G iiij

104 SVITE DE LA DERN. PART. naufrage à vn nauire chargé d'or, com? met vne aussi grande faute que si le vaisseau ne portoit que de la paille. Plus la marchandise est precieuse, plus faut il auoir de soin de sa conservation. De forte que si c'est par l'ignorance du Pilote que le nauire perit, il a beaucoup plus de tort d'auoir entrepris de faire vne chose qu'il ne sauoit pas, où il s'agissoit de beaucoup, que là où il n'alloit que de peu. Et si c'est par negligence, & par peu de soin, ce vice est beaucoup plus blasmable dans les grandes que dans les petites choses. Mais pourtant, quand il est question de juger entre des freres, de quelque chose dont il s'agisse, il y va de la conscience, de rendre à chacun ce qui luy appartient : & où il y va de la cons science, il n'y a iamais rien de petit. De plus, la faute d'vn homme qui manque à son deuoir, croist à proportion de ce qu'il est obligé de donner de bons exemples. Or est il bien vray que les Magistrats y sont tenus: mais les Ministres de l'Euangile y ont vne obligation encore plus particuliere. Car ils sont comme les tours basties pour seruir

DE LA MORALE CHREST. 105 de phares à ceux qui nauigent sur la mer. S'ils n'éclairent comme il faut, non seulement ils sont cause que les Nauires perdent la droite route de leur cours, mais mesmes qu'ils se vont briser contre les rochers, ou eschouër miserablement au riuage. Et si les Magistrats commettent des injustices, les Ministres, qui doiuent estre plus éclairés, n'ont point de couleur d'en prendre l'occasion de se licencier à mal iuger. Mais si ceux cy s'abandonnent à l'iniquité, le maquais exemple en va iusques aux Magistrats, qui semblent estrebien fondés à s'excufer s'ils l'imicent. Enfin, dans les affaires qui dependent du jugement des Magistrats, il arriue assés souuent que la caule est embarassée, & le droit des parties embrouillé; parce qu'il y a de la contrarieté dans les loix, de l'obscurité dans les questions, & des difficulcés de droit qui donnent quelque lieu à la faueur pour les amis, dautant que les choses sont problematiques. Tellement que les iugemens qu'ils y rendent, peuuent estre iniques sans neantmoins estre scandaleux, parce qu'on n'en apperçoit

106 SVITE DE LA DERN. PART. pas affés distinctement l'injustice. Mais en ces differens qui se vuident dans les Presbyteres & dans les Synodes, il arrime rarement, sion y veut prendregarde, que le droit ne soit assés clair; de sorte que sion s'en écarte, il faut que ce soit par passion. Or de voir des Ministres de l'Euangile qui iugent de quelque chose par passion, c'est un horrible scandale. La seconde chose à laquelle ils doiuent soigneusement regarder, est qu'en l'administration de leurs iugemens ils ten-dent autant à l'amendement de celuy qui auoit le tort, qu'à la satisfaction de l'autre à qui ils ont procuré la reparation de l'offense. Car les Magistrats ordinaires, n'estans establis que pour faire rendre à chacun ce qui luy appartient, se contentent de cela dans leur administration; & quand vne fois ils ont ordonné que Titius ou Meuius aura telle somme d'argent qui luy appartient, ou possedera telle maison qu'on luy detenoit injustement, ou receura telle satisfav Stion pour vne iniure qui a esté faite à sa personne, ils nese messent plus de rien que de l'execution de leur iugement.

DE LA MORALE CHREST. Mais quant aux Ministres de l'Euangile, la qualité de Iuges qu'ils ont dans les Assemblées Ecclesiastiques, ne leur oste pas celle de Pasteurs. Or le delinquant estant leur brebis, aussi bien que celuy en faueur de qui la sentence a esté prononcée, l'vsage de leur houlette doit consister à le ramener à son deuoir. Ce qui ne consiste pas seulement en la res paration du tort en ce qu'il y a d'exterieur, mais aussi & principalement en la bonne constitution de son esprit & en l'amendement de son ame. La troisieme chose finalement est commune à toutes les parties, non du Ministere seulement, mais de la vie des Pasteurs & de tous les autres fidelles de Iesus Christ, c'est que tout se face à la gloire de Dieu, & pour l'auancement du regne du Sauueur du monde. La charge des Magistrats, mesmes dans les iugemens qu'ils rendent sur les differens des particuliers, regarde au seruice du Prince & au bien general de tout l'Estat. Car comme on dit dans la Philosophie, que ce qui est vniuersel ne subsiste que dans les choses particulieres & individuelles

108 SVITE DE LA DERN. PART. la Republique à quelque chose de sem-blable, parce que n'estant composée que de personnes singulieres, de l'interest de chacune est composé l'interest general de tout le corps. Tellement que quand par l'autorité de la iustice l'vn des citoyens a obtenu ce qui luy appartenoit, & puis encore vn, & puis encore vn autre, & ainsi consecutiuement, il se trouve ainsi que la Iustice regnant partout le corps de la Republique, elle se trouue toute entiere dans l'estat auquel elle doit estre pour posseder sa felicité. Mais cela ne passe pas plus auant, & si vn Magistrat regarde à la gloire de Dieu en l'administration de sa charge, cela luy vient du zele que luy inspire le Christianisme, qui a espandu de nouvel-les lumieres sur la Politique, & donné à ceux qui l'exercent, des sentimens & des mouuemens que les anciens legislateurs ne connoissoyent point. Mais dans l'exercice de cette iustice Ecclesiastique dont ie parle, le dernier but auquel on doit tendre est la gloire de Dieu, selon ce que l'Apostre nous dit que quoy que

nous facions, nous y deuons rapporter

DE LA MORALE CHREST. 109 vniuersellement toutes choses. Et elle resulte de cette administration quand on s'en acquitte fidellement : parce que le general de l'Eglise est en bon estat quand tous les particuliers ont iuste sujet de contentement, & que c'est vne chose qui tourne à l'honneur de l'Euangile de voir que ceux qui s'estoyent laissés emporter à quelque injustice contre leurs freres, soyent amenés à repentance par la remonstrance & par la correction, & que c'est vne chose pleine d'edification, & qui redode à la louange du souuerain maistre, quad ses serviteurs, qu'il a commis à la coduite de son peuple, s'acquittent de leur deuoir en toute verité & sincerité. Et de plus, voir vne societé comme est l'Eglise, composée de telle sorte, & animée d'vn tel esprit, que toutes les parties en conspirent vnanimement à la pieté enuers Dieu, à la charité enuers les home mes, à la iustice en toutes leurs actions, & generalement à toutes les choses esquelles consiste la vraye sanctification, c'est vn spectacle digne de l'admiration de toutes les creatures intelligentes qui

HO SVITE DE LA DERN. PART. sont dans la terre & dans les Cieux, & en qui la sainteré de Dieu mesmes reluie à merueilles. Il y a encore cette difference entre les societés politiques de l'Eglise de nostre Seigneur, qu'encore qu'ordinairement les interests des particuliers forment celuy de tout l'Estat, si est-ce qu'il arriue quelquessois des conjonctures où pour le bien general de toute la Republique, on est en quelque façon contraint de faire souffeir de l'injustice à quelcun de ses citoyens. Et iamais il n'y eut aucun Estat si heureux que l'vtilité de tous les particuliers & la sienne, se rencontrassent ensemble en toutes occurrences. C'est pourquoy on est quelquessois contraint de ietter quelques marchandites, & mesmes quelques personnes en la mer, afin d'empescher que tout le vaisseau ne face naufrage. Et bien que la iustice doine estre en souveraine recommandation à toutes fortes de gens vertueux, si est-ce qu'Aristide meime, qui en sembloit estre come le souverain Prestre entre les Atheniens, n'a pas laissé de confesser qu'il en falloit quelquesfois abandonner le Culte & la

DE LA MORALE CHREST. IT deuotion, pour seruir aux interests de la Republique. Dans l'Eglise il n'en est pas de mesme. C'est vne erreur, en l'administration des choses qui la concernent, de s'imaginer qu'il faille quelquesfois commettre des injustices pour le bien general de l'Eglise ou de la Religion. C'est vne maxime generale & qui se doit pratiquer en toutes les choses qui concernent sa conduite, qu'il ne faut iamais faire le mal afin qu'il en arriue du bien, & que qui veut messer cette prudence politique dans le gouuernement du peuple de Dieu, offense nostre Seigneur Iesus Christ, qui l'a pris en sa protection, comme s'il auoit besoin de l'iniquité des hommes pour le conseruer. Condamner vn innocent sous ombre que l'on s'imagine qu'il est ainsi expedient pour l'avancement de la gloire de nostre Seigneur; iustifier vn coupable, parce qu'on estime qu'il est ainsi à propos pour le restablissement de la paix en quelque troupeau; donner impunité aux crimes des contempteurs de l'ordre public, & conniuer aux fautes de ceux qui foulent la Discipline aux 1 2

Fiz SVITE DE LA DERN. PART. pieds, parce que l'on craint que par leur violence & par leur opiniastreté ils nemettent tout sans-dessus-dessous, c'est vne prudence de la Chair, l'vsage de laquelle nostre Seigneur n'approuuera pas quand il fera paroistre ses serviteurs fur son Tribunal, pour luy rendre conte de leur conduite. Ie vous auois bien, dira-t-il, recommandé d'estre prudens comme serpens, mais ie vous auois auss dit qu'il falloit estre simples comme colombes. Est-ce donc-là cette simplicité que i'ay requise de vous, que vous apportiés à la conduite de mon Eglise, les considerations du siecle, les egards de la prudence de la chair, & les biaisemens des fages de ce present monde ? Si en faisant instice mon Arche vous paroissoit estre en peril de tomber, auiés-vous si grand peur, ou que ie ne me souuinsse pas, ou que ie ne me souciasse pas, ou que ie n'eusse pas le pouuoir de la soustenir, que vous ayés creu qu'il y fallust porter des mains qui non seulemet n'y auoyent point de vocation, mais dont le pretendu secours ne pouvoit estre recompensé que de mon irritation & des playes qui

en

ch dependent. En effect il arriue tous jours tost ou tard que Dieu sait paroistre comme en plein iour que cette administration ne luy est pas agreable. Mais c'est assés de cela; disons maintenant quelque chose des sonctions de la charge de Pasteur dans la visitation des malades, & dans les autres occasions qu'en comparaison de ce qui a esté traitté cy-desus, l'on peut appeller particulieres.

Ie mets la visite des malades au premier rang, parce que c'est & la plus ordinaire & la plus importante. Car dans vn troupeau tant soit peu nombreux il y a tousiours quelcun qui se sent de l'infirmité de nostre nature. Et dans cette occurrence-là on a plus besoin de l'assistance de ses Pasteurs, parce que l'affliction en est sensible, & latentation grande, principalement si les maladies sont on longues, ou douloureuses, & encore plus si, comme il arriue quelquesfois, ces deux choses-là se rencontrent dans vne mesme souffrance. Car quat aux longues maladies, bien qu'elles ne soyent pas accompagnées de beaucoup de donleur, il y a cela d'importun, qu'elles in-

H

114 SVITE DE LA DERN. PARTS terceptent les fonctions de la vie, qu'elles priuent la personne de l'vsage des honnestes voluptés, & qu'elles mettent yn homme en estat d'estre yn spectacle de l'imbecilité humaine, & vn objet dans lequel les autres contemplent à loisir & à diuerses reprises, les suites calamiteuses du peché. Celles qui sont fort douloureuses, encore qu'elles ne soyent pas longues, ont quelque chose d'extraordinairement cuisant. Parce que quand on ne sent gueres de mal, quoy que la maladie soit de durée, elle laisse pourtant la liberté aux fonctions de l'esprit, qui quand il peut agir de toute sa force, trouue toujours, en quelque sorte d'affliction que ce soit, quelque endroit par où l'enuisager, & quelque anse par où la prendre, en sorte qu'il ne la trouue pas si fascheuse qu'il ne la puisse ou soulager ou adoucir de quelque consola-tion. Mais les grandes & violentes douleurs mettent en quelque façon l'esprit de l'homme hors de son assiette : de sorte qu'il faut estre soustenu d'vne force extraordinaire pour s'y pouuoir maintenir. Et de fait, on void peu sou-

De LA Morale Chrest. 115 hent que les longues infirmités sans douleur portent les hommes à prendre de violentes resolutions contre euxmesmes: & si Pomponius Atticus s'affermit à vouloir mourir à l'heure qu'il ne sentoit plus de mal, c'est vn exemple si rare que peut estre personne ne l'a imité. Mais il ne se void que trop sou-uent que les douleurs extremes iettent les hommes dans le desespoir, & leur ont faire des choses qui sont contre les mouuemens ordinaires de la Nature. En fin, quand les maux sont grands & durables, c'est ce semble la derniere espreune à laquelle la Prouidence de Dieu puisse mettre la patience des humains. Epicure disoit des maladies, que les longues sont legeres, & que les griefues sont courtes, & c'estoit en cela qu'il trouuoit la principale consolation qu'il y falloit apporter. Mais l'experience monstre quelquesfois que cette reigle n'est pas generale, & qu'il y a des maladies qui sont tout ensemble de longue durée, & accompagnées de grandes douleurs. Et c'est là où non seulement la Philosophie d'Epicure, mais celle de Platon meime &

116 SVITE DE LA DERN. PART. d'Aristote, demeure courte, & où l'on ne peut appliquer de solides consolations sinon celles qui sont tirées de la Parole de Dieu. Vn Ministre de l'Etiangile donques doit estre soigneux de les y aller dispenser, afin de soulager les fidelles en leurs ennuis, & d'empescher qu'en cette sorte de tentations leur foy & leur patience ne succombe. Il y a pourtanticy deux observations à faire, I'vne pour le temps de le faire, l'autre pour la façon. Ie dis pour le temps premierement, parce que ny l'estat des malades, ny les occupations des Pasteurs, ne permettent pas que cela se face à toutes heures, c'est pourquoy il est bon de les choisir. Les malades donques, qui ont besoin de consolation, & ceux qui sont autour d'eux pour leur rendre leurs assistances, doiuent en appellant les Pasteurs, comme la Parole de Dieu les y oblige, prendre garde de ne troubler pas importunément les Ministres de l'Euangile dans les occupations où ils sont employés pour le Public. Carils sont bien Pasteurs de chaque fidelle à la verité, & en est egard ils leur doiuent

DE LA MORALE CHREST. 137 leur secours & leur presence. Mais leur Ministere appartient encore plus à l'Egliseroure entiere, du service de laquels leil n'est pas raisonnable qu'on les détourne pour rendre des offices particuliers. De sorte que là où il n'y a point de necessité absolument inuincible, il est de la sagesse de ceux qui gouuernent les malades, de laisser vn Ministre en repos quand il vacque à quelque meditation pour l'edification du Public. Les Ministres aussi de leur costé, quand ils se disposent d'eux-mesmes, ainsi que leur charge les y oblige, à visiter les malades sans qu'on les y ait appellés, doiuent s'enquerir de leur estat, pour voir si cetse heure-là leur est commode. Car les remedes, & leurs effects, & le repos, & le repas, & diuerses autres conjonctures, mettent assés souvent les malades hors des termes de pouvoir apporter de l'attention aux paroles de l'exhortation 35 de la consolation qu'on leur voudrois departir. Et en telles occurrences le Pasteur perd inutilement son temps & lemalade ne le peut ouir; ou si on ne le veutpas renuoyer sans l'écouter, il arrie

H iij

118 SVITE DE LA DERN. PART. ue quelquesfois qu'au lieu de consoler il importune. Ie dis aussi pour la façon, Car il y a de la prudence à iuger des circonstances des choses & à chossir les occasions. Il y a tel malade dont il faut humilier l'esprit par la representation de ses fautes, pour luy en imprimer le repentir: & tel autre qui en est de luymesme si sensiblement touché, qu'il faut espandre le baume de la misericorde de Dieu dans les playes de sa conscience. Il y en a tel autre encore qu'il faut instruire par des propos estendus, & à qui l'attention qu'il y faut apporter ne fait point de tort : & tel à qui il n'est pas ny necessaire ny peut estre mesme expedient de parler que par interualles, & par des sentences brieues, parce que la violence de la douleur, ou l'extremité de sa foiblesse, ou les autres choses qui causent de la distraction à ses pensées, ne luy permettent pas de tenir long-temps son esprit tendu sur vn mesme objet. Quelquesfois on n'a pas seulement egard au malade, on regarde aussi à l'edification des assistans. Car les yns ont besoin d'estre fortisés, aux autres il est

DE LA MORALE CHREST. necessaire de leur doner quelque instruction, & quand ils'y rencontre quelcun de difference Religion, il est souverainement important de luy faire voir combien l'Euangile, quand il est annoncéensa pureré, est capable de consoler efficacement les ames des hommes. Sur tout vn Ministre de l'Euangile doit estre soigneux de ne manquer pas à assister les sidelles à l'heure de la mort, lors que cet ennemy de la Nature desploye ses plus terribles espouuantemens, & que le sentimet du peché se réueille das la conscience, & que la sustice de Dieu se reue le en son plus haut appareil, & que le malin fait ses efforts pour se preualoir de la foiblesse de la Chair pour attaquer l'esprit, & pour y mettre quelques doutes contre la verité des promesses de l'Euangile. De sorte qu'il n'y a point d'occasion où il soit plus requis de soustenir les fidelles contre les tentations, ny où la Parole de Dieu monstre plus manifestement son vsage. Comme aussi. quand il plaist à Dieu benir les instruations & les consolations qui s'en tirent en telles ocçasions, & de fiire que le fig

H iiij

120 SVITE DE LA DERN. PART. delle triomphe magnifiquement de tous ses ennemis en ce dernier combat, il n'y a rien qui mette la verité de la Religion Chrestienne en plus beau iour, soit pour la ioye & la consolation des gens de bien, soit pour l'edification de ceux de dehors, ou mesmes pour la conversion des prophanes. Et le Ministre mesme en reçoit vne satisfaction quine se peut exprimer, de voir le Ministere qui luy a esté commis, ratifié par l'efficace de l'Esprie de Dieu, & les fidelles de nostre Seigneur gouster la vie eternelle dans les estraintes de la mort, & au trauers de la pourriture du sepulchre dans laquelle se doiuent dissoudre leurs corps, anticiper de la pensée la bien-heureuse iournée de l'apparition de Christ, auecque l'incorruption & l'immortalité glorieuse. Il y a vne infinité d'autres occasions en la vie, où si les particuliers n'ont besoin de l'assistance de leurs Pasteurs, les Pasteurs ne laissent pas d'estre obligés de leur faire paroistre leur affection, & la part qu'ils prennent dans les choses qui les concernent. Car ce precepte de l'Apostre, soyés en ioye auecque ceux qui

DE LA MORALE CHREST. 127 sont enioye, & soyés en pleur auec ceux qui sont en pleur, regarde bien tous les Chrestiens: mais il n'y en a point à qui la pratique en soit si conuenable qu'aux Ministres. Dans les occasions de tristesse donques, de quelque nature qu'elles foyent, (& la vie humaine en fournit de mille façons,) il doit visiter les fidelles pour les consoler: & dans les occasions de ioye il les doit exhorter à s'y comporter moderément, & à en témoigner leur gratitude à nostre Seigneur par leurs actions de graces. S'il arriue à quelcun de s'emanciper de son deuoir, il le doit ramener par remonstrances; si vnautre se laisse aller à l'imitation des coustumes de ce present siecle, il luy doit mettre deuant les yeux la sainteré de la profession de l'Euangile de Christ; s'il arriue des dissensions entre ceux de son troupeau, il doit trauailler à les appaiser; & tascher, où l'occasion le requiett, de reconcilier les femmes auec leurs maris, les peres auec leurs enfans, les freres auec leurs freres, & generalement

essayer d'imiter la Providence de Dieu au gouvernement du monde. Car d'au122 SVITE DE LA DERN. PART! cant que la subsistance de l'Vniuers de pend de l'union de ses parties, & qu'ele les ne se peuvent diviser sans le ruiner, cette Prouidence qui preside sur toutes choses, a vn si merueilleux soin d'entretenir cette vnion, que plustost que d'y souffiir aucune alteration, elle inspire aux elemens des sentimens & des mouuemens contraires à lours inclinatios naturelles. Car plustost que de souffrir du vuide par leur separation, l'air descend en bas, & la terre & l'eau vont contremont, & chaque chose renonce aux impressions que la Nature luy auoit données. Le fidelle Ministre donques, considerant que la conservation de l'Ex glise consiste en l'harmonie de ses parties, & en leur estroitte conjonction, tascheratant qu'il pourra d'en empescher la diuision, & obligera plustost par ses exhortations les Chrestiens, à deposer la consideration de leurs interests, & à renoncer à leurs ressentimens, quelques iustes qu'ils peussent estre. Cependant, en toutes ces choses il se doit souvenir de la circonspeaion que l'Apostre veut que Timothée

DE LA MORALE CHREST. 123 apporte en l'œuure du ministere. Car il veut bien qu'il insiste à exhorter en temps chors temps. C'est à dire, que non seulement il ne perde aucune occasion de le faire, mais mesmes qu'il les fasse naistre, & que là où il ne sembleroit pas d'abord qu'il y eust apparence de parler, il passe par dessus diuerses confiderations pour representer leur deuoir aux hommes. Mais neantmoins il y a de la distinction entre les conditions des personnes, & de la difference entre leurs aages, & diuerses autres circonstances, qui obligent vn Ministre de l'Euangile à varier cette dispensation de la Parole de Dieu. D'autant que les Prophetes ont autresois parlé merueilleusement hardiment aux Rois, & aux Gouuerneurs du peuple d'Israel, quelques vns se sont imaginés qu'il estoit permis aux Ministres d'en faire de mesme. Certainement, parce que les Monarques & les Grands du monde, sont hommes, ils doiuent estre les objets de nostre charité: parce qu'ils sont Chrestiens, leur salut doit estre celuy de nos soins: parce que leur charge regarde le

SVITE DE LA DERN. PART. bien de beaucoup de gens, nous deuons, autant qu'il nous est possible, procurer qu'ils s'en acquittent fidellement: enfin, parce que leur deuoir les oblige à estre les nourriciers de l'Eglise de Dieu, coux à qui Dieu en a commis la conduite, leur en doiuent, autant qu'ils pourront, inspirer l'affection & le zele. Mais neantmoins, leur souveraine autorité, & la dignité à laquelle ils sont esseués au dessus des autres mortels, nous les doiuent tousiours saire considerer auecque beaucoup de respect, pour leur dispenser les remonstrances & les exhortations en telle façon que nous n'effleurions rien de leur majesté ny de leur puissance. Car il y a cette difference entre les Prophetes & nous, qu'ils estoyent enuoyés immediatement de Dieu, & nous non; qu'ils parloient en vertu d'vne extraordinaire inspiration, & d'vn commandement exprés de la part de l'Eternel, & nous ne faisons finon appliquer les preceptes communs & generaux de la Parole de Dieu, aux choses particulieres. Ils estoyent proprement Ambassadeurs du Dieu souuerain, comme

DE LA MORALE CHREST: 124 3. Paul dit que luy & ses compagnons l'estoyent de nostre Seigneur Iesus Christ: & nous n'auons cette qualité là que par quelque analogie seulement, encore est elle foible & diminuée. Et comme les Rois auoyent une onction de par Dieu qui les consacroit pour le souuerain commandement en l'Estat, les Prophetes en auoyent vne qui leur donnoit vne souveraine autorité en l'Eglise. Quant à nous nostre on ction ne consiste sinon en la communion de la grace de l'Esprit de Christ, qu'il communique comme il luy plaist à ses serviteurs, mais qui ne les esseue nullement à ce degré d'autorité qu'ont eu les Prophetes & les Apostres. C'est pourquoy, comme nous ne deuons pas estre muets par lascheté, nous ne deuons non plus estre insolens par la presomption de nostre caractere. Comme l'Esprit que nous auons receu ne doit pas estre de timidité, pour nous empescher de faire nostre deuoir, aussi doit-il estre de sens rasis, pour le faire auec retenuë & bienseance. Et s'il n'estoit pas hors de l'estenduë de Rose Euesque de Senlis, de repren-

126 SVITE DE LA DERN. PART. dre en ses predications les courses no-Eurnes & les mascarades de Henry troisieme pendant la licence du Carnaual, la façon insolente dont il le faisoit, ne laissoit pas de meriter vn chastiment bien seuere. Tellement que ce fut vn grand effect de la douceur ce Prince, de se contenter de luy appliquer cette correction, qu'il trouuoit bien estrange sa seuft courules ruës la nuict vne ou deux fois seulement, veu qu'il les luy auoit laissé courir si long-temps sans luy dire mot, lors qu'il auoit, comme il auoit eu effectiuement, la ceruelle renuersée. Ceux qui ont dit autrefois qu'il se falloit seruir de paroles de soye enuers les Rois, ont eu egard à la douceur seulement; mais en donnant mon approbation à cet apophthegme là, ie croy neantmoins qu'on y peut bie auoir aussi egard a la force. Car il est certain que les paroles dont on forme les liens qui tirent & qui attachent les esprits des Princesà leur deuoir, sont incomparablement plus efficaces quand elles sont accompagnées de beaucoup de témoiz

DE LA MORALE CHREST. 127 gnages de respect; & bien que peut offre il y auoit quelque chose à redire en la complaisance de Fauorinus, qui n'osoit maintenirla verité contre vn Empereur, parce qu'il auoit quantité de legions, si est-ce qu'il faut vser auec beaucoup de discretió des Canons de la Discipline Ecclesiastique,& de ses cesures enuers ceux qui en ont d'autres dans leurs arsenaux dot la violence est si terrible. Pour le regard des autres personnes, l'Apostre aduertissant son disciple de traitter en ses reprehensions les vieilles femmes comme meres, & les ieunes comme sæurs, donne aux Ministres de l'Euangile vn aduertissement general de mesnager cette partie de son administration auecque toute la douceur & la moderation imaginable.

Lors que l'ay dit que le temps de la maladie est celuy auquel les sidelles ont plus de besoin de l'assistance de leurs Pasteurs, i'ay eu egard aux choses qui peuvent en quelque sorte estre communes aux sidelles & aux autres hommes, & non à celles qui leur sont particulieres entant qu'ils sont sidelles de

128 SVITE DE LA DERN. PART. Icsus Christ. Car au reste, il y a noma mément deux autres occasions ausquelles vn Ministre de l'Euangile doit auoir vn soin tout à fait extraordinaire de la consolation & de la conservation de son troupeau. L'vne est quand il est persecuté pour la verité de Christ, l'autre quand, sans en venir à cette sorte de persecution qui consiste en la perte des biens, en la vexation du corps, & dans les menaces de la mort, les faux Do-&eurs taschent à circonuenir les esleus par leurs artifices. Au temps de la persecution, les Pasteurs doinent regarder sice sont eux qui en sont l'occasion, & si en s'essoignant de leur troupeau, il en pourra estre deliuré, & neantmoins continuer à receuoir l'edification de la predication de la Parole de Dieu par quelque autre. Car si cela est, il ne doit point mettre son depart en deliberation, deust il, par maniere de dire, aller en exil aux Indes. Car si, comme dit nostre Seigneur, le bon Pasteur met sa vie pour ses brebis, combien est-il plus obligé de procurer leur conseruation par la perte de son repos & de son ordinaire habitation

DE LA MORALE CHREST. 129 tion, que par celle de sa vie? Si c'est la seule verité de l'Euangile qui soit l'occasion de la persecution, tellement que toute autre personne qui exerce le ministere au lieu de son establissement, y soit aussi odieuse aux ennemis de l'Énangile que la sienne, vn fidelle Ministre de nostre Seigneur Iesus Christ ne desemparera iamais, & fortifiera son troupeau, tant en public qu'en particulier, par ses exhortations continuelles. Alors il ira, comme dit S. Paul, par les maisons, exhortant, consolant, accourageant, louant la fermeté des vns, soustenant la foiblesse des autres, opposant à la perte des biens de la terre l'esperance des richesses du Ciel, aux mauuais traittemens du corps, la ioye du salut de l'ame, & à l'apprehension de la mort, l'asseurance de la bien-heureuse immortalité & de la resurrection glorieuse. En cette autre sorte de tentation, il ne doit pas estre moins vigilant, parce que le peril n'y est guere moindre. Car la crainte peut à la verité beaucoup sur les esprits: mais l'esperance de son costé ne laisse pas de les corrompre. Et d'ail-

I

130 SVITE DE LA DERN. PART. leurs, la violence de la persecution, & la cruauié qu'on y employe ordinairement, donne aux fidelles vne iuste indignation contre les faux Docteurs qui en sont les instigateurs & les boutefeux, de sorte qu'ils n'ecoutent pas leurs cageoleries. Au lieu que quand ils n'employent à seduire sinon la voye de la suasion, leur douceur affectée, leur zele cotrefait, leurs complaisances estudiées, & l'assiduité de leurs soins, rend leur charlatanerie moins suspecte, & leurs artifices plus dangereux. C'est pourquoy il faut apporter beaucoup d'exa-Etitude & de diligence à empescher qu'ils ne reuffissent, & armer les fidelles de toutes sortes de bonnes pensées contre leurs sollicitations. Et si la necessité requiert qu'vn Ministre de l'Es uangile s'engage dans quelque dispute pour la confusion du mensonge & pour l'éclarcissement de la verité, alors en s'appuyant, non sur la presomption de sa suffisance, & sur la subtilité de son Esprit, mais sur le Seigneur Iesus, qui donne à ses seruiteurs de parler à l'heure qu'il en est besoin, il ne craindra pas de

DE LA MORALE CHREST. 131 liurer de cette sorte de batailles. Seulement y a t-il à observer deux choses en cette rencontre. L'vne est que si ces conferences sont reglées par l'autorité du Public, il y obserue exactement tous les reiglemens Ecclesiastiques & ciuils, afin d'vn costé de ne choquer pas les Magistrais, & de l'autre de ne hasarder pas la gloire de la verité, & l'edification de l'Eglise sans son approbation. L'autre est, que, comme il arriue assés souuent, si ceux à l'occasion desquels ces disputes s'entreprennent, ne les desirent que pour faire le changement de leur Religion auec plus d'éclat, il leur en retranche plustost l'esperance tout à fair, que de donner aux aduersaires de la verité plus d'occasion de triompher. Car quelques bonnes raisons qu'on allegue en telles rencontres, on en juge plustost par l'euenement, & ainsi vn changement qui estoit desia resolu auant qu'on eust our les raisons, leur est ordinairement attribué, bien qu'il soit indubitablement venu d'autre causes.

ikitakakakakakakaka

DV BON EXEMPLE QUE

les Pasteurs doiuent donner en toutes choses.

I E prie les Anciens qui sont entre vous. dit S. Pierre, moy qui suis Ancien auec eux, & témoin des souffrances de Christ: & qui suis aussi participant de la gloire laquelle doit estre reuelée : Paisés le troupeau de Christ qui vous est commis, en prenant garde sur iceluy, non point par contrainte, mais volontairement : non point pour gain deshonneste, mais d'un pront courage: non point comme ayant domination sur les heritages du Seigneur, mais tellement que vous soyés pour patron du troupeau. Et quand le souverain Pasteur apparoistra, vous receurés la couronne incorruptible de gloire. Toutes ces paroles meritent vne finguliere attention, & fournissent d'admirablement belles instructions à tous les Ministres de l'Euangile. Desia, S. Pierre qui les exhorre à se monstrer comme patrons de leurs

DE LA MORALE CHREST 133 troupeaux, leur represente vn merueilleusement beau modelle de modestie en sa personne. Car il estoit Apostre, c'est à direesseué au plus haut degré de dignité & d'autorité où il estoit possible que les hommes peussent monter en l'Eglise. Et il escrit à des Anciens, c'est à dire à desMinistres ordinaires, dont la charge, à la regarder en elle mesme, est digne de toute recommandation. Mais à la comparer auec les Apostres, & les Prophetes, & les Euangelistes, selon que S. Paul les arrange en quelque autre lieu, c'est le plus bas degré de la puissance Pastorale. Il pouuoit donques, s'il eust voulu vser de son droit, leur enjoindre leur deuoir, & toutessois il les prie : il pouuoit se preualoir du tiltre de l'Apostolat, & se concilier ainsi du respect, & neantmoins il dit qu'il est Ancien auec eux, & ne s'attribuérien dauantage. Qui peut douter qu'il n'en ait vsé de la sorte pour apprendre à tous les fidelles seruiteurs de Iesus Christ, que sil'ordre de l'Eglise leur donne quelque forte de preéminence, ils n'en doiuent pas prendre occasion de s'enorgueillira I iii

SVITE DE LA DERN. PART. 134 ou que si Dieu les a auantagés de quelques dons particuliers, ils ne doiuene pas penser que cela les tire hors du pair d'auecque leurs freres ? Il adjouste qu'il est témoin des souffrances de lesus Christ; ce qui fait vne grande partie de la dignité de son Apostolat. Car luy & ses Compagnons ont esté ordonnés pour rendre témoignage de la mort & de la resurrection de nostre Seigneur à tout l'Vniuers, & nous ne les croyons que sur leur parole. Mais cela mesme advertit aussi les Ministres de ne se proposer rien de grand selon le monde en leur predication, & de se resoudre plustost à toutes sortes d'affl ctions, puis que la Croix de Christ doit estre la matiere ordinaire de leurs propos, & tout ensemble le modelle de leurs souffrances. Il se vante certes magnifiquement d'estre participant de la gloire laquelle doit estre manisestée en l'apparition du Seigueur: mais c'est pour proposer la mesme esperance aux Anciens ausquels il escrit. & pour leur donner courage dans les afflictions qui doiuent accompagner

seur ministere. Il les exhorte à paistre

DE LA MORALE CHREST. le troupeau de Christ: ce qui sans doute leur est glorieux. Car il n'est pas icy question de brebis, mais d'hommes vinans: ny des troupeaux ou des haras des Monarques d'icy bas', mais de l'Eglise du Roy des Rois, qu'il a acquise par son propre sang, & regenerée à son image. Et ce qu'il dit que ce troupeau leur a esté commis, est vn aiguillon à leur deuoir. Car puis que nostre Seigneur l'a mis en depost entre leurs mains, & l'a donné en garde à leurs ioins, c'est à eux à en rendre conte. Neantmoins il ne veut pas qu'ils y prennent garde comme par contrainte, mais volontairement. Parce que ce qui se fait par contrainte se fait à regret, & que naturellement nous auons. de l'auersion pour les choses ausquelles. on nous porte malgré que nous en ayos. Au lieu que la nature du troupeau, & la qualité de celuy qui le nous a commis, & la fin de cet employ, & l'effect qui en resulte, & generalement toutes les choses à quoy aboutit cette intendance pas storale que Dieu no done sur ses brebis, doiuent posseder toutes nos aff. ctions, donner puissamment & toutessois dous

136 SVITE DE LA DERN. PART. cement l'impulsion à nos mouuemens, & gouverner avec vn souverain contentement toutes les parties de nos ames. Il adjouste encore qu'il ne faut pas que ce soit pour gain deshonneste, mais d'vn pront courage: ce qui peut receuoir vne double interpretation. Car si vous considerés ces mois de gain deshonnesse à part, il semble que l'Apostre vueille dire qu'ily a dans les fonctions du ministere quelque gain qu'on peut qualifier hon-neste, parce qu'il est iuste & legitime; comme de fait S. Paul dit qu'il est raisonnable que ceux qui seruent à l'autel viuent de l'autel, & si aucun ne va à la guerre à sa propre solde, on ne doit pas requerir des Ministres de l'Euangile, qui sont, comme dit le mesme Apostre en parlant à son disciple Timothée, les soldats de Ch. ist, qu'ils facent cette milice à leurs despens, & qu'en fournisfant les choses spirituelles aux Chresties, ils soyent priués de l'vsage des corporelles. Et si vous les considerés en l'opposirion que l'Apostre en fait auecces autres paroles, mais d'un pront courage, il semble qu'il ait voulu donner à enten-

DE LA MORALE CHREST. 137 dre qu'encore que ce gain soit iuste en luy-mesme, si est-ce que si les Pasteurs ne sont portés à faire leur charge que par la consideration du profit qui leur en reuient, & non par cette prontitude de courage, & cette alegresse que l'excellence de la chose est capable d'inspirer, ce qui de soy mesme est permis, leur deuient illicite & deshonneste. Et l'yne & l'autre de ces deux choses est veritable. Car ny le gain deshonneste', & qu'vn Ministre fait hors des termes de sa vocation, ne peut estre supporté en luy: ny le plus iuste & le plus legitime de tous les profits n'est plus honneste pour luy, quand il en fait sa principale consideration dans les fonctions de sa charge. Ce doit estre l'amour du Seigneur Iesus, le zele de sa verité, le soin du salut du prochain, l'edification du Public, & le fentiment de son deuoir, qui gouuerne les mouuemens d'vn homme qui exerce cette charge : & quiconque est inspiré de cet esprit, il la fait indubitablement, non pas seulement volontairement, mais auec satisfaction & joye. Il ne veut pas que ce soir

138 SVITE DE LA DERN. PART. comme en dominant sur les heritages du Seigneur, & i'ay desia parlé de cela, de sorte qu'il ne me reste plus à en dire qu'vne chose. C'est que la grandeur de la puissance, telle qu'est celle que les Magistrats ont sur leurs sujers, donne ordinairement de hautes eleuations d'esprit. Et veritablement depuis que les Pasteurs de l'Eglise ont commencé à affecter vne autorité semblable à celle des Princes & des Magistrats terriens, ils l'ont en toutes choses porté si haut, qu'il semble que ce soit en quelque sorte vne differente especes d'hommes. Et le mal est encore qu'on a voulu fonder cette tyrannie en raisons, & qu'on s'est voulu faire accroire qu'il falloit tirer le ministere de l'Euangile du mespris, & imprimer le respect de la Religion, en donnant de la crainte & de la veneration pour ceux qui la seruent. S. Pierre dit icy que ce n'est pas ainsi qu'il faut gouuerner l'Eglise de nostre Seigneur, & qu'il faut donner efficace à la doctrine de Iesus Christ, en se proposant soy-mesme pour patron de toutes sortes de vertus Chrestiennes. Aristote,

DE LA MORALE CHREST. 139 & Ciceron, & Quintilien, & quelques autres, ont esté de ce sentiment, que pour estre bon Orateur, il faut estre homme de bien; parce que si vn homme n'a pas la reputation d'estre vertueux, il n'aura pas bonne grace à exhorter les hommes à l'exercice de la vertu: & au contraire, s'il est en estime d'auoir en vn haut degré toutes sortes de louables qualités, cette reputation donnera vne grande autorité à son oraison, & vn merueilleux poids à ses paroles. En effect, Virgile representant vn homme qui s'auance au milieu d'vne populace émeuë, pour en appaiser la sedition, le descrit comme vn personnage graue & serieux, & à qui le merite concilie de la veneration & du respect, parce que sans cela ses propos, sussentils extraordinairement eloquens, ne calmeroyent pas la tempeste. Et quoy que les medicamens agissent tout autrement sur le corps, que les paroles ne font sur l'esprit, l'operation de ceux là estant physique tout à sair, au lieu que celle-cy est morale, si est-ce qu o espere plus d'vn remede que l'on reçoit de la main d'vn

SVITE DE LA DERN. PART. homme debien, que de celuy que l'on prend de celle d'vn libertin & d'vn desbauché, parce qu'on s'attend que la be-nediction de Dieu secondera plustost les soins de l'vn que de l'autre. Mais tout cela n'est rien au prix de ce que fait à la predication, & à l'administra-tion des Sacremens, & à l'exercice de la Discipline, la bonne ou la mauuaise reputation d'yn Ministre de l'Euangile. C'est pourquoy il faut que ie rapporte icy brieuement les qualités que l'Apostre S. Paul requiert en celuy qui veut paruenir au Ministere, & que ie ramasse d'ailleurs quelques belles actions de ceux qui l'ont exercé, pour en former vn tableau de la contemplation duquel chacun puisse tirer les instructions de sa conduite. Et premierement S. Paul dit que celuy qui veut estre Euesque desire vne œuure excellente : ou la qualité qu'il luy donne est à remarquer. Car Eues que signifie inspecteur, ou intendant, & comme ce terme represente vne charge qui a de l'autorité, aussi marque-t-il bien expressément qu'elle doit estre exercée auecque beaucoup de vigilan-

DE LA MORALE CHREST. ce. Car la premiere partie de la come position de ce mot signifie bien en la langue Grecque, que cette fonction eleue celuy à qui elle est commise au dessus des personnes & des choses qui forment son objet : mais le reste aduera tit que ceux qui la font doit auoir les yeux ouuerts, pour prendre garde soi-gneusement à ce qui est de sa dependance. Le tiltre de Pasteur qui leur est donné ailleurs, ne les aduertit pas moins ouuertement de leur deuoir : car chacun sçait que si les bergers ont de l'autorité sur leurs troupeaux, ils ne sont pas moins obligés & à veiller à leur conduite, & à pouruoir à leur nourriture. Ce qu'ils sont nommés Anges en l'Apoca-lypse, a quelque chose d'extraordinaire-ment glorieux. Car cela n'emporte pas seulemet qu'ils sont les messagers de Dieu, pour porter aux hommes ses volontés, quoy que cela est magnifique tout ce qui se peut ; il les reuest aussi en quelque façon de la condition de ces intelligences bien-heureuses qui sontainsi appelléesen l'Escriture. Or pour ne dire point que leur nature spirituelle est vn

142 SVITE DE LA DERN. PART. embleme du soin que les Ministres de l'Euangile doiuent apporter à faire abstraction de leurs ames d'auecque les passions du corps, & que leur demeure ordinaire dans le Ciel, aduertit les Pasteurs de viure comme bourgeois de là haut, & de frequenter ordinairement les lieux celestes par la meditation & par la pensée, leur admirable prontitude & activiré à executer les commans demens de Dieu, & leur vigilance qui ne sommeille iamais, admoneste les Ministres de la l'arole de Dieu, dese monstrer autant qu'ils pourront, infarigables en leur charge. Ailleurs ils sont appellés Presidens, ce qui monstre bien que Dieu les a establis dans les Eglises auecque quelque notable pou-uoir. Mais l'Apostre S. Paul les aduertit aussi de ce qui vient en consequence; c'est que celuy qui preside, le doit faire soigneusement. Ce qu'il appelle l'Episcopat vne œuure excellente, a vne emphase particuliere. Car comme dans les choses de la Nature, la Prouidence a proportionné les facultés & leurs operations à la dignité des objets sur les-

DE LA MORALE CHREST. 143 quels elle a voulu les employer, de sorte qu'elle a fabriqué l'œil d'vne maniere incomparablement plus admirable que les organes du toucher, parce que la veuë deuoit estre beaucoup plus noble, & que la lumiere est plus belle que ne sont les qualités qui se rapportent à l'attouchement: celuy qui se destine à vne œuure si excellente que celle-là, doit faire estat d'y apporter des vertus ex-traordinaires. Et c'est pourquoy S. Paul commence par là, que l'Euesque doit estre irreprehensible. Dans les autres fonctions de la vie humaine, pour importantes qu'elles puissent estre, on supporte beaucoup de defauts en ceux qui font appellés à les exercer, pourueu qu'ils ayent les qualités qui sont necesfaire à leur charge. D'vn Iuge, pourueu qu'il soit iuste & incorruptible, on souffre qu'il ne soit pas extrememet temperant. D'vn guerrier, moyennant qu'il soit vaillant & experimenté Capitaine, on ne se scandalise pas s'il n'est ny fort temperant ny fort iuste. D'vn Medecin, s'il est entendu & bien versé en son art, on supporte l'auarice, & quelquessois

144 SVITE DE LA DERN. PARTI mesmes l'irreligion. D'vn artisan s'il est excellent en son mestier, on ne fait pas semblant de voir s'il est desbauché ou fantasque. Mais quant aux Pasteurs, il faut, s'il est possible, que Momus mesme ne puisse rien trouuer à redire en leurs personnes. Parce qu'on ne regarde les autres hommes, que par vnendroit particulier, qui se rapporte à ce qui est de leur vocation : au lieu qu'yn Ministre de l'Euangile est consideré de tous costés, & que toutes sortes de vertus sont necessaires à rendre fructueux l'exercice de sa charge. Et c'est ce qui auoit esté representé par les conditions corporelles que Dieu requeroit autrefois en ceux à qui on conferoit le Sacerdoce. Car ils ne deuoyent estre ny aueugles, ny boiteux, ny camus, ny auoir aucun defaut ou aucune superfluité en leurs membres, ny aucune taro cossiderable en toute la conformation de de leurs corps : ce qui figuroit que les seruiteurs de lesus Christ ne doivent rien auoir d'exorbitant ny de mutilé dans les perfections de l'ame. La peau mesme des Sacrificateurs deuoit estre exempte

DE LA MORALE CHREST. 145 exempte de pustules, & de verrues signalées, & de toutes les autres choses qui en defiguroyent l'aspect; pour donner à entendre que la reputation des Pasteurs ne doit estre effleurée d'aucune tache importante. C'est pour quoy dans l'Ancienne Eglise on estoit si circonspe& à leur donner l'ordination, qu'on n'y admettoit point ceux à qui il estost arriué de participer à l'idolatrie apres auoir receu le Baptesme, quoy qu'ils l'eussent fait par la crainte de la mort,& qu'ils eussent essayé d'essuyer le blasme de leur desection auec les larmes de la repentance. Ce que l'Apostre adjouste, mary d'une seule femme, a vn maniseste egard à des choies qui se pratiquoyent au temps de S. Paul, & qui ne se voyent plus maintenant. Les Iuifs pouuoyent auoir plus d'vne femme en mesme temps, & bien que cela ne leur eust esté permis que par vne raison politique seulement, si est-ce que la permission en empeschoit le scandale. Les Gentils n'en espousoyent pas deux ordinaire-ment en mesme temps, quoy que cela se soit fait quelquessois à Athenes, pour

K

146 SVITE DE LA DERN. PART. quelques raisons d'Estat. Mais ils ne faisoyent point de difficulté d'avoir vne concubine auec vne femme legitime. Or c'est proprement auoir deux femmes, bien qu'au mariage de l'vne manquent les solemnités de la Loy. Et les Iuifs & les Gentils pratiquoyent le diuorce sans scrupule, & apres auoir renuoyé vne premiere femme sans la cause qui est designée en l'Euangile par nostre Seigneur, ils ne faisoyent point de conscience d'en espouser vne autre, soit que la precedente fust morte ou viuante, foit qu'elle fust remariée à vn autre, ou bien qu'elle ne le fust pas. Or cela estoit auoir deux femmes, contre la sainteté du mariage, & contre sa premiere institution. L'Euangile donc ayant ramené l'vnion du mary & de la femme à la pureré de ses principes, tous les Chrestiens estoyent bien obligés de renoncer à ces mauuailes coustumes, & de se conformer à ce que le Seigneur en avoit enseigné. Mais il a esté malaisé d'obtenir cela vniuersellement de tous dans le commencement; & sur tout est-il arriué que ceux qui pendant le

DELA MOARLE CHREST. temps de leur ignorance auoyent repudié leurs femmes injustement, & qui en auoyent pris d'autres en leur place, venoyent puis apres à se conuertir à l'Euangile, qui ne pouuoit pas corriger le mal qui auoit esté fait auparauant. Toutesfois, au moins pouvoir on bien faire en sorte, que ceux à qui ces fautes estoyent arriuées, ne fussent point installes au Ministere public. Et c'est ce que S. Paul requiert, afin que la tache qui paroissoit sur la vie de ces gens-là, ne s'espandist pas sur la sainteté de cette Charge. Les Peres de l'Eglise primitiue ont encore estendu cela plus auant. Parce qu'entre les Payens les femmes estoyent admises au sacerdoce de leurs Deesses, & qu'ils auoyent acconstumé d'y observer cette regularité, de n'y receuoir que celles qui n'auoy et esté meriées qu'vne fois, les Docteurs de l'Ancienne Eglise ne voulurent pas non plus qu'on permist à celles qui auoyent espousé deux maris, d'estre Diaconesses. Et afin que l'on ne pensast pas qu'ils voulussent requerir dans les femmes vne plus grande louange de continence que dans les

K ij

148 SVITE DE LA DERN. PART. hommes qui aspiroyent à l'Episcopat; ils ont establi les mesmes loix pour les Ministres que pour elles. De sorte que dans les Canons qu'on appelle des Apostres, qui sont les plus anciennes Constitutions Ecclesiastiques que nous ayons, & que les doctes croyent auoir esté recueillies des la fin du second siecle, il est expressément defendu d'establir en la charge d'Euesque, ou de Prestre, ou de Diacre, vn homme qui se seroit marié en secondes nopces apres auoir esté baptisé. Car quant à celles qui auoyent precedé le Baptesme, il semble qu'en cette occasion on les air tenuës pour non arriuées. De plus, il est certain qu'entre toutes les nations les seconds mariages, bien que licites, ont esté tenus pour moins honorables que les premiers, & dans Virgile Didon, bien qu'elle brûlast d'enuie de se remarier ; ne laisse pas pourtant, d'autant qu'elle dissimuloit son dessein, d'appeller cela vne faute, & de la detester comme telle. En partie donques par ce zele qu'on a eu de rendre la Difcipline de Christ plus exacte & plus

DE LA MORALE CHREST 149 austere que celles des Philosophes & de seux qui auoyent le plus de reputation de vertuentre les Payens, en partie par quelque superstition, à quoy les hommes ont naturellement beaucoup d'inclination, les vns ont condamné les secondes nopces absolument, comme Tertullien, les autres les ont au moins defenduës aux Ministres de l'Euangile. Ceux-là, parce qu'ils ont creu que les Chrestiens deuoyent ce bon exemple de continence à toutes sortes de nations : ceux-cy, parce qu'ils ont estimé qu'au moins les Pasteurs le deuoyent-ils à ceux qui font profession du Christianisme. Plutarque dit en quelque lieu que les premieres nopces sont à souhaitter, & que les secondes sont à fuir & odieuses: ce qui n'est ny vniuersellement faux, ny vniuersellement veritable. Car le premier mariage a bien certes quelque chose de rea commandable, & vn particulier aggréement. Mais personne n'y est obligépourtant, & S. Paul conseille plustost de s'en abstenir tout à fait, si on a le don de la continence. Et le second à bien quelque chose de moins honorable, au

K iij

150 SVITE DE LA DERN. PART: moins si on a des enfans du premier. Et toutesfois il est permis, & mesmes il est commandé, fila necessité y oblige. Vn Ministre de l'Euangile donques se doit abstenir, non seulement du second, mais mesmes du premier, si Dieu l'a mis en tel estat qu'il s'en puisse passer. Car sans doute il en sera beaucoup moins embarassé dans les fonctions de sa charge. Mais si l'estat de sa personne, & le repos de sa consciencel'y oblige necessairement, il contractera non seulement le premier, mais il passera mesmes au second: parce qu'il n'y a rien qui le puisse tant trauerser en ses fonctions, ny tant en empescher le fruit & l'edification, que s'il ne pounoit conseruer la conscience en pureré, & si la flamme dont il brusseroit se faisoit voir au dehors en quelques actions indecentes. S'il estoit donques question de faire vne reigle generale du comportement des Ministres en telles occasions, il se faudroit reduire auxtermes des decisions de la Parole de Dieu, & laisser à chacun sa liberté de se marier & de se remarier, selon qu'il y seroit necessité par le sentiment de sa conscience.

DE LA MORALE CHREST. Car de vouloir estre plus sage que S. Paul, & de faire en l'Église des constitutions, ou qui excluent du ministere des gens qui y pourroyent seruir tres-vtilement, ou qui engagent ceux qui y sont dans les tentations & dans les pieges de la Conuoitise, au prejudice de l'edification publique & de leur propre san &ification, c'est en quoy ie ne voudrois pas qu'on imitast les anciens Conciles. Parce que quand vne fois on passe au de là de ce que la parole de Dieu nous permet ou nous prescrit, l'esprit humain ne trouue plus que des tenebres & des precipices. Mais il ne s'agit maintenant icy que de donner quelques aduertissemens, que ie reduiray seulement à deux sur cette matiere. Le premier sera, que fi vn Ministre se peut passer de se marier, il s'en abstienne, & encore plus de se remarier, si Dieu l'ayant priué de sa semme, il se peut passer d'vne seconde. Asseurément il en aura plus de liberté de vacquer à son ministère, & s'attachera plus estroittement à nostre Seigneur & auecque moins de distraction, & en donnera moins d'occasion de parler aux

infidelles. L'autre est, que s'il faut necessairement qu'il prenne quelque autre resolution, il se comporte de telle façon, que si l'erreur & la fantaisse des hommes a fait que les secondes nopces fussent estimées moins honnestes & moins legitimes qu'effectiuement elles ne sont, il en releue la dignité par la grauité de sa conduite. A quoy i'adious steray encore ce mot, que soit dans le mariage, ou dans le celibat qu'il ait resolu de passer ses iours, il y donne roujours toutes sortes de preuues de temperance & de chasteré, s'esloignant de toutes frequentations, s'abstenant de toutes sortes d'actions, & bannissant de sa bouche, & mesmes de ses oreilles tous propos, qui pourroyent estre capables de blesser l'edification du public, & d'attirer quelque blasme sur le ministere de l'Euangile. Le mot qui vient apres dans le texte de l'Apostre, & que l'on traduit ordinairement vigilant, signisie aussi sabre, & ce sont deux qualités qui dependent l'vne de l'autre ; parce que les fumées du vin & de la viande, quand on en prend immoderément, boûchent les

DE LA MORALE CHREST. 157 conduits des esprits, & appesantissent la teste, & font venir le sommeil: & qu'à cette occasion, ceux qui sont naturellement actifs, & qui veulent beaucoup veiller, afin de vacquer aux choses de leur vocation, ne se chargent pas beaucoup ny de viande ny de vin, & par ce moyen s'accoustument à estre sobres. Er toutes ces choses sont si dignes d'vn Ministre de l'Enangile, qu'il ne faut pas appliquer ce terme precilément à l'vne des deux, mais les y comprendre toutes deux ensemble. Il est donc premierement souverainement convenable à vn l'asteur d'estre retenu en l'ysage des choses qui sont necessaires à la vie,& d'y garder vne grande moderation. Non pas seulement parce que ceux qui s'en chargent trop, s'embarassent dans leurs fonctions, & qu'il est impossible que les esprits se portent comme il faut à la teste, pour sournir au raisonnement & à la meditation, à l'heure qu'ils sont employés à la cuisine du corps, & qu'ils vacquent à cuire dans l'estomach les prouisions qu'on y a mises; mais encore parce que la gourmandise a d'elle-mes-

SVITE DE LA DERN. PART. me quelque chose d'indigne de la nature de l'homme. Car Dieu a formé les bestes de telle façon qu'il paroist bien qu'elles sont presque toutes faites pour leur ventre ; aussi ne pensent elles qu'à le remplir. Mais l'homme à vne stature propre pour la contemplation des choses de l'Vniuers, & vne ame differere de celles des autres animaux, & qui trouue ses contentemens en des choses separées de la matiere. Si donques vn honneste homme, & vn Ministre nommément, pouvoit accoustumer son corps à se contenter d'extrémement peu d'alimens, sans que neantmoins cette abstinece luy ostast la vigueur qui est necessaire pour fournir à vne vie laborieuse, cela seroit souverainemet expedient, & ie ne doute pas que ces prodigieux labeurs de Calvin, dont nous auons vne partie entre les mains, ne doiuent estre en grande partie attribuées à son extraordinaire sobrieté, qui luy donnoit la liberté de vacquer à ses estudes à toutes les heures du jour & de la nuit, qu'il employoit auec vne afsiduité émerueillable. Neantmoins ie ne voudrois pas icy enjoindre à qui que

DILL MORALE CHREST. 158 ce soit la pratique du regime Cornaro, & ie sçay qu'il y en a quelques-vns qui se sont mal trouués de l'auoir voulu saiure. Il y a des temperamens chauds, qui se consument eux-mesmes,s'ils ne reparent suffisamment la substance de leurs corps, & des naturels qui ne subsisteroyent pas au trauail, s'ils ne se soustenoyent par vne nourriture assés abondante. De sorte qu'il faut que chacun se connoisse pour regler sa façon de viure selon sa necessité, & que neantmoins il prenne pour regle generale, de manger plustost trop peu que trop, parce que c'est le moyé de se tenir au milieu des deux extremes. Ioint que le defaut est plus aisé à reparer par le sentiment de la foiblesse, que la plenitude à euacuer quand on est incommodé; & que la santétant du corps que de l'esprit se conserue mieux dans vn corps peu chargé de pituite & d'excremens, que dans yn autre où la chaleur paturelle est estouffée sous le faix des humidités superfluës. Ie rangeray icy cette autre partie de la sobrieté qui consiste à n'estre pas friand & amateur des bons morceaux, & qui n'est gueres

176 SVITE DE LA BERN. PART. moins digne d'vn honneste homme que l'autre. Car il est bien vray que la nature a mis dans les fruits & dans les viandes des qualités fort attrayantes, & qu'elle a logé dans nos sentimens des facultés propres pour les sauourer. En quoy son Auteur nous a assés donné à entendre, que puis qu'il a si bien proportionné ces choses entr'elles, il a voulu que nous goustassions la volupté qui resulte de l'operation des puissances sur des objets ainsi conditionnés. Et de fait il yad'vn costó en cela sujet d'admirer la sagesse du Createur de toutes choses, qui les a si bien adjustées les vnes aux autres, & si bien fait correspondre les qualités des substances aux puissances de nos sens : & de l'autre son inenarrable bonté, qui ne s'est pas contentée de nous fournir vne ou deux choses dans l'vsage desquelles nous puissions prendre quelque delectation: mais qui en a fait vne infinie varieré, qu'il a remplis de sucs aggreables & delicieux à merueilles. Neantmoins il est certain que cette abondance & cette diversité, n'est pas faite pour nous engager à establir

DE LA MORALE CHREST. 157 nostre felicité dans les fonctions des sens corporels, & ceux qui s'y rendent trop voluptueux, abandonnent ordinairement la culture de leur esprit, & oublient que la dignité de l'homme consiste dans les operations de l'ame. On peut donc gouster ces plaisirs : & s'en priuer de propos deliberé pour affecter quelque auscrité dans sa vie, & quelque extraordinaire dureté, c'est s'imposer vne chose que Dieu ne requiert pas de nous, & se retrancher le sujet de luy rendre louanges & actions de graces. Mais il se faut contenter de les gouster, & non pas s'en rassasser, & de faire paroistre qu'on n'est pas stupide & insensible aux contentemens honnestes & que la Nature a permis, & non qu'on est en quelque sorte asserui à ces organes du corps par où les contentemens y entrent. Car à la verité la gourmandise approche plus l'homme de la nature des pourceaux, qui ont vneauiditéinsatiable de se remplir, sans se soucier de quoy ils le facent. Mais bien que la friandise semble auoir quelque chose de plus espuré, il est neantmoins tres-indigne

158 SVITE DE LA DERN. PART. d'yn honneste homme, & d'yn Ministre nommément, qu'on le voye prendre plus de plaisir au goust des viandes qu'à l'harmonie des sons, ou à la consideration des objets qui se rapportent aux yeux; quoy que de deserer plus aux vo-luptés des oreilles & des yeux qu'aux belles contemplations de l'esprit, c'est encore vne intemperance vicieuse. Ie pardonnerois plustost à vn Pasteur qui aimeroit vn peu à dormir, quoy qu'il semble qu'il n'y ait rien de si opposé à la vigilance. Car il y a quelquesfois des complexions qui enclinent à cela, & qu'il est malaisé de surmoter: & de plus, la meditation & l'estude dissipant beaucoup d'esprits, & les veilles échauffant le fang, il est absolument necessaire que le sommeil tempere l'alteration de celuycy, & qu'il repare les autres. De fait ie connois des gens qui ne sont maistres ny de leurs corps ny de leurs esprits sinon apres qu'ils ont bien dormi, rellement que quand ils ont esté priués de ce rafraichissement, ils ne se reconnoissent pas eux-mesmes. De plus, s'il y a de l'excuse dans l'immoderation de la volupté,

DE LA MORALE CHREST. e'est en celle du sommeil : parce que la fatigue du corps nous en impose tellement la necessité qu'il est absolument impossible de resister à l'accablement qu'on en reçoit; de sorte qu'il y en a eu qui se sont couchés dans l'eau, quoy que ce fust en hyuer, parce que l'enuie de dormir ne leur permettoit pas de marcher encore deux cens pas pour prendre leur reposà terre. Et quand vne fois nous y sommes engages, l'engloutissement en est tel, qu'il n'est pas en nostre puissance de nous réneiller; le sommeil ne s'en allant de nos yeux sinon par quelque son vn peu violent, ou par le soin de ceux qui sont alentour de nous, ou par la satieté de la nature. Au lieu que nous sommes les maistres de l'vsage des plaisirs du goust, & dans leur commencement, pour nous en abstenir entierement si nous le voulons; & dans leur continuation, pour les interrompre à l'heure que nous l'estimons conuenable. Il y a neantmoins icy deux preceptes à doner. L'vn, de ne nous laisser pas flatter à la chair en cette occasion non plus que dans les autres. Car nous couurons 160 SVITE DE LA DERN. PART! quelquesfois du nom de necessité de la nature, ce qui n'est qu'vne mauuaise coustume, ou vne foiblesse de la partie sensuelle & voluptueuse de l'ame àlaquelle nous nous laissons emporter: & tel se defend du goust des viandes & du vin, qui se laisse prendreau ployement de bras, comme dit Salomon, & flatter par la chaleur des linceuls, & qui trouue de la douceur en la langueur de ses paupieres. Diuerses choses peuuent remedierà cela. Car le soin qu'yn Ministre a de sa charge, & de vacquer aux belles meditations, le peut réueiller en plein minuit; & Homere a tres-bonne raison quand il dit, qu'il ne faut pas qu'vn homme qui doit donner de bons conseils, dorme la nuit toute entiere. Si la foiblesse de la nature l'emporte sur l'a-Aiuité de ses soins, il se peut faire reueiller par ses seruiteurs, & passer ainsi vne partie de la nuit à la meditation ou à la lecture. Et s'il se veut veiller tandis que les autres dormiront, il se peut seruir de l'artifice d'Alexandre, qu'on dit qu'Aristote luy auoit appris. Car il terenoit yn bras estendu hors du lict, &c dans

DE LA MORALE CHREST! 161 dans la main vne boule de cuiure ou vn caillou, qui venant, quand le sommeil relaschoit sa prise, à tomber dans vn bassin qu'il auoit fait mettre au dessous, ne măquoit pas, en menăt du bruit, deluy dissiper son sommeil, & de luy redonner la liberté de ses pensées. L'autre est, de nous bien considerer nous mesmes, & de ne vouloir pas forcer la nature au prejudice de nostre santé. Car celuy qui pour imiter Casaubon, qui estudioit la plus grande partie de la nuit, se mettoit du vinaigre dans les yeux pour en chasser le sommeil, mostroit bien qu'il auoit de la generosité, & vne grande affection pour les lettres. Mais s'il eust persisté opiniastrément en cette resolution, il y eust indubitablement perdu la veuë. Il faut que chacun se mesnage, pour ne se rendre pas inutile en voulant trop seruir au public, & dispenser ses veilles & ses trauaux de telle façon qu'il les puisse long-temps continuer à l'auantage de l'Eglise. La qualité qui vient apres est celle d'attrempé, qui n'est pas mesme chose que temperant, quoy que le mot s'y rapporte. Car la temperance est l'habi-

SVITE DE LA DERN. PART. rude qui regle les voluptés des sens du corps, pour en vser raisonnablement & dans la mediocrité; & ce terme d'attrempé signifie plustost modeste. Or la modeflie est vne vertu qui gouuerne le geste, & la contenance, & les actions exterieures du corps, pour n'y commettre rien d'indecent & qui monstre qu'on ait l'ame turbulente ou euaporée. Mais voicy quelle est la raison de la ressemblance qui est entre ces deux appellations. Ceux qui sont intemperans, sont emportés à l'heure que la passion de la volupté les domine; & soit dans l'amour, soit dans le vin, l'esprit est comme hors de soy-mesme, & l'homme se laisse aller à des actions & à des paroles qui donnent à connoistre son transport. Et quelle est la nature de la passion, telles sont aussi les extrauagances qui s'en produisent. Pareillement, il y a des gens qui mesmes sans estre émeus de semblables passions, soit par legereté naturelle d'esprit, ou par quelque hus meur hagarde, ou par presomption & par vanité; font des actions trop libres, & prononcent des paroles licencieuses,

DE LA MORALE CHREST. 162 & oùils ne gardent pas assés de moderation. Et c'est ce qui est contraire à la modestie. La vertu donques que l'Apostre requiert icy d'vn Pasteur, consiste en vne certaine disposition de l'ame, qui en tienne tellement tous les mouuemens en leur deuoir, qu'elle ne s'emancipe iamais, ny dans le ris immoderé, ny dans l'allure affectée, ny dans le visage égaré, ny dans l'insolence des actions, ny dans la licence des paroles, ny dans l'extrauagance des habits, ny dans l'irregularité des gestes, ny dans la fierté du port, ny dans le trop haut ton de la voix, ny dans l'imperuosité de la parole, ny dans l'indecence de la contenance, ny dans la trop grande agitation du corps, ny generalement dans le maintien peu retenu & peu composé de la personne toute entiere. A peine y a-t-il aucun qui quand il est question d'vne femme, n'entende parfaitement bien ce que l'on veut dire quand on luy donne la qualité de modeste, & l'idée que ce terme met dans l'esprit, se connoist & se sent mieux qu'on ne sauroit le representer par des paroles Caril signifie

64 · SVITE DE LA DERN. PART? vn certain air messé de douceur, d'humilité, de pudeur, de solidité de iugement, de grauité, de civilité, de circonspection, d'honneste timidité, & ie ne sçay quoy d'également eloigné de la fierté dédaigneuse, & de la complaisance affectée, de l'austerité importune, & de l'adiustement coquet. Or est-il bien vray qu'il y a quelque difference entre la modestie d'vn homme & celle d'vne femme, & que nostre sexe nous donne vn peu plus de hardiesse & de liberté. Neantmoins ce qu'est vne semme exemplairement modeste entre le reste des femmes, l'Apostre veut qu'vn Ministre de l'Euangile le soit entre les autrés hommes, bien qu'on ne les puisse pas accuser d'estre des éceruelés. Parce qu'il y a beaucoup de choses ou qu'on supporte, ou mesmes qui sont biene seantes aux autres hommes, dans les autres conditions, qui ne sont pas de bonnes grace en vn Ministre de l'Euangile. Ce qu'il dit qu'il faut qu'il soit honorable, car c'est ainsi qu'on traduit le mot qui vient incontinent apres, semble, à le prendre comme on fait ordinairement

DE LA MORALE CHREST. 169 en nostre langue, ne s'accorder pas entierement auec la condition des Pasteurs. Car on appelle honorables ceux qui viuent en quelque sorte splendidement. & qui en coutes sortes d'occasions font vne dépense honneste & qui tient quelque chose sinon de la magnificence, aumoins de la liberalité. Or les Pasteurs du temps de l'Apostre S. Paul, n'auoy ét pas fort communément le fonds pour fournir à l'exercice de cette vertu, & maintenant en la Reformation, si quelques vns n'en sont pas destitués, cela ne leur vient pas du reuenu de leur ministere. Mais à cela on peut dire deux ou trois choses. La premiere est que les vertus confistent dans les habitudes mesmes: & l'exercice des vertus dépend des facultés qu'on en a. L'Apostre peut exhorter les Pasteurs à auoir l'ame dispolée aux actions honorables, quand Dieu leur fournira le moyen de les pratiquer. Du reste, il nous enseigne ailleurs qu'on est agreable à Dieu selon ce qu'on a, & non pas selon ce qu'on n'a point. Et comme nostre Seigneur dit que la vefue, qui n'auoit mis qu'vne pi166 SVITE DE LA DERN. PART.

te au tronc, y auoit pourtant plus mis que les riches; parce qu'ils y auoyent mis de leur abondance, & elle de sa necessité, on peut dire qu'vn Ministre qui vse de ses facultés ou petites ou mediocres comme il faut, est plus honorable que ceux à qui les grands biens donnent le moyen d'exercer la magnificence ou la liberalité, & qui neantmoins ne le font pas de bonne grace. La seconde est, que iamais le saint ministere n'a esté si contemptible entre les hommes, ny si vniuersellement abandonné, qu'il n'y ait tousiours eu quelcun à qui sa naissance, ou les biens qu'il a herités de ses ancestres, ou la faueur des Princes, ou quelque autre honneste & legitime moyen d'estre riche, a donné le moyen de viure honorablement. Or est-il certain que de quelque condition que soit vn homme, s'il est riche, ce luy est vne honte d'estre auare & espargnant au delà de la raison. Ce vice est vne marque de foiblesse, & qu'on a naturellement l'ame basse, & les sentimens peu genereux. Car les biens ont esté donnés aux hommes pour en vser, & non pas

DELA MORALE CHREST, 167 pour les accumuler, & les cacher à autruy & à soy-mesme, selon l'inclination des chouëttes. Mais il n'y a personne à qui cette humeur convienne moins qu'à vn Pasteur, qui doit mieux sauoir qu'aucun quel est le legitime vsage des richesses. Mais estre honorable n'est pas à dire estre vain, ny prodigue, ny inconsideré à dépenser en toutes occasions, ny amateur de la reputation de faire belle dépense & de tenir bonne table. A l'egard d'vn Ministre, cette vertu consiste à ne manquer pas aux occasions necessaires de monstrer qu'on prefere les actions de la vertu à la possession de l'argent, & à faire toutes choses auec honneur & bienseance. La troisseme finalement est qu'en effect le terme dot S. Paul se sert, est employé par de bons auteurs pour designer vn homme qui sçair parfaitement obseruer ce qu'on nomme le decorum, en quelque occurrence que ce soit, & non pas seulement en celles qui regardent la dépense. Car il est bien vray qu'vne des occasions où cette vertu se déploye plus manifestement, est quandil faut contribuer quelque chose

L ilij

168 SVITE DE LA DERN. PART.

pour le public, ou faire quelque dépense dans les ressouissances de l'Estat, ou receuoir ses amis & les traitter à sa table, ou viure soy mesme à son ordinaire & regler la depense de sa maison, ou se loger & se meubler selon sa condition, ou recompenser les labeurs de ceux qui nous ont rendu quelque seruice, ou n'espargner pas son argent quand il est question de seruir les honnestes gens, ou pour quelque autre cause que ce soit, mettre la main à la bourse. Vn homme d'honneur, sans doute, & sur tout vn Ministre de l'Euangile, le fera tousiours de bonne grace, & en telle sorte qu'il paroistra qu'il a l'honneur en recommandation. Mais il, y a vne infinité d'autres rencontres où il faut vser de cette mesme decence, & où les circonstances ne le requierent pas moins que dans les choses où il y va de l'argent. Car il ne se faut ny abbaisser à des ministeres seruiles, ny esseuer à des actions trop hautes pour nous : ny reculer de la presence des Grands, quand le deuoir, ou les affaires, ou leur desir ; ou leur service nous y appelle, ny s'en approcher en tel-

DE EA MORALE CHREST. 169 le façon qu'ils ayent occasion de croire que nous voulons nous faire leurs compagnons: ny nous rendre comtemptibles par des habillemens ou par des occupations sordides, ny essayer de nous faire trop considerer par quelque trop splendide singularité. En vn mot, cette mediocrité que les anciens ont dite estre d'or, doit regner par tout, de sorte qu'elle espande sur toutes nos actions yn aggréement temperé des marques d'vne grande modestie & d'vn bon courage. Ce que l'Apostre veut en suite que l'Euesque soit hospitalier, a quelque egardà la façon de viure de ce temps là, auquel, comme on ne voyageoit pastant que l'on fait, aussi ne se servoit-on pas si communément d'hosteleries. Car les amis logeoyent tousiours leurs amis; la moindre connoissance faisoit trouuer le couuere & la table chés ceux qui vouloyent paroistre riches, honorables, & liberaux : & ceux d'entre les Hebrieux nommément qui failoyent profession d'vne extraordinaire charité, comme les Esséens, receuoyen tous les estrangers qui pouuoyent estre recommanda-

SVITE DE LA DERN. PART. bles par quelque bonne qualité, & generalement tous les pauures. Les Chrestiens donques estans esleués sous vne discipline qui les formoit à l'humanité & à la charité d'vne saçon tout à fait incomparable, n'ont pas deu ceder à aucun en ce bon office-là, ny les Apostres oublier de le leur recommander, afin qu'ils rendissent en cela, comme en toutes autre choses, la profession de l'Euangile exemplaire. Sur tout estoitil conuenable qu'ils vsassent de cette charité enuers les Chrestiens, quand la necessité de leurs affaires les obligeoit à entreprendre quelque voyage. G'est pourquoy S. Paul les exhorte à communiquer aux necessitez des Saints, & à poursuiure l'hospitalité: S. Pierre ne se contente pas de leur ordonner d'estre hu/pitaliers les uns enuers les autres, il veut encore que ce soit sans murmures : c'est à dire, d'vne si bonne volonté qu'on ne se plaigne pas de la charge qu'on en reçoit, comme font ceux qui se sentans impore tunés, grommellent entre leurs dens contre les voyageurs & les voyages. Et l'auteur de l'Epistre aux Hébrieux veut

DE LA MOARLE CHREST. 171 qu'on pratique cette humanité mesmes enuers ceux que l'on ne connoist point, à l'imitation d'Abraham, qui ayant pensé receuoir en son tabernacle des estrangers, il se trouva qu'il avoit logé des Anges. Car c'est à l'histoire de ce Patriarche que l'Apostre regarde quand il dit: N'oubliés point l'hospitalité. Carpar elle quelques vns ont logé des Anges n'en sachans rien. Comme donques les Ministres doiuent fournir de bons exemples en toutes sortes de vertus, ce deuoir qui est commun à tous les Chrestiens, est en particulier recommandé aux Pasteurs, & bien que les temps & l'estat des choses ayent beaucoup changé depuis le siecle de S. Paul, cette exhortation ne laisse pas d'auoir encore de la force. Il y a à peu prés de trois sortes de gens qui voyagent. Les riches que nous ne connoissons point, ou qui ne sont point nos parens & nos amis particuliers. Et ceux-là logent dans les hosteleries par necessité; parce qu'en cette façon de viure qu'on suit maintenant, d'aller & venir presque sans cesse, soit pour affaires, ou par recreation, ou par

172 SVITE DE LA DERN.PART. simple curiosité, s'il falloit qu'on receuft dans les maisons particulieres tous ceux qui tracassentainsi, il n'y auroit hospitalité qui ne s'en lassast, ny famille qui n'en suit incommodée. Puis apres, ceux à qui Dieu a donné le moyen d'aller dans les lieux publics, & de s'y faire traitter à leurs despens; mais que nous ne voulons pas souffrir ailleurs que dans nos maisons, à cause de la parenté ou de l'amitié qui est entre nous, & qui fait que nous les considerons en quelque forte comme nous-mesmes. A l'egard de ceux là ce n'est ny charité ny hospitalité que nous y exerçons: & l'obligation qui naist de ces bons offices-là, tombe sur nous, & non sur ceux qui les reçoiuent. Enfin, ceux qui n'ont pas le moyen de loger ailleurs sinon dans les hospitaux, qui sont les hosteleries des pauures. Et ces panures sont de mesme communion de Religion auecque nous, ou d'vne profession cotraire. Pour ceuxcy, le soin ne nous en appartient pas proprement. Mais c'est sans doute enuersceux-là que se doit exercer l'hospitalité des Chrestiens, & particuliere-

DE LA MORALE CHREST 173 ment des Ministres: Soit en les recevant en leurs maisons pour les nourrir, si cela se peut : soit en procurant par leurs soins qu'ils soyent accommodés ailleurs, & en n'y espargnant pas leurs facultés : soit, en cas, comme cela arriue ordinairement, qu'ils n'en puissent pas supporter le faix sans se trop incommoder, en procurant auec diligence & charité qu'ils soyent assistés selon l'ordre de l'Eglise. Car l'hospitalité d'vn Ministre s'estend iusques là, & si on le vouloit obliger à receuoir tous les pauures de sa profession dans sa maison, il luy faudroit donner autant de reuenu qu'aux Euesques. Car il est bien vray qu'vne partie du reuenu des Euesques estoit autrefois employé à pratiquer cette hospitalité. Mais il passoit alors de bien loin les gages qu'on donne maintenant aux Ministres de l'Euangile. Ce que S. Paul dit qu'ils doiuent estre propres à enseigner, est vne chose qui dépend de qualites tant naturelles qu'acquises, tant physiques que morales. Quant aux naturelles, nous en auons desia parlé dans le chapitre precedent, & des acquises aussi: 174 SVITE DE LA DERN. PART. & cela comprend en soy celles que i'ay nommées physiques, pour les distinguer d'auecque les autres qui sont en la volonté. Ie ne rediray donc pas icy qu'vn Pasteur doit auoir quelque naturelle disposition à bien parler, quelque vsage de le faire auecfacilité & grace; quelque raisonnable connoissance des langues & des sciences, & particulierement qu'il doit estre bien versé en la parole de Dieu. Ie n'adjousteray pas mesmes qu'il faut qu'il soit assés exercé dans les choses qui forment les hommes à traitter les choses auec ordre, & mesmes à leur donner quelque ornement & quelque aggréement. Quoy qu'il est certain que la methode est absolument necessaire pour bien enseigner, & que les plus belles choses du monde dites en confusion, ou ne sont pas entenduës par ceux à qui nous parlons, ou, si on les entend en quelque façon, s'écoulent de la memoire. Ie remarqueray seulement icy que S. Paul mettant cette qualité entre celles qui regardent proprement les mœurs, il a sans doute par elle voulu defigner l'inclination que tout bon Pasteur

DE LA MORALE CHREST. doit auoir à communiquer la doctrine de la verité, en toutes les occasions qui s'en presentent. C'est vne chose comune à toutes les ames genereuses, de se respandre, s'il faut ainsi dire, sur les autres par la communication de ce qu'elles possedent de bon, & d'imiter par ce moyen Dieu, comme font les plus excellentes de ses creatures. Le Soleil verse sa lumiere vniuersellement sur toutes sortes de corps ; l'air s'insinuë par tout & penetre dans tous leurs pores. L'Ocean envoye ses eaux dans toutes les parties de la terre, pour y distribuer l'humeur & le rafraichissement : & dans nos corps le cœur, le foye, & le cerueau, fournissent à toutes les autres parties les esprits & la nourriture qui sont necessaires pour y maintenir les forces, & pour faire qu'elles produisent leurs operations & leurs mouuemens ; & en general, il n'y a rien de fort excellent en l'Uniuers, qui n'ait receu de son Createur cette impression de se communiquer liberalement soy-mesme. Et dans les fonctions physiques qui sont asfignées à nos ames, elles ont elles-mel176 SVITE DE LA DERN. PART. mes vn enseignement de ce qu'elles doiuent estre en ce quiregardeles operations del'entendement : car elles se prestent tellement à tous les membres du corps, qu'on a accoustumé de dire qu'elles sont toutes entieres en son Tout, & toutes entieres encore en chacune de ses parties. Ce qui signifie bien à la verité l'indivisibilité de leur estre, qui ne se partage point. Mais ce ne laisse pas d'estre vn embleme de ce que doit saire l'entendement à l'egard de ses connoissances. C'est qu'il se communique de telle sorte par elles à la societé humaine de laquelle il fait part, qu'il n'ait rien de particulier en ce qui peut estre vtile au public, & qu'il tasche de posseder par indiuis auec son prochain, les lumieres de verité que Dieu luy a communiquées. Or si telle est la disposition de tout honneste homme, elle doit estre encore sans doute beaucoup plus inuiolable en vn Pasteur, qui outre qu'il doit auoir toutes les vertus en vn degré fort eminent, est en quelque maniere establi depositaire d'vne verité qui est absolument necessaire aux hommes. Tellement que comme

De la Morale Chrest. comme il emane perpetuellement des corps des images sensibles qui les representent, & par lesquelles ils se sont voir: il doit aussi sans cesse couler de l'ame d'vn Ministre de l'Euangile des images intelligibles de la verité de Dieu; & ce dautant plus que comme les corps n'en reçoiuent aucune diminution, parce que ce ne sont pas des parties de leur substance, mais seulement les especes, comme on parle dans les Escoles, par lesquelles les objets visibles sont perceptibles à nos yeux : quelque écoulement des lumieres salut aires qui se puisse faire de l'entendement d'vn Ministre dans celuy de ses prochains, il n'en reçoit quant à luy aucun affoiblissement en ses connoissances. Mais l'Apostre S. Paul donne ailleurs yn excellent enseignement là-dessus. Caril dit de soy? mesme qu'il est detteur tant aux- Grecs qu'aux Barbares, tant aux sages qu'aux ignorans. C'est à dire que les renelations qu'il auoit receuës de Dieu, n'estoyent pas comme vn depost qu'il deust tenir caché, mais comme vn fideicommis qu'il deuoit distribuer liberalement à

M

178 SVITE DE LA DERN. PART. tout le monde. Et bien qu'ailleurs il les appelle vn tresor, ce n'est qu'à cause de la richesse & de la magnificence de la chose en elle-mesme, & non pource qu'il le deust tenir enfouï, comme sont ordinairement les tresors. Comme auffi cerces ce que nostre Seigneur dit des talens, qui doiuent multiplier entre les mains de ceux à qui ils ont esté commis, regarde vniuersellement tous les dons du saint Esprit, & tous les fidelles; mais neantmoins il se verifie d'vne façó particuliere dans les Ministres de Jesus Christ, & dans les graces qu'il leur a comuniquées pour l'instruction des aux tres. En toutes les occasions donques, & publiques & particulieres, où vn Pau steur se pourra respandre, comme fait vne source commune qui enuoye de l'eau de tous costés, il ne s'espargnera nullement, & parce qu'outre l'inclination qu'il y doit auoir, il y a de l'art & de la prudence à enseigner vtilement, il en cherchera tous les moyens, & y aura soigneusement egard à toutes les circons stances des lieux, & des temps, & des personnes. Car il faut autrement en

DE LA MORALE CHREST. 179 seigner le simple peuple, que ceux qui sont plus auances, autrement les enfans & les paysans, que les gens de lettres & les adultes. Vn docteur, qui est dans vne Escole, doit essayer d'aller plus auant dans les matieres, qu'vn Ministre qui n'a à parler qu'à l'assemblée de son troupeau; & si ce docteur-là se trouve en lieu où il ait tout ensemble à enseigner son troupeau, & ceux/qui l'escoutent en l'Escole, il taschera de temperer tellement ses instructions qu'il profice & aux vos & aux autres egalement. En quoy il imitera la parole de Dieu mesme. Car il y a des montagnes & des vallées, des choses basses & de hautes, des lieux, comme disoit autrefois quelcun, où les brebis passent à gay, & d'autres où les elephans peuuent nager. Et tout cela est tellement dispensé qu'en la lisant les simples passent par dessus les choses difficiles sans s'accrocher, & s'edifient de ce qui est intelligible pour eux; au lieu que les sauans attachent leur meditation à ce qui est plus releué, & en tirent des enseignemens qui seruent à eux & aux autres. Ie ne

180 SVITE DE LA DERN. PART. sçay si ie dois faire quelque instance sur ce que l'Apostre recommande à l'Euesque qu'il ne soit pas adonné au vin, parce qu'il me semble que c'est vn vice si esloigné d'vn homme d'honneur, de quelque condition qu'il soit, que de voir vn Ministre qui en soit entaché c'est vne espece de monstre. Quelle horreur de voir vn Pasteur, qui quand il doit monter en chaire, a les yeux pleins des marques de son intemperance, à qui la langue begaye, & les pieds chancellent, & de qui l'entendement nage dans le vin! Quel scandale de le voir dans les compagnies respondre aux fantés qu'on luy porte', comme les plus grands desbauchés, & puis auoir besoin qu'on le porte en sa maison, parce qu'il ne s'y peut porter luy-mesme! Quelle honte à la Religion de Christ de voir ceux qui sont ordonnés pour l'enseigner, succomber en quelque occasion que ce soit, à vne si grossiere volupté qu'est celle qui consiste à boire! Neantmoins on dit qu'il y en à dans les regions du Septentrion à qui il arriue de semblables accidens, & bien qu'on les

DE LA MORALE CHREST. 181 excuse parce que c'est le vice de leurs nations, la relation qu'on nous en fait ne laisse pas d'estre choquante tout ce qui se peut, & d'offenser les ames modestes. L'Apostre ne defend pas absolument le vin aux Pasteurs, puis qu'il ordonne ailleurs à son disciple Timothée d'en vser à cause de la foiblesse de son estomach: mais quand il dit qu'il en doit prendre seulement vn pen, il monstre auec quelle retenuë & quelle circonspection vn Ministre se doit gouuerner en ce qui concerne son breuuage. Comme celuy-là fortifie l'estomach si on en vse moderément, il debilite les nerfs quand on en abuse. Comme il éueille l'imagination, il trouble le iugement. Comme il donne de la gayeté, il porte naturellement à l'insolence. Comme il peut fortifier la memoire si on y garde la moderation qu'il faut, la trop grande abondance en trouble les idées de l'imagination. En fin il fair beaucoup de bien quand on s'en sçait bien seruir, mais il fait encore plus de mal quand on n'y garde pas la mesure. Quelques-vnsont creu que le vin auoit M iij

182 SVITE DE LA DERN. PART. esté créé pour seruir de medicament plustost que de breuuage, parce qu'il est dit au Pseaume qu'il a esté fait pour resionir le cœur, & que S. Paul veut qu'on en vse en petite quantité, seulement pour fortifier l'estomach, quand il est trauaillé de quelque foiblesse consie derable. Si cela est, Dieu qui a fait presque tous les autres medicamens fort desagreables à la nature, a suiui en celuy- cy vne methode bien differente, en le rendant si delicieux. Ecles hommes ont merueilleusement changé son vsage & sa destination, d'en prendre si souuent & auecque tant de volupté, au lieu qu'ils ne se servent qu'à contrecœur & fort rarement des autres remedes. A la verité c'est peut-estre le plus puissant de tous les cardiaques que la Medecine puisse employer; mais s'il n'auoit deu seruir qu'à cela, il n'y a pas apparence que Dieu eust mis entre les benedictions qu'il promettoit à la pieté & à la sainteté de son peuple d'Israel, la fertilité de ses vignobles. Et quand nostre Seigneur a institué sa sainte Cene, il y a consideré le vin comme breus

DE LA MOARLE CHREST. EST uage, ainsi que le pain comme aliment, & a choisi ces deux elemens, parce qu'ils sont les deux principaux soustiens de la vie du corps, pour nous representer qu'il est celuy qui fournit tout ce qui est necessiire pour celle de nos ames. De plus, quand il s'est trouué aux nopces de Cana, non seulement il n'a pas empesché qu'on s'y soit servi de vin, comme d'vn breuuage ordinaire, mais il en a luy mesme fourni par la transmutation de l'eau; ce qu'il n'eust pas sans doute fait si en cela il y eust eu quelque chose contre la disposition de la Nature. Si le vin n'est pas vn breuuage, mais vn remede seulement, il est certain qu'il n'est pas permis de se seruir d'aucre boisson que de l'eau: & neantmoins c'est vne chose qui a passe dans l'vsage de toutes les nations, de chere cher quelque autre moyen de satisfaire àla soif, tant en relevant le goust de l'eau par quelque mixtion, qu'en corrigeant sa froideur & sa crudité, pour la rendre plus propre à entretenir la chaleur naturelle des entrailles. Que s'il a esté permis aux hommes de faire de la biere

184 SVITE DE LA DERN. PART. & de l'hydromel, & d'autres breuuages mixtionnés, & de se seruir du suc des pommes & des poires pour faire vne espece de vin dont ils beussent ordinairement, il ne leur a pas esté defendu d'y employer le ius des raisins, qui a quelque chose de naturellement plus propte à cela, de sorte qu'il semble qu'on n'ait recours à l'inuentio des vins artificiels, sinon pource que celle-là manque. Car si les vignes venoyent aussi bien au Septentrion qu'ailleurs, ie doute qu'on se fust iamais aduisé de se feruir de l'orge ny du houblon; pour rendre le breuuage de l'eau plus salubre ou plus agreable. Vray est que le vin dons ne à la teste, & qu'il offusque le iugement: mais les autres breuuages artificiels ne laissent pas d'enyurer quand on en prend immoderément; & s'il falloit ofter l'vsage du vin aux hommes parce qu'il fait plus de mal que de bien, il leur faudroit aussi oster l'vsage de la raison, qui leur est communément plus pernicieux que salutaire. Quand on auroit arraché toutes les vignes de la terre, on n'auroit pas pour cela gueril'in-

DE TA MORALE CHREST. 184 Temperance de l'esprit humain; & il est si enclin a faire en toutes choses trop ou trop peu, que si on avoit reduit les hommes à l'eau, les vns s'en gonfleroyent l'estomach & en boiroyent iusques à creuer, & les autres se laisseroyent brusser les entrailles de chaleur & de secheresse. C'est la pieté & la vertu qui doit corriger tous ces excés: & quoy que cela soit requis en tous les Chrestiens, il convient neantmoins particulierement aux Ministres de l'Euangile. Tellement qu'encore que la Morale Chrestienne ne leur interdise pas abfolument l'vsage du vin, si est-ce qu'elle leur recommande d'y estre souveraix nement circonspects, s'ils se veulent monstrer dignes de ce caractere. Car quant à ces nouveaux Casuistes, qui disent qu'il est permis de se remplir de vin & de viande, & mesmes de s'en gorger, pourueu que ce soit pour la volupté seulement, & que cela n'altere point la santé, peut estre qu'Epicure les eût bien receus au troupeau de ses pourceaux; mais tant s'en faut qu'ils puissent tenir place entre les docteurs Chres

186 SVITE DE LA DERN. PART.

stiens, qu'asseurément ils eussent esté chassés bien honteusemet de la compagnie des vrais Philosophes. S'il est permis de se remplir des voluptés qui se rapportent au goust, il ne l'est pas moins sans doute de donner aux autres sens toutes celles dont ils sont capables, autant que leur auidité en peut demander, pourueu que cela n'apporte point de prejudice à la santé. Figurés vous donc vn homme qui n'a autre soin que de rechercher tous les moyens imaginables de contenter ses yeux des belles choses visibles, & ses oreilles de l'harmonie des sons, & ses narines des bonnes odeurs, & son palais du goust des viandes & des delices des bons vins, & toutes les parties de son corps où reside l'attouchement, des choses qui sont propres à y engendrer le chatouillement du plaisir; & qui passe à cela sa vie; ne vaudroit-il pas autant que Dieu ne luy eust point donné d'entendement pour vacquer à la connoissance des objets intelligibles ? Car il est absolument impossible de s'abandonner entierement aux contentemens du corps,

DE LA MORALE CHREST. 187 & vacquer tout ensemble aux occupations de l'esprit, n'y ayant rien qui destourne tant des belles & nobles contemplations, que ce fretillement de volupté que produisent en nossens les objets qui ont des qualitez extremement agreables. Si donc il falloit necessairement renoncer au corps ou à l'esprit, il seroit plus raisonnable que nous nous reservassions l'vsage de la partie de nous qui sans aucune difficulté est incomparablement plus excellente. Et si la Nature nous a formes pour estre d'esprit & de corps, & pour iouir des choses qui peuvent donner de la satisfaction à tous les deux, celle de l'esprit le doit infiniment emporter, & nous n'en deuons donner au corps sinon à proportion de ce qu'il a de dignité en la composition de nostre estre,& que la douceur de ses iouissances aide, ou au moins ne nuit pas, aux fonctios de la partie de nous mesmes par laquelle nous fommes hommes & souverainement esleués au dessus des animaux. Apres cela il veut que le Ministre ne soit point batteur : ce qui est diuerse189 SVITE DE LA DERN. PART. ment interpreté par les Glossaires de la langue Grecque. Car il y en a quelques-vns qui rapportent l'emphase de ce mot aux coups de main qui sont capables d'oster la vie au prochain. Et il est si absolument necessaire qu'vn Pasteur soit exempt de ces crimes là, qu'à peine estoit-il besoin qu'il en sust fait mention entre les qualités de l'Euesque. Tant s'en faut qu'on doine souffrir en luy des choses qui sont seuerement punies dans les autres par l'autorité du Magistrat, que quand il estoit autresois arriné à vn Ministre de tomber par malheur & sans dessein en quelque no-table irregularité par l'effusion du sang du prochain, les anciens Canons ne permettoyent pas qu'il retint le saint Ministere. D'autres interpretent cela par vn mot qui signisse proprement, si cela se pounoit dire en nostre langue, sombatteur , c'est à dire , qui est d'humeur à contester de telle façon, qu'il soit capable d'en venir aux mains, bien qu'il ne s'en ensuiue pas grande effusion de sang, & qu'il ne soit pas pour se porter aux dernieres violences. Et cela

DE LA MORALE CHREST. 189 sans doute doit estre conté entre les qualités des Pasteurs, qu'ils ne soient pas de cette humeur-là. Car de quelle edification seroit la predication de la parole de Dieu en la bouche d'vn homme qu'on verroit en venir souuent auec ses voisins aux coups de pied & aux gourmades? Maisi'estime quel' Apostre veut dire quelque chose de plus. Il ya deux sortes de personnes que les Ministresont en leur pouuoir, assauoir leurs seruiteurs & leurs enfans: & la Nature leur done pouuoir de chastier ceux cy, & le droit des gens celuy de corriger ceux-là, en y vsant de main mise. Or est-il certain que le caractere d'Euesque n'oste ny l'vn ny l'autre de ces droits, & que si on ne corrigeoit quelquessois les seruiteurs ils ne feroyent iamais leur deuoir; & sion ne chastioit les enfans, ils deuiendroyent peut estre aussi lasches, aussi mauuais, & aussi garnemens que les esclaues. Mais voicy la difference qu'il y a entre vn batteur, & vn homme qui vse raisonnablement de ces deux sortes de pouvoir. C'est que celuy-là frappe par colere, & par chagrin,

190 SVITE DE LA DERN. PART. & pour contenter sa passion, & par quelque espece d'inhumanité qui luy tient tousiours la main leuée. Au lieu que celuy-cy chastie ses enfans par l'affection qu'il leur porte, & pour imprimer en eux la vertu; & qu'il corrige ses seruiteurs par le mesme motif qui le porte à chastier ses enfans, & comme les estimant partie de sa famille. Delà vient que comme vn bon pere n'excede iamais ses enfans, vn bon maistre n'outrage point ses seruiteurs, & au lieu que les maistres rigoureux battent plus souvent leurs serviteurs qu'ils ne fouettent leurs enfans, parce qu'ils sont plus enclins à la violence qu'ils ne sont amateurs de la vertu: les honestes gens, & particulierement les Ministres, font plustost sentir la verge à leurs enfans, que leur main à leurs seruiteurs, parce qu'ils aiment mieux ceux cy, & par consequent ils ont moins de soin de les formerà la vertu, & que d'ailleurs ils se gardent soigneusement des emportemens de la colere. Veritablement il seroit honteux aux Chrestiens, & particulierement à ceux qui le doiuent

DELA MORALE CHREST. 191 estre plus qu'aucun, de ceder en cette partie de l'humanité & de la moderation d'esprit, à plusieurs d'entre les Payens, qui ont traitté leurs seruiteurs auec vne finguliere douceur; & principalement encore ences temps, que la seruitude estant abolie, ceux qui nous seruent maintenant sont d'vne condition qui nous donne beaucoup moins de droit sur eux, qu'on n'en auoit autrefois sur les esclaves. C'est aussi voe des choses que S. Paul requiert d'vn Pasteur, qu'il ne soit point conuoiteux de gain deshonneste. Et ie ne sçay s'il ne vaudroit point mieux tourner, deshonnestemens conuoiteux de gain. Car le premier signifie bien qu'vn Ministre de l'Euangile doit estre extremément esloigné de faire des choses injustes pour son profit. Et telles sont les vsures, & les rapines, & les vexations qui se font aux fois bles pour auoir leur bien, & les autres pratiques de cette nature, qui sont si seuerement defenduës par l'Euangile du Sauueur. Mais en cela S. Paul ne desire rien d'vn Pasteur, qui ne soit egalement requis, non pas seulement de tous les

192 SVITE DE LA DERN. PART. Chrestiens par la discipline de Iesus Christ, mais des autres nations par leurs Legislateurs, & des Payens mesmes par leurs Philosophes. Le secod dit qu'il y a des gains qui sont iustes & honestes aux autres Chrestiens detoutes conditions; mais qu'vn Ministre ne peut rechercher fans mettre quelque tache sur son ministere. En effect il n'y a rien de plus iuste que les salaires d'vn Aduocat qui s'acquitte bien de sa charge, ny que les recompenses qu'on donne aux Medecins qui exercent bien leur art. La solde de mesme est legitiment deuë aux gens de guerre, & les gages du Public à ceux qui rendent la Iustice & qui font les fonctions de Magistrat en l'Estat. Mais il ne seroit pas honneste à vn Ministre de l'Euangile de plaider dans le Palais, ny de faire des ordonnances pour la santé des malades, ny de faire les factions militaires comme les soldats, ny de rendre mesme la Iustice, quoy que ce soit la plus belle chose du monde apres la predication de l'Euangile, à intention d'en receuoir les emolumens. L'exercice de la marchandise ne luy

DE LA MORALE CHREST. 193 est pas permis non plus, & beaucoup moins celuy des arts mecaniques, si ce n'estoit que son ministere ne luy peust pas fournir ce dont il auroit necessaire. ment besoin. Car S. Paul trauailloit bien à faire des tentes, & il se vante luy-mesme que ce sont ses mains qui l'ont nourri. Mais il y auoit quelque chose de particulier en l'administration de son Apostolat, qui requeroit qu'il ne se seruist pas du droit qu'il auoit d'en viure, comme les autres Apostres, & les autres serviteurs de Christ. Et l'on dit que Musculus faisoit de la toile pour fournir à ses necessités. Mais c'est que les circonstances des temps ne souf-froyent pas qu'il peust estre entretenu par les Eglises, de sorte qu'en cette conjoncture, il n'y auoit rien de si honneste que ce qui luy reuenoit de ce trauail. Hors cela, vn Ministre de l'Euangile doit viure des fonctions de sa charge,& des emplois honorables qu'il peut auoir d'ailleurs dans les lettres, & qui n'em. barassent point ses principales sonctions. Que s'il ne peut pas esperer de deuenir riche par ce moyen-là, il

194 SVITE DE LA DERN. PART faut qu'il se propose qu'il n'est pas appellé à amasser d'autres tresors que ceux de la connoissance de Christ: encore ne les doit-il pas retenir comme vn bien qui luy soit particulier, mais, comme nous auons dit, il les doit liberalement communiquer à toutes sortes de perfonnes. Mais quoy que signifie le mot qui defend aux Pasteurs d'aimer deshonnestement le gain, il en vient vn autre apres, qui a vne particuliere emphase. Nous le tournons non auaricieux: mais il signifie proprement vn homme quin'aime point l'argent, ce qui veuten-core dire dauatage. Car nous appellons auares ceux qui ne pensent à autre chose qu'à amasser du bie, & qui pour cet effect se laissent aisément aller à des actios ou sordides ou injustes: & ie ne nie pas que quelquesfois l'amour de l'argent, entre les Grecs, ne signifie ce vice-là: Mais neantmoins l'amour de l'argent pouuant estre tel qu'il ne meriteroit pas beaucoup de blasme, parce qu'on le peut aimer mediocrement, l'auarice, qui est vn vice, n'a point esté appellée du nom d'amour de l'argent, sinon par-

DE LA MORALE CHREST. 195 se que ces deux choses sont fort dans le voisinage l'vne de l'autre. Tellement que cette disposition de l'ame que l'Apostre recommande à vn l'asteur, signifie mesme quelque chose qui est au deça cet amour de l'argent qui pourroit estre estimé legitime & mediocre. Et de fait, il y a des gens que l'on ne peut pas accuser comme injustes, & que ie ne voudrois pas blasmer comme auares, qui font neantmoins trop paroistre qu'ils aiment l'argent. Si on leur fait vn payement, ils sont difficiles en la monnoye, & exigent rigoureusement iusques au dernier petit quadrin. S'il vient à courir vn bruit de la diminution du prix des especes, ils rougissent & pâlissent, quoy que peut-estre le dom-mage qu'ils ont à y sousser ne soit pas grand. S'ils voyent en quelque lieu quelque grosse somme de Louys ou de pistoles, ils l'admirent, & leur conuoitise se manifeste incontinent dans leurs yeux. S'il faut mettre la main à la bourse, ils la deslient auecque peine, & ne se défont de ce qu'ils en tirent qu'à regret. En yn mot, en toutes occasions

Nij

196 SVITE DE LA DERN.PART. où ils ne se tiennent pas sur leurs gardes, (car quelquesfois ils veulent euiter ce blasme, & taschent de passer pour liberaux) ils découurent le foible de leur esprit ; de sorte qu'il est aussi aisé de reconnoistre vn homme qui a ces inclinations, que celles des amoureux en la presence de leurs maistresses. Or quoy qu'on peust supporter cela dans les autres Chrestiens, & que ce soit vne passion qui regne en beaucoup de gens, il est neantmoins certain qu'elle est tout à fait mal seante à vn Ministre de l'Euangile. D'vn costé il y doit auoir quelque chose de noble & de genereux en son esprit, qui le garentisse de cette bassesse-là; & de l'autre il doit auoir en l'ame des tresors qui luy rendent les richesses de ce monde comme contemptibles. Ie ne voudrois pas qu'vn Pasteur fust ny prodigue ny tout à fait negligent en ses affaires, ou tellement contempteur des choses du monde qu'il ne s'en souciast du tout point. Principalement s'il a vne famille il en doit auoir le soin, & s'il l'abandonne entierement, il a part au blasme de ceux que S. Paul dir

DE LA MORALE CHREST. 197 estre pires que les infidelles. Mais neantmoins i'aimerois mieux qu'il pechast de ce costé-là, que s'il se laissoit aller à l'autre extremité, & me suis souuent estonné de voir quelques Ministres de la Parole de Dieu, reprocher à vn grand homme que i'ay connu, qu'il donnoit trop liberalement pour sa condition, & qu'il ne regardoit pas d'assés prés à sa dépense. l'arce qu'il estoit en mesnage, il en laissoit faire à sa femme; & d'autant qu'il estoit naturellement honorable & liberal, il vsoit selon cette inclination de ce qu'il se trouuoit entre les mains. Du reste, il auoit l'esprit perpetuellement esleué à des contemplations sublimes, & ne pensoit à autre chose qu'à esclaircir la Theologie & la Parole de Dieu. Les richesses qu'il auoit dans l'ame luy faisoyent mespriser celles du corps, & quoy qu'il eust vn entende. ment capable à merueilles, le soin des petites choses dela vie n'y pouvoit neatmoins entrer. Si on en parloit deuant luy, il destournoit incontinent le propos à quelque chose de beau & de grand, & si la necessité des voyages, 198 SVITE DE LA DERN. PART. l'obligeoir à se distraire de ses meditations pour manier & pour conter de l'argent, il bailloit sa bourse à vn de la compagnie, & le prioit qu'il luy eust cette obligation de conter & de payer aux hosteleries pour luy. Mais ceux qui prenoyent cette peine en estoyent bien recompensés. Car la connoissance des langues, qu'il possedoit admirablements celle de la Philosophie d'Aristote, qu'il auoit toute presente dans l'esprit : celle de la Theologie, dans la quelle il regnoit absolument en son temps; & quantité d'autres belles lumieres qu'il avoit dans les sciences, & mesmes en quelques beaux arts, luy fournissoit le moyen de redre à ceux auecque qui il voyageoit, sa conversation tres-vtile & tres-agrea; ble. Mais il est arriué à ce grand personnage ce qui a de coustume d'arriuer aux hommes extraordinaires, c'est que parce qu'ils sont extraordinaires, les autres ou ne les goustent pas, ou ne les pequent supporter. Tellement que si vne vertu eminente n'auoit dequoy se contenter en elle-mesme, & si celuy qui la possede n'auoir en sa iouissance

DE LA MORALE CHREST. 129 yne grande matiere de louër Dieu, i'estimerois sa condition en quelque sorte miserable, de se voir l'objet de la contradiction. Mais retournons aux qualités que S. Paul requiert en vn Euesque. Il dit donc apres cela qu'il doit estre benin, & toutesfois ie croy que le terme de l'original signifie plus proprement equitable. Or chacun sçait ce que c'est que l'equité. Aristore appelle ainsi cette sorte de iustice qui ne se tient pas precisément & rigoureusement aux termes de la loy, & qui y supplée ce que le Legislateur n'y a pas mis, afin de traitter doucement celuy enuers qui il faudroit estre rigoureux, si on examinou son action à la loy auecque toute sorte d'exactitude. En effect il arriue aux Legislateurs ordinairement deux choses, L'vne, qu'ils se tiennent par necessité dans les termes generaux, sans auoir égard à diuers cas particuliers ou qu'ils ne peuuent pas preuoir, ou, quand ils les pourroyent preuoir, qu'il n'est pas possible que les loix comprennent. L'autre, qu'ils se seruent de termes seueres, pour tenir les esprits des home

N iiij

200 SVITE DE LA DERN. PART. mes en leur deuoir, parce qu'ils sont na? turellement enclins au mal, & que s'ils n'en estoyent destournés par l'austerité des loix, & par les termes tranchans de leurs denonciations, ils s'y abandonneroyent auec vne extreme licence. L'equité donques d'vn costé supplée à la Loy ce qui n'y est pas, & de l'autre, quand il en faut saire application aux actions des particuliers, elle y apporte de l'adoucissement, si la nature de l'action, ou la condition de la personne, luy en fournit quelque occasion fauorable. Or est-il bien vray que c'est aux Magistrats d'vser de cette equité lors qu'il est question d'imposer aux hommes des peines inflictiues & reelles. Et est bien vray encore qu'elle conuient particulierementà vn Ministre entant qu'il a l'administration de la Discipline entre les mains, & qu'il faut qu'il dispense les Censures & les peines Ecclesiastiques. Parce qu'aussi bien dans l'Eglise que dans la police, le souverain droit est souvent le souverain tort, c'est à dire, qu'il y a de l'iniquité beaucoup à youloir estre trop iuste. Mais neant-

DELA MOARLE CHREST. moins, comme encore que les personnes priuées ne laissent pas de iuger des actions de leurs prochains, quoy que ce ne soit pas d'vn iugement conjoint auec autorité, elles ne laissent pas aussi d'estre obligées à y vser d'equité, bien qu'il ne soit pas question de l'imposition d'aucune peine. C'est pourquoy S. Paul la recommande à tous les Chrestiens. Que vostre equité, dit-il, car c'est là l'interpretation du mot dont il se sert, soit connue de tous les hommes. Et ailleurs il ordonne à Tite de recommander aux Créceins qu'ils ne médisent de personne, qu'ils ne soyent point querelleux, mais qu'ils soyent equitables. De sorte que nostre deuoir est à tous d'interpreter les actios detout le monde, & particulierement de nos freres, le plus fauorablement qu'il se peut, pour les louër quand elles le meritent, les iustifier quand il n'y a rien à reprendre, les excuser quand on le peut faire sans flatter, ou sans conniuer au mal, & si le mal y est si apparent qu'il n'y ait pas moyen de les excu-

fer, les prendre au moins toufiours par l'anse par laquelle elles pesent le moins, 201 SVITE DE LA DERN. PART! & les enuisager par l'endroit par où elles sont moins choquantes. Et parce que ceux qui sont ainsi disposés sont debonnaires & benins, ce n'est pas chose estrange qu'on ait traduit ce mot tantost benin, tantost debonnaire. C'est donc vne mesme vertu que S. Paul requierticy dans les Ministres, qu'il a requise ailleurs dans tous les fidelles de Iesus Christ, mais il la recommande à ceux là plus particulierement, mesmes dans les lugemens qu'ils font entant que particuliers, à proportion de ce qu'ils doiuent donner en tout yn singulierement bon exemple. Ce qui vient apres, qu'ils ne soyent point querelleux, n'est pas vne qualité moins recommandable. Et à mon aduis elle regarde nommément trois choses. La premiere est que le Ministre ne soit ny trop sensible aux offenses, ny pront ou enclin à offenser, & quand il luy arrive quelque demessé, qu'il ne soit ny malaisé à appaifer, ny difficile à reduire aux choses qui sont necessaires pour appaiser ceux qui pensent auoir sujet de se plaindre de ses offenses. Car il y a des hu-

DELA MORALE CHREST. 203 meurs acariastres, & vindicatiues, & qui ne veulent rien ceder, & des gens qu'il n'est iamais possible de ranger à reconnoistre qu'ils ont failli, soit qu'ils soyent si aueuglés de leur passion qu'ils ne l'apperçoiuent pas, soit que la fierté de leur esprit les empesche de l'aduouer encore qu'ils s'en apperçoiuent. Or vn Ministre doit estre tout d'vne autre constitution : de sorte qu'il pardonne aisément; & qu'il ne face point de difficulté de demander pardon, s'il luy est arriué de faire quelque chose qui le merite; & enfin, que de quelque costé que soit le tort, il estouffe & enseuelisse le plustost qu'il se pourra toutes semences de contentions, foulant aux pieds ses interests, pour la gloire de nostre Seigneur, & pour l'edification publique. La seconde est que dans les affaires pecuniaires il se témoigne ennemy come irrecociliable des procés, non pas seulement parce qu'il ne doit pas estre attaché au bien, mais encore parce qu'il doit auoir vne grande auersion à toutes querelles. Car il y a des gens qui ne plaident pas seulement par auarice, &

204 SVITE DE LA DERN. PART. pour auoir le bien d'autruy, ou pour retenir le leur, ils le font aussi par obstination d'esprit, & par humeur à le vouloir emporter, quelque chose qu'ils entreprennent. Et ie croy que qui pourroit voir iusqu'au fond de la dispositiondes chicaneurs, il s'en trouueroit presque autant qui le sont paropiniastreté d'esprit, que par la conuoitise des richesses. La troisieme finalement est que dans les conuersations il ne face pas paroistre qu'il ait l'ame contentieuse. Car il y a aussi des gens qui aiment naturellement à contester : de sorte qu'en toutes occasions, ne s'agist-il que de sauoir, comme on disoit autrefois, s'il faut dire d'vne cheure, qu'elle porte de la laine ou non, ils disputent auec chaleur, & ne s'en departent iamais que les autres ne leur quittent le champ de bataille. Ot soit que cela vienne d'ambition, parce que l'on veut paroistre ou plus savant ou plus subtil, soit que cela vienne d'inclination qu'on ait naturellement à ergoter, ou de quelque autre telle cause, quelle qu'elle soit, c'est vne chose tresmal seante à vn Ministre de l'Euangile.

DE LA MORALE CHREST. Ailleurs S. Paul adjouste à ces qualitéslà celle d'estre amateur des gens de bien: ce qui ne manquera iamais de se rencontrer en vn Pasteur, s'il est homme de bien luy-mesme. Car il nous est naturel d'aimer nos semblables, & ce qui se void dans les bestes & dans les · oiseaux, a donné lieu aux Anciens d'en coposer des prouerbes. Mais outre cette inclination naturelle, d'vn costé il y a dans la vertu & dans la pieté des attraits merueilleux pour se faire aimer, & de l'autre, il y a dans l'esprit de ceux qui en sont eux-mesmes imbus, vne pente perpetuelle à le faite. Les nouueaux Philosophes disent que le monde est composé de petits atomes de figure fort differente, & qui ne peuuent rien composer tandis qu'ils demeurent meslés: mais que toutes choses estans dans vn mouuement continuel, qui fait faire à ces petits corps mille tours & mille vortices, il s'en fait separation par ce moyen, de sorte que ceux qui sont de mesme nature se ioignans en mesme lieu, & s'attachans les vns aux autres par la conformité qu'ils ont en206 SVITE DE LA DERN. PART. tr'eux, toutes ces belles formes que nous voyons au monde en resultent. Si cela est ou non, c'est ce que ie laisse maintenant indeterminé. le veux dire seule ment que ce qu'on attribuë à ces corpuscules se verifie dans nos esprits : 82 que comme il semble que les atomes lumineux dont se forme la lumiere du . Soleil, ont encore plus de propension que les autres à se ioindre, afin de fournir tous les iours la clarté qui est necessaire à l'Vniuers: les ames bien éclairées de la connoissance de Dieu ont encore vne plus inuiolable inclination à l'ynion, que celles qui n'ont autre guide que la raison & les propensions naturelles. C'est aussi vne chose bien remarquable que l'Apostre dit qu'il ne faut pas qu'vn Ministre soit adonné à son sens; ce qui, ce me semble, comprend deux choses. La premiere est, que si c'est vn homme qui n'ait en l'entendement que des lumieres ordinaires, il se laisse aisément conduire à ceux qui ont plus de prudence que luy. La seconde, que s'il a quelque chose d'extraordinaire dans la clarté & dans la

DE LA MORALE CHREST. 207 force de son esprit, il ne laisse pas de ceder, à l'heure que l'ordre veut qu'il defere plus à la prudence d'autruy qu'à la sienne. En vn mot, que soit par sentiment qu'il ait de la mediocrité de ses qualités, soit par respect à l'autorité de ceux qui luy sont superieurs, quelque connoissance qu'il ait de la vigueur de son intelligence & de la bonté de ses sentimens, il ne s'en monstre pas neantmoins trop amateur, & qu'il face tousiours paroistre qu'il est homme d'ordre & modeste. S. Paul, non plus, ne veut pas qu'il soit colere : ce qui ne fignifie pas qu'il doine estre absolument exempt de cette passion. Car elle est sinaturelle à l'homme qu'elle a donné le nom à l'vne de ces deux parties de son ame sensitiue, & quelques-vns reprennent Aristote de ce qu'il a fait vn vice de cette sorte d'insensibilité qui confiste à ne s'emouuoir iamais d'aucune offense, parce qu'il est impossible qu'il se rencontre personne entaché de ce vice-là. Le mot duquel se sert S. Paul signisie proprement vn homme crop pront à s'irriter, & qui le faic

208 SVITE DE LA DERN. PARTA trop souvent pour des choses legeres? mais de qui aussi l'emotion se calme aisément. Car quant à ceux qui sont opiniastres en leur courroux, & qui gardent bien long temps le ressentiment d'vne offense, la Philosophie d'Aristote les appelle plustost amers. Il est donc, selon le sentiment de S. Paul, indigne d'vn Ministre de l'Euangsle de ressembler aux enfans, qui se faschent aisément & de peu de chose, quoy qu'ils s'appaisent de mesme auecque beaucoup de facilité: ou aux petits chiens, qui s'irritent au premier bruit qui se sait à la por-te de la maison, sans sauoir qui c'est qui frappe, & qui iappent à toute rencontre, & puis vn moment apres caressent ceux qu'il semble qu'ils voulussent deuorer auparauant. Vn honneste homme doit estre plus composé, & plus en la puissance de soy mesme : & sur tout vn Ministre de l'Euangile doit auoir plus de douceur & de grauité. Selon le sens de S. Paul il doit estre encore iuste & saint: ce qui regarde autruy & luy-mesme. Car la iustice est vne vertu qui reigle les actions des hommes

DE LA MORALE CHREST. 209 hommes en ce qui touche le prochain, & la circonspection qu'il faut apporter à ne le frauder d'aucune chose quiluy appartienne. La sainteté en est vne autre, qui compose les mouuemens de cette partie de nos ames où reside la convoitise, & particulierement celle qui concerne les voluptés tant du goust que du toucher. Celle-là donques oblige vn Ministre à estre souuerainement ponctuel en toutes les choses cù le prochain à interest, pour ne luy faire aucun tort : celle-cy, à prendre garde à ses actions, à ses paroles, & à ses gestes, auec tant de circonspection, qu'on n'y puisse rien obseruer qui donne le moindre soupçon qu'il y ait quelque chose d'impur en sa conscience. Quant à ce que S. Paul adjouste qu'il doit estre continent, i'estime que ce terme signifie quelque chose de plus qu'il ne fait dans la Philosophie d'Aristote. Car là le continent est opposé à celuy qui par quelque desordre de la partie sensitiue de son ame, & par quelque foiblesse de sa raison, qui en deuroit gouuerner &c tenir en bride les mouuemens, se laisse

210 SVITE DE LA DERN. PART. aller aux voluptés illicites, & qui sont réconnuës telles, mesmes par le iuger ment de son propre entendement. Icy ie croy que l'Apostre veut qu'vn Ministre de l'Euangile ait dans l'intellect tant de force, & dans la partie inferieure de son ame tant de moderation, que mesme il s'abstienne des voluptés qui luy sont permises, quand les occurrences le requierent, soit pour s'accoustumer soy-mesme à tenir en bride ses passions, ou pour donner aux autres de bons exemples & seruir à leur edification. Et de fait S. Paul se sert de ce mesme terme où il dit, que ceux qui se preparent à la lutte pour emporter le prix, viuent entierement par regime, ou fe monstrent continens en toutes choses, ce qui signifie vne exactitude merueilleuse en toute sa façon de viure, iusques à estre scrupuleux dans les choses qui sont permises à toutes sortes de personnes qui ne se disposent point à ces combats. Et luy-melme s'en propose pour patron, quand il dit qu'il matte & qu'il reduit son corps enseruitude, l'accoustumant à des trauaux dont les autres se dispésent

DE LA MORALE CHREST. Le priuant de diuerses choses ausquels les les autres estiment qu'ils se peuvent laisser aller. Sans doute parce qu'il couroit dans yne lice, & qu'il estoit appellé à vne lutte, dans laquelle tout le monde auoit l'œil sur luy, pour voir comment il sortiroit d'vn combat où il auoit à donner de si grands exemples. Enfin, car ces considerations me tirent trop loin, l'Apostre requiert d'vn Ministre de l'Euangile deux choses. La premiere est, qu'il conduise honnestement sa propre maison, ayant ses enfans suiets en toute reuerence. Et il en adjouste incontinent la raison; c'est que si quelcun ne sçait conduire sa propre maison, il ne pourra pas gouverner Eglise de Dieu. Et cela est de si grande importance, au iugement de ce grand seruiteur de Dieu, que si vn homme a des enfans accusés de dissolution ou qui ne se puissent ranger, il ne veut pas qu'on le choisisse pour estre Euesque. Parce que s'ils sont tels par sa faute, & par la trop grande ou indulgence, ou seuerité qu'il a apportée en leur education, il n'est pas capable de conduire l'Eglise de Dieu; &

O ij

212 SVITE DE LA DERN. PART.

s'il a fait tout ce qu'il a peu & tout ce qu'ila deu pour les tenir en leur devoir, & qu'il n'en ait peu venir à bout, bien qu'il soit excusable quant à luy, si est-ce que le vice de ses enfans rendroit son ministere moins honorable & moins fructueux, & que l'exemple du desordre de sa maison, seroit dommageable à l'Eglise. C'est pourquoy nous trouuons ces mots dans la Loy de Moyse. Si la fille du Sacrificateur se polluë en paillardant, elle polluë son pere: & pourtant elle sera bruslee au feu. Et quoy que l'extreme vieillesse d'Heli l'eust peu excuser deuant les hommes, de ce qu'il n'auoit pas assés seuerement reprimé l'insolence & le débordement de ses fils, si est ce que cela ne l'excusa pas denant Dieu, qui fit à cette occasion tomber vn terrible iugement sur sa personne & sur sa famille. La seconde est, qu'il ne soit point ou nounel apprentif, ou comme d'autres traduisent, nouice, ou enfin, si vous voulés retenir le terme grec, qui n'est pas absolument inconnu entre les François, neophyte, c'est à dire, nouvellement planté en l'Eglise. Car les ar-

DE LA MOARLE CHREST. 113 bres nouuellement transplantés d'vn lieu en vn autre, sont plus sujetsou à comber par l'imperuosité des vens, ou à secher parce qu'ils ne tirent pas assés de suc, ou à perdre toute leur vigueur d'abord, en iettant plus de fueillages qu'il ne faut, parce que le nouueau terroir leur donne quelque gayeté au commencement, laquelle ne continuë pas, leurs racines n'estans pas encore assés, ny profondes ny vigoureuses. Et c'est peut-estre à ce dernier que S. Paul a egard quand il adjouste, de peur qu'il ne s'enfle, & qu'il ne tombe en la condamnation du Calomniateur. Car ces nouueaux venus, auant que d'estre bien confirmés en la profession de la verité, paroissent tous de zele d'abord; & sur tout, s'ils se voyent promus à l'honneur du ministere public, ils se laissent emporter à la vanité, & ce peu qu'ils ont d'auancement en la connoissance de Iesus Christ, ils l'estallent, & en font parade, & veulent acquerir la reputation d'auoir plus de pieté, & plus d'affection à l'auancement de la Religion que leurs copagnons. Cette affectation

O iij

214 SVITE DE LA DERN. PART; d'vne sainteté & d'vn zele extraordia naire, doit tousiours estre suspecte, principalement en ceux qui sont nouueaux conuertis, & il arriue rarement que cela ne degenere, & ne produise enfin quelque notable scandale. Certainement il n'y a que trop d'exemples de ceux qui apres estre sortis des Cloistres, & auoir esté receus dans vne autre Communion aux fonctions du ministere sacré, sont apres auoir quelque temps fair ostentation de leur conuersion, retournés à leur ancienne profession; ce qui est proprement la condamnation du Calomniateur, qui est tombé du ciel en la terre. Quoy qu'il en soit, comme les plantes qui doiuent durer, font plus long-temps à venir, il est certain que les hommes qui doiuent faire beaucoup de fruit, ont besoin d'estre confirmés en la connoissance de l'Euangile. Ce que l'Apostre adjouste enfin que l'Euesque doit retenir ferme la pæole fidelle, qui est selon instruction, a esté traitté dans le discours precedent, & ce qu'il dit qu'il faut qu'il prenne garde à soy, comme dispensateur de la maison

DE LA MORALE CHREST. le Dien, ce n'est pas tant vne qualité qu'il requiert en luy, qu'vn motif & yn argument duquel il se sert pour le porterà toutes les vertus qui sont dignes de ce caractere. Comme de fait, vn homme qui tient en l'Eglise de Dieu le mesme lieu que tenoit entre les sert uiteurs d'vne maison, celuy à qui le Maistre auoit commis l'intendance sur les autres, & l'administration de son bien; d'vn costé, par la consideration de son deuoir, est obligé d'apporter à cette charge toute sorte de diligence, de soin & de fidelité, & de l'autre il doit estre excité par le ressentiment de l'honneur que son maistre luy a fait, de l'esleuer au dessus de ses compagnons, à s'y comporter de telle façon, qu'il en remporte son approbation, & qu'il leur soit en bon exemple. Et pour le regard du bon témoignage que l'Euesque doit auoir, mesmes de ceux qui sont de dehors, si cet aduertissement regarde le temps qui a precedé la vocation du Pasteur au Christianisme, il yeur dire que mesmes pendant le temps de son ignorance, il a deu estre d'vne si honneste con-

216 SVITE DE LA DERN. PART. uersation selon le monde, qu'on ne luy puisse rien reprocher de criminel: & s'il concerne le temps de sa vocation au Christianisme & au ministere, il veut dire qu'alors ses comportemens doiuent estre tels, que les ennemis de la verité soyent neantmoins contraints d'aduouër qu'il est irreprehensible en sa conduite. Le premier est necessaire, afin que la flestrissure de la personne ne s'estende pas sur le ministere qui luy est commis: le second l'est encore plus, afin que les vices du Pasteur ne soyent pas imputés à la doctrine de l'Euangile, & qu'il paroisse qu'elle inspire des vertus qui rendent recommandables les personnes qui l'enseignent, de forte qu'ils ont l'approbation de ses ennemis. Et l'aurois icy acheué la description des qualités d'vn Pasteur, si les autres endroits des Escrits de S. Paul ne m'aduertissoyent d'en dire encore deux ou trois choses.

Pour donques commencer par cellecy, à mon aduis vn des plus grands defauts qui puisse estre en vn Ministre de l'Euangile, c'est celuy de la sincerité.

DE LA MORALE CHREST! 217 Et i'appelle ainsi cette disposition d'ame qui fait que les paroles & les actions d'yn homme découurent naïsuement ce qu'il a dans l'interieur, tellement qu'en sa coduite il fait paroistre vne certaine rondeur ennemie de la menterie, & de la fourberie, & des artifices par lesquels on se déguise, pour passer pour autre que l'on n'est veritablement. Et i'ay premierement fait mention de la menterie. Car il est bien vray que S. Paul n'en a point parlé dans le denombrement des qualitez d'vn fidelle Ministre de Iesus Christ. De quoy ie ne faurois rendre de raison si ce n'est qu'il a creu que c'est vn vice de valet, & que tant s'en faut qu'il peust tomber en la personne d'yn Pasteur, qu'il ne se rencontre pas mesme en celle d'aucun honneste homme. Certes quand l'Apostre S. Paul dit, Ne mentés point l'un à l'autre, mais parlés en verité chacun auecque son prochain, il donne vn enseignement qui appartient vniuersellement à tous les Chrestiens : mais de quelque façon qu'on prenne le mot de mensonge en cet endroit-là, l'exhortaZIS SVITE DE LA DERN. PART. tion couient incomparablement mieux àvn Ministre qu'à aucun autre. Car s'il est question des menteries qui sont atcompagnées de fraude, pour circonuenir son prochain, ces tromperies doiuent estre extrememet esloignées d'vn serniteur de nostre Seigneur. Et s'il s'agit de celles qui procedent de la vanité & de la legereté de l'esprit humain, sans qu'il en arriue aucun notable dommage à vn autre, il faut qu'vn Ministre ait en souueraine recommandation la verité & la grauité. Si l'Apostre veut desendre celles qui consistent en railleries, vn Ministre, s'il est possible, doit estre tousiours serieux. Enfin, s'il veut comprendre les mensonges officieux, le Ministre de la Parole de Dieu y doit aussi apporter vne circonspe-&ion exemplaire. Gar ie ne sçay si l'Apostre S. Paul mesmes luy auroit absolument defendu de faire accroire à son enfant qu'vne medecine est de l'hypoeras, s'il ne luy pouuoit autrement persuader de l'aualler, quand il est ainsi absolument necessaire pour sa vie. Et si voyant quelcun qui dans les vaines

DELA MORALE CHREST. 219 cerreurs que luy donne le trouble de son imagination, auroit pris de l'arsenic pour se deliurer des Preuosts des Maréchaux qu'il s'imagine qu'il a aux trouse ses, ie ne pouvois autrement l'induire à prendre des contrepoisons qu'en luy disant que c'est du vin de Coindrieu ou de Frontignan, ie ne croy pas que ie me peusse empescher, quelque amour que i'aye pour la verité, d'abuser de sa soiblesse pour le garentir. Mais ie dis qu'en telles occafions, si l'on s'y voyoit necessité, il faudroit par toute autre sorte de moyens donner cette impression aux assistans, qu'on ne laisse pas pour cela d'auoir en horreur toute autre espece de mensonge. l'appelle à cette heure fourberies toutes les actions par lesquelles on veut faire croire qu'on defire & que l'on demande vne chose laquelle neantmoins on nevoudroit pas obtenir: mais on pense pouuoir ainsi mieux paruenir au but de ses pretent tions, en faisant comme ceux qui tirene à l'auiron, & qui tournent le dos au port auquel ils tendent. En effect il y a des gens qui, soit qu'ils ayent esté ainsi

220 SVITE DE LA DERN. PART mal formés par la nature, & qu'elle leur ait mis quelque chose de tortu dans l'ame, de sorte qu'ils ne sauroyent iamaisaller droit en quoy que ce soit : ou qu'ils se soyent eux-mesmes accoustumés à cette sorte de prudence qui ressemble les Escreuisses, & qui s'auance en reculant, font tousiours semblant d'vne chose quand ils en desirent vne autre, ou vont par des destours & par des ambages, louiant, comme disent les matelots, tantoit d'vn costé tantost de l'autre, & ne tournant iamais la prouë de leur Nauire vers le lieu où ils veulent arriuer. Nostre Seigneur allant en Emmaus, fit en vn certain endroit, semblant de vouloir passer outre, afin d'exciter plus efficacément en ses disciples le desir de le rerenir. mais il procuroit le bien de ceux auec qui il mare choit, & non le sien particulier. Au lieu que ces gens-là ne se seruent de ces simulations que pour le bien de leurs affaires, ou pour l'execution de leurs passions. Il sit semblant seulement du geste & de la contenance du corps. Au lieu que ces gens parlent, escriuent, af-

DE LA MORALE CHREST. 221 firment, nient, protestent & iurent mesmes, & ne font point de difficulté d'employer les choses les plus sacrées, pour en persuader vne qu'ils ne croyent pas eux-mesmes, seulement afin de reussir en leurs desseins. L'Euangile ne nous rapporte point que nostre Seigneur se soit serui de cet innocent artifice sinon vne fois seulement. Au lieu que toute la conduite de la vie de ces gens est de cette trempe, parce qu'ils en ont fait vne habitude laquelle ne se démentiamais. Vn moment apres que nostreSeigneur eutemployé ce moyen là, il se découurit à ses disciples, & leur fit connoistre quelle auoit esté son intention. De sorte que leur erreur ne dura que fort peu de temps, & ne seruit qu'à produire en eux des connoissances qui n'y estoyent pas auparauant, & à y engendrer des mouuemens qui leur donnerent puis apres vne satisfaction incroyable. Au lieu qu'entant qu'en eux est ces gens entretiennent tant qu'ils peuvent par leurs simulations, les esprits de ceux à qui ils ont affaire, dans l'ignorance de la verité de leurs senti222 SVITE DE LA DERN. PART. mens, afin d'en abuser à leur auantages Mais il y a encore cette difference entre nostre Seigneur Iesus Christ & eux. C'est que le Seigneur Iesus n'a remporté de cette sage économie, sinon vne immortelle louange de bonté & de charité : au lieu que de quelques nuages que les autres enueloppent leurs actions, fi est-ce pourtant qu'on void incontinent au trauers, de sorte qu'ils n'en rempor-tent rien sinon la reputation d'estre fourbes. Enfini'appelle artifices pour se déguiser, non pas seulement les faux semblans de pieté, les yeux tournés vers le Ciel, les prieres souventes fois repetées, l'affectation de paroistre attentif aux predications, la ponctualité à se trouuer aux lieux & aux exercices sacrés, & toutes les autres choses par lesquelles on se contresait en cette maties re: mais aussi les déguisemens qu'on apporte à ses actions, pour leur donner vne autre couleur, que celles qu'elles ont naturellement, & qui vient des principes interieurs de leur production. Car il y a des gens qui quand ils ont dit ou fait quelque chose qui ne se peut pas

DE LA MORALE CHREST. soustenir, ne sont pas difficulté de la nier hardiment s'ils croyent qu'on ne la leur puisse pas prouuer; & s'il n'y a pas apparence de la pouuoir nier tour ouuertement, ils biaisent, ils tergiuerfent, ils chicanent sur les circonstances, ils epiloguent sur l'ambiguité des termes, ils vetillent, ils embarassent tant qu'ils peuuent l'estat de la question, ils donnent à ce dont il s'agit mille tours & mille visages, pour esblouïr les yeux du monde, & pour empescher qu'on n'apperçoiue la verité. Car ils s'imaginent que par cet artifice-là il en arriuera comme quand on a sur le nés de ces lunettes taillées à facettes, qui multiplient tellement les especes, & qui les tiennent tellement en mouuement, que pour vne piece de monnoye vous en voyés cent qui se remuent incessamment, de sorte qu'il vous est absolument impossible de saisir la vraye. Or cela est indigne d'vn Ministre de l'Euangile tout ce qui se peut, & directement opposé soit à la simplicité de Christ, soit à la generosité d'vn homme d'honneur, qui croit auoir beaucoup plustost fair,

224 SVITE DE LA DERN. PART!

& devoir remporter plus de recommandation, d'auouer franchement son action, ou de reconnoistre ses paroles quelles qu'elles soyent, que de donner cette impression de luy qu'il a l'ame mal constituée. Apres cela S. Paul en quelques lieux marque l'inconstance comme vne chose fort mal convenable à vn Ministre de Iesus Christ, quand il se defend si fortement qu'il y ait eu Ouy, Ouy, & puis Non, Non, en sa conduite. Iusques là que pour oster le soupçon qu'il y ait eu rien de tel, il ose bien appeller Dieu à témoin sur son ame, ce qui est le plus grand serment qu'il luy estoit possible d'employer. Et celane peut proceder que de l'vne de ces deux causes. Ou bien c'est vne legereté natur relled'esprit qui fait qu'on ne demeure pas ferme en vne resolució; ou bien c'est qu'on se laisse gouverner par ses interests, qui estans sujets à varier, émeuuent aussi diuersement les passions, & font changer les pensées. Or ce dernier icy empesche qu'vn homme ne puisse estre dit homme de bien. Car vn homme de bien se gouverne par la raison,

DE LA MORALE CHREST. 225 par la iustice, par la charité, par la consideration du public, & par le zele de la gloire de nostre Seigneur, à quoy il fair tousiours ceder la consideration deses affaires particulieres. Le premier, s'il n'y a rien dauantage, ne fait pas qu'on estime vn homme meschant, mais il fait qu'il passe pour vn triboulet, de qui l'esprit tourne à tout vent, ainsi qu'vne girouëtte. Virgile donne l'embleme d'vn homme constant, dans l'image d'vn rocher, qui demeure toussours le mesme, & absolument inesbranlable, nonobstant qu'il soit perpetuellement battu des plus grands flots de la mer. Mais d'vn homme tel qu'il s'en void, qui ne demeure iamais en vne assiette, on ne sauroit faire vn plus beau portrait qu'en le peignant sous l'image d'vn moulin à vent; qui est tousiours le mesme à la verité, mais qui tourne tousiours pourtant, de sorte qu'il n'a rien de constant sinon qu'il est vniforme en son inconstance. L'opiniastreté est un grand vice: mais la legereté est plus incommode & plus importune à la societé. Gar quand yous aués affaire à vn hom226 SVITE DE LA DERN. PART. me opiniastre, au moins vous prenés là-dessus vos mesures, & saués qu'il demeurera ferme en cela, à quoy il se sera vne sois determiné. Mais quand il faut traitter auecque des gens ainsi versatiles, & qui ne vous donent iamais aucune prise certaine en vos resolutions, vous vous trouués à toute heure perplex ou déconcerté. Et tout cela vient de ce qu'on n'a pas l'entendement bien fait, ou la conscience imbuë de la veritable vertu: de qui le train est tousiours egal, & les maximes inuariables. Enfin, car il faut desormais passer à d'autres sujets, vne des plus belles qualités que puisse auoir vn Ministre de l'Euangile est celle de la patience. Et il y a trois choses principalement où elle se doit pratiquer. La premiere & la plus freuente est celle des afflictions qui sont communes aux autres hommes, de quelque prosession & de quelque Religion qu'ils soyent. Telle est la perte des biens, qui arriuent en vne infinité de manieres. Telle la perte des amis, & des enfans, & des autres personnes qui nous sont cheres, que la mortemporte

DE LA MORALE CHREST. 227 selon les loix ordinaires de la Nature, ou par quelque extraordinaire accident. Telle enfin est la maladie, & sur tout la douleur du corps, qui quand elle est violente & de durée, met, comme i'ay dit ailleurs, l'esprit de l'homme à vne merueilleusement dure espreuue & tres-difficile à supporter. En toutes ces choses vniuersellement tous les Chrestiens doiuent monstrer de la fermeté, mais elle y est particulierement requise dans les Ministres de l'Euangile. Car la foiblesse, & la mollesse de l'ame, qui s'abandonne à l'ennuy, & qui s'emporte à des lamentations femiminines, & à des actions indecentes, comme sont celles que sont les enfans dans le transport de leur passion, est vne chose fort indigne, & qui deshonore vn homme, & nommément ceux que Dieu a eslevés si hant qu'est le Ministere public. Car quant au sac & à la cendre, aufquels nous voyons que quelques-vns des anciens fidelles ont eu recours dans leurs grands ennuys, c'est vne chose qui tenoit de la nature & de l'air de l'alliance legale. Tous les exer228 SVITE DE LA DERN. PART. cices de pieté y estans beaucoup plus corporels qu'ils ne sont sous l'Econo-mie de maintenant, la repentance, que les fidelles témoignoyent en telles oc-casions, deuoit aussi avoir ses marques exterieures en ces tristes habillemens & en ces contenances lugubres. Neantmoins, quand ie dis de la fermeté, ie n'entends pas cette dureté de courage que quelques Payens ont fait paroistre, & qui estoit plustost soustenuë de la fierté, ou animée de l'ambition, que de la vraye vertu. Quelque chose que peussent dire ou faire les Stoiciens, il a esté impossible qu'ils ayent mis l'insensibilité dans le corps humain, & toute la science de Chrysippus ou de Zenon ne sauroit empescher qu'vn homme ne sente grand mal quand il a dans les vreteres vne pierre qui trauaille beaucoup à y passer, ou qui a quelque fluxion acre & mordicante sur les iointures. D'ailleurs, quelque effort d'entende-ment que l'on puisse faire en la souffrance de la douleur, il est impossible neantmoins de faire vne sigrande abstraction de l'ame d'auecque le corps, que la

DE LA MORALE CHREST. Souffrance de l'vn ne se communique à l'autre. Et comme le sentiment est inseparable du corps humain, les passions sont naturelles à nostre esprit, de sorte que l'impassibilité est aussi impossible à introduire dans l'vn, que l'insensibilité dans l'autre. Aussi ny Dauid, ny les Apostres, ny Christ mesme, quoy qu'il eust plus de lumiere de raison que tous les homes ensemble n'en peuvent auoir, n'ont point fait profession de cette roideur insurmontable de cœur, qui braue & qui morgue la douleur, & qui dit que dans le taureau de Phalaris le sage est tousiours à son aise. En cela, come en autres choses, la vertu consiste en la mediocrité, & cette mediocritélà n'exclud pas les gemissemens, non pas mesmes quelquesfois les cris tranchans, puis que les lions mesmes en iettent. Mais elle empesche les murmures contre Dieu, les paroles mal digerées contre sa Prouidence, les impatiences inquietes & accompagnées de chagrin contre les assistans, les despits contre les remedes quand ils ne reussissent pas, les emportemens de dou-

P 11j

SVITE DE LA DERN. PART! leur qui font faire des extrauagances; Elle exclud les tentations qui portent à se deliurer de la douleur par des moyens illicites, comme sont ou les sortileges ou la mort, & les pensées qui font douter de la bonté de nostre Seigneur, & quienclinent au desespoir,& les doutes de la verité inuariable de ses promesses. Elle empesche que l'amertume ne s'empare de l'esprit, & quele sentiment du mal ne l'emporte sur celuy de la grace de nostre Sauueur, & qu'au lieu de la douceur de la consolation & de la paix, qui doit tousiours tenir le premier lieu en nos cœurs, l'amene se laisse engloutir par la tristesse qui, comme dit S. Paul, est selon le monde. Pourueu que l'esprit demeure en cette assiette-là: que le corps sente sa douleur, que la sympathie la porte iusques dans le cœur, que les larmes en tombent des yeux, que les sanglots, & si vous le voulezainsi auecque Dauid, les rugissemens en sortent de la bouche du patiet, ce seront des esfects de la nature seulement, que la Grace de nostre Seigneur n'esteint point, & que l'on ne peut des-

DE LA MORALE CHREST. 231 pouiller qu'il n'en couste l'humanité mesme. Que si les martyrs dans leurs tourmens ont paru dans vne autre disposition, & s'ils y ont ou parlé, ou chanté des hymnes à Dieu auec vne parfaite tranquilité, & mesmes auec emotion de ioye, ç'a esté par quelque assistance extraordinaire & miraculeuse de la vertu de l'Esprit de Christ, qui comme il a peu, dans les fournaises ardentes, empescher la flamme du feu de toucher au corps de ses serviteurs, peut seul alors que le seu grille leur corps, arrester le sentiment de la douleur là, &c l'empescher desparuenir insques à l'ame. La seconde chose où yn Ministre de l'Euangile doit faire paroistre sa patience, est dans les persecutions qui luy sont faites à l'occasion de la verité. Et ie n'appelle pas persecution ce que son ministere l'empesche d'estre autant honoré au monde qu'il seroit peut-estre autrement; & que quand il va par les ruës on luy dit quelques paroles offensantes, ou qu'on luy fait quelques gestes de mespris: & que dans la distribution des charges publiques on pele sur luy,

232 SVITE DE LA DERN. PART. plus que de raison. Ces choses-122 & quelques autres semblables, sont fascheuses à la verité: mais il faut auoir bien peu de force de courage, & bien peu de connoissance de l'excellence de la verité, & de la Charge qui l'enseigne, pour prendre quelque chagrin de ces petits insultes-là. Comme il n'est pas permis de se plaindre dans la douleur corporelle sinon quand elle est grande & vehemente, & comme on dissimule les petites sans en faire quasi semblant: il n'est pas permis à vn Pasteur d'estre touché sinon des persecutions importantes, & non de ces legeres algarades qui s'euanouïssent en les mesprisant. C'est donc quand il y va de la ruine de sa famille, du bannissement de sa personne, de sa captiuité dans les prisons, des peines corporelles qu'on luy inflige, & de l'horreur des tourmens & de la mort, que l'occasion se presente à luy de faire vn grand effort de patience, & c'est là qu'il est appellé à la monstrer. Et parce qu'il n'est pas seulement Chres stien, mais aussi Pasteur, il n'y doit pas seulement aussi monstrer la patience

DE LA MORALE CHREST. qu'ont tous les Chrestiens, il y faut donner de bons exemples. Dans la perte des biens donques il fera voir qu'il se console par l'esperance de ceux du ciel, & dans le bannissement, par celle d'vne meilleure patrie. Dans la prison il se souvindra que Christ nous a affranchis des liens du peché, & de l'empire du malin, & tandis que le corps souffrira la captiuité, il fera paroistre qu'il iouït de la liberté de son ame. S'il est fouëtté pour la cause de la verité, il se ramenteura que les Apostres se sont resiouis en telles rencontres, d'auoir esté reputés dignes de souffrir pour le nom du Seigneur Iesus. Et s'il luy faut souffrir de plus griefs tourmens & lamort, ils'efforcera de faire en sorte qu'on reconnoisse en ses paroles & dans tous ses deportemens, que l'horreur de cetraittement ne luy oste pas la consolation qui luy vient de l'esperance de la couronne de vie. Mais parmy toutes ces considerations il ne manquera pas de messer que s'il venoit à témoigner quelque foiblesse au prejudice de la Verité, il n'y va pas seulement de son

SVITE DE LA DERN. PART. salut, de l'esperance duquel on dechet en decheat de la Foy & de la profession du nom de Christ, il y va du salut de ceux qui pecherot par l'exemple de son imbecillité; & de la gloire du Sauueur, au seruice duquel il s'est mis; &de celle de l'Euangile, qui luy a esté donné en depost, de toutes lesquelles choses il faut qu'il se prepare à rendre conte. La troisieme finalement est le mauuais traittement qu'il peut receuoir de la part de ses freres mesmes. Et l'occasion d'exercer cette sorte de patience se peut presenter en diuers egards. Car quelquesfois vn Pasteur a affaire seulement auec quelques-vns de son troupeau, qui s'irritent contre luy & qui luy donnent de la peine. Si c'est pour choses dans lesquelles il ait tort, il est bien aisé de remedier au desordre que cela produit. Parce que s'il reconnoist sa faute assés franchement, il n'y a point d'ame si implacable entre les Chrestiens à qui vne reconnoissance sincere de sa faute ne satisface. Mais s'il est question de chose où il ait le droit, le remede à ce mal est d'yn costé dans la constance,

DE LA MORALE CHREST: 234 pour n'en perdre pas, comme on dit, la tramontane, & ne se pas trop émouuoir pour se voir la butte de la contradiction, & de l'autre la douceur & la moderation d'esprit, pour supporter patiemment les manquemens de ses brebis, & tascher par ses soins & sa charité, de les ramener à la bergerie. I'en ay connu vn de qui i'ay eu l'auantage d'estre collegue, qui apres auoir serui tres vtilemet plus de vingt ans dans son troupeau, ne peut euiter par la conjoncture des temps, de tomber dans l'indi-'gnation de plusieurs de ceux qui le composoyent, à cause de quelque diuersité de sentimens dans les affaires publiques. Ce personnage auoit plusieurs belles qualitez. Car outre le sauoir, qui n'estoit point mediocre en luy, & la probité, qui y estoit exemplai-re, il estoit doué d'vn excellent entendement, versé dans les reiglemens de l'Eglise, extraordinairement prudent & aduisé & fertile en expediens, & charitable autant qu'homme qui soit venu à ma connoissance. Mais il auoit cela en quelque sorte de particulier, que

336 SVITE DE LA DERN. PART. la fermeté de son ame en cette fascheuse occasion, estoit comme incomparable. Il oyoit médire de luy, il sçauoit bien qu'on l'accusoit de n'auoir pas esté fidelle à ce qu'on appelloit son parti: on luy imputoit d'auoir eu part en ie sçay quels auantages imaginaires que quelques vns osoyent nommer des recompenses de trahison, & l'irritation qu'on en auoit contre luy passoit iusques à sa famille, à qui quelques-vns des plus violens firent à cette occasion d'assez importunes algarades. Cependant, il estoit encore vexé par les ennemis de dehors, que les rencontres des choses auoyent extraordinairement animés, de sorte que quand vn flot l'auoit ietté d'vn costé, l'autre le repoussoit de l'autre. Et neantmoins au milieu de l'agitation il demeura ferme en sa station, ne manqua iamais à aucune partie de sa charge si sa santé luy permettoit d'y vacquer, ne pensa iamais à se retirer du milieu de ce troupeau où il receuoit rant de mécontentement, soustint constamment tous ces choqs sans s'emporter au de là de la raison, attendit pa-

DE LA MOARLE CHREST. 237. tiemment que tous ces nuages se dissipassent, & que Dieu ramenast la serenité, & enfin eut pour recompense de sa magnanimité, que quelques années auant sa mort on reconnut pleinement fon integrité,& que quand Dieu le retira il n'y en eut aucun de son troupeau qui ne le pleurast comme vn bon enfant fait son pere. Ie dois ce trait de plume à sa vertu, & ce témoignage de gratitude à l'affection qu'il me portoit, & ie serois bien aise si la posterité a quelque connoissance de moy, qu'on peust dire que son exemple & sa conuersation ne m'auroyent pas esté inutiles. C'est vnerude espreuue que cellelà, quand ceux que vous considerés comme vos brebis, vous regardent comme vn loup, & qu'au lieu que la seule douce consolation qu'on peut auoir en tant de trauaux ausquels vn Ministre est appellé, consiste (apres la satisfaction qu'on a de s'estre acquitté de son deuoir, & d'auoir serui au conseil de Dieu en son temps) en labien? veillance de ceux enuers lesquels ils ont esté employés, on n'en remporte

238 SVITE DE LA DERN. PART. que des effects d'vne extreme irrital tion, des iniures & des calomnies. Neantmoins, comme ce n'est pas dans le calme que le courage & l'addresse d'vn Pilote se fait voir, mais dans les bourrasques & les tempestes, ce n'est pas dans les saisons tranquiles & de repos qu'vn fidelle Ministre de l'Euangia le fait bien paroistre ce qu'il est, c'est dans l'importunité de ces temps fascheux que sa vertu se fait connoistre. Et comme ie trouve bien-heureux vn Pilote qui a peu faire vn voyage de long cours, sans auoir eu le vent contraire, & voguant tousiours à souhait, ausi estime- je celuy plus recommandable pour sa vertu, qui dans les perils eminens, & parmy les vagues & les tourbillons, a tousiours tenu son gouuernail droit, & a enfin amené son nauire au port, malgré tous les mauuais coups de mer, & la violence des orages. Vn autre egard auquel vn Ministre de l'Euangile a besoin de sa patience, c'est quand il est injustement accusé de ne retenir pas le patron des saines paroles en la predication de l'Euangile,&

DE LA MORALE CHREST. que le bruits'en est tellement espandu que cela flestrit sa reputation. Car ç'a esté vne maladie des Theologiens en tous les siecles, que de ne se pouvoir supporter les vns les autres dans les dissentimens qu'ils ont sur le sujet de la Religion. Dieu ne nous ayant pas donné à tous vne mesme mesure de connoissance, il estimpossible qu'en quelques choses, qui ne sont pas essentielles au salut, nous n'ayons des opinions differentes, selon que nous regardons les matieres differemment. Mais Dieu ne nous ayant pas aussi parfaitement sanctifiés, le vice de l'esprit humain se mesle dans ces dissentimens là, & produit de mauuais effects, selon la diuerse constitution des personnes. Car les vns, qui ne sont pas exempts de l'enuie, s'ils voyent quelcun de leurs freres à qui nostre Seigneur ait donné des lumieres qu'ils n'ont pas, ne peuvent gouster ce qui vient d'eux, & crient incontinentà l'heresie, s'ils mettent quelque chose vn peu extraordinaire en auant. Les autres, qui ont esté imbus de quelques doctrines en leur ieunesse, ne

240 SVITE DE LA DERN. PART. peuuent changer d'aduis quand ils sont deuenus vieux. Soit qu'il soit difficile qu'vn vaisseau perde la premiere teinture qu'il a receuë au commencement, ou qu'il soit fascheux d'apprendre de ceux qui sont plus ieunes que nous, se-lon que quelcun a ditautresois qu'il n'y a rien de plus malaisé ny que de faire desaprendre quelque chose à autruy, ny que desaprendre soy-mesme. Les autres enfin estans animés de ce que S. Paul appelle le zele de Dieu, mais qui neanmoins est destitué de connoissance, ont toutes nouveautés merueilleusement suspectes, & appellent nouveauté tout ce qu'ils ne sauent pas. Tellement qu'encore que les choses qu'on leur dit soyent aussi anciennes que la terre, si est-ce que comme on appelle terres nouuelles celles qui sont découuertes depuis peu, encore qu'elles soyent dés le temps de la creation, ces gens appellent nouveautés toutes les verités qu'ils n'auoyent iamais entenduës, quoy qu'il n'y ait rien de si ancien que ce quiest vray. Et parce que le salut est vne chose souuerainement importante, & dans laquelle

DE LA MORALE CHREST! 241 laquelle il est pernicieux d'errer, le zele qu'ils ont pour leur salut, & pour celuy des autres encore, fait qu'ils cheminent dans vne Theologie qu'ils ne connoisfent pas bien, comme dans vn pays où il y a des scorpions, s'imaginans qu'il n'y a pas vne seule pierre qui n'en cache. Quelles contentions n'a t-on point veu autrefois en l'Eglise de nostre Seigneur sur le iour de la celebration de la Pasque, iusques à voir l'Occident excommunier l'Orient, & remplir l'Eglise de Dieu d'anathemes ? Quelles combustions n'a point causées la dispute touchant les Escrits d'Origene, & combien est-ce que les Euesques, & mesmes ceux qui sembloyent estre les plus honestes gens, ont fulminé les vns contre les autres fur cela ? Et n'auons-nous pas veu depuis quelque temps vne region florissante en la connoissance de toutes les belles choses, & pure en la Religion, dont les Theologiens escriuoyent, non pas seulement auecque chaleur, mais auec quelque chose de plus encore, sur la question s'il faut porter les cheueux courts, ou s'il faut permettre aux ieunes

242 SVITE DE LA DERN. PART. gens d'auoir la perruque vn peu longue & vn peu frisée? Or dans les accusations d'heresie vn honneste homme est bien empesché. Car siS. Paul das vne matiere moins importante, a dit qu'il aimoit mieux mourir que si quelcun luy ostoit sa gloire, quels doiuent estre les mouuemens d'vn fidelle Ministre de l'Euangile, quand il y va de sa reputation en la doctrine du salut? Certainement la sidelité est en toutes choses requise en vn dispensateur de la Maison de nostre Seigneur; mais nommément en ce qui touche les divins mysteres, dont la dispensation regarde plus directement la gloire de Dieu & le salut de ses enfans. De sorte que si vn Ministre doit estre ialoux de la reputation d'estre fidelle en toutes les parties de sa charge, il le doit estre principalement en celle-la. C'est pourquoy quelcun a dit qu'en crime d'heresie, il n'est pas seant d'estre patient. Neantmoins, i'estime qu'il eust mieux valu dire qu'il n'est pas seant de n'estre pas fort sensible, parce que la patience est vne vertu qui est bonne en toutes fascheuses rencontres, & qui

DE LA MORALE CHREST. neantmoins compatit fort bien auec vne viue sensibilité. Il faut donc qu'en vne telle occasion vn fidelle Pasteur air vne grande douleur en l'ame de se voir ainsi méconnu, & que le mauuais bruit qu'on espand sur sa doctrine empesche que son ministere ne soit d'assés d'edification. Mais pourtant, aussi bien en cette rencontre qu'ailleurs, il doit affermir son courage, & marcher s'il est posfible auec vn melme vifage parmy l'honneur & l'ignominie, parmy le diffame & la bonne renommée, à l'imitation de ce grand S. Paul. Comme nostre Seigneur Iesus Christ a esté une fois pris par ses disciples pour yn fantosme, & neantmoins il fut incontinent apres reconnu, il se faut consoler de cette esperance que le temps dissipera cette nuée qui enueloppe la verité & la reputation de ceux qui l'enseignent, & qu'elles en sortiront lumineuses, comme dans la serenité d'vn beau iour. Mais quand il plairoità Dieu permettre que l'vne & l'autre demeurast tousiours offusquée & opprimée par le faux zele, & par l'ignorance, & par la fumée de la passion,

244 SVITE DE LA DERN. PART. tousiours viendra t il vn iour qui mettra toutes choses en euidence. Comme ceux qui sur le bon fondement ont basti du bois & du chaume, verront brusler leur ouurage, & s'ils paruiennent à salut, comme S. Paul leur en donne l'esperance, ce sera comme par feu, & comme s'ils se sauuoyent tous nuds d'vn embrasement : ceux qui auront edifié sur ce mesme fondement, de l'or, de l'argent, & des pierres precieuses, auront la consolation de voir leur ouurage soustenir le feu de l'apparition de nostre Seigneur. Et il y aura encore sans doute quelque chose de plus. Ceux qui par la chaleur d'vn mauuais zele, ou par l'instinct de quelque mauuaise passion, auront icy donné de la peine & de la fascherie à leurs freres, auront à rendre conte à nostre Seigneur, comme ce mauuais seruiteur, qui en attendant son maistre se mit à battre ses compagnons de seruice. Au lieu que ceux qui auront supporté constamment de la fascherie pour l'amour de la verité, recev uront de la bouche de Iesus Christ yn bon & auantageux témoignage

DE LA MORALE CHREST. 245 Et quoy qu'on soit introduit dans la iouissance d'vn mesme ciel, il y aura pourtant bien de la difference entre ceux qui y entreront comme hauis& vn peu noircis de l'embrasement, ou à qui nostre Seigneur aura reproché. leur ignorance & leur precipitation, & ceux qu'il aura consolés de son approbation contre la dureté de leurs freres. Le troisieme egard auquel vn Ministre de l'Euangile a besoin de sa patience est quand les Assemblées Ecclesiastiques rendent quelques iugemens iniques contre luy pour quoy que ce soit. Car c'est vne chose bien dure, quand on s'est attendu de receuoir de la part des seruiteurs de Dieu vne sentence fauorable dans des choses qui sont de quelque importance, selon l'euidence de son. droit, de voir ou l'erreur, ou la passion, ou l'enuie, ou quelque autre chose de cette nature, prevaloir dans les Conciles, & faire rendre des iugemens à rebours de la iustice & de l'equité. Et la fascherie en est dautant plus difficile à supporter quand les iugemens sont sans appel, & qu'iln'y a pas moyen d'en faig.

Qiij

246 SVITE DE LA DERN. PART. re corriger l'iniquité par vne compagnie superieure. Et que cela soit arriué quelquesfois il en appert par l'exemple de divers bons serviteurs de Dieu, qui ont esté fort mal traittés dans les Consiles. Car Athanase, & Chrysostome, & quelques autres, ont autrefois experimenté ce que peut l'enuie, la haine, & le desir d'abbaisser les choses hautes, & de releuer les basses, quand vne fois on veut vset d'acception de personnes, & pour cela peruertir le droit. Neantmoins, vn fidelle Ministre de l'Euangile d'vn costé prendra patience, & attendra de Dieu la iustice que les hommes ne luy rendent pas : & de l'autre, il se donnera bien garde des'emporter contre ses iuges, & de les accuser de corrus ption. Car comme dans la Police cia uile il faut que les particuliers souffrent plustost que d'auilir l'autorité de l'ordre public, dans l'Eglise il est absolument necessaire de maintenir la bonne reputation de ces Assemblées, parce que sa

subsistance depend de là. Ie ne trouue donc rien plus indigne d'vn Ministre de l'Euangile, que de le voir, quand il

DE LA MORALE CHREST: 247 croit auoir esté mal traitté par vne Assemblée Ecclesiastique, declamer concre sa iustice, se plaindre qu'il a estô iugé par des gens de mauuaise conscience, & qui le sont laissés corrompre par leurs parties, ou emporter par quelque vilaine passion. Car quand cela seroit vray, il a esté bien dit par les sages, qu'il vaut mieux estre sous vn mauuais Prince, que de n'en auoir point du tout, & ces declamations ne tendent à autre chose qu'à l'introduction de la confue sion & del'Anarchie. La constance & la fermeté en telles occasions est le seul remede à ces disgraces, en attendant qu'il plaise à Dieu faire voir la part qu'il prend en la iustice & en l'innocence de ses seruiteurs. Car quoy qu'il en soit, tost ou tard la verité paroistra, & cependant vn honneste homme jouit de la satisfaction d'vne bonne conscience, & de l'approbation des gens sages qui ont quelque connoissance de sa vertu. Mais quand il auroit à souffeir les dernieres extremités, & à perir comme Chrysostome en exil, il aura sa consolation en l'apparition de Christ, & fa

Qiiij

248 SVITE DE LA DERN. PART. recompense dans les lieux celestes. If ne me reste plus qu'vn mot à dire. Ceux qui forment les hommes à l'eloquence, leur donnent cet aduertissement, qu'il faut qu'ils se proposent quelque grand Orateur à imiter. Et parce qu'il n'y en a peut-estre iamais eu d'absolument acheué, ils leurs disent qu'il faut qu'ils s'en figurent vne idée où il n'y ait aucun des defauts qui se peuvent remarquer en Demosthene, pour exemple, & en Ciceron, & où toutes leurs vertus soyent au plus eminent degré qui puisse estre imaginable. Parce que si on ne se propose point d'atteindre plus haut que l'exemple de ceux qui ont esté effectiuement auant nous, on demeure toûjours au dessous, les copies n'egalant iamais l'original. Au lieu que si on se met deuant les yeux quelque chose de plus esleué, si l'effort de vostre esprit ne vous porte insques au dernier point de la perfection, au moins pourrez-vous bien aller insques où les plus excellens ont peu atteindre. Pour moy ie ne pense pas qu'il y ait iamais aucun Ministre de l'Euangile qui puisse,

DE LA MORALE CHREST. 249 arriuer à la mesure de la vertu de S. Paul. Aussi, apres diuersautres beaux enseignemens qu'ils a donnés à Timothée pour se conduire en la charge d'Euangeliste, il se represente luy mesme deuant les yeux de ce sien dispiciple, & ne requiert de luy sinon qu'il s'efforce de l'imiter. Car quand il dit: Tu as pleinement compris ma doctrine, conduite, intention, foy, douceur, charité, patience: mes persecutions & afflictions, telles qu'elles me sont arrivées en Antioche, & Iconie, & à Listre; voire quelles persecutions i'ay (oustenues: il n'a point d'autre intention sinon d'essayer de le rendre semblable à luy. Ie suis donc d'aduis qu'vn bon Ministre lise bien soigneusement les aduertissemens que S. Paul donne à Timothée, & sur tout qu'il s'estudie à vne chose qui est la plus difficile du monde, qui est de supporter patiemment les mauuais. Mais s'il fait sa principale estude de l'imitation de ce grand seruiteur de Dieu, quoy qu'il ne paruienne iamais à l'egaler, il surpassera pourtant tous les autres.

250 SVITE DE LA DERN. PART.

WWW.W.W.W.W.W.W.W.W.W.W.W.W.

DV DEVOIR DES AVTRES Ministres du Christianisme, assauoir des Anciens & des Diacres.

Lya, outre les Pasteurs, des gens qui seruent en l'Eglise, pour contribuer par leur prudence à son gouuernement, aider à l'exercice de la Discipline, remedier aux desordres & aux scandales qui y arriuent, & auoir soin des pauures qui se trouuent entre les Chrestiens: & ie les messeainsi, selon l'vsage de maintenant, bien qu'au commencement de leur establissement leurs fonctions ont esté distinctes. Car en la naissance du Christianisme les Apostres auoyent la charge de tout celà; mais l'Eglise ayant commencé à se multiplier en Ierusalem, de sorte qu'en vacquant aux pauures, & aux subuentions charitables, pour les leur distribuer, les Apostres estoyent contraints de se distraire de la Priere & de la Predication de l'Euangile, qui estoit neant-

DE LA MORALE CHREST. 251 moins la principale partie de leur administration, ils furent obligez d'establir en l'Eglise des Diacres. On en choisit donc sept, de ceux qui auoyent plus de reputation de foy, de pieté, & de charité entre les Disciples, qui apres auoir esté presentés aux Apostres, furent par eux installés en cette charge par des prieres solemnelles, & par l'imposition des mains. Quant à ceux que nous appellons maintenant Anciens, nous ne trouuons pas l'institution de leur charge en l'Escriture si expressément. Car il est bie vray que S. Ambroise dit enquelque lieu, que la Synagogue, & ensuite, l'Eglise a eu des Anciens, sans le conseil desquels il ne se faisoit rie dans les affaires Ecclesiastiques, & qu'il ne sçait par quelle negligece la coustume s'en estoit perduë de son teps, si ce n'estoit que l'Eglise eust abandoné ce droit, ou qu'euxmesmes eussent abandonné cette fonction par quelque espece de lascheté, ou que l'orgueil des Docteurs, qui ont voulu estre seuls considerés, en ait fait supprimer l'vsage. Mais il ne dit pas si ç'ont esté les Apostres qui ont institué

252 SVITE DE LA DERN. PART. cet ordre en l'Eglise de Dieu, ou s'il s'y auoit esté introduit peu de remps apres que Dieu les eut retirés. Et c'est vne chose remarquable, que S. Paul nous ayant donné le caractere, non teulement des Euesques, c'est à dire, des Pasteurs, mais aussi des Diacres, fort exactement, & ne s'estant pas mesmes teu ny des qualités ny du deuoir des Diaconesses, il passe entierement sous silence les Anciens, & nenous dit nullement ny quelles doiuent estre leuts vertus, ny quelles estoyent leurs fonctions. Vray est que quelques-vns y rapportent ce pas-Sage, que celuy qui preside le face soigneusement: & cet autre endroit où il est parlé des gouvernemens. Mais quant à ce dernier, il semble qu'il signifie plustost vn don extraordinaire & miraculeux, que non pasvne charge. Car ces mots, Dieu 4 mis les vns en l'Eglise premierement Apofires, secondement Prophetes, tiercement Docteurs : signifient bien sans doute des charges: mais ceux-cy: & puis les vertus; consequemment les dons de guerisons, les secours, les gouvernemens, les diversités de langages; signissent quelques choses

DELA MORALE CHREST. 253 extraordinaires, qui n'ont eu lieu qu'en ce temps-là, & qui, comme elles pouuoyent estre données à ceux qui auoyent charge en l'Eglise de Dieu, aussi pouuoyent elles bien se trouuer en ceux qui n'en auoyent point. Et pour le regard du premier, ce precepte que celuy qui preside le face soigneusement, se peut estendre, comme vn precepte moral, vniuersellemenr à tous ceux qui sont preposés à quelque chose que ce soit pour y auoir inspection, & mesmes hors le ministere de l'Eglise. Ou si on le restraint aux choses Ecclesiastiques, il peut signifier vne des parties des fon-Aions du ministere des Pasteurs, de laquelle l'Apostre veut que quand ils l'exercent, ils s'en acquittent auecque soin, comme il veut pareillement que soit qu'ils exhortent, ou qu'ils distribuent, ouqu'ils vacquent à quelque autre partie de leur ministere, ils en facent, comme on dit, leur hoc age, & qu'ils s'y employent tous entiers & auec vne grande diligence. L'autre passage où il est dit que les Anciens qui president deuëment doinent estre reputés dignes de double hon-

SVITE DE LA DERN. PART neur, principalement ceux qui trauaillent en la Parole & en l'endoctrinement, ne fournit aucun inuincible argument pourquoy on le doiue interpreter d'aux tres que de ceux que l'Escriture appelle ordinairement Anciens, assauoir les Ministres de l'Euangile. Car si le mot de trauailler n'a pas l'emphase de mettre de la distination entre ceux qui trauaillent beaucoup, & ceux dont le trauail n'est que mediocre & ordinaire seulement; au moins en peut-il mettre entre ceux qui trauaillent, & ceux qui ne trauaillent plus, parce que l'aage, ou l'infirmité du corps qui vient par malas die ou autrement, les empesche de continuér dans cette fonction de leur charge. Car celle de presider leur peut demeurer, en ce qu'ils ont part en la conduite de l'Eglise & en l'autorité de son gouvernement; & ils peuvent avoir vn simple honneur, c'est à dire, receuoir quelque chose de l'Eglise pour leur entretenement: (car le mot d'honneur fignifie quelquesfois cela) au lieu que celuy qui trauaille effectivement merue yne plus grande recompense. Com-

DE LA MOARLE CHREST. ment qu'il en soit, & d'où que soit pres mierement procedée cette institution des Anciens : (car il n'est pas necessaire de decider icy cette question,) elle est tres-vtile en l'Eglise de Dieu, & n'est pas destituée de fondement en la Parole divine. Car quand à la naissance du Christianisme il y auroit eu assés de Pasteurs en chaque Eglise pour la gouuerner heureusement sans l'assistance des Anciens, comme de fait nous voyons par l'histoire des Actes qu'au commencement on y en establissoit beaucoup, les choses ont tellement changé depuis, que si l'on vouloit remettre la conduite de chaque troupeau à ses l'asteurs seulement, il y en auroit la pluspart où le regime Ecclesiastique, qui doit estre Aristocratique ordinairement, seroit contre l'institution de nostre Seigneur, absolument reduit à la Monarchie. Il faut donc necessairement donner aux Pasteurs des associés, non pour la predication, puis qu'il n'y a pas moyen d'en entretenir beaucoup en chaque lieu, mais pour leur aider dans les autres fonctions de leur ministere, & par-

256 SVITE DE LA DERN. PART. ticulierement en l'administration de la Dicipline, & en ce qui touche l'autorité du gouvernement. Or est-il vray qu'on s'y pourroit seruir de l'ordre des Diacres, & de fait on les y employe maintenant. Mais puis que les Diacres par leur premiere institution, n'auoyent charge sinon d'administrer & de distribuer les deniers destinés à la nourriture des Pauures, & que ç'a esté par vne nouuelle concession de l'Eglise qu'ils ont esté admis à ces autres fonctions, c'est vneautre charge que celle du Diaconat qui leur a esté commise en cet egard, & par consequent cette mesme charge, mesme sans le Diaconat, a peu estre conferée par l'autorité de l'Eglise à d'autres. Ie dis qu'au commencement les Diacres n'auoyent point de partau gouvernement de l'Eglise, parce que l'histoire de leur institution n'en parle point; que quand au liure des Actes S. Paul recommande les Eglises à leurs conducteurs, il ne parle sinon aux Euesques seulement; que dans le caractere que S. Paul fait de leurs qualités il ne mesle du tout rien de tel; en yn mor,

que

DE LA MORALE CHREST. 257 que dans le Nouveau Testament il n'y en a aucune trace. Car quant à ce que quelques vns disent qu'il y a bien de l'apparence qu'ils furent admis au Concile de Ierusalem pour y donner leurs aduis, ie n'en doute nullement. Mais c'est comme les autres sidelles y furent admis pareillement, & non en vertu de leur charge. Car les Apostres, apres auoir decidé ce qui estoit de la doctrine, prirent aduis de tous les freres pour ce qui estoit de l'ordre qu'il falloit suiure pour faire sauoir leurs ordonnances à l'Eglise d'Antioche, en les considerant comme sidelles, qui ont part au gouvernement de l'Eglise quand il est à propos de luy donner vne forme democratique, ainsi qu'il est necessaire en certaines occasions, & non comme ayant quelque charge particuliere qui leur mist ou en tout ou en partie le gouvernail en main. Il n'est pas necessaire que ie sois bien long à expliquer quelles doiuent estre les qualités de cette sorte de Ministres du Christianisme. Car celles des Anciens & des Diacres doiuent estre touces sembla278 SVITE DE LA DERN. PART. bles, & comme S. Paul fait la description de celles des Diacres, elles ont vne merueilleuse convenance auecque celles des Pasteurs. De sorte qu'on peut tirer des discours precedens ce qu'il y a de commun, & se contenter icy de quelques remarques particulieres. S. Paul dit donques que les Diacres doiuent estre graues, c'est à dire, garder dans leur conduite vne certaine moderation qui concilie du respect, tellement que la sagesse de leurs actions donne de l'autorité à leur charge. Et de fait quelques-vns tournent le mot qui est employé par S. Paul, par le terme de venerables : parce que ce doit estre vne grauité qui tire tout à fait le Diacre hors du commun, & qui face qu'au lieu que les autres hommes se contentent de s'entr'honorer, ils ayent mesmes de la veneration pour ceux qui s'acquittent bien de ce ministere. Il adjouste qu'il ne faut pas qu'ils soyent doubles en parole, ce qui est vne qualité qui convient vniuersellement à tous les Chrestiens, aux Ministres de l'Euangile nommément, mais que S. Paul a eu quelque

DE LA MORALE CHREST. 259 raison particuliere de recommander aux Diacres. Car de dire tantost de l'vn tantost de l'autre, promettre vne chose & neantmoins ne la tenir pas, auancer quelque discours & puis venir à le retracter, affirmer vne chose à celuy-cy & puis la nier à celuy-là, se plaindre de sa condition & puis apres s'en louer, dire bien d'vn homme en vnendroit & puis du malen vn autre, &, comme Mars passoit d'vn parti à l'autre en vn moment, aller sur vn mesme sujet du blanc au noir & du Septentrion au Midy, c'est ou vne inconstance indigne de toutes honnestes gens, ou vne complaisance trop lasche, & vne espece d'infidelité. Tellement qu'il y a peu de choses plus capables de flestrir la reputation de qui que ce soit. Mais il y a cecy de particulier pour les Diacres & pour les Anciens, que la condition des Fglises ne leur permettant pas de les entretenir de gages, il leur faut dans les fonctions de cette charge, laisser exercer leurs autres vocations & mesmes celle de marchand. Or est ce vice, d'estre double en parole,

260 SVITE DE LA DERN. PART non inseparable de la marchandise à la verité, mais neantmoins incorporé auec elle de telle façon, qu'il y en a peu dans cette profession-là qui ne s'en fentent. Car quand ils veulent achepter, la marchandise d'vn autre est tousiours fort chere, & quandils veulent vendre, la leur est toujours à trop bon marché. Ils disent, ils protestent, ils iurent qu'ils ne la bailleront pas à moins d'vn tel prix, & toutessois à vn demy quart d'heure de là ils relaschent: ils affeurent qu'ils ne la donneroyent pas à ce mesme prix à vn autre; & toutesfois cet autre là qui qu'il soit, l'aura peut-estre incontinent à meilleur conte de beaucoup. Ils affirment sur leur foy que c'est la plus belle estoffe de leur boutique qu'ils vous presentent, & neantmoins ils sauent bien qu'il n'en est rien: ils la vous font voir en vn faux iour, & si vous y remarqués quelque defaut, ils font semblant de se mettre en colere contre vous & vous querellent. En vn mot, c'est vne chose estrange que de la vanité & de l'inconstance de leurs discours, & c'est ce que S. Paul ne veut pas qui se

DE LA MORALE CHREST. 261 pratique par vn Ancien ny par vn Diacre. En effect, la marchandise pourroit bien se faire autrement si l'on vouloit, & si vn marchand en s'abstenant de ces façons de faire là, avoit vno fois acquis, ce qu'il pourroit faire aisée ment, la reputation de rondeur & d'integrité, pour n'auoir iamais qu'vn mot, on n'en frequenteroit pas moins sa bou-tique. Ce que S. Paul adjouste qu'ils ne doiuent pas estre adonnés à beaucoup devin, a esté interpreté cy-dessus où il s'agissoit des Pasteurs, & bien que peut-estre l'abstinence & la sobrieté sont plus rigoureusement requises en ceux-cy qu'en ceux-là, si est-ce que S. Paul la leur recomandant également, il, donne assés à entendre que la difference n'y doit pas estre fort grande. Cette autre qualité, de ne deuoir pas estre conuoiteux de gain deshonneste, leur doie estre dautant plus recommandée, que leur condition de ce costé-là est plus sujette à estre corrompue que non pas celle des Pasteurs, parce qu'ils se meslent plus dans le monde, & que les occalions de gagner se presentent à eux

262 SVITE DE LA DERN. PART. plus frequemment. De sorte que non seulement l'Apostre veut que l'on bannisse du Collège des gouverneurs de l'Eglise, les vsuriers, & les iou ëurs de dés, & les basteleurs, & les gens qui font toutes telles autres sortes de mestiers qui rendent les hommes odieux ou mesprisables : mais vniuersellement tous ceux que les pratiques injustes enrichissent auecque mauuaise reputation. Car quant à ceux qui exercent vn honorable commerce, & qui par des voyes legitimes acquierent beaucoup de biens, tant s'en faut que leur richesse les rende incapables de ce ministere, qu'elles les y rend plus vtiles à l'E-glise de nostre Seigneur. Parce qu'ils suppléent quelquesfois de leur abondance, ce qui defaut aux charités des particuliers, & fournissent eux-mesmes les choses dont on leur commet la distribution. Et veritablement c'est vne grande consolation aux pauures, & à ceux qui ont soin de leur entretenement, de voir quelquesfois venir en leur bourse de grosses sommes, que les riches marchands y mettent pour re-

DE LA MORALE CHREST. connoissance de la grace que Dieu leur a faite de les benir en leur commerce, & de leur ramener heureusement les nauires qu'ils auoyent enuoyés en voyage de long cours. S. Paul leur demande outre cela, qu'ils gardent le secret de la Foy dans une conscience pure. Ce qu'il appelle le secret ou le mystere de la Foy, c'est l'Euangile de Christ, qu'il ne nomme pas ainsi parce que ce fust vn secret alors, mais parce qu'il l'auoit esté autrefois. Car quand l'Apostre appelle l'Evangile une sapience cachée en mystere, ila egard aux temps des dispensarions. precedentes, sous lesquelles cette do-Arine estoit couverte d'enigmes & enueloppées de diuerses ombres, qu'il n'y auoit pas moyen d'expliquer: & non au temps de la predication, auquel il auoit esté mis en pleine euidence. Il veus donc qu'en vn Ancien & en vn Diacre, la bonne & pure conscience soit comme depositaire de la doctrine de la Foy, pour la conseruer. Et cela conformément à cette belle exhortation qu'il fait à son disciple Timothée. Ie te recommande, dic-il, ce commandement, que 264 SVITE DE LA DERN. PART.

selon les Propheties qui auparauant ont esté de toy, par elles tu faces deuoir de guerroyer. en cette bone guerre: Ayant foy & bonne conscience; la quelle quelques vns ayans rejettée, ont fait naufrage quant à la Foy. En effect, la connoissance de la doctrine de la Foy a proprement son siege dans la partie superieure de l'ame qu'on nomme l'entendement. La bonne conscience estant ordinairement prise pour ce qu'on nomme autrement la sanctification, est principalement considerée dans les appetits. Or comme ilest cers tain que quand l'entendement est profondement persuadé de la verité de l'Euangile de Christ, il est impossible que la bonne conscience ne s'en ensuiue; aussi quand on n'a qu'vne legere teinture de cette verité, si d'ailleurs les affections sont mal composées, & si lo vice regne dans les appetits, il est ineuitable qu'enfin l'entendement ne se peruertisse. Car on l'auarice, ou l'ambition, ou la volupté, ou le despir, ou la lascheté, ou quelque autre telle malheureuse passion, venant à estre ex citée par quelque puissant objet qui sol-

DE LA MOARLE CHREST. 265 licite à l'apostafie, & dont la jouissance ne peut compatir auec la profession de. l'Euangile de Christ, bien que peutestre il y a pour quelque temps du conflict entre l'entendement & là passion, si faut-il de necessité qu'en fin la partie inferieure de l'ame l'emporte. Et de là viennent les reuoltes qui donnent tant de scandale à l'Eglise de Dieu, & qui sont daurant plus scandaleuses quand elles arrivent à ceux qui ont quelque charge au milieu d'elle. Les reuoltes donques des Anciens & des Diacres, causent plus de trouble que celles des particuliers, & celles des Ministres plus que des Anciens & des Diacres: & encore entre les Ministres, ceux-là choquent dauantage les ames infirmes, & donnent aux aduersaires plus de matiere de triomphe en se reuoltant, qui pour leur sauoir, ou leur eloquence, ou par quelque autre qualité recommandable, auoyent acquis de la reputation. Neantmoins, c'est aux sidelles de nostre Seigneur à se fortisier contre ces scandales. Christ n'auoit que douze disciples autour de luy, &

266 SVITE DE LA DERN. PARTI I'vn d'eux pourtant estoit larron, & traistre comme vn demon. Cet Hymenée & cet Alexandre, dont S. Paul dit qu'ils ont fait naufrage, & qu'à cette occasion il a liurés à Satan, estoyent des gens qui l'vn ou l'autre, ou mesmes peut-estre tous deux, s'estoyent signalés en l'Eglise, & dont à cette occasion le changement auoit mené beaucoup de bruit. Et au dernier iour il en paroistra deuant nostre Seigneur qui se vante-ront d'auoir presché & d'auoir fait des miracles en son nom, à qui il dira qu'il ne les connoist du tout point, & qu'il enuoyera dans les tenebres eternelles. Que si on vient à examiner vn peu attentiuement la vie de ceux qui abandonnent le saint Ministere & la profession de la verité, l'on trouuera que la ruine qui en eux est arriuée à la Foy, a commencé par la bréche que le Monde, & le l'eché, & le Malin, auoyent premierement faite à leur conscience. L'auarice a gourmandé l'vn, l'ambition & la vanité ont emporté l'autre. Celuylà s'estoit premierement contaminé de quelques souillures, comme sont les

DE LA MORALE CHREST. 267 paillardises & les adulteres, de sorte qu'ayant l'ame pourrie, le depost de la foy n'a peu s'y conseruer : & celuy-cy ne pouuant soustenir la reputation qu'il auoit acquise sans veiller & sans trauailler, s'est chagriné dans le labeur de son Ministère, parce qu'il aimoit à dormir haut'heure, & à couler les iournées entieres dans ses passetemps. Vn autrene reussissant pas en ses desseins s'est despité de se voir fruitré de ses esperances, & a pensé se pouuoir vanger & recompenser en mesme temps: vn autre enfin ayat flairé l'air de la Cour, ou halené ce que vaut la bonne grace d'vn Euesque, & la iouissance des Benefices & des Prieurés, a creu que c'estoit là le seul moyen de pouvoir viure splendidement, & de faire la fortune de sa famille. Or c'est assés de l'yne de ces considerations pour subuertir vn Ministre ou vn Ancien qui n'est pas homme de bien; combien moins doit-on esperer de la perseuerance de ceux qui sont sollicités de plusieurs ensemble? Comme vn seul vent, quand il est trop violent, peut emporter yn nauire contre des rochers,

268 SVITE DE LA DERN. PART. vne seule passion, quand on s'y laisse dominer, peut renuerser vn homme de sa station. Mais comme plusieurs vens, qui soufflent impetueusement de divers costés, sont encore plus capables d'agiter, & de fracasser, & d'engloutir enfin vn vaisseau dans les gouffres de la mer: plusieurs passions conjointes ensemble tourmentent l'ame de telle façon qu'il faut enfin qu'elle face vn lamentable naufrage. C'est pourquoy l'Apostre adjoute par vne singuliere prudence, qu'auant que d'estre admis à ce ministere, il faut que les Diacres soyent premierement esprounés, & puis apres qu'ils seruent, estans trouvés irreprehensibles. Et cette épreuve-là se faisoit dés la naissance de l'Eglise, par la publication des noms de ceux que l'on vouloit promouuoir au Diaconat, afin que s'il y auoit quelcun qui trouuast à redire en leun conduite, & qui par de bonnes preuues les peust convaincre de ne s'estre pas bien comportés, on n'admist pas dans vn employ si important ceux en la bonne conscience desquels, on ne pourroit pas prendre confiance. Et.

DE LA MORALE CHREST. veritablement c'est vne tres-belle institution, que ceux qui ont à estre installés dans vne charge publique; subiffent premierement yn examen de leur vic & de leurs mœurs. Car outre que l'administration du Public est vne chose de celle importance, qu'il n'est pas raisonnable de la commettre sinon à ceux dont on est asseuré qu'ils s'en acquitteront fidellement, les Charges colloquent les hommes en lieu eminent; & les mettent en veuë de tout le monde, de sorte que leur vie est en scandale si elle n'est en edification. On dit de l'Empereur Seuere, que quand il vouloit establir des Gouverneurs ou des Intendans dans les Provinces de l'Empire, il en faisoit premierement proclamer le nom en public, auec exhortation au peuple que s'il y auoit quelcun qui les peust conuaincre de quelque crime, il se presentast hardiment à ceux à qui l'examen en estoit commis: & qu'il alleguoit pour raison de cette coustume, que ceux qu'il destinoit à ces charges ne denoyent pas trouuer cela mauuais, puis que les Chrestiens & les Iuiss

270 SVITE DE LA DERN. PART. en vsoyent de la façon auant que de proceder à l'ordinatió de leurs Prestres. C'està dire que ce Prince faisoit incoma parablement plus de cas de la Charge de Gouverneur que de celle de la Prestrise; ce qu'on ne doit pas trouuer mauuais d'vn Payen. Mais pour nous, nous formerons volontiers la ratiocination à rebours: c'est que si on le pratique de la forte, où il ne s'agit que des choses de la vie presente & du gouuernement ciuil, il est beaucoup plus necessaire où il y va de la gloire de l'Euangile de Christ, & du salut eternel des hommes. Cependant, ce que l'Apostre veut qu'ils soyent irreprehensibles, doit estre entendu commodément. Car s'il auoit voulu que ceux là seuls fussent Diacres, en qui il ne se trouueroit absolument rien à redire, le Diaconat demeureroit vuide, n'y ayant point d'homme sur la terre dont la viene soit sujetteà quelques infirmités. Mais il y a deux tribunaux deuant lesquels les Chrestiens ont à rendre raison de leurs actions. L'vn est celui de la Iustice ordinaire, où les actios des hommes sont examinées selon les

DE LA MORALE CHREST. 271 loix de l'Estat : l'autre est celuy de l'Eglise, où on considere la vie des home mes d'vneautre maniere, & à peu prés comme les Censeurs faisoyent à Rome autresfois. Quand donc vn homme seroit irreprehensible à l'egard de ce premier tribunal, il ne seroit pas propre au Ministre de l'Euangile, de quelque façon qu'on l'exerce, s'il est sujet aux peines & aux Censures Ecclesiastiques qui s'infligent au second. Caril doit estre non seulement exempt de la flestrissure du Magistrat, mais aussi de la honte qu'impriment les censeures du Presbytere. Que si ny deuant l'vn ny deuant l'autre de ces tribunaux on ne luy peut raisonnablement rien reprochergles infirmités ineuitables de nôtre nature ne le doiuent pas empescher d'estre installé dans cette charge, ny de l'exercer à l'edification |du public. Ce qui vient apres dans le texte de l'Apostre, que les femmes soyent honnestes, non medisantes, sobres, fidelles en toutes choses, est diversement interpreté. Car quelques vns d'entre les Anciens l'ont entendu desfemmes à qui le Diaconat

272 SVITE DE LA DERN. PART. estoit commis, comme il appert par le Nouveau Testament qu'il y en avoir alors à qui l'on donnoit part à ce ministere. Les autres l'ont entendu des femmes mesmes des Diacres, encore qu'elles n'eussent point de part en la charge de leurs maris. Et la principale raison de ces derniers est, qu'apres ces paroles, l'Apostre continue à descrire les qualités des Diacres; de sorte qu'il semble que ce soit la suite d'vn mesme propos, qui autrement seroit vn peu incommodément-interrompu. Les premiers estiment qu'ayant commencé à parler des Diacres, il a creu qu'il n'e pouuoit pas trouuer vn lieu plus propre pour dire qu'elles doiuent estre les Diaconesses, puis que c'est à peu prés vn mesme ministere qu'il leur est commis. Comment qu'il en soit, car il n'est pas necessaire de vuider icy cette dispute, comme c'est vne chose indubitable que du temps de S. Paul les Pasteurs mesmes auoyent la liberté de se marier, aussi est-il certain que les Diacres auoyent leurs femmes. Et bien que les fautes soyent personnelles, & qu'il ne foir

DE LA MORALE CHREST. 273 soit pas raisonnable que les imperfections des femmes soyent imputées à leurs maris, siest ce qu'il est necessaire que ceux qui sont dans le ministere public, l'exercent auec edification, ce qu'ils ne feroyent pas si bien si la conuersation de leurs femmes estoit scandaleuse. S. Paul veut premierement que celles cy soyent honnestes, ce que i'ay desia interpreté de cette sorte de gras uité qui concilie du respect & en quelque sorte de la veneration. Car c'est le mesme terme qui est employé où il est dit qu'il faut que les Diacres soyent graues. Et veritablement bien que les hommes, à proportion de l'excellence de leur sexe, sont plus obligés que les femmes à monstrer en eux tout exemple de vertu, si est ce que celle-cy est particulierement requise dans les femmes de ceux qui sont employés au mi-nistere Ecclesiastique. Car encore qu'vne femme ne soit pas coquette, neantmoins il peut arriuer qu'elle se donne quelque liberté dans ses habits, dans ses gestes, dans ses paroles, & dans le maintien de sa personne, qui est

SVITE DE LA DERN. PART. supportable en vne autre, mais qui ne convient nullement à celles de cette condition. Tellement que comme il y a des places qui sont estimées si fortes que mesme on ne pense pasà les assieger, parce qu'on y void de si grands remparts, & de si terribles dehors, que cela estonne les plus hardis capitaines: ainsi faut-il que la semme d'vn Mini-ftre de l'Euangile soit telle en son exterieur, qu'elle essoigne par sa seule grauité les approches des cageoleurs & qu'elle leur donne de la crainte. Il adjouste qu'il faut qu'elle ne soit point médisante. Et quoy qu'il ait esté bien obserué que les femmes Grecques & Asiatiques estoyent particulierement sujeta tes à ce vice-là, & qu'Euripide leur reproche qu'elles aiment à critiquer, & qu'elles prennent occasion des moindres choses, pour mal parler les vnes des autres, & pour s'entredescrier, si est ce que c'est plustost le vice du sexe qu'il descrit, que celuy de la nation. Car outre qu'elles aiment naturellement à parler, & que la matiere qu'on tire d'ailleurs ne pouuant fournir à cet-

DE LA MORALE CHREST. 275 te inclination, il faut necessairement qu'elles s'attachent aux personnes, il est certain qu'elles sont ordinairement enuieuses, ce qui leur fait trouuer à redire en tout ce que les autres font. Il y a donc en elles vne source inépuisable de médisance, si la pieté ne la boûche, & outre qu'il seroit de mauuais exemple qu'à la femme de celuy qui exerce vn ministere en l'Eglise on peust reprocher quelque chose detel, les medisans ces sont vne matiere perpetuelle de querelles, que son mary auroit sans cesse à demesser. Ce que S. Paul demande qu'elles soyent sobres, regarde principalement le vin. Car les femmes ne sont pas si sujettes à la gourmandise; mais en Grece, où l'yurognerie auoit la vogue, elles se laissoyent quelquessois aller à boire trop. Orest-il bien vray que tous les autres vices sont odieux en eux-mesmes : mais celuy-cy dans vne femme à quelque chose de particulier, & qui se rapporte à la chasteté. Tellement qu'outre que c'est vne chose horrible de voir vne femme à qui le vin a osté l'entendement, il est impossible

276 SVITE DE LA DERN. PART. qu'elle soit bien asseurée de sa pudicité, l'yuresse l'exposant à toutes sortes d'attentats, de quoy l'histoire fournit des exemples. Ce qui pourroit faire penser qu'en cet endroit de l'Apostre d'où ie tire la matière de ce propos, il seroit parlé des Diaconesses, c'est quel'Apostre adjouste que les femmes dont il parle doiuent estre fidelles en toutes choses; parce qu'il leur falloit mettre les charités & les liberalités de l'Eglise entre les mains, & qu'ainsi leur fidelité deuoit auoir esté esprouuée en toutes autres sortes d'affaires. Neantmoins, puis que les Diacres auoyent les charités de l'Eglise en garde pour les distribuer aux necessiteux, leurs femmes en estoyent aussi en quelque saçon depositaires, de sorte que c'est tres-à-propos qu'il est icy requis d'elles qu'elles soyent fidelles, & qu'elles en ayent donné des preuues en toutes occasions. Parce que s'il y auoit de l'infidelité en leur conduite, le blasme en retomberoit sur l'administration de leurs maris. Quant à ce que l'Apostre dit que les Diacres doiuent estre maris d'one seule femme, com-

DE LA MORALE CHREST. 277 me ils ont cela de communauecque les Pasteurs, aussi doit-il estre entendu pour eux de la mesme façon que ie l'ay interpreté ailleurs, & requis d'eux pour les mesmes causes. Car il n'est pas de la sainteté du Christianisme, ny de permettre aux Diacres d'auoir deux femmes comme on le permettoit aux Iuifs: ny desouffeir qu'auec vne femme legitime ils eussent encore vne concubine, comme les Gentils: ny enfin, de tolereren eux le diuorce, comme les vas & les autres le pratiquoyent, sice n'estoit pour la cause que nostre Seigneur. a seule autorisée en l'Euangile. De sorte qu'aussi bien que les Euesques, ceux-cydeuoyent estre des exemples de chasteté en toute leur conversation. Et pour ce qui est de leurs enfans, & du reste de leurs maisons, ce que l'Apostre veuz qu'ils les conduisent honnestement, c'est par cette mesme raison, qu'ayant part en la conduite de l'Eglise de nostre Seigneur, ils en doiuent auoir fait l'apprentissage, & puis apres en donner l'exemple en celles de leurs familles. Car qui ne sçait pas gouverner vne pe278 SVITE DE LA DERN. PART. tite barque, ne gouuernera pas vn grand vaisseau : & qui ne sçait pas nauiger sur vne riviere où sur vn lac, ne doit pas estre presumé se pouruoir tirer des tempestes de l'Ocean mesme. Ce qui vient incontinent apres dans le texte de S. Paul, a peu d'vsage en nostre siecle. Car il dit que ceux qui auront bien serui dans le Diaconat, s'acquierent un bon degré pour eux, & vne grande liberté en la foy, ce que les Anciens ont fortraisonnablement entendu de la promotion des Diacres aux autres parties du ministere de l'Eglise. Parce qu'on tiroit les Anciens & les Diacres du nombre des Chefs-de famille, en choisissans les plus vertueux: & du nombre des Anciens & des Diacres on tiroit les Pasteurs ordinaires de l'Eglise, en elifant d'entr'eux les plus propres pour cela: & enfin, quand on eut distingué les Euesques d'auecles autres Pasteurs, c'estoit du nombre de ceux-cy qu'on les tiroit, en elisant aussi ceux qui auoyent le plus de reputation de pieté, de probité, de suffisance, & de prudence. Et si l'on en estoit demeuré dans-

DE LA MORALE CHREST. 279 cestermes-là, on n'auroit pas eu tant de sujet que l'on a eu d'abolir en la resormation cette prééminence des Euesques qui s'estoit renduë odieuse. Mainrenant, ou bien les Anciens & les Diacres ne sont pas gens qui ayent esté nourris dans les lettres, ny qui par consequet se puissent rendre propres pour la predication: ou s'ils ont estudié, comme il s'en trouue beaucoup, ils sont attachés à d'autres vocations, qu'ils abandonnent rarement pour embrasser l'exercice du S. Ministere. Car ceux qui se sont donnés au Barreau, ou à la pratique de la Medecine, ou à quelques autres tels emplois, demeurent ordinairement tels tout le reste de leurs iours, de forte qu'il faut prendre ailleurs la matiere dont on forme les Ministres. Neantmoins s'il s'en rencontroit quelcun à qui Dieu eust mis au cœur de quitter les emplois du siecle pour seruir en l'Eglise de nostre Seigneur, la loüange qu'il auroit remportée dans les degrés inferieurs, luy seroit vne tres-forte recommandation pour vn plus haut Ministere. Tellement que quand il S iiii

280 SVITE DE LA DERN. PART. viendroit à l'exercer, il en feroit ses exhortations & ses remonstrances auec vne beaucoup plus grande hardiesse, sachant bien qu'on ne luy pourroit rien reprocher sur sa conduite precedente, & que sa vertu luy donneroit de l'autorité. Car c'est ce que S. Paul entend par la liberté en la Foy, prenant là la foy pour la doctrine de l'Euangile de Christ, & la liberté, pour la hardiesse de parler, comme aussi le terme de l'Originalle porte. l'ay dit cy-dessus qu'au commencement on donnoit vne partie duDiaconat aux femmes, & cela paroist par le chapitre vnziéme de l'Epistre aux Romais, où l'hobe est appellée servante ou diaconesse de l'Eglise de Cenchrée. Et ailleurs, où S. Paul parle de l'aage des femmes qui doiuent estre enrollées, il entendsans doute, mises sur le catalogue de celles à qui l'Eglise commettoit, comme vne espece de charge, le soin de solliciter les malades, & de pouruoir aux necessités des souffreteux. Et de celles-là il veut qu'elles ayent soixante ans, de peur que si elles estoyent plus ieunes, elles ne fussent

DE EA MORALE CHREST. 281 sujettes à quelques tentations qui les obligeassent à quitter legerement leur ministere, ou qui les portassent à faire quelques actions indecentes & de mauuaise edification. A quoy il adjouste qu'il faut qu'elles eyent rémoignage d'auoir fait de bonnes œuures, d'auoir nourri leurs propresenfans, d'auoir logé les estrangers, d'auoir laué les pieds des Saints, d'auoir subuenu aux affligés, & d'auoir soigneusement suiui toute bonne œuure: c'est à dire, qu'elles n'ayent manqué à aucune occasion de monstrer leur pieté enuers Dieu, & leur charité enuers les hommes. Mais i'ay à dire là dessus deux choses. La premiere, que cette charge n'est plus en l'Eglise de Dieu. Car il y a bien des femmes pieuses & charitables en chaque Eglise, qui prennent vn grand soin des pauures & des malades, en leur rendant à peu prés les mesmes offices que faisoyent les Diaconesses autrefois. Mais elles ne le font pas comme vne fonction qui leur soit commise, & à l'occasion de laquelle elles puissent auoir vn nom particulier. Elles le font de leur propre mouue282 SVITE DE LA DERN. PART. ment, en quoy elles meritent beaucoup. de louange. L'autre est, que si les Diacres ont esté employés au gouuernement del'Eglise, comme cela sans doute s'est fait quelque temps apres leur premiere institution, les femmes en ont tousiours esté excluses, comme d'vne chose à laquelle leur sexe les empesche de pouvoir avoir vocation. Tout leur ministere consistoit en des actions de charité, & qui encore estoyent beaucoup plus souuent employées enuers les femmes qu'enuers les hommes. Car outre qu'elles ont des infirmités, & qu'il leur arriue des maladies, où il est beaucoup plus honneste que celles de leur sexe les assistent, la Medecine de ce temps-là se servoit souvent de bains, où le ministere d'vn homme n'eust pas esté assés conuenable. Enfin, car il est temps de passer à d'autres considerations, soit hommes, soit femmes qui foyent employés à cela, la vraye & naturelle fonction de cette charge cossiste à affister les pauures & les malades, & les qualités qui y sont principalement requises, sont la diligence & la fidelité.

DE LA MORALE CHREST. 283 Car d'autant que cette assistance ne se fait point sans despense, en nourriture, en habillemens, en medicamens, il fauc necessairement qu'il passe de l'argent par les mains des Diacres & des Anciens, & generalement de toutes les personnes qui ont quelque part en ce seruice, de sorte qu'il y faut auoir les mains pures, & exemptes de tout soupcon d'infidelité. Et parce que souuent les pauures & les malades sont en grand nombre, & que les vns par leur impuissance, & les autres souuent par leur honte, sont empeschés de pouruoir à eux, il faut qu'il y soit subuenu par la charité & par la vigilance des autres.

Mak ik ik

DV DEVOIR DES NOBLES, selon le Christianisme.

OVS voyés, dit l'Apostre S. Paul escriuant aux Corinthiens, vostre vocation: c'est que vous n'estes point beaucoup de sages selon la chair, ny beaucoup de forts, ny beaucoup de nobles. Et

284 SVITE DE LA DERN. PART. dans ces paroles il y a deux difficultés? La premiere, en ce que ce mot beaucoup, se disant par comparation, parce que les choses sont dites grandes ou petites, en petit nombre ou en grand, selon qu'on les compare les vnes aux autres, l'Apostre ne dit pas s'il entend qu'il y a peu de nobles en l'Eglise de Corinthe à proportion de ce qu'il y en auoit entre les Gentils qui n'auoyent point em-brassé l'Euangile de Christ, ou si en comparant les Corinthiens conuertis les vns auecles autres, il s'y en trouuoit beaucoup moins de nobles que d'autre condition. La seconde, s'il a pretendu remarquer la condition de l'Eglise de Corinthe seulement, ou bien si dans la vocation de celle-là, il a voulu nous donner yn exemple de celle de toutes les autres. Mais l'vne & l'autre de ces questios se peut resoudre par cette consideration. C'est que les Anciens ont fait de diuerses sortes de noblesse. Car il y en a vne que l'on establit en la vertu seulement, quand elle est si illustre & siéclattante qu'elle fait qu'on regarde vn homme auec vne estime & vne venera-

DE LA MORALE CHREST. tion extraordinaire, & comme separé par là du commun. L'autre consiste en l'extraction, quand on est issu de ceux que leur vertu a rendus extraordinairement recommandables, & comme dignes d'admiration. La troisieme est celle des dignités. Car ceux qui sont esleués à de grandes charges dans la Republique, de quelque origine qu'ils soyent descendus, acquierent par là quelque chose que les autres hommes n'ont pas, & sont tenus d'vn autre rang qu'eux. Et la quatrieme finale. ment est celle qui depend de la richesse. Car il y a eu des Republiques où les riches estoyent plus estimés que les autres, & tenus plus dignes & plus capables du gouvernement de l'Estat, tellement que pour estre admis aux charges publiques il falloit auoir certaine somme de reuenu. Or pour ce qui est de la premiere, l'Apostre S. Paul n'a pas entendu en parler. Car si on eust comparé les Corinthiens Christianisés auec les autres habitans de la mesme ville, quelque corruption qu'il y eust peu auoir en cette Eglise-là, il s'y fust sans

286 SVITE DE LA DERN. PART. doute rencontré plus de gens vertueux qu'entre les Payens. Ce mesme S. Paul qui leur parle ainsi, leur tient aussi ce langage en la mesme Epistre. Ne sauésvous pas que les iniustes n'heriteront point le Royaume de Dieu? Ne vous abusez point: ni les paillards, ni les idolatres, ni les adulteres, ni les effeminez, ni ceux qui habitent auecque les masles, ni les larrons, ni les auaricieux, ni les yurongnes, ni les medisans, ni les rauisseurs, n'heriteront point le Royaume de Dieu. Et telles choses estiez-vous quelques vns; mais vous en auez esté lauez, mais vous en auez esté sanctifiés, mais vous en auez esté instifiez au nom du Seigneur Iesus, & par l'Esprit de nostre Dieu. D'où il paroist que l'Euangile les auoit tirés de l'horrible corruption dans laquelle les autres estoyét demeurés dans le Paganisme. Et si on eust comparé les Chrestiens de Corinthe entr'eux, ou le nombre des gens de bien & des vertueux l'emportoit sur celuy des autres, ou à peine meriteroyent-ils le nom d'Eglise, & que l'Apostre leur escriuist en cette qualité-là. En effect par ce mot de sages, il entend

DE LA MOARLE CHREST. 287 les prudens selon le siecle, & les gens versés dans la Politique & dans les affaires du monde. Par les forts, il designe ceux qu'on nomme ordinairement puissans, parce qu'ils ont beaucoup d'autorité & de credit. De sorte que par celuy de nobles, il faut qu'il designe quelque autre auantage de cette vie, qui soit distingué d'auec les qualités morales qui font vn homme vertueux. Et veritablement la vertu est bien sans doute plus excellente que la noblesse, mais ce n'est pas la noblesse mesme, c'est plustost la cause qui la produit. Car si la noblesse commence en vn homme, elle vient de ce qu'il est reconnu si vertueux, qu'à cette occasion l'on le met au rang de ceux qui ont tiré quelque éclat de leurs ancestres, & qui iouissent de quelques priutleges que les autres hommes n'ont pas. Et s'il la tire de ses deuanciers, elle vient de ce qu'ils ont esté si vertueux, qu'on a voulu recompenser leur vertu de quelque éclat d'honneur & d'immunités, qu'ils ont transmis à leur posterité apres eux. Et c'est là la seconde sorte de noblesse se-

288. SVITE DE LA DERN. PART. lon le dénombrement que i'en ay fair, & dont indubitablement l'Apostre S. Paul parle en ce passage. Car à Corin-the, aussi bien qu'ailleurs, il y auoit des gens qui se vantoyent de l'antiquité de leur race, & d'estre descendus de gens ou que leurs vertus heroïques, ou que la grandeur de leur puissance, auoyent extraordinairement signalés. Et tels estoyent entre les autres ceux que l'on appelloit les vns Cypselides, & les autres Bacchiades, ceux-là parce qu'ils estoyent venus de Cypselus, qui auoit autrefois regné à Corinthe, & ceux cy parce qu'ils estoyent issus de ceux qu'on nommoitainsi, & qui auoyent eu toute l'autorité du gouvernement assés longtemps. Or de quelque façon qu'on considere la noblesse, soit quelle consiste en l'auantage de l'extraction & du sang, ou dans la dignité des charges, ou enfin dans la possession des grands biens, il est certain que c'est d'ordinaire vn grand empeschement à faire profession de l'Euangile. Car elle est exposée à la persecution, & la persecution est accompagnée d'ignominie selon le monde,

DE LA MORALE CHREST. 289 monde, ce qui est diametralement opposé aux inclinations des nobles, qui aiment l'honeur. Et elle ferme la porte aux charges & aux dignités, ou en fait dépouiller ceux qui les possedet; ce qui est come insupportable à la chair. Et enfin, elle rend sujet au rauissement des biens, ce qui est aussi dur à quelques-vns que si on leur rauissoit la vie mesme. Cela estant ainsi, d'vn costé l'Eglise de Corinthe auoit esté composée de sorte que s'il s'y estoit conuerti quelques nobles, (commeil n'en faut pas douter, puis que S. Paul se contente de dire qu'il y en auoit peu,) tant y a qu'ils estoyent en petit nombre, par ce que la plus part n'auoyent pas voulu se mettre au hazard de souffrir la dégradation de noblesse pour la verité de Christ: & de l'autre, puis que cela venoit d'vne cause qui n'estoit pas particuliere aux Corinthiens, mais tirée de la nature des choses mesmes, & des inclinations des hommes, qui sont de mesme nature par tout, quelle a esté la condition de l'Eglise de Corinthe, telle faut-il que soit celle des autres ordinairement. Et

290 SVITE DE LA DERN. PART. ie ne puis que ie ne mette icy les paroles d'vn Ancien, qui me semblent extre-ment considerables. Personne, dit-il, n'aime la vercu sinon ceux qui la peuuent suiure : or suiure la vertu n'est pas vne chose facile à tous. Ceux-là le penuent que la paugreté & l'indigence des choses a exercés, & rendus capables de l'embrasser. Car si la vertu consiste en la souffrance des maux, ceux-là n'en peuuent estre capables qui ont tousiours esté dans la jouissance des biens: car ils n'ont pas experimenté les maux, & la coustume de iouir de leurs biens, & le regret de les perdre, parce qu'ils n'en reconnoissent point d'autres, les rend incapables de supporter les choses qui accompagnent la vertu. C'est pourquoy les pauures, & les personnes de basse condition, parce qu'ils sont libres de l'embarras des choses du monde, croyent plus aisément en Dieu que les riches, que divers empeschemens tiennent comme entortillés. Ou pour mieux dire, ils sont enchainés, & comme s'ils estoyent aux ceps, ils seruent à la Con-

DE LA MORALE CHREST. 291 uoitise, qui les maistrise comme il luy plaist, & qui les tientattachés de liens & de nœuds qu'il n'y a pas moyen de détacher. Tellement qu'ils ne peuuent regarder vers le ciel, parce que leur entendement panche contre bas, & est attaché à la terre. Le chemin de la vertu n'est pas assés large pour ceux qui portent de grands fardeaux : c'est vn fentier fort estroit, par lequel la iustice mene l'homme au ciel ; & il n'y a que ceux qui sont deschargés & comme nuds; qui y puissent marcher. Ces riches, qui portent de grandes charges, cheminent par la voye de la mort, qui est fort large, parce que la domination de la perdition est d'vne grande estenduë. Et à ceux là sont fascheuses & inportunes, & ils considerent comme des poisons, les choses que Dieu commande pour exercer la instice, & que nous, qui les auons apprises de Dieu, enseignons touchant la vertu & la verité. Ces paroles de Lactance rendent la raison de celles de Christ, qu'il est plus aisé qu'vn chameau passe par le pertuis d'yn aiguille, que non pas qu'yn

193 SVITE DE LA DERN. PART. riche entre dans le Royaume des cieux Neantmoins, ce que les hommes estiment impossible, ne l'est pas à Dieu pourtant. Car Nicodeme, & Ioseph d'Arimathée, & l'Eunuque de la Reyne des Ethiopiens, & le Proconsul Sergius Paulus, & Manahem, qui auoit esté nourri auec Herode le Tretraque, & Denys l'Areopagite, & quelques femmes Grecques honorables, & quelques-vns de la Cour mesme de Neron, ont creu à la doctrine de l'Euangile preschée par Iesus Christ & par ses Apostres: & depuis en tous les siecles il s'est trouué des personnes de condition eminente, qui ont fait profession de cette mesme verité. Iusques-là que du temps des persecutions, des Conseillers de Cours souveraines, & d'autres gens esleués aux plus éclattantes dignités, ont souffert les tourmens & le martyre plustost que de l'abandonner. Et par la grace de nostre Seigneur il y en a encore maintenant, en quitant s'en faut que la grandeur de la naissance ait esteint les sentimens de la pieté & l'amour de la verité de Dieu, qu'ils sont

DE LA MORALE CHREST. en aussi bon exemple en cet egard, que leur extraction est glorieuse. C'est pourquoy il faut que i'employe ce chapitre à descrire les deuoirs ausquels ils sont obligés selon l'Euangile de Christ, & bien que souuent la noblesse du sang, celle que donnent les charges & les dignités, & celle enfin qui vient des richesses, se rencontre it en vn mesme sujet, ie les distingueray pourtant en quelque façon, afin de ne confondre pas les considerations qui se rap-

portent à chacune.

Ie diray donc premierement que la Noblesse qui vient de race à divers degrés. Car il y a quelques nobles qui sont nobles seulement, & qui p'ont point d'autres tiltres qui les signalent. Il y en a qui ont des tiltres qui les discernent d'auecque le commun des nobles, quoy que cestiltres là ne les empeschent pas d'estre vassaux d'autres nobles qui sont esseués au dessus d'eux. Il y en a qui ont des tiltres si releués qu'ils ne sont vassaux que du Roy, & meantmoins ils nes appellent pas Princes, parce qu'ils ne sont pas issus de

294 SVITE DE LA DERN. PART. Souuerains. Enfin, il y en a qui sont issus de Souuerains, & à qui la qualité de Princes est donnée à cette occasion, ce qui est le plus haut degré de la noblesse, sinon qu'on y voulust adjouster celle des Souverains mesmes, qui est tout à fait d'vne autre espece, parce qu'ils ne releuent que de Dieu. Et qui voudroit encore vser de subdivision, & particulariser dauantage, il tronueroit que comme entre les souverains il y en a de plus majestueux les vns que les autres, selon la grandeur de leur puissance, & la splendeur de leurs Estats, il ya pareillement de la difference entre les Princes qui sont issus de souuerains, à proportion de la majesté de l'estoc duquel ils sont descendus, & de ce qu'ils sont ou plus ou moins esloignés de la source de leur noblesse. Comme entre ceux qui ne sont pas Princes, & qui neantmoins ne sont vassaux que du Roy, il y a de la distinction selon l'antiquité de leur sang, & de mesmes dans les degrés inferieurs, iusques à ceux - là qui n'ont rien sinon cette simple qualité. Mais il n'est ny necessaire ny à

DE LA MORALE CHREST. 298 propos de detailler ainfila noblesse par le menu, ce que i'en ay dit suffiiant pour me conduire dans mes confiderations generales & particulieres. La premiere donc & la plus generale est, qu'en quelque degré de noblesse que l'on soit, il faut reconnoistre cela comme vne grace de Dieu, & luy en rendre toute la louange. Caril y aicy deux écueils opposés à euiter. L'vn est l'opinion de ceux qui croyent que la noblesse n'est rien du tout : l'autre est celle de ceux qui luy deferet tant qu'ils croyent qu'elle fait comme vne autre espece d'hommes. Pour examiner la premiere, il est vray que si nous fussions, demeurés en nostre integrité, nous fusfions tous nais egaux, & n'y eust eu autre distinction entre nous sinon celle de l'homme à la femme, à cause de la diuersité du sexe : du pere à l'enfant, comme de la cause à l'effect : des freres. entr'eux eu egard à la difference de leur aage, & du viel au ieune, entre ceux qui n'auroyent point eu de relation de fraternicé. Mais le peché aapporté vn changement vniuersel en toute l'ecog-

T iiij

296 SVITE DE LA DERN. PART. nomie de la Nature : de sorte qu'à son occasion la providence de Dien a mis vne notable difference entre les hommes, tant eu egard à leurs qualités personnelles, soit pour le corps soit pour l'esprit, qu'à l'autorité de commany der & à la sujettion d'obeir, dans la Police & dans les familles; & à la diuersité de leurs emplois, dont les vns sont plus releués & les autres moins; & & enfin eu egard à leur naissance, selon qu'ils sont issus de plus ou de moins illustres ayeuls. Tellement que qui voudroit reduire les nobles & les roturiers àl'egalité, il seroit aussi bien fondéà destruire toutes ces autres differences qui se rencontrent entre les humains, & renuerser sans-dessus-dessous toute la societé des hommes. Comme donc l'establissement des puissances est de l'institution de Dieu, bien que ce soit vn ordre humain : & comme l'autorité des maistres sur les seruiteurs se doie rapporter à la mesme cause, bien qu'elle ait esté introduite par le droit des Gens: les autres distinctions des hommes entr'eux, & nommement des no-

DE LA MOARLE CHREST. 297 bles & de ceux qui ne le sont pas, doiuent estre estimées de mesme origine. Ioignés à cela que la noblesse ayant accoustumé d'imprimer des sentimens genereux,& de donner à l'ame quelque elevation qui la porte aux actions vertueuses, & qui luy fait auoir honte & horreur des lascherés, ce seroit estre ennemy de la vertu, que de reduire les hommes à une condition egale. Car encore que quelquesfois on degenere, & qu'il se trouve des ames basses entre ceux qui sont releués par leur extra-Etion, si est-ce que d'ordinaire on experimente la verité de ce que dit Horace, que les vaillans engendrent les vaillans, & que de la race des pigeons on ne void point venir des aigles. Outre que la vertu, quand elle va du pere au fils, & qu'elle se prouigne ainsi pendant quelques generations, deuient en quelque sorte naturelle, les exemples qui se prennent des deuanciers & des ayeuls, ont plus d'efficace, & donnent beaucoup plus d'emulation, que ceux que l'on tire des histoires ou des familles estrangeres, & qui ne nous touchent

298 SVITE DE LA DERN. PART. point. Ce n'est pas qu'il n'y ait des ames si fauorablement & si auantageusement formées par la nature, qu'encore qu'elles soyent issues de gens de basse condition, elless'esleuent d'ellesmesmes, & surmontent les difficultés que la bassesse de leur origine oppose à leurs belles actions. Et puis que la noblesse n'est pas de nature, il faut necessairement qu'elle commence en quelcun, qui monte de bas en haut par la force extraordinaire de son genie, & qui en se rendant illustre, laisse comme vne espece d'heritage, la gloire de ses belles qualités à ses descendans. Mais tant y a que communément l'auantage d'estre issu de noble sang, inspire de la generosité, & porte par quelque naturel instinct aux choses honnestes & louables. Mais cet autre écueil de la vanité, qui fait que quelques nobles estiment les autres hommes d'vne autre espece qu'eux, n'est pas moins à euiter. Ie pense auoir dit en quelque autre lieu que ce grand le-Plessis Mornay disoit qu'il y avoit trois sortes de peché originel, qui impriment des caracteres

DE LA MORALE CHREST. 299 également indelebiles : celuy de tout le genre humain, qu'aucune sanctification ne desracine iamais tout à fait: celuy des Moines, qui laisse tousiours quelque tache, eussent-ils changé de baptesme & non seulement de profession: & celuy des gentilshommes, qui quelque soin qu'on y apporte, ne se guerit iamais de telle saçon, qu'il ne demeure tousiours au fond de l'ame quelque teinture d'orgueil, qui leur fait mespriser les autres hommes. Et de faic, il n'y a point d'ordre d'hommes qui pratique dauantage la ciuilité, ny qui le face de meilleure grace, que les per-fonnes vrayement nobles, quand elles ne pensent point auoir de sujet d'irritation. Mais si on vient à les offenser, ou qu'elles s'imaginent l'auoir esté, alors il leur arriue ce qui ne s'euite iamais en remuant les vaisseaux pleins de liqueur, mais au fond desquels il y a de la lie & de la vase. C'est qu'au lieu que la liqueur estoit fort claire auant l'agication, ce qui est au fonds s'excite par le mouuement, & trouble vniuersellement toutes les parties de ce qui and

300 SVITE DE LA DERN. PART. parauant paroissoit extraordinairemet limpide. Et de là vient ie ne sçay quelle enflure de l'esprit qui fait que les nobles considerent ceux qui ne le sont pas, comme si c'estoyent leurs esclaues. Le remede donc à cela est de reconnoistre que c'est Dieu qui est l'auteur de l'auantage qu'ils ont, que c'est luy qui les a discernés d'auecque les autres hommes & non pas eux, & qu'ainsi ils ne s'en doiuent pas glorifier ny enorgueillir contre les autres. Car s'ils sont euxmesmes les auteurs de leur noblesse, c'est Dieu qui leur a donné la vertu par laquelle ils se sont esseuésau dessus de leurs compagnons. Parce qu'il n'y a ni vertus morales, ny qualités intellectuelles qui rendent les hommes recommandables, en quelque degré qu'elles soyent, soit dans la Nature, ou dans la Police, ou dans la Grace, dont il ne faille attribuer la louange à la Prouidence deDieu, où à la vertu de son Esprit. Beaucoup moins certes les hommes se doiuent-ils attribuer ce qu'il y a d'extraordinairement eminent en eux, 82 qui églatte entre les autres. S'ils ont leur

DE LA MORALE CHREST. noblesse de leur sang, & de l'heredité de leurs Ancestres, c'est encore vne prerogative que Dieu leur a faite, deles faire naistre d'vne belle extraction. Parce que c'est luy qui preside sur la propagation de la race humaine, & qui distribuë le destin de la naissance comme il luy plaist. Apres cela, ie ne sçay coment il arrive qu'il y en a qui abusent de leur noblesse tout au rebours de sa nature & de son institution, & qui s'imaginent que parce qu'ils sont plus haut montés toutes choses leurs sont permises. L'injustice, pour ne payer pas leurs dettes; l'intemperance, pour s'abandonner à toutes sorte de dissolutions; la tyrannie, pour commettre milleextorsions & mille violences; l'impieté, pour semer tous leurs discours de profaneté & de blasphemes; l'orgueil, pour faire la morgue a toutes sortes de gens; la petulance, pour faire des extrauagances en toutes occasions; & la fanfaronnerie, pour faire des querelles sur des pontilles, sont les fruicts de la noblesse en certaines gens, qui pourueu qu'ils puissent acquerir ou conser-

302 SVITE DE LA DERN. PART. uer la reputation d'estre braues, ne se soucient pas de renoncer absolument à toutes autres bones qualités. l'aduouë que c'est la vertu militaire qui donne le plus ordinairement la naissance à la noblesse, & ne nieray mesme pas que si on compare celle qui vient des grandes actions militaires, auec celle qui procede de la richesse, & mesmes des dignités, celles-cy ont quelque peu moins de splendeur, la brauoure estant de tout temps en possession de tenir quelque plus haut rang d'honneur entres les vertus morales. De sorte que i'accorderay bien volontiers que comme c'est la valeur qui a donné l'origine à la noblesse, ce soit elle encore qui la conserue principalement, & que la grandeur du courage soit son particulier ornement. Mais qu'à cette occasion l'on renonce à toutes les autresvertus, & qu'on s'abandonne à toutes sortes de vices, c'est ce qui est tres indigne des gens veritablement nobles. Ce qu'est aux femmes la pudicité, cela est aux gentilshommes le courage. C'est pourquoy comme ceux cy ont principalement soin de

DE LA MORALE CHREST. 303 leur reputation en cet egard, & y constituent leur honneur, les femmes appellent du mesme nom la bonne estime de leur chasteré. Mais bien qu'yne femme ait esté sage de ce costé là, si est-ce que si elle a mauuaise teste, si elle est mauuaise mesnagere, si elle a des inclinations au larcin, si elle est curieufe & médisante, si elle n'aime ny ses enfans ny son mary, si elle est adonnée à la menterie & à la fourberie, elle ne merite pas la qualité d'honneste femme, parce que ce tiltre embrasse beaucoup de louables conditions. Vn homme donques, pour estre courageux, ne sera pas pourtant digne du tiltre de gentilhomme d'honneur, si parmy toutes sortes d'impersections il n'a que la seule valeur quile rend recommandable. C'est pourquoy la seconde reflexion que les gentilshommes doiuent faire sur leur noblesse, c'est qu'elle les oblige plus que les autres a estre veritablement vertueux. Car c'est vne chose honteuse que de n'estre pas semblable à ses ancestres, quand pour reigle de leur conduite ils se sont proposés le

SVITE DE LA DERN. PART. vray honneur. C'est vne chose en quels que façon injuste, de garder des immunités & des privileges, que l'on ne possede que comme vne recompense de la vertu, quand on n'a plus la vertu mesme. C'est plustost vne infamie qu'vne noblesse ny qu'vn honneur, d'estrepar l'auantage de sa naissance esleué en lieu eminent, & tout ensemble en mauuais exemple par ses vices. Et comme la nov blesse done beaucoup d'éclat à la vertu, elle met aussi les mauuaises qualités plus en veuë, & les fait connoistre de plus loin. Enfin, qui n'a autre chose qui le recommande sinon qu'il est issu d'illustres ayeuls, s'il a d'ailleurs les conditions des portefaix & des gens de neant, ou les inclinations des pendars & des garnemens, il fait plus de deshonneur à ceux dont il est descendu, qu'il ne tire de lustre de leur nom & de leurs armes. Comme il y a vne noblesse des personnes, il y en a aussi vne des nations. Etie croy que de toutes nations la plus noble est la Iudaïque. La Grecque est ancienne à la verité; mais elle n'approche point de l'antiquité de celle-là

DE LA MORALE CHRETS! celle-là. La Romaine a eu quelque chose d'extraordinaire en la majesté de fon empire: mais cela n'approche point des auantages de la posterité d'Abraham. Lefquels , dit l'Apostre , sont Ifraelites: desquels est l'adoption, & la gloire, & les Alliances, & les ordonnances de la Loy, & le service divin, & les promesses. Desquels sont les Peres, & desquels selon la chair est descendu Christ, qui est Dieu benit eternellement. Et neantmoins les pechés de cette miserable nation, ont fait qu'elle est deuenuë la plus odieuse & la plus mesprisable de la terre. Quand on parle à cette heure des descendans des Atheniens, & des Spartains ; c'est auec quelque espece de compassioni qu'on les void asseruis au Turc, & tombés si bas au dessus de la gloire de leurs ancestres. Quand on pense aux descendans des Romains, on a de l'estonnement de voir tant de foiblesse où il y avoit autrefois tant de vigueur, & que les soupplesses, & les fourberies, ayent succedé à cette haute magnanimité qui a autrefois triomphédel' Vniuers. Mais quand on parle des luifs, on est saisi

306 SVITE DE LA DERN. PARTS de ie ne sçay quelle espece d'horreur; de les voir siessoignés de la foy, de la sainteré, & de la vraye pieté de leurs Patriarches. Il y a donc beaucoup de sujet d'estre sensiblement touché de pitié, quand on void des gens de haute naissance decheus de la condition de leurs peres par quelque calamité. Et ceux mesmes qui bien qu'ils ne soyent pas nobles de race, ont neantmoins quelque chose de vrayement genereux dans l'ame, ne les peuvent considerer sans douleur. Mais ils regardent com me des monstres ceux en qui la splendeur de leur origine n'a point d'autre vsage, que de les mettre à couvert des chastimens & des supplices que meritent leurs horribles débordemens. Mais il vaut mieux venir aux considerations plus particulieres, & qui se rapportent à chacune de ces sortes de noblesse que i'ay distinguées cy-dessus. La premiere qui se presente à moy est celle des Roys & des autres Souuerains, que i'ay dite estre en quelque façon d'vne autre espece que les autres. Ce que ie ne tire pas seulement de ce qu'ilsont vne au-

DE LA MORALE CHREST. 307 torité qui n'appartient à aucun des autres nobles, mais de ce que cela leur imprime quelque caractere different de la condition des autres gentilshommes, & qu'ils conseruent mesmes apres qu'ils n'ont plus l'autorité. Car quand, pour exemple, l'Empereur Charles-Onint se sut démis de l'Empire entre les mains de son frere, & de ses Estats patrimoniaux entre celles de son fils, il n'auoit plus de pouuoir de commander nulle part, si ce n'estoit entre ses Moines, auec lesquels il s'estoit rangé, & sur ses domestiques, qu'il avoit gardés pour le service de sa personne & de sa Maison. Mais ie ne pense pas qu'aucun voulust dire qu'en cet estat-la il n'estoit rien plus que les autres nobles, qui estoyent sujets du Roy Philippe; parce qu'encore qu'il ne gouuernast plus le Royaume, si est-ce pourtant que son catactere l'empeschoit d'en pouuoir estre dit sujet. Et cela paroist encore en d'autres dont nous voyons en ce temps les exemples deuant nos yeux, & qui soit qu'ils soyent eux-mesmes volontairement descendus de dessus le trône,

308 SVITE DE LA DERN. PART. ou que quelque calamité des temps les empesche d'y remonter, tant y a qu'on les tient d'vn autre rang que les nobles, &que s'ils ne sont plus souverains parce qu'ils n'ont plus l'autorité du Commandement, au moins sont-ils libres à tel point qu'on ne les peut pas dire estre sujets d'aucun autre. Et telle estoit la noblesse d'Abraham, au iugement des Payens mesmes. Car encore que Dieu luy eust donné le droit de posseder comme Seigneur la terre de Canaan, si est ce qu'en effect il n'en avoit point esté mis en possession, & qu'il n'y a iamais possedé vn pouce de terre. Mais il n'estoit pourtant sujet ny de ceux du milieu desquels il etroit sort i, parce que Dieu l'en auoit tiré: ny de ceux parmy lesquels il estoit venu, parce qu'il ne s'estoit point incorporé auec eux, & que dans la vie qu'il menoit, Dieu faisoit asses paroistre qu'il l'exemptoit de la sujetion à aucune puissance souueraine. C'est pourquoy, quand l'occasion s'en presente, il leue les armes, il donne des combats memorables, & fait des hostilités, sans y estre autorisé que de sa

DE LA MORALE CHREST. leule volonté, parce que s'il n'auois point de sujets à qui comander, fors ceux de sa famille seulement, il n'auoit point aussi de souuerain à qui obeir, & des ora dres de qui ses resolutions dependissent. Si donc le Roy François premier iuroit ordinairement foy de gentilhomme, comme on le dit, ce n'estoit pas pour se reduire à la codition de ceux qui portent cette qualité, & establir en cet egard entr'eux & luy quelque espece d'egalité. Ou bien il auoit retenu cette formule de serment de quand il estoit encore. Conte d'Angoulesme, & sujet de son predecesseur; ou bien il le faisoit pour gratifier la Noblesse de son Royaume, en l'approchant de sa dignité. Et ce que l'on dit que le Roy est le premier gentilhomme de son Royaume, n'este pas no plus pour les faire tous de mesme rang; mais parce qu'il est tout seul du sien, on le met à la teste de tous les autres. Cette sorte de noblesse donc estant si haut esteuée, elle doit donner des sentimens qui ayent quelque chose d'extraordinairement signalé. Car d'vn costé, si cout biensait requiert de la

310 SVITE DE LA DERN. PART. reconnoissance, & si la reconnoissance doit estre grande à proportion de la grandeur du bienfait, il n'y a point de nobles qui soyent obligés à tant de gratitude envers Dieu pour l'avantage de leur condition, que ceux qui possedent vne noblesse si pure & siabsolument independante. Et d'autre costé, si la prerogatiue de la condition doit ins-pirer des pensées vrayement genereuses, & donner de grands mouuemens à la vertu, la noblesse du plus haut rang y doit auoir plus d'efficace. Ie ne me metrray pasicy à descrire le deuoir des Souuerains. Outre que cette Morale n'est pas pour tomber entre leurs mains, i'en ay dit quelque chose ailleurs, & ie ne les considere pas icy comme Souuerains, mais comme nobles. Mais ie ne laisseray pas de dire que puis que les Souverains sont la source d'où la noblesse coule dans tous les sujets de leurs Estats qui en sont participans, ils doiuent aussi estre la source de la vertu, sans laquelle la noblesse n'est quasi que comme vne ombre. Et puis que quand ils font des nobles ils declarent haute-

DE LA MORALE CHREST. ment que c'est à cause de leur vertu, & que par consequent ils reconnoissent qu'il n'y a que ceux qui sont veritablement vertueux qui meritent cette qualité, ils se sont en quelque saçon leur procés si eux mesmes ne se proposent en bon exemple. Quand on trouue dans les histoires que par la faueur des Empereurs, des valets des cordonniers ont esté esleués aux plus hautes charges de l'Estat quoy que ce ne fussent que des coquins & des garnemens, on en conçoit vne iuste indignation, comme si la noblesse auoit esté profanée en ces infames. Qu'est-ce donc que ces Empereurs-là mesmes pouuoyent esperer du iugement de tous les mortels, lors qu'ils estoyent eux-mesmes des meschans & des gens de neant, sinon qu'en leurs personnes estoit aussi auilie & abastardie la majesté de l'Empire? Ce que sont au ciel les astres, & entre les astres le Soleil, cela mesme sont en vn Estat politique les nobles, & entre les nobles le Souuerain. Comme les astres sont lumineux à l'egard des aut res corps inferieurs & des autres parties de la Nature,

V iiij

312 SVITE DE LA DERN. PART. les Nobles ont vn grand éclat entre les autres parties de l'Estat. Et comme c'est le Soleil qui communique la lumiere aux autres astres: c'est le Souuerain qui donne la noblesse aux autres nobles; de sorte que ne plus ne moins que tout ce qu'il y a de lumiere en l'Vniuers vient ou mediatement ou immediatement du Soleil, tout ce qui a quelque splendeur de noblesse & de dignité dans vn Estat, vient indubitablement de la puissance souveraine. Or ce seroit bien sans doute yn grand desordre dans la Nature, si auecque cette lumiere que les astres tirent du Soleil, ils mesloyent d'eux mesmes de mauuaises influences, &qu'ils les respandissent dans les parties de la Nature où leurs constellations peuuent dominer : mais ce seroit bien encore pis si le Soleil mesme auoit en son corps quelque chose de venimeux, qu'il coulast & dans les astres & dans les corps inferieurs conjointement auec la lumiere. Car il n'y auroit si petite ny fi reculée partie du monde, qui se peust garentir de ce venin, de sorte qu'il faudroit que tout perist comme par vne

DE LA MORALE CHREST. 313 peste vniuerselle. De mosme ce serois yn estrange déreiglement en vn Empire, si tous les nobles y deuenoyent vicieux: mais quand le Souuerain mesme l'est, rien ne se sauroit naturellement fauuer de la contagion de son exemple. Nous voyons bien à la verité qu'encore que la mer soit salée, & que toutes les rinières & les sources de la terre en viennent, elles sont douces pourtant. Et la raison de cela est qu'ou bien l'eau passant au trauers des veines de la terre s'y espure, & y laisse les parties plus grossieres, dans lesquelles estoit la salure, & s'adoucit en se subtilisant: ou bien, ce qui a mon aduis est plo vray, c'est que toutes les eaux douces venat des nuées, & les nuées elles-mesmes estant attirées par les corps celestes, elles laissent en la mer toute sa salure, & n'estans composées que des parties les plus deliées qui s'en tirent, quand elles se resoluent en pluyes, elles se trouuent sans saueur. Ainsi il y a bien sans doute quelque vertu d'enhaut qui preserue les gens de bien de la corruption des mauuais exemples que fournit la vie del-

314 SVITE DE LA DERN. PART. bordée des Souverains. Mais si Dieu laissoit aller les choses selon leur naturelle disposition, les vices des Potentats seroyent pernicieux à toute la terre. Quinte-Curse nous represente Alexan-dre comme vn Prince qui dans ses actios guerrieres se proposoit qu'il auoit pour spectateur tout l'Vniuers : tellement que comme s'il luy fust arriué d'y faire paroistre quelque foiblesse, il eust eu tous les habitans du monde pour témoins de son deshonneur, il auoit au contraire les yeux de tous les mortels pour approbateurs de sa gloire. Et s'il eust eu la mesme pensée en tous ses autres deportemens, il eust sans doute surpassé la condition humaine. Mais quand sa colere le transportoit, ou qu'il faisoit la débauche auecque ses Capis taines, il croyoit estre dans vne cauerne où personne ne le voyoit, ou si il croyoit que tout le monde le regardast, il monstroit bien qu'il n'estimoit rien les autres vertus, au prix de la reputation de la militaire. Ie voudrois que ceux qui sont aupres des Princes leur ramenteussent sans cesse, non pas seule-

DE LA MORALE CHREST. ment qu'ils sont mortels, comme on faisoit aux Rois de Perseautrefois; mais que tandis qu'ils sont viuans ils sont esleués en vn lieu si eminent, qu'aucune partie de leur vie ne sauroit estre cachée. Car come on a honte de paroistre nud sur vn theatre, parce que la nature a mis en nous quelques parties qu'elle nous ordonne de couurir : si les Souuerains auoyent vne fois receu bien auant cette impression, que les yeux de tous les hommes sont sur eux, ils tascheroyent de se composer de telle saçon qu'on ne leur peust reprocher aucune chose deshonneste. Les Potentats veulent qu'on les appelle des images viuantes de Dieu; & ils ont raison. Car cette puissance souueraine qu'ils ont sur les autres humains, est vn rayon de celle que Dieu a surtoutes les choses du monde : & comme Dieu n'est point tenu de rendre conte de ses actions à aucune des creatures qui sont dans l'estenduë de son empire, qui passe au de là de l'Vniuers, ils ne sont non plus tenus de rendre conte de leur administration à ceux qui sont en l'estenduë du

316 SVITE DE LA DERN. PART. leur, & iln'y a que Dieu seul à qui ils ayent à en respondre. Mais ce qui donne à Dieu cet empire sur toutes choses, c'est en grande partie l'excellence de sa nature, qui est souverainement intelligente, & sage, & iuste, & bonne, & sainte, & pitoyable, & en encline à bien faire aux bons, & à supporter mesmes les mauuais, afin de leur donner lieu de se repentir; & en qui en vn mot sont toutes les vertus qu'il est possible de conceuoir, & cela dans vne hauteur infiniment eminente. De sorte que s'ils veulent remplir comme il faut l'emphase d'vn tiltre si glorieux, ils se doiuent efforcer de le representer autant & plus en ces admirables proprietés, qu'en la grandeur & en l'independance de sa majesté. Car les foudres; & les tremblemens de terre, & les vens imperueux, ont bien en eux quelque representation de la puissance de Dieu. Mais pour cela il ne leur a pas donné le gouvernement du monde, ny assujetti ses creatures, sinon quand il luy plaist de s'en seruir pour les malgraitter. Parce que ces choses-là ne

DE LA MORALE CHREST. 317 gouvernent pas leur force par l'intelligence, la vertu & la raison, s'il leur auoit commis l'empire du monde, elles y feroyent des rauages continuels, & des ruines sans relasche, & le tires royent incontinent dans vne espouuantable perdition. Il n'a pas mesmes donné le souverain commandement aux lions, bien qu'ils soyent extraordinairement courageux & magnanimes, parce qu'ils sont aussi feroces, qu'ils n'ont point de connoissance de la iustice, & qu'ils prennent plaisir au sang. Il donna au commencement la surintendance de ses ouurages à l'homme, qu'il auoit doué d'intelligence, & qu'il auoit parfaitement bien formé à exercer la vertu- Et ie ne puis que ie ne dise icy quelque chose à la gloire de nos Rois: qui bien qu'ils regnent peut-estre de droit aussi absolument qu'aucuns autres Potentats de l'Uniuers, & qu'ils ayent presque tous donné des preuues bien authentiques de la grandeur de leur courage en diuerses occasions, ils aiment mieux pourtant qu'on les represente dans leurs seaux assis qu'à

318 SVITE DE LA DERN. PART. cheual, & tenant la main de iustice, que la foudre ou quelque autre marque de leur terrible puissance & de leur pouuoir independant. En vn mot, puis que nous cherchons icy quelle est la Morale Chrestienne, on ne leur peut mettre deuant les yeux vn tel modelle que celuy de Iesus Christ. Or les Prophetes disent bien que quand il exercera son regne, il ceindra son espée sur sa cuisse, & que maiesté & magnificence l'accompagneront; mais ils adjoustent qu'il sera monté sur la parole de la verité, sur la des bonnaireté & sur la iustice, de sorte qu'elles conduiront tous ses mouuemens, & qu'il ne sera porté à ses actions que par elles. Ils disent que sa dextre luy enseignera des choses terribles; parce que l'obstination de ses ennemis l'obligeront necessairement à faire d'espouuantables executions: & que ses fléches seront aiguës, & que les peuples cherront fous luy, & que ses traits entreront dans le cœur de ses aduersaires: car puis qu'ils ne se veulent pas soumettre à l'empire que le Pere luy a donné sur tous les humains, que reste-t-il plus sinon qu'ils experi-

DE LA MORALE CHREST. 319 mentent sa colere? Mais ils disent aussi que le sceptre de son regne est va septre d'equité:qu'il aime la inflice, qu'il hait la me (= chanceté, & qu'à cette occasion Dieu l'a eint d'huile de liesse par dessus tous ceux qui ont quelque communion auecque luy, ou à qui il a communiqué quelque veine de sa puissance. Et si les Monarques de la terre auoyent perpetuellement ce portrait-là devant les yeux, come le Seigneur Iesus, d'où il est dans les cieux en vne gloire inenarrable, fait continuellement couler icy bas, auecla douceur de ses divins aspects, l'abondance de ses graces, & la vertu de son Esprit; les Rois, de ce haut trône d'autorité où Dieu les a mis, respandroyent incessamment sur leurs sujets, tant leurs faueurs & leurs bienfaits, que les influences de leurs bons exemples. le viens maintenant à ceux que l'ay nommés Princes, parce qu'ils sont issus de maisons souveraines. Et la premiere chose que i'ay à dire d'eux, c'est qu'encore qu'ils soyent descendus vn degré au dessous de la souueraineté, ils sont pourtant assés souvent des sujets capa-

SVITE DE LA DERN. PART. pables d'y remonter. Vne bonne pat tie de nos Rois sont venus à la Couronne de cette façon là, & depuis enuiron deux censans, Louis XII, & François Premier, & Henry quatriéme nous en fournissent d'illustres exemples. quant à Charles neufiéme, & Henry III, leur naissance les en tenoit encore si prés, qu'il n'a pas falu remonter bien haut pour qu'ils se missent en possession de la puissance souueraine. Or c'est assés pour donner à ceux qui sont tels, de beaux & nobles sentimens, que de penser que leur condition les peut appeller au gouvernement des Royaumes. Car ce leur seroit vne chose bien honteuse, si le cas en arriuoit, que leurs vices les en fissent vniuersellement iuger indignes On dit qu'il y a certaines parties du regne, qui s'exercent mieux par ceux qui ne sont pas nés sur le trône; comme est le traittement des sujets en la distribution des charges & des imposts. Et la raison qu'on en rend est qu'ils connoissent mieux la necessité des peuples, & qu'ainsi ils sont plus capables d'en auoir pitié. Qu'ils l'ont euxmelmes

De LA Moarle Chres. 321 mesmes assés souvent experimentée dans leurs'affaires ; c'est pourquoy, quand ils font venus au Royaume, ils en sont meilleurs mesnagers. Enfin, qu'il leur est beaucoup plus aisé de descendre par la pensée à la consideration des affaires de leur Royaume, pour s'y gouverner sagement, que non pas à ceux qui dés leur naissance se sont trous ués assis si haut, qu'à peine l'estat de leurs sujets peut il monter à leur conoissance. Et bien que cela ne soit pas vniuersellement vray, s'estant veu des Monarques nés dans la pourpre, qui ont tressagement regné, & des gens esleués d'vn degré beaucoup plus bas à l'Empire, qui ont tout mis sans dessusdessous, la chose n'est pourtant pas sans apparence de verité, ny destituée d'exemples. Et neantmoins i'estime que ces trois que ie viens de nommer, & quiont tous eu de grandes vertus, les y ont apportées de ce que leur naissance, leur genie, & leur education; leur auoit fait conceuoir qu'il falloit qu'ils se rendissent dignes de toute grande fortune. C'est ce qui a fait que le premier s'est

123 SVITE DE LA DERN. PARTO fait aimer comme le pere de son peuple? que le secondaimprimé vn tel respect de ses vertus dans l'esprit de ses sujets, qu'ils ne l'ont iamais perdu, nonobstant la consideration de ses imperfections & de ses disgraces; & que le troisiéme, qui vit encore dans la memoire de plufieurs, & dont l'histoire, à cause de la proximité du temps, est plus connuë que des precedens, reuient incontinent dans l'esprit de ceux que leur chagrin ou leur malheur degouste du gouuernement present, & fait que l'on dit; Où est le temps de Henry le Grand, comme si ç'auoit esté l'aage d'or & le siecle de Saturne. Mais quand l'estat des choses r eculeroit vn Prince si loin qu'il ne luy feroit pas permis d'auoir iamais de telles pensées, toussours est-il certain qu'il se doit ressouvenir de la gloire de ses ayeuls, & de la splendeur de sa naissance. On dit que l'eau, quelque bas qu'elle descende, peut tousiours remonter aussi haut qu'est la source d'où elle a coulé. Et il s'en void des exemples prodigieux, & des jets d'eau de quatrevingt-dix ou cent pieds de haut, ce qui

De la Morale Chrest. donne de l'admiration à ceux qui les regardent. Cela n'est pas tousiours vray en ce qui regarde les dignités; & plusieurs, qui sont issus de Souuerains & de Potentats, se peuvent bien sevrer de l'esperance des grandeurs qui ont esté possedées par leurs ancestres. Mais il est quasi vniuersellement vray de la vertu, si ce n'est qu'on soit descendu d'ayeuls dont les qualités ayent esté extraordinairement herosques Carà la verité il estoit malailé qu'aucun des descendans d'Hercule, egalast la grandeur de ce patron : parce qu'outre la valeur qui l'a fait estimer digne du rang des Dieux de son temps, il faudroit, comme luy, auoir dans le corps vne force prodigieuse. Mais pour ce qui est des vertus dont l'histoire n'a rien de fabuleux, il y en a eu peu de si éleuces en aucun Prince souuerain, que ceux qui sont issus de luy soyent absolument obligés de desesperer d'y pounoir atteindre. L'on rapporte du Connestable de Lesdiguieres, qu'il auoit accoustumé de dire qu'il n'y a dignité, ny sauoir, ny richesse, ny reputation de valeur, à

SVITE DE LA DERN. PARTS quoy vn homme soit paruenu; qu'vii autre ne puisse raisonnablement & certainement esperer, pourueu qu'il prati-que deux choses. La premiere, qu'il se propose vn certain but de ses actions. Car ceux qui ne s'en proposent point, & qui courent tantost à vne chose & tantost à l'autre, desirans à cette heure de deuenir riches, & demain d'estre sauans, & vne autresfois de paruenir aux honneurs, & qui voltigent sans cesse ainsi, ne font iamais, pour parler comme les Italiens, vne bonne reuscite. Ils ressemblent aux chiens qui prennent le change, & qui courans tousiours apres la derniere beste qu'ils ont veuë, les faillent toutes egalement. Et ceux qui s'en proposent beaucoup ensemble, ne reuflissent gueres mieux; parce qu'outre qu'il est impossible que l'esprit de l'homme se parrageant à tant de choses, ait de la force assés pour sournir à toutes, souvent deux diverses fins de la vie s'embarassent l'une l'autre, de sorte que qui veut deuenir riche, est obligé de renoncer à l'esperance de paroistre entre les sauans. La seconde, que quand

DE LA MORALE CHREST. 325 ils'est vne fois proposé vn but, il y demeure si ferme & si arresté, qu'il y rapporte vniuersellement toutes ses actios, & qu'il ne s'en destache i i mais quelque chose qui arriue. Tellement qu'encore qu'il luy survienne des traverses, & des disgraces, & des rebuts, il ne se rebute pas pourtant, & qu'il espere que ce qui n'a pas succedé par vn moyen, succedera enfin par vn autre. Ie croy que ce grand personnage parloit ainsi par l'experience de soy-mésme. Car s'estant proposé pour but les plus grandes charges militaires, & les plus grandes dignités que les sujets puissent obtenir dans l'Estat, il y a tellement conduit ses pensées en toute sa vie, & tellement dirigé ses conseils & ses actions, que ne se contentant pas d'y faire seruir ses vertus, il y a aussi employé ses vices. Car voyant que ny la reputation de ses hauts faits d'armes, ny les seruices qu'il auoit rendus à la Couronne, ny sa prudence politique, qualités qui estoyent aussi eminétes en luy qu'en aucun homme de son temps, ne le pouuoyent faire. atteindre iusques à l'espée de Connesta-

Cir 1

326 SVITE DE LA BERN. PART. ble à laquelle il avoit toussours aspiré, il abandonna sa religion qui mettoit le dernier obstacle à son esperance. Ce n'est pas, comme quelques vns ont pensé, qu'il ne sist du tout point de cas de la religion. Car il en auoit prosessé vne soixante aus : il l'auoit gardée nonobstant la difficulté des temps dans lesquels il s'estoit rencontré: les censu-res de l'Eglise & le dépit des excommunications ne la luy auoyent pas fait quitter: & à, la premiere proposition qu'on luy sit de luy donner cette grane de Charge à condition qu'il passeroit dans vn autre Communion, il le promit bien à la verité, mais il ne voulut pasl'executer quand il vid qu'on auoit changé de visée. Mais quand le Connestable de Luine fut mort, & qu'on luy promit tout de bon, de l'eleuer à la derniere dignité à laquelle vn gentilhomme François puisse paruenir, il donna sa religion au mesme temps qu'on executa la promesse qu'on luy auoit faite. Ainsi il y a apparence qu'il n'y auoit que cette Charge qui luy peus faire renoncer à la Foy: mais quand il

DE LA MORALE CHRIST. 327 l'a fallu recenir au prejudice de ce qu'il s'estoit mis deuant les yeux pour la derniere fin de ses actions, il a creu qu'vne si belle espée, aussi bien que celle de Brennus, le dévoit emporter à la balance. le ne voudrois pas qu'yn Princese mistiamais en la teste le dessein de deuenir riche, & de tirer toutes ses actions à ce blanc : c'est vne chose trop basse pour ces gradesames. Ie ne voudrois pas non plus qu'il se proposast d'estre sauant. Car la science est bien vn grand ornement & vne grande aide aux autres vertus des gens de cette condition: mais c en doit estre vn ornement & vne aide. seulement, & ils sont appellés à donner de la matiere aux Poëtes & aux Historiens, & non pas à les bien entendre. l'estime mesmes que de se proposer de hautes charges & des emplois éclattans, c'est vne chose au dessous d'eux, si ce n'est pour y exercer la vertu, & la faire paroistre comme sur vn theatre. Car les Charges & les emplois doiuent suiure leur naissance, ou tout au plus tenir à l'egard de leurs actions, le mesme lieu. qu'Aristote donne à la volupté en X Allj.

328 SVITE DE LA DERN. PART. l'exercice de la vertu. C'est que celle? cy doit estre le vray but auquel vn honneste homme tend: si celle-là ou l'accompagne ou la suit, non seulement on ne la refuse pas, mais on la reçoit comme yn rejetton naturel des belles & grandes actions, & comme vne seconde fin qui vient en dependance de l'autre, Le vray but auquel vn Prince doit viser est celuy que l'on recommandoit à Achille, de paroistre tousiours le premier & d'estre tousiours le plus excellent dans les choses dignes de louange. Comme ie n'estime pas que Louys de Bourbon, celuy qui sut tué à Bassac, pensastà la Royauté, parce qu'il voyoit deuant luy quantité de ieunes Princes qui pouuoyent y paruenir; aussi recon-nois-je bien qu'il n'est pas hors de la vray-semblance, qu'il ait esté au commencement porté à ses grandes entreprises par cette consideration, que si les desseins de ceux de Guise reuffissoyent, la maison Royale, dont il faisoit part, seroit esteinte tout à fait, ou aumoins rabaissée bien loin au dessous de sa splendeur & ancienne & naturelle.

DE LA MORALE CHREST. Peut estre mesme qu'il y a senti l'aiguil-Ion de quelque ressentiment, de voir qu'encore que ceux de Guise n'eussent pas eu de si hautes pretentions qu'on se l'imaginoit alors, neantmoins ils auoyent trop de puissance dans l'Estat, au prejudice de coux qui estoyent du sang des Rois, & à qui il croyoit qu'à cette occasion appartenoit plustost qu'à des estrangers, l'administration des affaires de France. Neantmoins, selon que i'ay peu comprendre de la nature de ce Prince dans ce que l'histoire rapporte de ses actions, ie ne doute pas que cette haute generosité, cette eleuation d'esprit qui luy faisoit auoir en horreur toutes sortes de bassesses & laschetes, & cette inuincible magnanimité qu'il a maintenuë, non dans les actions militaires seulement, mais en des occasions où il est beaucoup plus difficile dela conseruer, ne luy vinssent du sentiment de son sang, & de la perpetuelle application de son esprit à penser à ce qui conuenoit à la qualité d'vn Prince. Il estoit en prison à Orleans: il y auoit arrest de de mort donné contre luy: l'eschaffaut 330 SVITE DE LA DERN. PART. estoit dressé pour en faire l'execution; le Roy estoit là present; tout se faisoit en son nom & en son autorité; mais tout estoit gouverné par les plus grands ennemis du prisonnier: & neantmoins il ne s'en estonna iamais, ne sit iamais paroistre aucune foiblesse en sa contenance, en les paroles, ny en ses actions; parla tousiours auec la mesme sermeté & la mesme grandeur de courage qu'il fit depuis à la teste des armées, & le monstra constamment si esleué au dessus, de toutes sortes d'accidens, qu'il sembloit que ce fust, non pas vn homme accusé de crime de leze Majesté, & condamné pour cela, mais vn Prince souuerain qui maintint son autorité & qui fift faire le procés aux autres. Maispuis que c'est icy la Morale Chrestienne, il faut que ie considere aussi en cela ce qu'il y pouvoit avoir de la connoissance de Iesus Christ. Ce Prince estoit né Chrestien, & auoit dés lors gousté la doctrine de la Reformation, qui commençoit à s'espandre par toute la France. Et ceux qui ne sauent pas bien la nature du Christianisme, s'imaginent

DE LA MORALE CHREST. 33E qu'il abbaisse le courage, parce qu'il exexhorteà la pacience, & qu'il forme à l'humilité. De sorte que Machiauel ne rend point d'autre raison pourquoy nous ne voyons plus de si grands exemples d'vne vertu quasi heroïque, qu'on en a veu dans l'Antiquité, sinon que ce-la ne compatit pas auec la Religion Chrestienne, qui semble auoir coupé les nerfs à la vigueur du cœur des hommes, en leur recommandant & en leur inculquant sans cesse l'imitation de la douceur & de la patience de Christ. Si donc vous en produisez quelquesvns, comme celuy du Prince duquel ie parle, & celuy de l'Admiral de Coligny, qui estoit du mesme temps, & de quantité d'autres dont nostre siecle, non plus que celuy de nos peres, n'est pas Dieu mercy destitué; pour parler selon ses maximes, & conformés ment à ses principes, il faut que Machiauel vous responde que ces gens-là, quelque prosession qu'ils sissent, n'estoyent neantmoins pas Chrestiens. Le pourray dire ailleurs, & particuliererement où il faudra traitter des gens

332 SVITE DE LA DERN. PART! de guerre, comment la doctrine de l'hul milité & de la patience Chrestienne, se peut accorder auec les actions militaires ausquelles les Capitaines sont obligés. Icy ie me contenteray de monstrer que cette grandeur extraordinaire d'ame qui a paru dans le Prince de Condé en cette occasion, non seulement n'auoit rien de contraire à la do-&rine & à l'exemple de Iesus Christ, mais encore, que c'est principalement de là qu'elle a procedé comme de sa source. Il faut donc icy supposer comme chose indubitable, que la Religion Chrestienne n'a rien changé dans l'ordre des choses du monde qui a esté premierement establi par la Nature, & puis apres par la Police, laquelle est venuë par dessus. Comme donques dans le Christianisme les vns sont demeurés Princes, & les autres se sont trouvés dans vneplus baffe condition, l'humilisé & la patience à laquelle nous sommes portés par l'Euangile de Christ, n'empesche pas que chacun ne puisse auoir des sentimens ou plus ou moins esleués selon la grandeur de sa naissance. Car

DE LA MORALE CHREST. la diuersité des conditions engendre aussi celle des relations, & la connoissan ce que chacun a de ses relations, luy donne des sentimens&des mouvemens conuenables. L'humilité donques d'vn Prince consiste à l'egard de Dieu, à se reconnoistre deuant luy, en qualité de de sa creature, comme yn neant; en qualité de pecheur, comme digne de sa malediction; & en qualité de fidelle, comme luy deuant absolument toute la gloire de son salut, & des vertus qui l'y conduisent. A l'egard des autres hommes, l'humilité d'vn Prince consiste à se reconnoistre de mesme natureauec eux, & entant que pecheur, enueloppó dans vne mesme corruption & dans vne mesme condamnation, de sorte que de ce costé, leur condition naturelle est absolument egale. Et s'ils sont fidelles comme luy, son humilité requiert encore qu'il les considere comme ses freres, participans de mesme adoption en Christ, esleués à l'esperance d'vn meime heritage eternel, & sans aucun precipu qui mette entr'eux de la difference. Or il n'est pas malaisé de

334 SVITE DE LA DERN. PART. conceuoir qu'elle temperature de dous ceur & de moderation cela peut mettre dans l'esprit d'vis Prince. Mais cela ne l'empesche pas de reconnoistre ce qu'il a pleu à Dieu de le faire naistre dans l'Estar, pour auoir le courage esleué à proportion de son origine. De sorte que si ceux qui luy sont inferieurs se veulent egaler à luy, il est bien sondé à ne le pas endurer : & si ceux qui ne luy font sinon egaux se veulent esleuer bien haut au dessus de luy, il luy doit estre permis de nele souffrir pas non plus, l'humilité du Christianisme n'empeschant pas qu'il n'ait en ce qui touche la Police, ou la Prouidence de Dieu à voulu qu'il ait esté auantagé, quelque particuliere generosité qui luy face tenir son rang auec la dignité conuenable. Que s'il vient à comber en quelques afflictions, il faut bien distinguer en luy les mouuemens qui luy viennent du sentiment de la main de Dieu, & la consideration de la nature de l'affliction mesme. Car en ce premier egard il doit estre plein de respect enuers la Prouidence de nostre Seigneur, & dans vne

DE LA MORALE CHREST. grande humiliation par la connoissance qu'il à de ses pechés, qui peuuent auoir donné vne inste occasion à sa souffrance. Mais au second, il luy sied bien de ne faire & de ne dire rien de bas, & qui soit au dessous de la grandeur d'vn bon courage. Que si son affliction luy est procurée par ses ennemis, alors il doit exactement distinguer entre ce qu'il peut meriter à l'egard de Dieu, & ce dont il se sent digne à l'esgard des hommes. Pour le premier, il n'a toujours que trop sujet de s'abaisser deuant Dieu, & de reconnoistre la iustice de sa conduite. Pour le second, il peut auoir la constance en son innocence qu'ont vniuersellement tous les innocens, mais il luy est souuerainement conuenable de tremper cela, comme fit le Prince de Condé à Orleans, dans la magnanimité d'vn Prince. En distinguant ainsi il imitera David, qui bien qu'il fust berger de naissance, auoit pourtant dés sa seunesse le courage des plus grands heros; de qui l'esprit auoit encore esté esseué par l'onction de Dieu mesme, aux plus hautes esperances aus336 SVITE DE LA DERN. PART. quelles puissent venir les mortels, & qui en fin apresauoir surmonté tous les Capitaines du monde en hauts faits, egala les plus grands Rois par la splendeur de sa couronne. Car quand il se presente deuant Dieu pour reconnoistre quelil se sent, s'ille yeut examiner à la rigueur, il s'aduouë digne de tous les maux qui luy pequent arriver. Mais quand il se compare auecque l'iniquité de ses persecuteurs, il publie hautement son innocence. Toutesfois, ie ne voudrois pas qu'vn Prince Chrestien portast en telles occasions sa magnaninité iusques où vont les imprecations de Dauid, qui couure souuent la teste de ses ennemis de maledictions espouuantables. Si cela est procedé de l'esprit de Prophetie qui luy faisoit connoistre la reprobation, & par consequent la derniere destinée de ces gens, comme il n'y à pas lieu d'en douter, ce luy estoit vn priuilege particulier dont les autres Princes ne se peuvent pas vanter. Et s'il y auoit quelque chose de la dispensation de la Nature, qui n'est pas si reseruée en ses ressentimens que la Grace, & qui s'y

DE LA MORALE CHREST. qui s'y donne plus de liberté, ce qui a esté excusable en David en ce temps-là, ne le seroit pas maintenant, que Christ requiert de nous vn plus haut degré de perfection par la manifestation de son Euangile. Quant à l'exemple de la pa-tience de Christ, il est proposé à imiter à tous les Chrestiens, mais neantmoins c'est sous divers egards qu'ils le considerent. Parce qu'il regarde sa mort comme vn effect de la malediction de Dieu sur tous les hommes à cause de leurs pechés, il fremit, il s'espouuante, il tombe en des angoisses extremes, il fuë des grumeaux de sang par la violence de l'agitation de son esprit. Or cela ne conuient pas ny en particulier aux Princes, ny en general aux autres Chrestiens. Dautant qu'ils ne doiuent plus considerer la mort come vn effect de la vengeance de Dieu, il est requis de leur foy à tous qu'ils l'enuisagent auecque de la fermeté; & de la generosité des gens de haute condition, de ne s'émouuoir que fort mediocrement de sa presence. Derechef, parce qu'outre la fin de sa satisfaction, nostre Seigneur souffrois

338 SVITE DE LA DERN. PART encore la mort comme vn martyre, poul la confirmation de la verité qu'il annonçoit; s'il arriue soit à vn Prince, soit à quelque autre fidelle, d'estre appellé à souffrir pour la mesme occasió, il y doit imiter la constance de nostre Sauueur, qui nonobstant toutes ces grandes & extraordinaires emotions qu'il sentit dans le iardin, ne laissa pas, quand il fut entre les mains de ses ennemis, de faire paroistre tout autat de vigueur d'esprit, qu'il estoit necessaire en vne telle occurrence. Enfin, parce que la mort de nostre Seigneur estoit ignominieuse felon le monde il ne se pouuoit que l'infamie n'en saissit son imagination. Car il estoit homme comme nous, & n'ya rien, hors le peché, qui puisse naturellement toucher vn esprit humain, de quoy celuy nostre de Seigneur ne fust susceptible. Neantmoins cela ne l'empess cha pas de s'esleuer bien haut au dessus de tous ses ressentimens, de se souvenir toujours de ce qu'il estoit, de le confesser, & de le maintenir hardiment en la presence de Ponce Pilate. Si done vn Prince se trouuoit en l'estat auquel

DE LA MORALE CHRIST. estoit celuy de Condé alors, la presence d'vn eschaffaut, & la pensée d'vn billot sur lequel il faudroit laisser vne teste capable de porter vne couronne; luy deuroit faire de l'horreur: mais neantmoins en s'y resoluant, il tascheroit toujours de garder le decorum qui cont uient à la hautesse de son origine. Ce siecle, fertile'en choses extraordinaires, & que ceux qui viendront apres considereront auec quelque estonnement, nous a fait voir vne chose bien plus estrange que celle dont le parle. Le Prince de Condé n'estoit que Prince, & encore non souverain: leRoy Charles d'Angleterre estoit Roy de trois beaux royaumes. Le procés du Prince de Condé luy estoit fait par son Souverains celuy du Roy d'Angleterre luy a esté fait par ses sujets. Du temps du Prince de Condé il y auoit plusieurs gens en France qui disoyent qu'il estoit bien au pouuoir du Roy de France de le tenir en prison bien resserrée, pour l'empescher de nuire à l'Estat; mais comme il ne luy estoit pas permis de démembres aucune partie du Royaume, dont il

Y ij

340 SVITE DE LA DERN. PARTE n'estoit qu'vsufruitier seulement, il ne luy estoit pas non plus permis d'oster la vie à vn Prince de son sang, parce que c'est oster à l'Estat une personne qui à cause de son habilité à la succession, luy est de plus de consequence que ne peutestre vne Prouince. En ce temps icy on a creu en Angleterre que le peuple y pouvoit absolument disposer de son gouvernement, & couper la teste à son Roy mesme. Enfin, le Prince de Condé, par vn accident inesperé à la verité, mais tant y a par vn accident, ne fut pas executé; & tandis qu'on a la teste sur les espaules, il peut toujours rester quelque fibre desperance, que comme on faisoit autresois dans les Tragedies descendre vn Dieu par des machines, pour desnouër des difficultés insolubles autrement, il pourra suruenir quelque chose d'impremedité, qui empeschera l'execution d'vne suneste sentence. Au lieu que l'eschaffaut dressé en la ville de Londresa esté teint du sang de son Roy, & que cette teste qui auoit porté trois couronnes auparauant, s'y est veuë effectivement separée du tronc de son

DE LA MORALE CHREST! 348 corps par la main d'vn homme à qui il ne manquoit rien pour estre bourreau, sinon qu'il s'estoit couvert d'vn masque, Neantmoins il est certain que ce Monarque s'y gouverna toujours en Roy, & bien que sa constitution naturelle luy eust donné vne fort grande douceur, que l'estat auquel il se voyoit reduit, luy deust encore donner plus de mortification, & que l'exemple de Christ, duquel il parla souvent, fust perpetuellement devant ses yeux, il n'y fit pourtant iamais rien d'indigne de sa Majesté, ny de la fermeté d'vn bon courage. Mais retournons à nostre propos. Les nobles qui sont immediatement au dessous des Princes; sont ceux qui ne sont pas Princes, mais que neantmoins l'antiquité de leur extra-Stion, & les tiltres de leurs terres ou de leurs charges, mettent au dessus de grand nombre d'autres nobles, sans que quant à eux ils soyent vassaux d'autre que de leur souverain. Ceux-là approchent bien prés de ceux de qui ie viens de parler : mais neantmoins ils y reconnoissent eux-mesmes vne notable diffee

342 SVITE DE LA DERN. PART. rence. Et de fait, ny ils ne peuuent pas sentir en eux les mouuemens que cause le sang des Souuerains, puis qu'ils n'en sont pas issus: ny ils ne se peuvent pas animer a la vertu par cette penfée, qu'ils peuvent devenir Souverains, puis qu'il n'y a rien dans leur sang qui la leur puisse faire naistre. Toutesfois, ils ont affés de grandeur pour ne se proposer rien que de grand en la conduite de leurs actions, & s'ils ne sont montés à ces hautes dignités par leur propre vertu, ce qui leur seroit bien glorieux, ils n'y pequent estre paruenus que par quelque rare qualité qui s'est trouuée en leurs predecesseurs. Or le premier leur doit estre yn aiguillon à ne se démentir point : car c'est vne chose bien honteuse de degenerer de soy-mesme, & de faire dire au monde; cet homme là estoit autrefois vn grand personnage, mais l'aise & les voluptes, & les dignités l'ont per-du, ce qui estarriué à Lucullus. Et le fecond doit perpetuellement exciter & reueiller les sentimens de vertu qui sont en vn homme de cœur, afin qu'on ne dise pas de luy qu'il a degeneré de

DE LA MORALE CHREST. 343 ses ancestres. On appelle les familles, & les bastimens où elles demeurent, ega-Tement des Maisons: & l'on les appelle grandes à proportion de ce que celles-là le sont en honneurs & en dignités, & ceux-cy en appartemens, en pauillons & en galleries. Et à la verité il y a quelque ressemblance entre les choses qui sont necessaires à les esseuer. Car comme il faut pour les vns de grands échaffauts, & des machines fortes, & des architectes bien entendus : il faut pour les autres d'extraordinaires qualités & des vertus bien eminentes. Mais il n'en est pas de mesme pour les chofes necessaires à les conserver. Car. quant aux bastimens, quand ils sont faits, on abbat les echaffauts, & on rene uoye les machines chés les charpentiers, & au lieu d'architectes experimentés, on se contente de gens qui prennét le soin des vitrages & des couuertures. Au lieu que sans les mesmes. vertus qui ont donné la naissance aux familles illustres & où il paroist de la grandeur, on les void incontinent tomber dans vne piteuse decadence. Et

344 SVITE DE LA DERN. PART. quand les richesses & les autres auanta? ges de cette nature s'y conserveroyent quelque temps, la notable diminution de la vertu, est la plus grande decadence qui s'y voye. Que di-je, quand ces choies s'y conserueroyent quelque temps? De la façon que les Grands viuent ordinairement, il est impossible qu'elles s'y maintiennent. Car la magnificence de leur train, les superfluités de leur table, l'abord continuel de toutes sortes de personnes en leurs Maisons, leurs meutes, leurs cheuaux, leurs oiseaux, leurs ieux & leurs passe-temps, leurs dissolutions, s'ils ne sont vertueux, & leurs debauches, les parties dans lesquelles ils s'engagent quelquesfois pour leurs amis, les griuelées, de leurs gens d'affaires, & les tours que leur font leurs intendans, sans parler d'vne infinité de rencontres extraordinaires qui les obligent à dépenser, mettent incontinent leurs Maisons en tel estat que c'est vn espouvantable desor-De sorte qu'elles ressemblent à leurs bastimens, quand on a esté quelque temps sans y faire les reparations

DE LA MORALE CHREST. 345 necessaires. La masse à la verité s'en foustient aucunement: mais vous voyés là vne grande muraille qui fait ventre, & icy vn pauillon demy fondu; en vn endroit vn lambris se pourrit parce qu'il y pleut: & en vn autre les peintures d'vne galerie se ruinent en ses creuasses; de sorte qu'on a quelque compassion que les choses qui auoyent esté faites auecque tant de soin & de dépense autrefois, tombent dans vn si grand deperissement. Ou donques il faut que ce soit la vertu qui regle la conduite de ces maisons pour les conseruer: ou il faut que se soit elle qui face des efforrs extraordinaires pour les restablir, & qui en rende les Maistres si recommandables prés des Souuerains, qu'ils employent à les entretenir les mesmes moyens & les mesmes gratifications qui y ont esté pratiquées par leurs deuaciers. Mais sur tout doivent-ils avoir le soin d'y conseruer la pieté enuers Dieu, & d'y faire fleurir autant qu'ils pourront la predication de l'Euangile. Car comme l'Apostre dit que Iesus Christ soustient l'Vniuers par sa parole puissantes 346 SVITE DE LA DERN. PART. l'on peut bien dire certes que c'est par sa parole encore qu'il fait subsister les maisons des grands Seigneurs. Il est vray que comme on ne void point par quels moyens nostre Seigneur conseruoit le monde, on n'apperçoit pas bien souuent d'abord ceux dont il se serg pour la manutention des grandes Maisons, Et c'est ce qui fait peut estre qu'on n'y est pas ordinairement si soigneux qu'on y deuroit estre, d'y entretenir la deuotion. Carles hommes ne croyent volontiers qu'aux choses sensibles, 82 quant aux secrettes voyes de la Prouidence Divine, ils n'y pensent iamais gueres que quand ils en voyent les euenemens. Mais quoy qu'il en soit, cet-te sentence, que la Pieté a les promesses de la vie presente & de celle qui est à venir, est vniuersellement veritable pour ce second chef; & quantau premier, bien que Dieu se soit reserué le chois des temps & des moyens d'en faire voir la verité, si est ce pourtant qu'il fournit ordinairement l'occasion d'esperer qu'on en sera l'experience. Quant aux Nobles qui sont vn degré

De LA MORALE CHREST. au dessous, & qui neantmoins ont quelques autres tiltres que ceux de gentilhomme seulement, ie les trouue dans vne condition fort auantageule, s'ils sauent bien gouster leur selicité, & ils la gousteroyent s'ils en imitoyent vn que ie connois, & dont il n'est pas necessaire que ie repete icy le nom. Apres auoir esté fort soigneusement esseué dans la connoissance des belles lettres & des sciences, particulierement dans les sentimens de la pieté sans oublier les exercices des cheuaux & des armes, afin de s'en pouvoir seruir en toutes. bonnes occasions, on luy sic faire les voyages qu'ont accoustumé de faire les hommes de belle naissance, afin de parler pertinemment des plus notables parties de l'Europe, & des plus illustres nations. Cela fait, il prit la teinture de la Cour, qui donne toujours à la Noblesse quelque éclat qu'elle n'auroit pas autrement: & puis il suivit les armées, comme le mestier de ses ancestres, sans la pratique duquel il est impossible à vn Gentilhomme de sonder jamais solides ment yne bonne reputation. Et com

348 SVITE DE LA DERN. PART. me il a le cœur assis en aussi bon lieu qu'ait aucun homme de sa condition, il ne s'est point là presenté d'occasions, ny de celles qui sont veritablement de la guerre, & où on combat plusieurs contre plusieurs, ny de celles qui sont de la maladie du siecle, & où le demeslé est d'vn à vn, où il n'ait fait voir de sibelles marques de sa valeur, que tous ceux qui l'ont connu l'ont eu en vne singuliere estime. Dans le mestier de la guerre, & dans toutes les factions militaires, où la pluspart des autres se perdent par la licence des armes, & par les exemples de l'impieré, il trouuoit vn Escole de toutes sortes de vertus & Chrestiennes & Morales. Carla mort, qu'il se proposoit à toutes rencontres, luy faisoit toujours tenir sa coscience en estat de comparoistre deuant Dieu. Les fatigues des armées endurcissoyent & son corps & son courage à toutes sortes. d'incommodités: & la faim & la soif. ausquelles on y est assés souvent sujer, luy donnoit occasion, non pas seules ment d'exercer alaigrement sa patience à l'heure qu'il le falloit, mais encore de

DE LA MORALE CHREST. 349 le preparer par l'abstinence & par le trauail, à l'heure mesme qu'il n'y estoit pas necessairement obligé, à supporter auecque gayeté, ce qui donnoit aux autres du découragement & de la triftes se. Quant à ces malheurs de querelles particulieres dans lesquelles on est quelquesfois engagé, s'il y auoit quelque chose à redire en sa vertu, c'est qu'ilne les fuyoit pas assés pour vn homme Chrestien, & de profession Reformée. Non qu'il soit de luy-mesme hargneux; car iamais homme ne le fut moins souque comme plusieurs ont fait, il cherchast sur des pontilles l'occasion de se faire dire braue. Mais neantmoins il auoit tellement ce que les gentilshommes appellent ordinairement l'honneur, deuant les yeux de l'esprit, que dans la deliberation, s'il valoit mieux obeir à Dieu, qui defend cette sorte de combats, ou estre la fable des hommes, qui tiennent pour lasches ceux qui les refusent, il se determinoit sans difficulté de ce costé-là, qu'il valoit mieux tomber entre les mains de Dieu, qui est misericordieux, qu'entre ceux des

300 SVITE DE DA DERN. PARTS hommes, qui sont tres injustes estimateurs de la pieté, & tres-insolens à insulter, quand on leur a donné quelque sinistre impression de son courage. Cependant il n'est iamais allé à cette sorte de combats sans une tres-ardente priére à Dieu qu'il luy pleust tellement conduire les choses, qu'en s'en retirant auec honneur, il peust conseruer la vie à son aduersaire. Et de fait, quoy que quand il en faloit venir aux prises, il valloit comme vn lion, il a toujours eu vn soin merueilleux de conseruer la vie à son ennemy, & de se contenter d'auoir eu l'auantage sur ses armes. Parce qu'il ne cherchoit pas à la guerre les grands emplois, mais seulement de satisfaire à ses inclinations, & d'acquerir la reputation que doit auoir vn homme de condition, lors qu'il se vit en cet estat, il se retira chés luy pour y composer vne famille. Ce n'est pas qu'il ne quittast la guerre comme vne maistresse qu'il auoit extremement aimée, mais qui luy causoit vne si grande dépense, qu'il n'y pouuoit plus sournir sans ruiner absolument ses affaires, s'il ne vouloit; comme plus

DE LA MORALE CHREST. 352 sieurs autres, saire des violences & des extorsions pour la contenter. N'estant donc pas d'humeur à cela, il aima mieux en faire vne autre qui luy apportast du bien au lieu de luy en demander, & qui des fruits de son reuenu luy aidast à nourrir ceux qu'elle produiroit de son ventre. Retisé qu'il a esté dans sa maison, ses soins se sont partagés principalement à ces choses. Premierement il a commencé par loger l'Arche de Dieu chés luy, en y establissant vne Eglise & vn Pasteur, pour y faire les exercices ordinaires de la pieté, & les autres fonctions du saint ministere. De quoy il y a tel autre que luy qui se sust sans doute bien passé, parce qu'il pouuoit trouuer prés de luy l'edification & la satisfaction qu'il cherchoit, & que ce nouuel establissement ne se pouuoit faire sans quelque despense considerable. Mais il a mieux aimé, quoy qu'il luy en peust couster, ouurir vne source en sa maison, pour y attirer ses voisins, qu'en aller chercher ailleurs & y mener ses domestiques. En effect elle y a esté fort frequentée iusqu'à mainte,

BYL SVITE DE LA DERN. PARTS nant, parce qu'on y a trouvéles eaux douces & salutaires. Apres cela, Dieu luy ayant donné quantité d'enfans, tant de l'vn que de l'autre sexe, il s'est appliquéauec vne affiduité incroyable à leur education, tant pour les former tous de bonne heure à la crainte de Dieu & à la vraye vertu, que pour donner la teinture des bonnes lettres à ceux que le sexe en a fait capables. Et comme il a animé cela d'exhortations, & l'a viuifié de son exemple, en quoy il a esté admirablement bien secondé par sa compagne, semme douée de tressexcellentes qualités, aussi y a-t-il parsairement bien reussi par la benediction de Dieu, n'y ayant point de famille de cette condition, mieux reglée ny mieux moriginée que la sienne. Mais bien qu'il semble, à voir les attachemens qu'il a eus prés de ses en-fans, qu'il n'eust plus de soin que de ce qu'il le touchoit en particulier, si est ce qu'il n'a iamais manqué à aucune des occasions où le public, ou bien ses amis, ont eu besoin de sa personne. Car n'estant pas possible qu'il n'arriue à toute heure

DE LA MOARLE CHERST. heure quelques brouilleries dans les Prouinces, dans lesquelles nomément la Noblesse ainterest, il s'y est toujours messéaussi auant qu'on le peut desiret d'vn honeste homme, & y a paru tellement zelateur du bien commun, qu'il en a toujours establi la principale partie en la conseruation des loix de l'Estat, & au respect qui est deu à la puissance souueraine. Si bien qu'encore que ce soit souvent vne chose assés difficile à faire que de satisfaire aux peuples, & de conseruer l'autorité du Roy, il a sceu tellement se mesnager, qu'il n'a man-qué ny à l'vn ny à l'autre. Pour ce qui est de ses amis, il s'est donné de telle façon à eux où les occasions l'ont requis, qu'il y a toussours maintenu l'intègrité de sa vertu, sans defaillir à aucun deuoir de l'amitié, & qu'il leur a fait comprendre que celle-cy doit estre tellement fondée sur celle-là, que ceux qui requierent qu'on passe les reigles de la premiere à leur occasion, eneruent & aneantissent la seconde. Tellement que ceux d'entr'eux qui ont en recommandation la vertu, ont trouué en luy 354 SVITE DE LA DERN. PART. tout ce que l'on peut desirer dans les offices de l'amitié, & ceux qui croyent qu'il faut absolument tout deferer à l'amitié, ont esté contraints d'auoir en venetation sa vertu, quand ils ont reconnu que s'ils n'obtenoyent pas de luy tout ce qu'ils desiroyent, il n'y auoit que la seule vertu qui y mist obstacle. La chasse est vn des exercices les plus ordinaires de la Noblesse quand elle demeure à la campagne, & quant à luy il ne le mesessime pas. Car c'est comme vne image de la guerre, & on fait son apprentissage contre les bestes, de ce qu'il faut pratiquer puis apres sur les ennemis. Le courage s'y affermit contre les dangers, & le corps s'y endurcit au trauail : & Machiauel a remarqué apres les anciens, qu'y ayant toussours beaucoup de conformité entre les diuers pays, on apprend en conduisant les meutes en l'vn, comment il faudra puis apres mener les armées dans l'autre. Parce que les costaux, & les vallées, & les fondrieres, & les forests, & les campagnes, & les buissons, quelque varieté qu'il y ait en leur disposition, se

DE LA MORALE CHREST. ressemblent pourtant en plusieurs façons, dans la guerre qui se fait à veuë d'œil, on tire beaucoup d'vrilité de s'estre exercé à la chasse. Et quand l'occasion s'en est presentée, celuy dont ie parle s'y est quelquesfois tellement abandonné, que les plus furieux picqueurs estoyent contraints d'aduouër qu'il leur donnoit de la tablature. Neantmoins il a premierement distingué entre le legitime plaisir qu'on y prend, & la passion auecque laquelle quelques-vns s'y laissent assés souvent emporter, de sorte que de ce qui leur deuroit tenir lieu d'exercice seulement, ils font vn mestier continuel & vne occupation sans relasche. Et c'est ce qui fait que quand ils sont en compagnie ils ne parlent presque iamais que de chiens & de cheuaux, parce que c'est ou bien ce qu'ils sauent le mieux, on au moins la passion qui les domine. Il a donc tousiours remarqué que c'est là vn giad defaut dans les personnes de sa condition, & puis enfin d'autres considerations l'ont empesché de cottnuer en cet exercice. La despense en est excessive,

356 SVITE DE LA DERN. PART. & on s'y fait manger à ses chiens, comme Actaon, a ses cheuaux, à ses oiseaux, & à ses valets. Le temps qu'on y met ordinairement, si on en veut faire son exercice ordinaire, est le meilleur de la vie, & le plus propre à toutes sortes de bonnes actions. Enfin il y faut auoir vn corps robuste, & quelque robuste qu'il soit, il est malaisé pourtant que la violence de la chasse, & les incommodités qu'on y endure, n'alterent enfin la santé. Il a donc creu que c'est vne grande folie que de se ruiner pour son plaisir, & que quand on ne s'y ruineroit pas, la dépense qu'on y fait, seroit incomparablement mieux employée aux œuures publiques, & pieuses, & charitables, d'où il peut reuenir quelque soulagement aux pauures, quelque edification à l'Eglise, & aux Lettres quelque ornement. Et de fait, il employe à cela ce que les affaires de sa famille ne l'obligent point de retenir, & bien qu'il cache ses liberalités tant qu'il peut, il est neantmoins impossible qu'elles ne se sachent. Pour son semps, il l'employe à la lecture des

DE LA MORALE CHREST. bons liures, qu'il aime passionnèment, & qu'il sait parfaitement bien choisir, & augmente tous les jours le magazin de ses connoissances pour sa satisfaction particuliere, & parce que naturellement il aime à sçauoir. Du reste, le peu de santé dont il a ioui depuis quelques années en çà, l'auroit tout à fait priué du contentement de la chasse, quand il n'auroit pas esté d'humeur à trouuer plus de satisfaction ailleurs. Enfin, le reste de sa vie se passe dans les conuersations de ceux dont il est visité, qu'il rend tousiours quant à luy salutaires par les marques d'vne pieté sans affe-Etation; vtiles par les lumieres des histoires, des sciences, & des belles lettres, qu'il y messe sans aucune ostentation; aggreables par des gayetés innocentes, & par des ieux d'esprit honnestes' & extraordinairement illuminés; & douces tout ce qui se peut, par vne complaisance sans exemple, mais qui ne va iamaisiusques à conniuer aux vices, non pas mesmes à dissimuler quand on s'emporte deuant luy à des mesdisances, qu'il releue tousiours auec

Z iij

358 SVITE DE LA DERN. PART. beaucoup de fermeré & de charité. Et parce qu'il me semble que c'est là vn suffisant caractere du devoir d'yn homme de cette condition, ie diray maintenant deux mots de celuy du dernier ordre des gentishommes. La condition de ceux-cy n'est pas à beaucoup près si auantageuse, & i'aduouë qu'il leur est beaucoup plus difficile de se rendre heureux. Car ils ont le courage haut, comme leur naissance le veut, & la fortune basse à proportion, ce qui leur donne beaucoup de peine : parce que leur condition ne leur permet pas de faire diverses choses que les autres homes font pour acquerir du bien à leurs enfans, & pour fournir à leur dépense. Tellement qu'on en void plusieurs qui sont extrémement incommodés, & à qui leurs incommodités font d'autant plus pesantes & plus importunes, qu'ils ne trouuent pas aisément le moyen d'y remedier. Il y a des pays où les nobles trafiquent comme les autres hommes, & neantmoins retiennent les auantages & les privileges de leur noblesse quand & quand. Iene sçay si cela est

DE LA MORALE CHREST. bien conuenable : parce que la marchandise, quoy qu'honneste, semble estre au dessous de l'ordre de la Noblesse, qui est destinée à de plus hautes fonctions. Ie doute mesme s'il est raisonnable qu'vn mesme homme ait en mesme temps la faculté d'attirer à soy la richesse par le commerce, & de retenir la prerogative des immunités. Car c'est comme si dans le corps humain quelques membres attiroyentà eux les forces, & que neantmoins ils se deschargeassent des fardeaux: ce qui seroit indubitablement contre l'equité de la Nature. Il y en a d'autres où les nobles ne peuuent exercer aucun commerce sans estre estimés dégenerer, & sans dechoir de leurs priuileges, dans lesquels ils ont puis apres bien de la peine à se faire rehabiliter. le trouve aussi que cela est dur, d'estre condamné à vne pauureté perpetuelle, pour soy & pour la posterité, ou à perdre le rang & le tiltre de ses ancestres, & les sentimens genereux que donne la communication de leur sang. Ie voudrois donc qu'il sust permis à cette sorte de gen-

Z iiij

SVITE DE LA DERN. PART. tishommes de laisser dormir pour quelque temps leur noblesse, iusques à ce que par des voyages aux Indes, ou par quelque autre negoce honorable, ils eussent peu apporter la richesse & l'abondance, ou au moins certes la commodité dans leurs maisons. Mais apres cela ie voudrois aussi qu'ils peussent sans aveune difficulté faire reuiure leur qualité, & reprendre en mesme temps & le rang & le courage des nobles. Mais quelles que soyent en cet egard les Coustumes & les Constitutions publiques, que ma Morale ne changera pas, la premiere chose que i'ay à dire à cette sorte de personnes est que l'auantage de leur naissance, pourueu que la vertula seconde, les rend capables des plus grandes charges de l'Estat. Car il n'y a point de simple gentilhomme qui ne se doiue proposer cela, que sans autre anoblissement il peut deuenir Mares chal de France, & paruenir encoreà de plus hautes charges militaires s'il y en auoit; ce quiseroit extremément difficile à vn autre, quelque vertueux qu'il peust estre, si la naissance luy manquoit.

DE LA MORALE CHREST. Ce n'est pas que l'histoire n'en sournisse des exemples, & qu'il ne s'en peust mesmes rencontrer en nostre temps. Mais outre que c'est vne chose fort rare, il la faut attribuer, non pas seulement à vne vertu extraordinaire, mais aussi à vn extraordinaire bonheur. Ny la vertu d'vn roturier, fust elle semblable à celle des anciens heros, ne monteroit iamais yn homme si haut, s'il n'auoit eu, comme on dit, la fortune fanorable: ny la fortune touté seule, pour si fauorable qu'elle peust estre, ne luy donneroit iamais ce grade, si elle n'en trouuoit l'occasion dans vne eminente vertu. Mais quant aux gentishommes, s'ils n'entrent dans les grandes charges de plein pied, au moins y peuuent ils monter par degrés, où ils n'ont gueres besoin que de leur vertu pour escorte. Et c'est par là que le Mareschal de Gassion, & le Connestable de Lesdiguieres, & plusieurs autres sont paruenus; la naissance leur ayant premierement donné la liberté d'aspirer à ces dignités, & le cœur de s'y efforcer, iusques à ce qu'enfin ils y sont paruenus

362 SVITE DE LA DERN. PART. par leur vertu militaire. l'allegue ces deux là nomément, parce que leur naissance estoit noble, mais telle pourtant qu'ils n'auoyent presque rien au delà; le second estant l'aisné de sa maison à la verité, mais accompagné de peu de bien: le premier estant d'vne Maison où il y pouuoit auoir du bien, mais cadet, de qui toute l'esperance dependoit de la benediction de Dieu, & de la bonté de son espée. De sorte qu'il n'y a gentilhomme si peu auantagé en naissant, qui ne puisse esperer en les imitant, de venir à des emplois considerables. Et ie ne fais pas difficulté d'exciter cette sorte de gentishomes par l'esperance de ces grandes charges, bien que i'aye dit que cen'est pas là proprement à quoy les Princes doiuent regarder. Car ceux-cy les doiuent considerer comme en quelque façon au dessous d'eux, ou au moins comme des choses ausquelles ils sont egaux par leur naissance, de sorte qu'il faut seulement qu'ils se picquent du vray honneur & de la vertu. Mais ceux-là considerent les grands emplois comme des choses qui

DE LA MORALE CHREST. sont bien loin au dessus d'eux, & ausquelles ils ne peuuent iamais arriuer par le seul auantage de leur naissance. Neantmoins, le second advertissement que i'ay à leur donner est, que quand ils ne pourroyent pas paruenir à ces recompenses là, la seule consideration de la vertu les doit animer, parce que com, me disoyent les Stoiciens autrefois, elle porte son salaire en elle-mesme. Iene veux pas dire comme eux, qu'elle est toute seule capable de rendre les hommes heureux. Asseurément il faut quelque autre chose auec elle pour acheuer la beatitude. Il n'y a point de gentil-homme de cinq cens liures de rente, à qui ie peusse persuader qu'apres auoir fait quinze ou vingt campagnes, où il a souffert beaucoup de fatigues, & receu beaucoup de playes en son corps, s'il s'y est comporté vertueusement, il se doiue reputer heureux, s'il ne s'est du tout point auancé ny dans le bien ny dans les Charges. Ie veux dire seulement, que quand cela seroit arriué, il ne se deuroit pas chagriner pourtant; ny dire comme Brutus, le voibien, vertu, que

364 SVITE DE LA DERN. PART. tun'es qu'un nom, & non une chose reelle. Vn home qui a veritablement le cœur noble, ne se dépitera pas contre la vertu, quand la fortune, comme on parle, ne luy aura pas esté fauorable; & se contentera en soy mesme de la satisfa-ction que suy donne le souvenir de ses belles actions. Iene sçay mesmes si vn homme qui a le cœur veritablement genereux, se décourageroit, & se rebuteroit de la resolution de faire de cette façon plusieurs laborieuses & perilleuses campagnes, quand par quelque rayon de l'esprit de Prophetie il deuineroit qu'il ne s'y auanceroit du tout point. Au moins certes sçay-je bien, que de la Noblesse Françoise qui fait prosession de la Religion, il y en a vne bonne partie qui peut bien preuoir que si les degrés par lesquels on paruient aux grands emplois, ne luy sont fermés, au moins y rencontrera-t-elle des empels chemens comme insurmontables. Et toutesfois le zele du seruice du Roy, l'affection au bien de l'Estat, & quand il n'y auroit que cela, l'amour de la vertu & de l'honneur, porte presque tous

DE LA MORALE CHREST. 365 ceux de cette naissance & de cette profession, aux factions militaires. Et c'est vn des preceptes que cette Morale leur doit donner, que puis que la pureté de la Religion qu'ils professent, les esleue pour le moins autant au dessus des autres gentishommes qui sont d'egale naissance auec eux, que la noblesse les esleue tous au dessus des roturiers, ils doiuent auoir des sentimens plus genereux à proportion, & passer par dessus toutes autres considerations, & surmonter toutes sortes de difficultés, pour s'acquitter de leur deuoir, & satisfaire à leur conscience. Peut-estre qu'il arriuera à quelques vns d'eux de deuenir des Connestables de Lesdiguieres & des Mareschaux de Gassion. Mais quand cela ne leur arriueroit pas, ce leur sera tousiours vn incroyable contentement d'auoir merité de l'estre. Mais parce qu'encore que cette exhortation-là conuienne fort bien à la noblesse, & nommément à la ieune, si est-ce qu'elle regarde particulierement la vertu militaire, & que la Religion les requiert toutes en ceux qui portent le nom de

366 SVITE DE LA DERN. PART. Chrestiens, i'adjousteray encore ce mot, pour passer puis apres à d'autres Considerations: c'est que la pieté enuers Dieu est la source de toutes les autres belles qualités qui rendent les hommes recommandables. C'est elle premierement qui les rend veritablement vaillans. Car dans la profession du Christianisme, sans l'esperance d'vne meilleure vie, le mespris de la mort est vne espece de brutalité. Autrefois, entre les Grecs & les Romains, où l'on auoit extrément peu de certitude de l'immortalité de l'ame, & encore moins de connoissance de son estat apres la mort, l'idée de ce qu' Aristote appelle no ranov, ce qui est beau & horneste, pouuoit aucunement porter les hommes aux louables actions. Et ie croy qu'Epaminondas, & Scipion l'Africain, & Socrate, & Xenophon, & quelques autres encore, en ont eu l'imagination imbuë quand ils ont fait ces belles choses que les historiens rapportent d'eux. Mais maintenant que l'Euangile a mis dans vne claire euidence quelle est la nature de nos ames, & ce qu'elles ont à deue-

De la Morale Chrest. 367 nir, on ne peut negliger cette pensée sans profancié, & la profancié ne peut compatir auec cette idée de l'honneur qui a autrefois animé & comme informé la vertu de ces grands hommes. C'est encore la pieté qui forme les hommes à la Iustice, vertu que la ieune noblesse n'a pas accoustumé de beaucoup considerer. Car il est aduis à la plus part qu'ils sont de le race des oiseaux de proye, qui ne viuent que de ce qu'ils rauissent, & qui ne se paissent qu'en deschirant. Tellement que quand ils sont à la guerre, la picorée & la rapine leur sont comme vne espece de solde; & ce qu'ils onrappris à la guerre, ils le pratiquent quand ils en sont retournés en leurs maisons. C'est elle encore qui donne les veritables preceptes & les inclinations à la temperance, qui est autrement quasi inconnue à la plus part des ieunes hommes, mais principalement à ceux qui se vantent de la noblesse de leur sang. Car il leur semble que la prerogative de leur naissance leur fournit des tiltres de licence, & de desbauche & de dissolution, pour les

368 SVITE DE LA DERN. PART. exercer non pas seulement impunément, mais encore auec quelque espece de louange. De sorte que celuy qui en fait le plus, est le plus estimé parmy eux, comme s'il y auoit vn prix ordonné pour l'yurognerie & pour l'insolence. C'est elle enfin qui donne l'humilité & la moderation d'esprit, qui se rencontre rarement entre les ieunes gentishommes, si de bonne heure ils n'ont esté esleués à la pieté. Parce que l'opinion de leur noblesse leur souffle ie ne sçay quoy dans l'ame qui les enfle démesurement, & qui leur fait regarder de haut en bas, & mesmes assés souuent traitter auec indignité, ceux qui sont d'vne autre naissance. De là vienuent les algarades, & les menaces, & les actions de violence que chacun d'eux exerce dans son vilage, quand ils ne voyent rien au dessus d'eux qui soit capable de les reprimer. Ce donc qui leur doit estre perpetuellement inculqué dés leur enfance, ce qu'on leur doit faire succer auecque le laict, ce dont on doit comme nourrir & entretenir leur ieunesse, ce qu'on doit sans cesse

DE LA MORALE CHREST. 169 cesse faire resonner à leurs oreilles, & dont il leur faut mettre iour & nuit les exemples deuant les yeux, c'est qu'il y a vn Dieu qu'il faut honorer, vn Iesus Christ qu'il faut croire, vne mort eternelle qu'il faut craindre, vne immortalité glorieuse à laquelle il faut aspirer; afin qu'en toutes occasions il leur vienne de là de bonnes pensées. Et parce que c'est de la parole de Dieu que la pieté se puise, & par la predication de l'Euangile que la foy se forme dans les cœurs, & que c'est la priere qui obtient de Dieu la grace de son Esprit, pour donner accroissement à ce que l'vn a planté, & à ce que l'autre arrouse, ceux à qui l'education de la ieune noblesse est commise, doiuent auoir soin de les accoustumer à ces exercices, pour les pratiquer toute leur vie, & pour en estre le fondement.



370 SVITE DE LA DERN. PART.

DV DEVOIR CHRESTIEN de ceux qui font nobles par leurs Charges.

IL y a de deux sortes de Charges : à sçauoir les militaires & les civiles. Et mon intention n'est pas de parler icy des premieres: parce que s'il est question de considerer la noblesse qu'elles donnent, nous en auons desia parlé dans le discours precedent. Et pour ce qui est du deuoir auquel sont obligés ceux qui les exercent, il en faudra traitter cy-apres, lors que nous parlerons de la guerre, & de la façon de laquelle ceux qui la font se doiuent gouverner. Quant aux autres, il y en a quelques vnes qui consistent plustost en dignité, que non pas en fonctions : & de celles qui confistent en fonctions, les vnes regardent plustost le gouvernement, les autres sont accompagnées de iurisdiction; & enfin il y en a où ces deux choses sont iointes ensemble. Pour exemple, en la

DE LA MORALE CHREST. Republique de Rome, le Consulat estoit vne charge das laquelle l'autorité du gouvernemet estoit en quelque sorte souueraine pour vn an: mais au reste le Cosul n'auoit point de iurisdiction qui luy fust particulierement affectée, & s'il en exerçoit quelcune, c'estoit conjointement auecque le Senat. Mais le Preteur auoit vne iurisdiction ordinaire pour prononcer sur les differens d'entre les particuliers. En France, qui est vne Monarchie, les Charges sont autrement dispensées. Car celles qui ont part au gouvernement de l'Estat, sont toutes conferées à ceux qui sont prés de la personne du Roy, de qui ils sont considerés simplement comme Conseillers & comme Ministres, parce que l'autorité du commandement reside en la personne de luy seul. Quant à la Iurisdiction qui leur est attribuée; comme il est certain qu'ils en ont en ce qui regarde dinerses choses qui arriuent entre les sujets du Roy, cela est reiglé soit par la nature des choses mesmes, qui doiuent estre ingées dans le Conseil de saMajesté: soit par la vo-

372 SVITE DE LA DERN. PART. lonté du Prince, qui les tire d'entre les mains des Iurisdictions ordinaires par la puissance souveraine de ses euocations. Les autres ont bien vne autorité en quelque sorte souueraine, en ce qu'elles prononcent en dernier ressort & sans appel: mais cela est separé de l'autorité du gouvernement, & regarde seulement l'administration de la Iustice entre les personnes particulieres, ou entre les Compagnies subalternes entre lesquelles il y peut auoir quelque different. Quoy qu'il en soit, les vnes & les autres anoblissent, & cela auec tres. bonneraison. Car soit qu'elles ayent quelque part au gouvernement ou non, ce rayon de la Puissance du Souuerain qui leur est communiqué, & qui leur fait auoir les biens, & l'honneur, & la vie des hommes entre les mains, leur donne quelque caractere qui les distingue des autres, & qui ne s'arreste pas simplement à l'exercice de leurs charges, mais qui s'attache à leurs personnes, & qui passe en celle de leurs descendans. Car il est bien vray qu'il y a vne grande difference entre la Iustice

DE LA MORALE CHREST. souueraine, comme l'autorité en reside en la personne du Prince, & elle-mesme comme elle est communiquée à ses Officiers. L'à elle est primitiue, icy elle n'est que par communication. Là elle est absolument independante; icy elle n'est que subalterne à l'egard du Prince mesme, à qui elle a à rendre conte de ses iugemens. Là elle est comme la lumiere est dans le Soleil, à sçauoir dans son principe, & dans toute la plenitude de sa force, parce qu'elle luy est essentielle, & qu'elle ne vient point d'ailleurs. Icy elle est comme la lumiere dans la Lune, c'est à dire empruntée & affoiblie, & dependance des aspects de cet astre superieur. Là elle vient immediatement de Dieu, qui a mis le Soleil dans le Monde, & le Monarque dans l'Estat, pour recueillir en soy tout ce qu'il y doit auoir de clarté & de vertu viuifiante, & de puissance de commander: icy elle vient de Dieu à la verité, mais c'est par l'entremise d'vn grand luminaire, qui se communique aux autres astres, & sans lequel ils ne seroyent point lumineux. Enfin là, el-

SVITE DE LA DERN. PART. le vient directement de celuy en qui est la source de toutes choses, & à qui elles se doiuent toutes rapporter: icy elle ne se fait sentir aux choses inferieures que par reflexion seulement. Et comme là où Dieu se reuele d'vne façon extraordinaire, les Princes du monde ne paroissent point, la splendeur de leur majesté demeurant engloutie dans l'infiniré de celle de Dieu, là où le Souuerain reuele son autorité tout à plein, celle de ses Officiers doit cesser, comme quand le Soleil est monté vn peu haut sur l'horison, la lune & les estoilles se cachent. Et de là depend le premier precepte qu'on leur peut donner selon les reigles du Christianisme. C'est que comme les Rois reconnoissent qu'ils tiennent leur puissance de Dieu, & font prefession de le luy soumettre, & de nerien commander qui soit contre sa volonté, ceux à qui les Rois ont communiqué quelque partie de leur pouvoir, le doiuent administrer comme le tenans d'eux aussi, auecque resolution de n'en vser iamais au prejudice de leur autorité souveraine. De

DE LA MORALE CHREST. fait, il y a cette difference entre Dieu &les Princes sonuerains, que s'ils se reuoltent contre luy, il est armé d'vne si merueilleuse puissance, que leur rebellion ne sauroit produire aucun effect, finon autant qu'il leur permet. Car leur vie est en sa main : & le souffle de tous ceux qui leur obeissent, depend absolument de sa volonté; & toutes les autres creatures sont tellement à son commandement, qu'à vn seul coup de sifflet, elles se sousseueront toutes s'il luy plaist contre eux, dequoy l'histoire de Pharaon fournit de memorables exemples. Au lieu qu'il se peut faire que les Officiers des Rois leur débauchent tellement leurs sujets, qu'ils se rendent plus puissans qu'eux dans leurs Estats mesmes. Mais il y a pourtant cela de commun, que comme la rebellion des Rois contre la puissance de Dieu est injuste, celle des Officiers contre leur Souuerain l'est pareillement: & comme la desobeissance des Rois aux commandemens de Dieu. rend à la subuersion de l'uniuers, celle des Officiers à la volonté & à l'auto-

376 SVITE DE LA DERN. PART. rité des Souverains, ne peut produire autre effect que le bouleuersement des Estats: enfin, comme la rebellion des Rois contre l'autorité de Dieu donne vn tret-manuais exemple à leurs Officiers; la rebellion des Officiers à l'autorité du Souderain, fournit vn tres pernicieux exemple aux autres parties de l'Estat, pour ne reconnoistre pas l'autorité des Officiers mesmes. S. Pierre donnant des enseignemens aux Chrestiens, leur parle ainsi. Rendés vous suicts à tout ordre humain pour l'amour de Dieu : soit au Roy, comme à celuy qui est pardessus les autres : soit à ses gouverneurs, comme à ceux qui sont enuoyés de par luy, pour exercer vengeance sur les malfaiteurs & à la louange de ceux qui font bien. En l'estat auquel estoit l'Eglise de Dieu alors, il y auoit peu des Officiers des Empereurs qui eussent embrassé le Christianisme. Ny les membres du Senar, ny les Gouverneurs des Princes, ny cenx qu'on a nommés les Procureurs de Cesar, ne se convertissoyent pas volontiers à l'Euangile de lesus Christ. Et si quelques-vns l'ont fait, comme le

DE LA MORALE CHRIST. Proconsul Serge Paul, ils ont esté en grand danger de se voir incontinent obligés de laisser l'exercice de leurs charges. De sorte qu'il y a beaucoup d'apparence que cet aduertissement de l'Apostre regarde directement les perfonnes de condition priuée, & non celles qui sont esleuées en autorité. Neantmoins il y a eu pareille raison de les appliquer aux Gouuerneurs à l'egard des Empereurs mesmes. Car si les Gouuerneurs estoyent personnes publiques & esleuées en autorité à l'egard des particuliers, ils estoyent sujets & particuliers à l'egard des Empereurs. Si par ce mot d'ordre humain, vous entédés l'establissement que les Empereurs fais soyet de la persone des Gouverneurs en la place de la leur, pour gouverner leurs sujets: s'il y a raison pour les particuliers de respecter cetordre-là & de s'y foumettre, il y en auoit encore plus pour les Gouverneurs & pour les Officiers de l'Empereur, de respecter sa puissance, par ce qu'elle estoit establie de Dieu, comme S. Paul l'enseigne gilleurs. Et si par ce mot vous enten-

378 SVITE DE LA DERN. PART. dés l'establissement des Empereurs, parce que c'estoyent des hommes, qui commandoyent à des hommes, & pour des choses humaines, & où la volonté des hommes interuenoit, tousiours y aura-t-il plus de majesté en cet or drelà, en ce qui regarde l'establissement des Empereurs, qu'en ce qui concerne celuy de leurs Officiers; parce que ceux-là tiennent leur pouuoir immediatement de Dieu, au lieu que ceuxcy le tiennent de Dieu à la verité, mais par l'entremise du Prince. Si donques les Chrestiens particuliers & de condition priuée, ont deu se soumettre aux Gouverneurs pour l'amour de Dieu, parce qu'encore qu'ils fussent enuoyés par l'Empereur, il y falloit pourtant reconnoistre l'autorité de Dieu mesme, qui auoit donné à l'Empereur le pouuoir de les enuoyer: les Officiers à qui Dieu auoit fait la grace de se conuertir an Christianisme, se deuoyent soumettre à l'Empereur pour l'amour de Dieu pas reillement, & encore en termes plus forts, parce qu'il auoit esté enuoyé de par Dieu mesme. On raconte d'yn

DE LA MORALE CHREST. Empereur qu'installant vn Officier en sa charge, & luy mettant pour cet effe & vne espée à la main, il luy dit que s'il luy commandoit des choses iustes, il employast cette espée pour son service, & que s'il luy commandoit des choses injustes, il s'en seruist contre luy: & cette parole, comme elle a esté sort celebrée par les historiens, aussi a t elle esté fort diuersement prise par les Politiques. Et veritablement on la peut regarder par diuers visages. Sice Prince l'a prononcée par la seule confiance qu'il auoit en sa vertu, parce qu'il estoit pleinement asseuré qu'il ne commanderoit rien d'injuste, de sorte qu'il n'arriueroit iamais non plus que son Officier se reuoltast contre luy, c'est vne façon de parler semblable à celle de l'Apostre S. Paul, quand il escrit aux Galates. Si nous mesmes, ou vn Ange du Ciel vous euangelise outre ce que nous vous auons euangelisé, qu'il vous soit en execration. Comme il sauoit bien que ny luy ny aucun Ange des cieux, n'annonceroit iamais rien contre la verité de Christ, il estoit aussi asseuré qu'ils n'au-

SVITE DE LA DERN. PART. roient point à craindre cet anatheme. De sorte que comme ce n'estoit pas pour deroger à l'autorité de son Apostolat, mais seulement pour recommander sa fidelité, qu'il parloit ainsi emphatiquement, ce n'auroit pas esté non plus pour rien diminuer de l'autorité de l'Empire que cet Empereur auroit ainsi parlé, mais seulement pour monstrer combien il estoit asseuré de la iustice de sa conduite. S'il l'a dite parce qu'effectiuement il ait creu que quand les Empereurs commandoyent quelque chose injustement, leurs Officiers fussent absolument fondés en droit de leur-resister à main armée, il a eu de la majesté de l'Empire d'autres sentimens que les preceptes de l'Apostre S. Paul n'en ont imprimé dans les ames des Chrestiens. Car il veut bien à la verité que l'autorité des Empereurs n'induise iamais les hommes à faire des choses qui sont manisestement contre la volonté de Dieu. Mais il ne veut pas que pour cela on se sousseue contr'eux, mais qu'on se resolue seulement à la souffrance. Et ils l'ont ainsi pratique

DE LA MORALE CHREST. pendant l'espace de trois censans, où ils n'ont iamais rien opposé à la violence des tyrans que la seule constance inuincible de leur courage à ne point mal faire. Du reste, le respect du caractere que les Empereurs portoyent les a tousiours empeschés d'opposer la force à la force. Si enfin il l'a dite parce qu'encore qu'il sceust bien quelle estoit la majesté de l'Empire, il y a pourtant renoncé, & a voulu que s'il s'y gouvernoit mal, on ne cosiderast pas son caractere, & qu'on se rebellast cotre luy, ç'a bien peu estre veritablement vne extraordinaire bonté en luy, mais ie ne pense pas que ç'ait esté vn pareil effect de prudence. Car bien qu'il n'eust pas dessein de faire tort à l'autorité de ses successeurs, parce que l'autorité qu'il donnoit à ses Officiers, le regardoit personnellement, il y dérogeoit pourtant, en donnant occasion à ses sujers de tirer cet exemple à consequence. Et bien qu'il fust fort asseuré de sa vertu, il hasardoit pourtant beaucoup sa personne & son autorité, en rendant ses Officiers iuges absolus de ce qui est iuste

382 SVITE DE LA DERN. PART. ou injuste. Parce qu'encore qu'il semble que cela soit determiné par les loix, si est-ce qu'il y a beaucoup de choses qui dépendent de la volonté des Souuerains, & que les loix ne comprennent pas: & que souvent il faut que les Souuerains changent les loix mesmes. C'est vne chose constante que ce commandement, Honore ton pere & tamere, comprend aussi l'obeissance que l'on doit rendre aux Souverains. Parce que le Souuerain tient en l'Estat le mesme lieu que le Pere tient en sa famille. Si doc vn pere de famille armant les seruiteurs ou ses enfans cotre les attétats des voleurs, leur disoit, serués-vous de ces armes-là contre moy, si ie viens à vous commander quelque ehose contre la iustice, ie ne diray pas seulement qu'vn bon fils, maisie diray mesme qu'vn seruiteur qui ne seroit pas garnement, donneroit à cette parole vne interpretation raisonnable. Il suffira, diroit-il, que ie ne vous obeïsse pas : mais Dieu me garde d'auoir iamais de plus mauuaises pensées. En effect les Parlemens de France, ou est en depost la souveraine Iustice du Roy, en

DE LA MORALE CHREST. 383 ont vsé ainsi. Ils ont bien pris la liberté, parce que la bonté de nos Rois le permet, de leur faire des Remonstrances, & de les reiterer, quand ils ont ordonné quelque chose qui a semblé contre le droit. Mais si nonobstant les remonstrances les Rois ont persisté en leur volonté, ils leur ont declaré auecque respect qu'ils quitteroyent volontiers leurs Mortiers & leurs Bonnets, comme fit le President de la Vacherie au Roy Louis XI. plustost que de faire quelque chose à quoy la iustice repugnast; mais leur resistance n'a pas passé outre. Et comme la respectueuse liberté qu'ils ont prise de faire des remonstrances aux Rois quand les occasions l'ont requis, ont souuent produit de bons essects pour l'etilité du Public, l'obeïssance & la soumission qu'ils ont renduë au Souverain, quand il a perfistó en sa volonté, a iusques icy conserué l'Estat en sa legitime forme. l'ay comparé le Roy au Soleil, & ces Compagnies souueraines à la Lune, & ie ne m'en dédis pas. Car outre qu'elles sont rayonnantes par la communication de

384 SVITE DE LA DERN. PART. son autorité, il ya encore cette ressemblance, c'est que tandis que le Soleil & la Lune sont en telle situation que la terre les peut voir tous deux, la Lune reçoit la lumiere du Soleil, & l'enuoye vers nous par reflexion. Au lieu que si la Lune se met entre le Soleil & laterre, comme pour empescher que nous ne le voyions, elle produit ce mauuais effect, qu'elle nous intercepte la lumiere du Soleil, & qu'elle ne nous éclaire pas elle-mesme. Ainsi tandis que dans vn Estat les choses sont en telle constitution que l'autorité du Senat n'offusqué point celle du Prince, elle se fait sentir aux inferieurs à l'vtilité du Public. Mais quand le Senat se met au deuant du Prince pour l'empescher de luire sur l'Estat, & d'y faire voir auec éclat les rayons de sa Majesté, on n'y sent point la chaleur ny la lumiere de l'vn ny de l'autre. Le second precepte que le Christianisme peut donner à ceux qui sont esleués à ce grade-là, c'est celuy que Iofaphat donna autrefois aux luges qu'il establissoit sur les villes de Iuda. Regardés, leur dit-il, que vous firés : car 20113

DE LA MORALE CHRIST. 385 vous n'exercés pas la iudicature de par un homme, mais de par l'Eternel, lequelest parmi vous en iugement. Maintenant donc que l'espouuantement de l'Eiernel seit sur vous; prenés garde à cecy & le faites, car il n'y a point d'iniquité en l'Eternel nostre Dieu, ny acception de personnes, ny reception de presens. Il y a cette difference entre les lugemens qui se rendoyent alors & ceux qui se rendent maintenant, que ceux là auoyent pour reigle les loix que Dieu mesme auoit establies, ceux-cy doiuent estre conformés aux ordonnances qui ont esté faites par les Rois. Car comme en formant la Republique d'Israel Dieu s'estoit reserué d'en estre le souuerain Magistrat Politique auant l'establissemet de la Royauté; aussi en auoit-il estéle Legislateur, n'y ayant pas la moindre partie de son gouvernement dont il n'eust luymesme donné la description par le ministere de Moyse. Au lieu que maintenant chaque Prince, ou chaque Seigneurie, ou chaque Republique populaire, fait les loix selon lesquelles la iu-

stice doit estre renduë aux particuliers,

Bb

386 SVITE DE LA DERN. PART. sans que Dieu y interpose ses reuelations & ses inspirations extraordinaires. Neantmoins, les loix de maintenant sont de deux sortes. Carilyen quelques-vnes qui sont absolument conformes à celles de la Nature, comme celles qui defendent le blaspheme, & le meurtre, & l'adultere, & la calomnie, & le larcin: & de celles-là on peut bien dire que ce sont les loix de Dieu, la Nature en cet egard n'estant rien sinon l'image de la sainteté de Dieu mesme, & la declaration de ses volontés. Et il y en a 'quelques autres, qui n'estant pas contre la disposition de la Nature, sont neantmoins plus arbitraires qu'autrement, & se soustiennent plus par l'autorité du Legislateur, que par leur iustice interieure & essentielle: & il faut encore appeller celles-là les loix de Dieu, en ce que la souveraine puissance qui les establit, est ordonnée de par luy, & que le Souverain des souverains parleaux hommes par cet organe. De sorte que les Magistrats qui son afsis pour prononcer selon ces reiglemens, doiuent tenir cela pour tout af-

Da LA MOARLE CHERST. 387 seuré, que c'est Dieu mesme qui leur a donné cette tablature. Mais cela, que Dieu est au milieu d'eux, est vn aduertissement qui a vne merueilleuse emphase. Car il signifie bien à la verité qu'il faut receuoir les iugemens qu'ils rendront comme s'ils venoyent de Dieu; pour s'y soumettre auec respect, parce qu'ils sont rendus en son nom: mais il fignifie pour le moins autant que Dieu est là leur inspecteur, pour voir comment ils se gouvernent. C'est pourquoy il y est fait mention d'épouuantement, parce qu'il exerce son intendance auecque beaucoup de seuerité, & que ceux qui peruertissent le droit doiuent attendre sa vengeance. On met assés fouvent des images du Crucifix au dessus des tribunaux où on administre la iustice, pour ramenteuoir aux hommes combien les crimes sont horribles, puis qu'ils ont attaché le Fils de Dieu sur vne ignominieuse croix. S'il estoit possible de representer nostre Seigneur assis sur son trône en iugement, & prononçant les arrests qui doiuent faire les eternelles destinées de tous les hom388 SVITE DE LA DERN. PART. mes du monde, ie pense que cela seroit encore plus à propos. Car il ne donneroit pas seulement aux particuliers de la veneration pour l'autorité des luges qui prononcent en son nom, mais de la frayeur aux luges mesmes, parce qu'ils luy doiuent rendre conte de leurs iugemens. Mais à bien parler toutes ces images là ne seruent de rien, & on s'accoustume tellement à les voir, que leur aspect ne produit aucun mouuement en la conscience. Si on s'arreste à les considerer, c'est pour y remarquer les beaux traits du pinceau du peintre, ou l'industrie du brodeur: tout le reste no touche point, ou s'écoule de l'esprit comme vne ombre. C'est dans le cœur que les Magistrats doiuent auoir profondement emprainte tant la passion de Christ, que la journée de son jugement, & si chacun d'eux la y auoit comme il doit, il n'auroit point affaire de peinture & de broderies. Et icy ie ne puis que ie ne dise vn mot en passant. Comme les Estats Chrestiens sont à cette heure formés, il y en a beaucoup qui sont messés de diuerses religions, à

DE LA MORALE CHREST. l'occasion desquelles il a esté fait des Ordonnances & des Edits, pour reigler les Magistrats en l'administration de la Iustice à l'egard de ceux qui font des professiós opposées. Et les differens qui leur suruiennent sont ou bien touchant les choses ciuiles seulement, de telle force que la Religion ne s'y mesle point; ou la Religion mesme y est interessée. Quant aux premiers, il faut qu'vn Iuge soit merueilleusement corrompu si la seule religion l'empesche de rendre le droit à qui il appartient. Si Titius est Catholique, & Meuius Reformé, de quelque Religion que le Iuge soit, s'il ne s'agit que d'interests particuliers, il n'y peut mettre la Religion en consideration, que ce ne soit vne acception de personnes toute manifeste. De quelque profession qu'ils soyent en ce qui touche la pieté, ils font partie d'une mesme societé politique, à la conservation de laquelle est destinée la iurisdiction des Magistrats. Et si dans vn Estat où la Religion Protestante est, comme on dit, la dominante, vn Magistrat estoit bien fondé à oster le bien à vn Catholi-

390 SVITE DE LA DERN. PART. que pour le donner à vn Reformé, dans vn autre Estat où la Religion Catholique a le plus d'autorité, les Magistrats seront pareillement bien fondés a oster lebien aux Protestans pour le donner aux Catholiques. Ce qui est vn renuersement de tout ordre, & qui tire apres soy la ruine des societés. Ce que sont en vn Royaume deux Religions opposées, quand elles sont permises ou autorisées par les loix, cela mesme sont au monde deux Estats de differentes religions, quand vne fois ils y ont esté formés par la Prouidence diuine. Comme donques Dieu souffre qu'il y ait au monde des Estats où on autorise des Religions contraires à la Chrestienne, & si dans ce qui regarde la Politique, les Chrestiens entreprennent quelque chose d'injuste contre les Mahometans, il prononce en faueur des Mahometas par le succés des barailles, parce que la iustice le veut & qu'il est ainsi necessaire pour la conseruation de l'Vniuers: les Magistrats qui ont à prononcer sur les differens de personnes qui sont partie d'vn mesme Estat, doiuent, sans

DE LA MORALE CHREST. auoir egard à la Religion non plus, prononcer en faueur du droit, parce seulement que c'est le droit, & qu'il est ainsi necessaire pour la conseruation de l'Estat mesme. Aussi ne void-on pas d'ordinaire qu'en telle nature de choses il se commette des injustices signalées à cette occasion. Mais là où l'interest de la Religion est meslé, il est certain qu'il ne s'en peut pas dire de mesme. Car chacun se laisse emporter au zele qu'il a pour la sienne, & croid que le seruice de Dieu, & le salut des ames des hommes, & la gloire de la profession qu'il a embrassée, le doit emporter par dessus toute autre consideration. De là vient qu'on soustrait les enfans de la puissance de leurs peres, quand on espere de les conuertir : que l'on fait des violences aux personnes adulces, pour les obliger à faire des choses qui sont contre les mouuemens de leur conscience, & contre les libertés qui leur sont ottroyées par les Edicts : qu'on empesche les exercices de religion aux lieux où ils sont permis, sion trouve le moindre pretexte du monde de les trauerser:

Bb iiij

392 SVITE DE LA DERN. PART. enfin, que l'on ne laisse échapper aucune occasion, quelque iniustice qu'il y ait, de faire qu'une Religion l'emporte sur l'autre. Et i'ay dit que chacun se laisse emporter à cezele, parce que la faute en cet egard, n'est pas absolument toute d'vn costé. Comme les Catholiques en vsent quelquesfois ainsi enuers les Protestans & les Reformés, il se peut faire que quelquesfois, là où ils ont la puissance & l'autorité en la main, ceuxcy en vsent de mesme enuers les autres. Et quoy que ie voudrois bien que les enseignemens de cette Morale leur peussent profiter indifferemment, ie l'escris neantmoins en quelque taçon plustost pour ceux qui sont de ma profession, parce que i'ay plus d'esperance qu'elle leur pourraestre vtile. Quoy qu'il en foit, ie dis que les hommes ont de trois sortes de Droits pour reigle de leurs actions, à sçauoir ceux qui viennent de la Nature, ceux qui resultent de la Police, & enfin ceux qui germent & qui se produisent de la Religion. Quand ils s'accordent tous les vns auecque les autres, & que dans vne mesme action

DE LA MORALE CHREST. on les peut egalement obseruer, c'est indubitablement vn grand bonheur, & yne grande satisfaction pour la conscience. Que s'il arriue qu'ils se choquent, & que pour satisfaire aux vns il faille necessairement renoncer aux aux tres, c'est vne erreur de jugement, & vn zele sans connoissance, que de tirer la reigle de sa conduite de la comparaison des Religions. Deux choses seules doiuent alors venir en consideration. La premiere est que les Magistrats ne sont pas establis pour faire paroistre leur zele, mais pour rendre à chacun ce qui luy appartient. Or ce sont les Edicts & les Ordonnances des Princes qui determinent cela. Car quand vne fois, pour exemple, le Souuerain par ses Edicts, a ordoné qu'il sera permis ou de dire la Messe, ou de faire le Presche en tel ou en tel endroit, ceux à qui cela touche ne sont pas moins fondés en droit de le demander, que Titius de demander la possession du champ qu'il a bien acquis, ou Meuius l'heredité qui luy a esté laissée par ses peres. De sorte que de prononcer là autrement que la Loy

394 SVITE DE LA DERN. PART. ne veut, c'est commettre vne aussi haute injustice pour le moins, que de rauir à vn particulier les possessions de son patrimoine. Or l'injustice sans doute est vne tres mauuaise maniere d'auancer la Religion, & si elle s'estoit reuestuë d'vn corps, & qu'elle peust dire ses sentimens, elle se plaindroit de voir qu'on employast en sa faueur l'injustice & le mensonge. Car elle est de la nature de fon auteur, & a les sentimens hauts & genereux commeluy. Commedoncil n'a point voulu du témoignage des malins esprits, & qu'il les a fait taire quand ils luy en ont rendu, elle ne veut point non plus de l'assistance de ses ennemis pour se planter & pour s'estendre. I'ay esté enuoyée au monde, diroitelle, pour en chasser le mensonge par la connoissance de la verité: le suis descenduë du ciel pour ramener la iustice en la terre, & pour en chasser l'iniquité. Et vous, administrateurs des choses humaines, vous employés, pour me fauoriser, les choses que ie veux destruire, & mettés mes plus grands ennemis sur le trône sous ombre de me vouloir

DE LA MORALE CHREST. 395 faire regner. La lumiere s'autoriset-elle par le secours des tenebres, & quelle sauvage methode est ce, de se seruir des armes du vice pour combattre pour la verité ? L'autre chose est, que c'est se tromper merueilleusement que de s'imaginer que les droits de la Religion ayent quelque chose de separé d'auecque les autres, de sorte qu'elle vueille qu'on y renonce afin de s'attacheraux siens. La Nature est le fondement de la Religion. Tellement que ceux qui violent les droits de celle-là en faueur de celle-cy, font comme qui pour estendre ou pour affermir vne muraille ou vne maison, en sapperoit le fondement, ou arracheroit les pilotis & les piliers qui la soustiennent. Comme S. Iean dit qu'il est impossible que celuy qui n'aime pas son frere lequelil void, aime Dieu qu'il ne void point, celuy qui n'a pas asses de respect pour les droits de la Nature qui nous est si proche & si intime, & auec qui nous auons de si indissolubles liaisons, ne peut pas auoir vn bon zele pour ceux de la Religion, qui en comparaison sont

396 SVITE DE LA DERN. PART. aucunement estrangers, & venus d'vne communication surnaturelle & plus essoignée. Asseurément ceux qui foulent aux pieds l'autotité paternelle, en soustrayant les enfans aux peres, & leur ostant le respect qu'ils doiuent à ceux qui les ont engendrés, ne pequent auoir de bonnes & legitimes affections pour l'autorité de Dieu, qui a voulu que celle des peres fust inuiolable. Quant à la Police, à la verité elle n'est pas le fondement de la Religion, mais elle en est comme vn lien, qui sert à sa conseruation, ou comme vne have mise alentour, pour empescher qu'il n'y arrive de la dissipation & du desordre. Car elle a bien à la verité ses loix, & les reigles de son propre gouvernement: mais il seroit impossible de les saire vniuersellement pratiquer, si elles n'estoyent soustenuës par l'autorité de la Police. De sorte que qui vient à relascher celle-cy, energe & dissout cellelà, & sous pretexte de l'estendre ilen démolit les defenses. En vn mot, Dieu est l'auteur de la Nature & de la Police, comme de la Religion, seil ne faut pas

DE LA MORALE CHREST. penser qu'il ait agreable que pour le seruir en celle-cy, on luy desobeisse dans les deux autres. Si dans l'establisfement de la Religion il auoit dit qu'il veut qu'absolument & vniuersellement toutes sortes de droits luy cedent, & qu'à tors & à travers on les choque & on les renuerse tous pour l'auancer, ce furieux zele que l'on void en quelquesvns auroit quelque legitime couleur. Mais ny nostre Seigneur ny ses Apostres n'ont rien comandé de tel; au contraire ils ont tres-estroittement ordon né l'observation des loix de la Nature, & des reiglemens de la Police, en quelque endroit que l'Eglise se trouuast establie en l'Univers, & en ont euxmesmes donne l'exemple. Et il ne faut pointicy alleguer pour pretexte des injustices qui se commettent en cette occasion, ny l'auancement de la gloire de Dieu,ny celuy du salut des hommes. Car quant au premier, c'est à Dieu à determiner les moyens qu'il faut suiure en l'avancement de sa gloire; & aux hommes à se tenir exactement dans les termes de la sujetion à ses comman-

398 SVITE DE LA DERN. PART. demens. Il veut obeifsance & non point sacrifice, & cette temerité, de passer par dessus ce qu'il ordonne, pour suiure en ce qui est de sa gloire, l'instinct de sa propre imagination, a autresois fait perdre le droit du Royaume à Saul & à sa posterité, & a attiré sur luy l'effect d'vne terrible vengeance. Et pour le second, il a sans doute plus à cœur le falut des hommes que nous ne l'y pouuons auoir, puis qu'ila abandonné son propre fils vnique à la mort pour le leur procurer. Et il saura bien y amener ceux qu'il a ordonnés pour cela, & trouuer les moyens d'executer les conseils de son election eternelle, sans que nous nous en meslions, si nous ne pouuons nous en mester sans outrepasser les reigles qu'il nous a prescrites. En l'vne & en l'autre, c'est vne loy generale, & essentielle à l'Euangile, de ne faire iamais du mal afin qu'il en arriue du bien: c'est à dire, de ne violer iamais les commandemens de Dieu, sous pretexte d'auancer ce que nous croyons estre vne bonne œuure. l'estime aussi que le Christianisme donne cet aduertisse-

DE LA MORALE CHREST. ment à ceux qui sont esseués en ce degré d'autorité, d'estre en toutes autres choses souuerainement scrupuleux en l'administration de la iustice. Ils ont à disposer des biens, & de l'honneur, & de la vie des hommes. Et i'arrange ainfices choses', selon qu'à mon aduis leur importance leur donne le rang. Car les hommes aiment le bien, parce que de sa possession & de son vsage dépendent les commodités de la vie : mais les ames bien faites aiment encore plus l'honneur, & se consolent de la perte de celuy là pourueu que celuy cy leur demeure. Ils aiment passionnément l'honneur, mais la vie leur doit estre en plus grande recommandation, non que la vertu à la verité, dans laquelle i'ay dit ailleurs que consiste le vray honeur, mais que celuy que les hommes peuuent ou oster ou donner par leurs blasmes ou par leurs louanges. Car outre que la vie est vn bien tout à fait reel, & que nous possedons en nous-mesmes, au lieu que cet honneur est hors de nous & consiste en l'opinion d'autruy, la peste de la vie ne se repare point, au

400 SVITE DE LA DERN. PARTE lieu qu'en quelque ignominie que l'on soit tombé par le ingement humain, on peut auecque le temps estre restabli en sa bonne fame. Ioint que qui perd la vie par la sentence des Magistrats, perd aussi quad & quand l'honeur, & qu'ainsi il est priué de deux biens ensemble. Pour ce qui est des biens donques, Dieu a voulu que les Iuges fussent si conscientieux en cet egard, que non seulement ils ne se laissassent pas corrompre par la faueur des puissans & des riches contre les pauures & les gens de basse codition; mais melmes qu'ils ne se laissassent pas toucher de la compassion des pauures, pour leur donner ce qui ne leur appars tient pas. Car il faut bien estre misericordieux à la verité: mais il faut que ce soit quand il est question de choses qui sont en nostre puissance. Ou si la compassion d'vn Iuge va plus auant, il peut bien vser de quelque exhortation enuers le riche, à ce que le pauure luy face pitié. Mais où il s'agit de pronon-cer ingement auecque autorité, la iustice doit estre sourde & aueugle aux larmes & aux clameurs des indigens, &

il n'y

DELA MORALE CHREST. il n'y a que Dieu leul, qui est le Seigneut foquerain de toutes choses, & qui n'en donne aux hommes l'vsage & la propriete sinon autant qu'il loy plaist, qui ait le droit de disposer des biens des particuliers, pour l'oster aux vns, & le donneraux autres, par vn pouuoir absolu, comme il donna les meubles precieux des Egyptiens aux Israelites. Encore quelques-vns trouuent-ils ce temperament en ceite action, qu'ils disent que Dieu n'y a pas vié de son pounoir absolu, mais qu'il y a fait fonction de luge, adiugeant aux Israelites ce qui setrouuoit de biens aux Egyptiens enrre leurs mains, pour le service de tant d'onurages qu'ils auoyent faits pour eux, & de tant de couruées ausquelles ils les auoyet cotraints auec vne extreme violence. Il n'y a qu'vne seule chose où les souverains Magistrats ont pensé auoir le droit d'oster le bien à l'vn de leurs cicoyens ou de leurs sujets, pour le donner à l'autre par vne puissance souueraine. C'est quad par l'auarice ou la violence des vns, & par la foiblesse ou le mauuais mesnage des autres, 402 SVITE DE LA DERN. PART. le bien de tous estoit venu entre les mains de quelques vns seulement, de sorte que comme il arrive quelques fois au corps humain, que la ratte attire toutes les humeurs, dont elle s'enfle extraordinairement, tandis que le reste des membres tombe en atrophie, vn petit nombre de gens possedant tout le bien d'vne grande communauté, le res ste se trouve priué des choses necessaire à la vie. Et il semble que celasoit fondé en quelque droit naturel. Carau commencement la terre estoit à tous les hommes par indiuis, afin qu'ils en tirassent toutes les choses necessaires à leur nourriture. Quand ils l'ont diuisée entr'eux, soit en laissant à chacun ce dont il s'estoit saisi le premier, soit en la partageant d'vn commun consentement ou par l'autorité de quelque superieur, ce n'a pas esté pour preiudicier à cette primitiue disposition de la Nature, qui a voulu que chaque home recueillist au moins de la terre ce qui est necessaire pour le nourrir. Tellement que quand les choses en sont reduites à tel point que peu la possedent toute, & que le

DE LA MORALE CHRIST. plus grand nombre n'y a rien, il semble que la volonté du Createur & l'institution de la Nature soit renuersée. Et bien que quand Dieu establit le Iubilé parmy le peuple d'Israel, & qu'il ordonna qu'au bout de cinquante ans chacun retournast en la possession des biens qui auoyent esté tenus par ses peres, & dont il avoit esté depossedé, il air eu quelque egard particulier à la police de cette nation, qui ne fait point necessairement la loy pour les autres, si est-ce qu'il y peut auoir regardétant à ce premier establissement que la Nature auoit fait, qu'à la consanguinité vniuerselle du genre humain, & à la charité qui s'en doit produire. Et neants moins quand on en est venu là dans quelques Republiques autresfois, comme à Rome par la publication des Loix Agraires, ou qui concernoyent la distribution des champs, les gens de bien s'y sont escriés comme contre vne matiere de sedition & vne action de tyrannie. De sorte qu'encore qu'Aratus ait fait diuerses belles choses en sa vie, il n'y en a point vne pourtant qui luy ait

Cc ij

404 SVITE DE LA DERN. PART. acquis plus de recommandation, qué l'invention qu'il trouva de si bien recompenser ceux qui dans le restablisse. ment de la Republique de Sicyone, feroyent obligés de laisser leurs possessions; quoy que tenuës injustement, qu'ils n'eussent point sujet de se plaindre. Car quant a ces nouvelles Tables qu'on a voulu quelquesfois pratiquer à Rome, à l'imitation de la Kepublique d'Athenes, pour faire faire par autorité publique vne banqueroute vniuerselle à toutes sortes de creanciers, & liberer ainsile menu peuple de ses dettes, on a tousiours creu que c'estoit la plus signalée miustice qu'il fust possible de pratiquer. Mais quand on seroit quelquesfois reduit à la necessité de le faire, il faudroit que ce fust le Souverain qui l'autorisast, & non pas ses officiers, entre les mains de qui il autoit mis l'admimstration de sa iustice. Pour ce qui est de l'honneur, ils y doiuent encore estre beaucoup plus circonspects, parce que la playe de l'injustice y est plus grande & plus malassée à guerir. Quand on a perdu du bien, il est permis de semet-

DE LA MORALE CHREST. 405 tre à en regagner, & si vous aués la reputation d'estre homme de bien & d'honneur, les vœux des autres hommes vous y fauorisent. Que s'il plaist à Dieu espandre sa benediction sur ce travail, la condition de celuy qui s'est remonté, est toute relle qu'elle estoit auant sa cheute. Au lieu que s'il est arriué à vn homme innocent d'estre fleftri par le Magistrat, il luy est difficile de se remettre en sa bonne reputation: & quand par quelque arrest solennelil y teroit restitué, il demeure toussours quelque cicatrice de cette morsure. Dieu auoit autrefois expressément defenduà ceux du peuple d'Israel de leuer aucun blasme sur le prochain: & sous l'Euangile de nostre Seigneur il n'y a rien plus seuerement defendu aux Chrestiens que les calomnies & les medisances. Et neantmoins les discours des particuliers ne mettent point de tache sur la reputation du prochain qui ne se puisse aisement effacer, au moins certes en comparaison des marques de deshonneur qu'impriment les Arrests prononcés auec autorité. De combien

406 SVITE DE LADERN. PART. donques est ce que le Christianisme defend plus seuerement aux Magistrats qui en font profession, de violer la bonne reputation d'vn innocent par des sentences injustes ? La charge des Magistrats a deux fonctions, la punition des meschans & la protection des bons. Si donques les gens de bien, au lieu de trouuer vn port à leur tribunal, y ren-contrent vn écueil, si au lieu que la main de la iustice les doit soulager, elle les accable, c'est vn manifeste renuersement de l'ordre establi de par Dieu,& vn bouleuersement des choses humaines. Enfin, ils ne sauroyent iamais apporter trop de soin aux iugemens où il y va de la vie. On a dit de quelques Magistrats de nostre temps, que lors qu'ils auoyent ou à rapporter yn procés criminel & où il y alloit du dernier supplice, ou bien à ouir le rapport qu'vn autre en seroit afin d'y donner leur iugement, ils estoyent deux ou trois iours auparauant en ieulne & en oraison, pour obtenir de Dieu la conduite de son bon Esprit, afin de ne se tromper point en vne chose de cette impor-

DE LA MOARLE CHERST. 407 tance. Et veritablement il y faut vne grande preparation pour s'en acquitter en conscience. Car que sera-ce si la iustice estant principalement establie pour empescher les meartres, c'est elle qui les commet ? Quelle misere si les hommes innocens & jujustement persecutés, se iettans dans les Palais comme en des asyles pour y estre garentis de l'oppression, ils trouvent que ce sont des cauernes & des repaires de bestes furieuses qui les deschirent ? Et ie veux bien que l'innocent n'y perisse pas par la meschanceté ny par la cruauté de ses iuges, mais seulement par leur inaduertace, & pour n'y regarder pas d'assés prés, tant y a qu'il ne laisse pas de perir, & les loix mesmes disent qu'il n'importe pas beaucoup si c'est par la malice, ou par la fraude, ou par la negligéce de quelcun que cela arriue. l'ay ouy dire qu'il est quelquesfois arriue au Parlement de Paris, de codamner des criminels sur des preuues tres-euidentes, mais que les acculés n'auoyent iamais voulu confesser, non pas mesmes au tourment de la question. Et bien que ce fust assés pour

Cc iiij

408 SVITE DE LA DERN. PART. mettre la conscience de ce sage Senat à repos, qu'il n'auoit rien prononcé que sur des témoignages euidens, & apres y auoir obserué toutes les formes, parce que quand ils eussent esté rendus par de faux témoins, les iuges n'y auoyent rien apperceu, si est ce que ceux qui auoyent prononcé l'arrest en auoyent de grandes inquietudes dans l'esprit, dont ils n'auoyent peu estre deliurés que par les propos du Confesseur qui auoit assisté le patient jusques à la rouë. Tant vne bonneame a de tendresse en vne telle occasion, & tant il faut de choses pour luy oster les scrupules & les soupçons, lors qu'il y va de la vie des hommes. Et ie pense que c'est principalement pour cela que les Magistrats Chrestiens employent les tortures lors qu'il y a des presomptions, & que les preuues neantmoins ne sont pas assés connainquantes. Hors cela, & qu'il est quelquesfois necessaire d'y appliquer les criminels pour découurir les complices d'vne mesme action, il semble que cette sorte d'information auroit quelque cho, se de barbare. Car quelle forme seroit,

DE LA MORALE CHREST. 405 ce d'employer à découurir vne verne, des moyens si rigoureux qu'on auroit peine à ordonner des supplices aussi cruels si la chose estoit auerée ? On crie contre l'inhumanité de ce Capitaine Romain, qui ne pouuant auoir d'autre preuue de la verité d'vne plainte que luy faisoir vne pauure femme, qu'vn de ses soldats luy auoit mangé la bouillie destinée à la nourriture d'elle & de ses enfans, fit fendre l'estomach à l'accusé, & confondit l'instruction du procés auec le supplice. Or qu'elle difference y auroit-il entre cette action & la pratique de maintenant, si l'ouverture de l'estomach du soldat n'auoit point esté indubitablement suivi de la mort, au lieu que la torture n'oste pas la vie? Il est pourtant vray qu'elle l'oste quelquesfois, & il n'y a point encore longtemps qu'en ces quartiers par l'imperitie du bourreau ou autrement, on arracha l'espaule & la vie à vn pauure miserable par la violence de la gesne. Mais quand cela n'arriueroit point, la cause qui sur plaidée deuant le Duc de Sauoye du regne de Henry le Grand,

410 SVITE DE LA DERN. PART. monstre assés que bien souvent la torturelaisse la vie si estropiée & si miserable, qu'il vaudroit en quelque sorte mieux l'auoir perduë, que de la retenir de la façon. C'est encore vn precepte que le Christianisme donne aux Iuges, de ne se contenter pas de rendre la iustice bonne, mais encore de la rendre pronremet. Car l'iniquité de ce maunais luge dont Iesus Christ parle en l'Euangile, ne consiste pas seulement en ce qu'il ne faisoit pas droit à ceux qui plaidoyent deuxt luy, mais aussi en ce qu'il les faisoit trop languir, & qu'il obligea la pauure vefue à l'importuner extraordinairement pour le faire prononcer sur son affaire. Et de fait, les longueurs en l'administration de la Iustice sont assés souuent plus ruineuses aux parties, que si on leur donnoit de mauuais Arrests. Car les frais des procedures les consus ment, & ceux des voyages les épuisent, & la distraction de leurs affaires les incommode pour le moins autant. De sorte que quand on auroit gain de cause apres tant de dépenses inutiles dont il ne reuient iamais rien, il se trouue qu'on

DE LA MORALE CHREST. a plus perdu, que si dés le commencement on s'estoit resolu à ne poursuiure pas son droict, & on est souvent reduit à cette extremité, qu'il faut ou se laisser voler, pour ne s'engager pas en des procez dont on ne voit iamais le bout, ou incommoder extremement les affaires de sa maison, si l'on se resout à poursuiure le recouvremet de son bien. C'est pourquoy nos Rois ont faittant de belles Ordonnances pour l'abbreuiation des procés; mais on dit que par quelque espece de fatalité, celles-là, non plus que les autres, ne sont pas tousiours bien obseruées. Il ne faut pas imputer aux Iuges ce que l'on dit de plusieurs gens de Palais: c'est que non seulement ils font durer les procés, afin d'auoir tousiours occasion de prendre dans la bourse des parties, mais mesmes qu'ils font naistre vn procés de l'autre, pour ne manquer iamais de matiere à s'exercer. En effect, comme il y a vne certaine plante qui commence par vne fueille, & puis cette sueille là en produit trois ou quatre autres, & puis de chacune d'elles il s'en fait encore autant,

412 SVITE DE LA DERN. PART. de sorte qu'en peu de temps cela croist d'vne façon prodigieuse; on void quelquesfois d'vne premiere question nauftre tant de difficultés & d'incidens, que les procedures enfin paruiennent à vne grosseur épouuantable. Il ne faut pas non plus imputer à ceux qui rendent la Iustice dans les Parlemens, que quandils ont prononcé sur vn different, il en naist d'autres de l'execution de leurs Arrests, comme on dit qu'il reuenoit sept testes à l'hydre quad on luy en auoit coupé vne. Cela peut venir de l'humeur chicaneuse de plusieurs, qui forment des oppositions, & qui affectent des difficultés sur tout, pour ne terminer iamais les affaires. D'où que cela vienne, c'est vne chose tres-indigne de la profession du Christianisme, que de voir ceux qui portent ce glorieux nom s'entreronger comme il font. S. Paul fait vne vehemente inuectiue contre les Corinthiens de ce qu'ils ont des differens, & dit qu'il vaudroit beaucoup mieux qu'ils souffrisent qu'on leur fist tort, que d'entrer en contestation auecque leurs freres.

DE LA MORALE CHREST. Pnis, s'il n'est pas possible d'euiter qu'ils n'ayent quelques demessés, il se plaind de ce qu'ils ne les terminent pas par l'arbitrage des Chrestiens, & qu'ils aiment mieux aller plaider deuant les Magistrats infideles, ce qui redonde au deshonneur de l'Euangile de Christ, C'est vn adeertissement qui regarde die rectement les parties, mais dont neantmoins les luges peuvent tirer cette instruction: c'est que puis qu'ils sont Chrestiens eux mesmes, ils doiuent retrancher autant qu'ils puuent le scandale qui vient de l'humuer chicaneuse de quelques vns, ou en les renuoyant à leurs amis & à leurs conseils pour les accorder, comme cela se fait quelquessois: ou en leur donnant des arrests si clairs qu'il ne soit point necessaire d'en donner d'autres en leur interpretation: ou en reprimant les artifices de ceux qui prouignent les procedures, & qui tirent les affaires en longueur pour leur profit particulier : ou en quelque façon que ce soit, remedier par leur souveraine autorité au desordre de la plaidoirie. Car c'est vne chose bien

SVITE DE LA DERN. PART. scandaleuse de voir le tumulte qui se fait dans les sales des Palais, où de cent personnes qui tracassent, c'est vne chose extraordinaire s'il y en a seulement deux qui pensent en Dicu, & qui n'ayet pour but à tort & à droit, de venir au dessus de leurs parties aduerses à quelque prix que ce soit. Et qui pourroit voir d'vn trait d'œil ce qui se fait en particulier dans les Cabinets des Aduocats; dans les estudes des Procureurs, dans les sollicitations, & dans le secret des parties, ce seroit bien encore sans doute vne beaucoup plus grande matiere de tristesse & de scandale. Mais nous parlerons de cela ailleurs. C'est encore vn enseignement que le Christianisme donne aux Iuges qui ont la vie des hommes entre les mains, de n'espargner pas celles qui sont extraordinairement meschantes, & pernicieuses à la societé. Au commencement du monde, comme ie pense l'auoir dit ailleurs, & plusieurs siecles apres, on a esté fort tetenu à faire mourir les hommes, quelque crime qu'ils eussent commis. D'ordinaite on se contentoit de les despouïl-

DE LA MORALE CHREST. ler de tous leurs biens, & de les bannir de leurs pays, & c'estoit encore la coustume du temps d'Homere. La raison en estoit que la terre n'estant pas encore beaucoup peuplée, il en falloit autant qu'on pouvoit conserver les habitans: de sorte que si le genre humain avoit esté priué d'vne de ses parties par le crime de quelcun , il ne falloit pas le priuer de l'autre par la seuerité de la iustice. Et Dieu mesme ayant vsé de cette douceur enuers Cain, sembloit auoir en cela voulu se proposer en exemple. A quoy on peut adjouster que les grands crimes n'estans pas fort frequens alors, il y auoit moins de sujet de craindre que l'indulgence ou l'impunité ne fournissent occasion à la licence. Depuis, le monde s'estant rempli, & la meschanceré ayant creu, il a esté necessaire de la reprimer par vne plus grande seuerité, autrement les hommes se sussent entremangés comme les bestes sauuages. Et Dieu mesme auoit establi de tres-rigoureuses loix parmy le peuple d'Israel, selon lesquelles on exterminoit sans pitié de cet-

416 SVITE DE LA DERN. PART. te Republique-là, ceux qui aucyent commis quelque crime signalé d'impieté contre Dieu, ou d'injustice & de violence contre leurs freres. Par l'establissement du Christianisme, non seulement les peuples n'ont point esté obligés de suure pontuellement toute la seuerité des loix de Moyse en ce qui regardoit les punitions : mais mesmes ils ont esté formés à quelque plus grande douceur que n'est celle à laquelle ils pourroyent estre inuites par les inclinations de la Nature. Tellement qu'encore que la societé Ecclesiastique & la Politique soyent fort differentes, cellelà n'espandant point de sang, au lieu que celle-cy est contrainte de le respandre quelquesfois pour sa conservation, siest ce qu'il se coule quelque air de douceur de la premiere dans la seconde, qui tempere sa seuerité. De sorte que l'on ne peut pas trouver mauvais que les Magistrats Chrestiens destrempent quelquessois l'austerité de leurs fonctions en qualité de Magistrats, dans les misericordes de Christianisme. Neantmoins, il faut tousiours qu'ils regardent

DE LA MORALE CHREST: gardent à la fin de leur institution: c'est qu'ils sont ordonnés pour faire instice en ire de celuy qui fait mal, & qu'ils ne portent point l'espéc sans cause. Car ce que S. Paul dit du Prince, se doit dire de tous ceux a qui il communique son autorité & l'administration de sa iustice. Tellement que là où la necessité le requiert, il faut qu'ils vsent de l'espée que Dieu leur à mise en la main 3 autrement ils sont coupables du dommage que la Republique en reçoit, & chargent leur conscience des crimes ausquels ils donnent l'impunité,& en rendront conte au juge du monde. On dit qu'il y a maintenant certains Directeurs de conscience qui ne font point de scrupule d'incliner celles des luges, quand ils se laissent gonuerner à eux, à sauuer la vie aux meurtriers, sous pretexte qu'ils se repentiront, ou parce que leur supplice ne redonnera pas la vie au mort, & priuera la societé d'vn homme qui luy pourra estre viile en quelques autres occurrences. Les Princes souverains peuvent bien auoir quelquesfois de telles consideraions deuant les yeux, & vser de

418 SVITE DE LA DERN. PART. leur pouvoir absolu pour dispenser de la severité des Loix en des occasions extremement importantes. Quoy que cela se doit faire fort rarement, pour le seul interest du bien public, & non pour faire des faueurs non necessaires & particulieres. Mais quant aux Magistrats qui sont establis par les Rois, ils sont ordonnés pour juger selon les loix, & non pour en exenter ceux que bon leursfemble. Beaucoup moins se doiuent les Confesseurs, ou les Ministres de l'Euangile, messer de les aller solliciter pour empescher l'administration de la Iustice. Comme il est permis aux Souuerains de donner des Graces & des Abolitions, il est permis aux criminels de les demander, & aux parens des criminels, fussent-ils Ministres ou Capucins, de les solliciter puissamment. Car les droits de la Police n'empeschent pas les deuoirs de la Nature, & il importe à l'Estat que chacun sente la tendresse de la Nature, & les mouuemens de la consanguinité. Hors de là, ny les gens d'Eglise ne sont pasbien d'affoibhr par leurs sollicitations & par leurs exhorta-

DE LA MOALE CHREST. tions la vigueur de la Iustice & des loix, & les luges font encore beaucoup plus mal, s'ils se laissent gouverner par des maximes contraires à l'exercice de leurs Charges. Enfin, si la calamité des temps n'auoit point rendu les Charges venales, & que les Rois fournissent à leurs Officiers l'entretenement qui leur seroit necessaire pour les exercer dignement, il faudroit dire à ceux qui suivent la milice du Palais, car c'est ainsi. qu'on la nomme quelquesfois, ce que Ican Baptiste disoit aux gendarmes qui sluy demandoyent, que ferons-nous? N'wses point de concussions, dit-il, & ne circonuenés personne, mais contentez-vous de vos gages. Et veritablement tous les gens de bien doiuent souhaitter que Dieu ramene ce bon temps auquel nos Rois donnoyent les offices de Iudicatuere gratuitement, à ceux qui auoyent en chaque Province & en chaque ville sile plus de reputation de probité de vertu, de sorte qu'ils adminieftroyent la instice aux particuliers gratuitement de mesmes. que François premier, obligé sans Dd in

\$20 SVITE DE LA DERN. PART. doute par la necessité de ses affaires, a commencé de mettre ces charges à prix, & que ce prix-là est allé croissant de temps en temps, comme les Rois qui font venus depuis s'y sont sentis obligés pour les mesmes causes, il a esté impos-sible que la sustice se soit administrée auecque tant de dignité, & peut-estre mesme auecque tant de pureté, qu'elle faisoit il y a deux siecles. Car il a fallu que les Iuges se soyent taxés leurs salaires à eux-mesmes, ce qui quand on y seroit fort moderé diminue de la majesté: & plusieurs n'y ayant pas gardé toutela moderation qu'il falloit, y ont perdu la reputation de la pureté de la conscience. Certainement la venalité des offices a mis les Iuges dans vn pas merueilleusement glissant. Car la plus part des hommes ont de la pente à l'auarice, & il n'y a que les ames vraye-ment nobles qui se defendent de ce vice là. Et naturellement encore les hommes sont enclins à abuser de leur poumoir, de sorte que quand ils sont eux-mesmes les Iuges de ce qui les touche, c'est vne chose bien rare, & qui ap-

DE LA MORALE CHRIST. proche de la vertu heroïque, s'ils ne font seruir leur puissance à leurs propres interests: & il y a fort peu de conditions d'hommes & fort peu d'occasions, où ils ayent plus de couleur & plus de pretexte de le faire. Car ces charges sont honorables, & mettent les hommes dans la Republique dans vn degré fore eminent. Là il faut paroistre en logemens, en habillemens, en meubles, en possessions, en equippage, & que cela melme se respande sur les femmes, sur les enfans, & sur les valets. Or quel moyen y a-t-il de soustenir cette splendeur si la Charge mesme n'y fournit pas? Elles sont aussi fort laborieuses, & s'ilfaut que ie me serve de ce terme, fort tedjeuses, & pleines d'importunité & de. chagrin. Car il faut apporter vne merneilleuse assiduité au Palais, écouter les parties auecque beaucoup de patience, supporter le choq des solliciteurs, vacquer de iour & de nuit, non seulemene. à la lecture des liures du mestier; (caril y pourroit auoir en cela quelque recreation, quoy que c'est vne science

422 SVITE DE LA DERN. PART. de papiers où dans la charge d'vn portefaix à peine se trouve-t-il vne ligne qui puisse exciter vn honneste homme à la pieté, à la vertu, & à l'honneur. Or de quelle recompense ne sont point dignes des gens d'eminente qualité & de haut sauoir, pour auoir employé leur temps à vne occupatio si ennuyeuse, afin de demesser les querelles & les droits des particuliers ? Enfin, ils ont acheté leurs charges, & yout mis le plus beau & le meilleur de leur bien. S'ils l'eussent employé à la marchandise, s'ils l'eussent colloqué dans les banques, s'ils en eussent acquis des possessions ; s'ils se sussent adonnés à quelque autre vacation, ils eussent fait multiplier leur talent, & eussent retiré le fruit de leur trauail & de leur patrimoine tout ensemble? Pourquoy seruiroyent-ils le Public à leurs despens, & pourquoy consumeroyent-ils leur bien, pour faire que les autres eussent le leur ? Que chacun se mette en la place de ces Messieurs. Y a-t-il aucon qui s'il y estoit, n'eust beaucoup de peine à se garentirde la tentation des espices? Neantmoins,

DE LA MORALE CHREST. plus la tentation est grande, plus on a de pretexte de s'y laisser aller, moins il y a de moyen de reprimer les mauuaises actions de ceux qui s'y laissent emporter; & plus les luges y doiuent-ils estre circonspects, pour s'y regler par leur propre honneur & par leur propre verțu, & pour s'y seruir de loy à eux-mesmes. C'est sans doute vne plainte injuste que l'on fait de la Iustice maintenant, & il la faut imputer au chagrin des plaideurs, & non à la corruption ou à l'incontinence des luges. Mais tant y a, c'est vn grand malheur qu'en nos temps, au lieu que la sustice se deuroie donner, la voix de plusieurs est qu'on la vend: & qu'il y en a quelques vns dont on dit qu'ils ne la vendent pas à vn prix fait & arresté legitimement, mais, par maniere de dire, à l'encan, où celuy qui met au dessus l'emporte. Il n'est pas besoin que i'aduertisse icy que tout ce que i'ay dit des enseignemens que le Christianisme donne aux Iuges que l'on appelle Souuerains, se doit pareillementappliquer aux subalternes. Car il est bien vray qu'il y a cette difference Dd iiij

424 SVITE DE LA DERN. PART. entr'eux, que les jugemens de ceux-cy peuuent estre corrigés par leurs superieurs, de sorte que les manquemens qui y peuvent arriver par l'inaduertance ou par la corruption, ne sont pas de si grande consequence. Mais cela n'empesche pas que leur deuoir ne soit à peu prés pareil. & qu'ils ne doiuent apporter mesme fidelité & mesme circonspection en l'exercice de leurs charges. Car il arriue bien quelquesfois que les luges superieurs corrigent les fautes des inferieurs, & l'on dir que sur cette presuppoficion, il y a des Iuges subalternes qui se voulant vanger de leurs ennemis, prononcent injustement en leur faueur; parce qu'ils sont asseurés que celuy qui a perdu son procés en appellera, & que celuy qui l'a gagné succombant indubitablement en la cause d'appel, les despens & les interests ayant beaucoup creu, sa ruine en sera plus grande. C'est à n'en point mentir vne bien estrange procedure que celle-là, mais qui est pour le moins autant imprudente que vicieuse. Car quoy qu'il en soit, vn homme qui se vange ainsi n'est point asseuré s'il

DE LA MORALE CHREST. sera secondé par le luge souverain, & si au lieu d'infirmer il ne confirmera point sa sentence. Il peut estre mené de passion comme luy, & hair l'appellant ou estre ami de l'intimé, de sorte qu'il peut donner tel arrest qui sera tout au rebours des intentions de celuy qui augit voulu exercer sa vengeance. Il peut ne regarder pas d'assés prés au merire de la cause, & y prononcer inconsiderément contre le droit; il peut mesmes y recevoir quelque prejugé de ce qui a desia esté prononcé, & incliner du costé où le panchant luy est donné par la premiere sentence. Mais quoy qu'il en foit, ce n'est point vne chose absolument affeurée, que les Parlemens corrigeront les sentences des sieges Royaux ou Presidiaux, tellement que chacun, en rendant son iugement, se doit proposer qu'il est souverain, pour y apporter autant de soin & d'exactitude que si l'affaire ne devoit iamais estre reueuë. Et quant à ce qui est des salaires qui eschéent aux Iuges inferieurs, on ne peur pas douter que les enseignemens du Christianisme ne leur soyent en cet

426 SVITE DE LA DERN. PART. égard pour le moins aussi necessaires qu'ils sont aux autres. l'en connois de veritablement genereux, & qui font leur mestier auec tant d'honneur, que s'il y a quelque chose à leur reprocher, c'est que peut-estre font-ils moins valoir l'exercice de leur charge à leur profit, que la raison ne leur permettroit, & qu'il ne seroit necessaire pour leur affaires. Et quant à ceux qui ne meritent pas cette louange, mon intention n'est pas de m'attacher icy à aucuns particuliers, parce que de quelques vices dont ils peussent estre entachés, ilest de l'interest du public que l'on conserue leur autorité & l'honneur de leur caractere. Ie diray seulement qu'à prendre les choses en gros & en general, les Officiers des sieges inferieurs sont plus sujets à se laisser corrompre de ce costé-là, que ceux des Cours soqueraines. Parce que ceux cy tirent quelques sentimens de generosité de la grandeur de leurs Charges, que les autres ne peuuent auoir si releués: qu'ils se voyent en lieu beaucoup pluseminent, & où leurs actions peuuent estre plus considerées pour leur

DE LA MORALE CHREST. 427 tourner ou à gloire ou à deshonneur qu'ils ont ordinairement la naissance plus auantageuse & plus illustre, & par consequent moins sujette aux bassesses de l'auarice & à la corruption des presens: & enfin, qu'ils ont souvenz de grands biens, de sorte que pour soustenir leur dignité, les mauvaises pratiques ne leur sont pas necessais res. Mais comme s'il arriue de l'obscurcissement aux grands astres, cela paroist beaucoup dauantage que s'il arriue aux estoiles de la plus petite grandeur, si quelqu'vn des Compagnies où reluit dauantage la iustice du Souverain, se laisse corrompre par l'auarice, il est sans doute plus remarquable que n'est pas le vice des inferieurs. Et ie m'asseure qu'encore que la charge des Aduocats & des Procureurs n'anoblisse pas, & que le tiltre de ce chapitre promette que i'y parleray de ceux qui sont nobles par leurs charges, le Lecteur trouuera bon qu'avant que ie sorte du Palais, ie dise quelques choses de leurs sonctions. La condition d'Aduocat est sans doute tres-honorable, & quand elle est bien

428 SVITE DE LA DERN. PART. exercée, elle est auantageuse au Public. Pour s'en bien acquitter il faut auoir la connoissance de beaucoup de choses, & particulierement du Droict. Il faut auoir de l'inclination à l'eloquence, & vne grande presence d'esprit. Il faut estre assidu & laborieux, & ne se rebuter. pas aisément pour les difficultés qui se rencontrent dans les choses. Et veritablement il y en a vne dans l'exercice de cette vocation, de laquelle ie me trouve souvent en peine comment ils se peuvent demesser; c'est qu'il y en a qui plaident toutes sortes de causes auecque pareille hardiesse, comme s'ils estoyent. persuadés vniuersellement de toutes qu'elles sont pleines de iustice & de raison. On dit que Carneades estant venu à Rome, y parla vn iour dans le Senat, extremement eloquemment & auantageusement en faueur de la Justice, de, lorte qu'il se fit admirer : & que le lendemain, auec yne pareille eloquence & yn mesme ton de voix, il renuersa dans ce mesme lieu tout ce qu'il auoit dit, & voulut faire accroire à ses auditeuts que la Iustice n'est qu'vn nom, auquelil n'y

DE LA MORALE CHREST: 429 à rien qui responde en la nature des choses. Son fondement estoir, qu'il n'y a que les loix & les coustumes qui determinent le droit, de sorte qu'vne mesme chose peut estre estimée iuste ou injuste, selon qu'elle est diversement determinée par les Coustumes des Nations & par les Ordonnances publiques. Sur cela il faut vser de distinction. Carde l'estendre vniuersellement à tout, comme Carneades faisoit, c'est vne pernicieuse erreur, & qui renuerse toutes choses. Pour ne parler point maintenant des devoirs de l'homme enuers la Diuinité, en quoy ce Philosophe n'entendoit rien, s'il se fust trouué au milieu d'vne nation, où le parricide, & le meurtre, & l'adultere, & le larcin eussent esté ou permis ou commandés, eustil donc tenu ces choses-là pour indifferentes en elles-mesmes ? La Nature & la Raison parlent si hautement en cela, que pour y estre du sentiment de Carneades il faut auoir depoüillé l'vne & renoncé manifestement à l'autre. En quantité d'autres sujets, qui sont beaucoup plus esloignés des premieres sour-

A30 SVITE DE LA DERN. PART. ces naturelles de la Iustice & du Droit, il y peut auoir beaucoup d'incertitude & d'ambiguité, de sorte qu'il en faut venir à la definition que les loix & les Coustumes en donnent. Mais quand vne fois les loix publiques en ont ordonné, il faut tenir pour bon & iuste. ce qu'elles ont establi, & suiure cette reigle-là comme inuiolable. Y ayant donc tant de Coustumes & si bien articulées parmy les peuples; tant d'Edicts, d'Ordonnances & de Declarations faires par les Rois: tant de Loix & de Constitutions faites par les Empereurs, aufquelles les Iurisconsultes ont recours quand les autres Reigles du Droit leur manquent : tant d'Arrests donnés solennellement en Parlement sur des difficultés sur lesquelles la Iurisprudence ne s'estoit point encore expliquée bien disertement: en vn mot, tant de de moyens de sauoir sur les questions les plus douteuses où est le droit & où le tort, coment est-ce que non seulement deux Aduocats soustiennent l'vn contre l'autre des propositions contradictoires si affirmatiuement, mais qu'yn melme

DE LA MORALE CHREST. Aduocat plaidera aujourd'huy d'vne facon sur vn point, & demain sur le mesme point de l'autre? On parle d'vn, honneste homme & habile homme d'ail. leurs, à qui il arriua vne fois d'auoir si mal pris l'affaire de son client, que quand il fut en la presence des luges il plaida pour la partie aduerse tout du long. Les auditeurs n'apperceuoyent pas son erreur; car ils ne connoissoyent ny les parties ny la cause. Mais l'Aduocat qui luy deuoit respondre, & qui estoit mieux preparé que luy, s'emerueillant au commencement de le voir emporter de la façon, se contint, & l'ayant laissé acheuer & prendre ses conclusions; il dit qu'il ne sauoit pas à quoy Maistre tel pensoit, mais qu'il employoit generalement tout ce qu'il auoit dit, & qu'il auoit conclu pour sa partie. Là dessus il se fit vn grand murmure au Barreau; l'Auocat qui auoit plaidé à rebours de son intention se trouua surpris, & neantmoins ayant passé sa main sur son front, il s'excusa sur ce qu'il n'auoit pas bien leu son exploit,& demada qu'il luy fust permis de

SVITE DE LA DERN. PART. parler encore vne fois, declarant qu'il refuteroit aisément ce qu'il venoit de dire. C'est plus faire que Carneades: car au moins il auoit pris vn iour pour se preparer, & celuy-là vouloit souffler d'vne mesme bouche le froid & le chaud tout d'vne haleine. Ce que celuy-là voulut faire, mais qui ne luy fut pas permis pourtant, la plus part d'entr'eux le pratiquent asses ordinairement, defendans aujourd'huy vne proposition, que quelque temps auparauant ils auoyent solennellement combattuë. Ie sçay bien qu'on a accoustumé de dire là-dessus deux ou trois choses. L'vne, qu'il n'y a iamais deux questions absolument semblables dans le Palais, parce que quelque circonstance, ou quelque incident, ou quelque fait particulier les varie. Sur tout, que iamais mesmes formalitez n'ont esté gardées en commençant & en enfournant vn procés,& que c'est des formalités que les affaires dependent. L'autre, que les Aduocats ne sont que la bouche des parties, & comme il est permis à chacun de deduire son affaire & ses raisons s'ille peut, il doit

DE LA MORALE CHREST. 433 doit estre permis à ceux qui ne le peuuent pas, d'implorer l'organe d'vn Aduocat pour le faire. La troisieme, que c'est aux luges à regarder de prés au droit de chacun, parce que c'est à eux à y prononcer: mais que quant aux Aduocats, ils ne sont obligés sinon à s'acquitter fidellement & diligemment des choses qui leur ont esté commises. Pour ce qui est de la premiere, il est vray que peut-estre ne s'est-il iamais trouué deux cas si absolument semblables, qu'il n'y eust quelque dinersité. Mais les petites differences qui se trouvent entre les choses n'en changent pas la nature, & ne font pas que la Iurisprudence change de regle pour cela. Ie ne sçay pas bien pourquoy les Iurisconsultes appellent especes les questions decidées en chaque loy. Mais quelle que soit leur raison, ie diray que les petites circonstances, & qui ne consistent qu'en de legers accidens, ne font pas varier les especes, & n'empeschent pas que les individus qui se rapportent à chacune, ne se doiuent representer par vne mesme definition. Tous les hommes different en quelque

434 SVITE DE LA DERN. PART. chose les vns des autres en lineamens de visage; en conformation de membres, & en ton de voix: & toutesfois ce sont tous des hommes, c'est à dire, des animaux distingués d'auec tous les autres par l'vsage de la raison. Tous les cheuaux ont dans leur taille, dans leur poil & dans leurs marques, quelque chose qui les discerne, & qui les fait reconnoistre dans les haras: & neantmoins ils font tous cheuaux egalement, & conviennent en nature, qui se distingue d'auec celle des autres bestes par sa difference essentielle, & par le propre du hennissement. Et ainsi en est-il de toutes les autres choses du monde, de quelque condition qu'elles soyent. Encore donc que tous les cas qui se portent à iuger dans les Palais, ayent quelque dissemblance dans leurs circonstances, ou dans quelques legers incidens, ils se rangent pourtant tous fous quelques reigles generales, sous quelques Rubriques du Code & du Digeste, sous quelque chapitre de la Coustume, ou sous quelques tiltres des Edicts & des Ordonnances de nos Rois. Pourquoy donques

DE LA MORALE CHREST. est-il si difficile d'en decider, que souuent les Aduocats y plaident sur des maximes tout à fait contradictoires? Quant aux formalités, selon l'ancienne Iurisprudence de Rome, qui y pechoit en vne syllabe, perdoit la meilleure cause du monde, si le Preteur y suivoir la rigueur du Droict. Mais on a reconnu l'iniquité de cette chicane, qui auoit conuerti la Iustice en des pontilles, & fait de la chose du monde la plus sacrée & la plus necessaire à la conservation de la societé, vne Escole de vetilles, & vn renuersement de la justice & de la Raison. Et certes ie ne sçay s'il se pourroit commettre vne injustice plus signalée & plus extrauagante que celle-là, que parce qu'vn Sergent n'aura pas bien fait vn exploit, ou vn Procureur bien dressé vne requeste, vn homme qui ne connoist ny lustinien ny Tribonien, perdist miserablement vne cause qui seroit bonne & indubitable au fonds. A la bonne heure, qu'on recommence, si l'on n'a pas bien entablé; que l'on chastie mesme si l'on veut celuy qui a commisla faute, en le condannant aux des436 SVITE DE LA DERN. PART. pens qui ont desia esté faits au procés. Mais que là dessus les Aduocats prennent occasion d'embarasser les affaires, & de faire tourner le droit du costé où estoit le tort, c'est ce qui est indigne de gens qui s'appellent ministres de la Iustice, & qui veulent que leur condition soit honorable, parce qu'elle est employée à faire rendre à chacun ce qui luy appartient. Quant à la seconde de ces excuses, il est vray que les Aduocats sont la bouche de leurs parties, mais il est vray aussi qu'ils prennent la qualité de leurs Conseils. Que ne leur conseillent ils donc d'estre gens de bien, & d'agir de bonne foy, quand ils apperçoiuent qu'au fonds il y a de l'obliquité dans leurs pretentions ou dans leurs defenses? Car c'est là proprement le conseil qu'ils sont obligés de leur donner, & non pas de leur fournir les destours, & les inventions d'embrouiller ce qui est clair, & les artifices d'Alcibiades, ou de ne conteriamais, ou de ne payer ia-Car s'ils estoyent mais leurs dettes. tous disposez de la façon, ceux qui s'addressent à eux pour chicaner auroyent

DE LA MORALE CHREST. honte de leur procedé, & de cent procés qui se font, il y en auroit quatre-vingt dix qui seroyent estouffés en naissant, &, s'il faut ainsi dire, esteints en graine. мais quad ils n'auroyent d'autre qualité que celle de bouche des parties, c'est vne chose peu digne d'vn honneste homme de seruir de bouche à vn chicaneur. L'eloquence est vne des plus belles choses du monde quand elle sert à la protestion de l'innocence, à la defense de la Iustice, & à l'eclarcissement de la verité. Mais il vaudroit mieux au reste des hommes que les eloquens eussent perdu la langue, que non pas si elle estoit employée à l'oppression de la justice & au peruertissement de la raison. Enfin, pour ce qui est de la troisieme de ces excuses, il est vray que les Iuges ont encore vne plus grande obligation à la conseruation du Droit que non pas les Aduocats, parce que c'est de leurs sentences que tout depend, & que c'est à eux à discerner le vray & le faux, le iuste & l'injuste, dans les plaidoyers des autres. Neantmoins il n'est pas moins certain que les Aduocats font tout ce

Ee iij

438 SVITE DE LA DERN. PART. qu'ils peuvent pour leur donner le penchant, & pour les determiner du costé de la cause qu'ils desendent. De sorte que s'ils sauent bien en leur conscience qu'ils plaident contre la raison, arrivant que le Iuge prononce mal, la faute leur en doit estre en grande partie impu-tée. Car celuy qui donne vn tour de main à la balance quand elle est en equilibre, est veritablement cause de son mouuement, & du faux iugement qu'elle fait de la pesanteur des choses. Or quelle asseurance ont-ils que les luges ne se laisseront pas abuser par leurs raisons & par leurs allegations? Les plus experimentés ne se laissent ils pas quelquessois tromper à la fausse monnoye quand elle est messée auecque la bonne? Mais posé le cas qu'ils eussent toussours affaire à des Iuges si clairuoyans qu'il sust impossible de leur imposer, tant y a qu'ils font tout ce qu'ils peuvent pour les tromper, & s'ils n'y reuffissent pas, ce n'est pas manque d'y appoiter toutes sortes d'artisi-ces. Or c'est en la disposition de l'ame & non au succés, c'est en l'intention,

DE LA MORALE CHREST. di-je, & non en l'euenement, que consiste le blasme ou la louange en telle occurrence. Et quand Aristote definit vn Sophiste, il ne tire pas sa definition ny de ce qu'il sçait faire: car vn honneste homme peut sauoir tous les moyens illegitimes de surprendre la rai-son, qu'il ne s'en servira pas pourtant. Ny de ce qu'effectivement il execute: car il peut auoir affaire à des gens qui sauent demesser les sophismes, ou quand ils ne les demesseroyent pas, qui ne s'y laisseront pas tromper. Mais il la tire de son dessein, & appelle sophiste celuy qui s'efforce de persuader le mensonge par ses fallaces. Pour qui deuons nous donc tenir les Aduocats qui au prejudice du droit qui leur est connu , employent en leurs plaidoyers toutes fortes de moyens pour surprendre la simplicité des Iuges? Car encore la sophi-sterie quelquessois n'a pour but que de persuader des saussets qui ne sont pas de grande importance à la vie humaine, & où l'erreur n'a rien de pernicieux. Que m'importe si quelcun m'abuse en m'expliquant les causes des meteores,

Ee iiij

440 SVITE DE LA DERN. PART. ou en me persuadant qu'il y a plus ou moins de quatre elemens? Au lieu qu'icy il y va de la Iustice, qui est la conser+ uatrice de la societé des hommes, & de la Charité, qui est l'ame du Christianisme & le sel de toutes les autres vertus: & de la ruine des familles, que la perte d'vne bonne cause met quelques sois à l'enuers; & souuent de l'honneur d'vn homme de bien, que la calomnie & la chicanerie, si elle reuffit, diffame. De forte que quand ie me represente vn Aduocat qui defend vne bonne cause, & qui déploye là toutes les voiles de son eloquence, & toutes les richesses de son sauoir, il me semble bien qu'apres la predication de l'Euangile, c'est vne des plus belles choses à quoy vn honneste homme se puisse appliquer. Parce qu'outre la satisfaction incroyable qu'il a dans sa conscience, de servir à la Iustice & de faire valoir la raison, il a les yeux d'vne infinité de gens tournés sur luy, qui le considerent comme vne espece d'oracle, & comme le support des particuliers & l'ornement du Public. Que si les foules, non des cliens seulement,

DE LA MORALE CHREST. 441 mais des ieunes Aduocats le suivent quand il s'en va à la maison, s'il reçoit les applaudissement des Iuges, & les acclamations des auditeurs, & si en passant par les ruës on le monstre glorieusement au doigt, il n'a pas encore à mon aduis vne recompense porportionnée à la dignité de son action & au merite de sa personne. Mais quand d'autre costé ie me figure vn homme de cette condition, à qui toutes causes sont bonnes indifferemment, & qui à tors & à trauers ne se propose autre chose que de venir à bout de ce qu'il entreprend par quelque moyen que ce soit, mettant en œuure toutes sortes d'artifices, de soupplesses & de ruses, de tours de chicane & de rubriques pour faire trouuer le droit là oùil sçait bien qu'il n'est pas, il me semble que c'est vne espece de monstre, & vne peste de la Republique, qu'il faudroit mettre dans vne barque pourrie à la mercy de la mer. Il y a encore vn autre mal assés ordinaire en cette vacation, mesme où il s'agit de defendre vne bonne cause. C'est qu'on ne craint pas en plaidant d'affirmer des

442 SVITE DE LA DERN. PART. choses fausses, & d'en nier de veritables, sur cette supposition, que pourueu qu'on soit bien fondé, toutes sortes de moyens, quels qu'ils soyent, deviennent iustes & legitimes, comme quelques fois dans les Escoles, de propositions fausses, on tire des conclusions qui sont pleines de verité. Ce seroit vne chose bien miserable si la verité ne se pouuoit point demonstrer autrement que par le mensonge, & ce n'est ordinairement que par forme de recreation qu'on se sert dans les Escoles de cette maniere de syllogisme. C'est auoir mauuaise opinion & de la iustice de sa cause,&de la capacité de ses luges, que de s'imaginer qu'on ne la sauroit faire paroistre ny la leur persuader, sans l'aide de la menterie, & sans l'impudence à l'affirmer. C'est encore à mon aduis vne imprudence signalée, sinon qu'on ait affaire à des luges inuariables en la iustice, & que mesme l'indignation n'est pas capable d'en destourner. Car autrement cette maniere de faire est pour leur donner de mauuaises impressions de la cause en ellemesme, & pour les mettre en colere,

DE LA MORALE CHREST. contre ceux qui ont la hardiesse de produire en leur presence des choses fausses sciemment. Enfin, c'est vne façon de faire à laquelle quand on s'est vne fois accoustumé, on la porte du Palais dans le reste de la vie, de sorte que desormais en toute autre chose on n'a point de honte de mentir. Et de fait, il y en a de cette trempe, qui ayant porté dans le Barreau quelque inclination naturelle à negliger la verité, s'y sont tellement accoustumés à nier & à affirmer egalement toutes choses sans distinction & sans scrupule, qu'il n'y a nulle affeurances en leurs paroles en toutes fortes d'affaires & en toutes conversations. Il y en a aussi plusieurs qui ont cette mauuaise coustume de plaider satyriquement, & de dire contre leurs parties aduerses toures les choses les plus mordandantes qu'il leur est possible, quand mesmes elles ne seruiroyent de rien au procés. Et ils s'accoustument si bien à cela qu'en fin la bouche leur en deuient en quelque sorte impudéte, pour deschirer à tors & à trauers les honnestes gens. Cela donc yenant à se messer auecque 444 SVITE DE LA DERN. PART. l'inclination naturelle qu'ils ont à ne dire pas la verité, & qu'ils ont augmentée & confirmée par la licence qu'ils se donnent de produire toutes sortes de faits, faux & veritables, en plaidant, il s'en pourroit enfin former d'horribles calomniateurs, que toutes sortes de gens de bien deuroyent auoir en vne detestation extreme. Et ie ne sçay comment il est arriué que le mot de calomnier, qui fignifioit chicaner au commencement, a passé dans la signification que nous luy donnons maintenant, si ce n'est que les chicaneurs de cette nature se portent aisément à la calomnie. Quantaux Procureurs, parce que d'ordinaire ils ne parlent pas dans les Barreaux, on ne leur peut pas si aisément imputer cette licencieuse façon d'agir à laquelle quelques Aduocats s'adonnent. Mais quant aux ruses, & aux soupplesses, & aux fuites pour allonger, & aux artifices pour egarer la conoissance du droit, & aux tours de main pour diuertir les pieces qui la peuuent donner, & aux autres malheureuses inventions de cette nature que par la grace de Dieuiene

DE LA MOALE CHREST. sçay point, il n'y a que la vraye crainte de Dieu, & la sincere amour du Christianisme, qui les en puisse preseruer dans la corruption que l'on dit estre maintenant en cette sorte de ministres de la Iustice. l'ay dit cy-dessus que l'on appelle quelquesfois cette occupation la milice du barreau: & c'est vn nom qui luy conuient parfaitement bien, eu egard à la ressemblance qu'elle a auecque la guerre en diuerses choses. L'vne & l'autre est vne merueilleusement belle escole de vertu pour ceux qui s'y veulent appliquer, & plus on y est sujet à la rentation de la corruption, plus on est digne de recommandation quand on la surmonte. L'vne & l'autre est extremement laborieuse & pleine d'inquietudes & de tracas, & quand on s'en acquitte comme il faut, l'vne & l'autre done sans doute beaucoup d'honneur, & a de belles recompenses. Mais l'une & l'autre a aussi ses stratagemes & ses embusches, & quelquesfois ses perfidies & ses trahisons, ses cruautés & ses picorées. En effect, pour finir ce chapitre par cette consideration, comme la

446 SVITE DE LA DERN. PART. guerre degenere quelquesfois tellement qu'elle deuient vn brigandage: de sorte que pour s'y garentir des crimes & des voleries qui s y font, il faut auoir vne ame bien genereuse, & bien profondement imbuë de la veritable vertu : la Iustice s'abastardist quelquesfois de telle façon, que pour se preseruer des concussions & des larcins ausquels quelques-vns se laissent aller, il faut auoir bien profondement receu la trempe du Christianisme. Mais comme il n'y a iamais de tel déreiglement dans la guerre, qu'il ne s'y trouue toussours de grands exemples de continence & de moderation, il n'y 2 iamais de si grands desordres dans la Iustice non plus, qu'on ne voye de belles marques de vertu en quelques vns de ceux qui la seruent. Tellement que si nonseulement la Loy Cincia est abrogée à l'egard des autres, mais s'ils foulent aux pieds toutes les loix de la Iustice & de l'honneur, ceux-cy la remettent sus auecque beaucoup de louange & derecommandation, & parfument tout le Palais de la bonne odeur de leur equité DE LA MORALE CHREST. 447 & de leur genereuse conduite.

DE LA RICHESSE DES Nobles, & de la noblesse des Riches.

T'Ay fait le tiltre de ce chapitre tel que le Lecteur le void , parce premierement qu'il y a des gens nobles par leur extraction, ou par la dignité de leurs charges, qui ont aussi beaucoup de biens, l'vsage desquels doit estre reglé à leur egard selon les maximes du Christianisme. Pois apres, qu'il y en a d'autres qui n'ayant rien d'auantageux sur leurs concitoyens, deviennent extraordinairement riches, & de qui les seules richesses releuent de beaucoup le rang: & de ceux-là il faut aussi dire quel est le deuoir en l'vsage de ces moyens qui leur sont venus entre les mains par la Prouidence divine. Quant aux premiers, parce qu'ils sont ordinairement riches de naissance, & qu'ils ont leur bien par succession de leurs deuanciers, ils n'ont pas cant besoin que les autres de cet ad-

448 SVITE DE LA DERN. PART. uertissement de l'Apostre, denonce aux riches qu'ils ne soyent point hautains. S'ils le sont, cela ne leur vient pas or dinairement de la richesse, mais du sentiment de leur noblesse & de leur extraction. Tellement que s'ils se comparent auecque les Grands, ce n'est pas par les rentes qu'ils s'egalent à eux, c'est par l'antiquité de leur sang, & par le lustre de leurs ancestres : & s'ils se preferent aux petits, ce n'est pas de leurs richesses non plus qu'ils tirent leurs auantages, c'est de ce que leur origine leur a donné vn autre rang. Et quand ils voyent quel-cun de bas lieu qui s'est esleué par les richesses, de sorte qu'ils sont de beaucoup surmontés par luy en cet egard; ils n'en rabbaissent pas leur courage pour cela, & ne l'en estiment pas moins inferieur à la dignité de leur naissance. Bien est vray qu'ils en conçoiuent assés souvent quelque sorte d'indignation. Car ils s'imaginent que les grands biens ne sont deus sinon à ceux qui sont d'yne grande extraction: parce qu'ils sont nés pour les choses hautes, & quine se peuuent exercer sinon par le moyen des richesses,

DE LA MORALE CHREST. 449 richesses, qui semblent perdre leur vsage entre les mains de ceux qui ne sont pas appellés à ces illustres actions. Mais tant y a que ce n'est pas communement ce qui leur enfle le cœur, & qui leur donne ces hautes esleuations qui sont ordinaires à la Noblesse. Aussi ne voyés vous pas qu'ils en facent beaucoup d'ostentation. Ceux de cette condition qui sont riches, bastissent somptueusement, ils se meublent magnifiquement, ils tiennent bonne table à tous venans, & s'il faut paroistre en quelque belle occasion, le train de leurs valets & de leurs cheuaux, l'equippage de leurs meutes, leur fauconerie, leurs carrosses, & la pompe de leurs habillemens, monstrent bien qu'ils veulent que l'on sache qu'ils sont riches. Mais neantmoins ils entedent que toutesces choses là paroissent comme si elles leur estoient naturelles, & comme des dependances de leur noblesse, lesquelles ils n'estiment sinon entant qu'elles seruent à donner quelque ornement à

Ff

450 SVITE DE LA DERN. PART. leur dignité. De fait s'ils aimoyent les richesses à cause d'elles mesmes, ou comme choses qui les esseuassent au dessus du commun, ils les mesnageroient mieux qu'ils ne font ordinairement, ou pour les conseruer ou pour les accroistre. Car il y en a bien quelques-vns d'entre ceux de grande naissance, qui sont assés bons mesnagers. Mais neantmoins il n'arriue que trop souuent que pour estre magnifiques ils deuiennent incommodés, & sans regarder de bien prés à ce qui pourra arriuer à l'aduenir, ils dépensent plus que de raison dans les occasions qui se presentent. Le premier aduertissemet donques qu'il faut que la Morale donne à ceux-là, est qu'à la verité l'auarice est vne des plus basses & des plus indignes inclinations ausquelles les hommes de haute naissance se laissent aller: mais qu'entre l'auarice & la profusion il y a quelque raisonnable milieu où la vertu des Nobles consiste. Et ie dis des Nobles nommément, parce qu'autre est leur milieu en cela, &

DE LA MORALE CHREST. 451 autre celuy de ceux qui n'ont pas la naissance releuée. Car il est permis aux gens de haute condition d'estre plus magnisiques & plus libe-raux, & s'ils doiuent pancher à quelcune des extremités, il leur est plus seant d'exceder en ces qualités là, que de se ietter trop auant dans le bon mesnage. Mais quand cela va iusques à la profusion, il en arriue deux ou trois inconueniens tres-considerables. Et le premier est que le trop est vicieux comme le trop peu, de sorte que ceux qui aiment la vertu s'en doiuent donner garde. Quand donc il n'y auroit que cela, ils doiuent vser de circonspection en toutes occasions, s'ils veulent remporter la recommandation que la vraye Morale donne. Apres cela, quand on s'accoustume à dépenser au delà de son reuenu, il est malaisé que pour fournir à ses profusions, on ne fasse d'ailleurs des extorsions & des rapines. Car quand on s'est vne fois engagé là dedans, on ne so peut pas retrancher, & ainsi il faut

Ff ij

452 SVITE DE LA DERN. PART. arracher à l'vn ce que l'on veut donner à l'autre. Or c'est adiouster le crime au vice, de deuenir violent & tyrannique afin d'estre prodigue & profus. Defait, on a loué la libe-ralité d'Alexandre & de Iules Cesar; & il ne se peut pas nier que ces deux Princes n'eussent vne merueilleuse inclination à cette vertu, comme à la magnificence. Mais quoy? Ils ont donné le bien d'autruy, & pillé; l'vn l'empire des Perses, & l'autre celuy des Romains, afin d'en respandre les richesses sur leurs creatures & sur leurs foldats. C'est ce qui ternit le lustre de ces belles qualités en eux, & qui empesche qu'on ne puisse dire que c'ont esté en eux des vertus tout à fait pures. Neantmoins ils s'excusent en quelque façon sur le droit de la guerre, qui donne au vi-Storieux ce qui appartenoit au vaincustellement que quand Alexandre a donné à ses amis & à son armée les richesses de l'Orient, il a pensé donner son bien, & non celuy de Darius ou des nations des Indes. Quant

DE LA MORALE CHREST. 453 aux autres, qui ne font point de telles conquestes pour satisfaire à leurs prodigalités & à leurs dépenses inconsiderées, & qui prennent tantost icy tantost là, sur l'vn par forme de prest, qu'on n'a point intention de payer, sur l'autre par quelque vexation & quelque violente extorsion, comme cela arriue quelquesfois, l'ombre mesme de la vertu ne leur demeure pas, & leur injustice n'a point d'excuse. En fin, si l'on s'abstient de ces iniquités, & que l'on ne dépense que de son fonds, il ne semble pas qu'il y air de crime à la verité, mais il y a vne merueilleuse imprudence. Car puis que la magnificence & la liberalité sont des vertus, il faut donner ordre à ce qu'on les pratique de telle sorte qu'on les puisse pratiquer longtemps, ce qui ne se peut pas faire quand la dépense n'a point de reigle. C'est pourquoy on leur peut donner pour second enseignement, de prendre bien garde à la nature des choses dans lesquelles ils dépen-

Ff iii

454 SVITE DE LA DERN. PART. sent. Car il ne faut pas nier qu'il ne soit permis aux personnes de haute condition, & à qui Dieu a donné de grands biens, d'estre logés plus magnifiquement, & meubles plus somptueusement que les personnes du commun, & d'estre plus richement vestus, & de tenir meilleure table. Il leur faut encore accorder vn plus grand nombre de seruiteurs,& si leur condition le leur permet, grande quantité de cheuaux, & des chiens, & des oiseaux, & d'autres instrumens de leurs recreations, si elles sont legitimes & honnestes. Car outre la chasse, ils peuuent encore auoir le plaisir de la Musique tant des voix que des instrumens, & le diuertissement de la peinture, & la curiosité des plantes & des medailles, & celle des raretés que l'on apporte des Indes & dont on dresse des cabinets. Ce que Salomon a esté autrefois si somptueux en la plus-part de ces choses, & qu'il n'en a point esté blasmé, cela ne vient pas seulement de ce que sa personne & son regne

DE LA MORALE CHREST. 455 ont esté des figures bien expresses de la personne du Sauueur du monde, & de la magnificence du regne qu'il exerce dans le Ciel. Il vient encore de ce qu'estant vn grand Prince que Dieu auoit extraordinairement benit, il n'a rien fait d'indigne de sa condition d'employer ses merueilleuses richesses a des choses de cette nature. Tellement qu'à proportion de ce que les Grands ou s'approchent ou s'essoignent de la dignité & de la richesse de Salomon, à mesme proportion le peuuent-ils imiter en l'vsage de ces benedictions terriennes. Ie sçay bien qu'il y a mes-mes en cela quelque difference entre les Princes souuerains & les autres Grands qui ne le font pas. Parce que ceux-là doiuent auoir quelque splendeur de majesté qui leur concilie du respect de la part de leurs sujets, & qui donne de l'autorité à leur gouvernement : & cette splendeur ne se peut bien ny acquerir ny maintenir sinon par l'esclat de leurs Cours & par la grandeur de leur dé-

F f iiij

456 SVITE DE LA DERN. PART. pense. Or il n'y a rien de semblable en ceux que Dieu n'a pas esseués iusques à ce haut degré de dignité & de puissance. Mais neantmoins Dieu ne laisse pas d'estre l'auteur de la differece qui est entre ces Grands, quoy que non souuerains Magistrats, que leur naissance, leurs emplois, & leurs richesses extraordinaires rendent signalés; & les hommes de basse codition & de la lie du peuple. Comme donques il a voulu que les vns fussent places beaucoup plus haut que les autres en la societé, il n'a pas eu desagreable que les degrés plus eminens rayonnassent à proportion de leur élevation; ce qui ne se peut faire sans cette sorte de dépense. Mais ie dis que s'ils dispensent bien leurs moyens, ils les employeront principalement à trois choses. La premiere est tout ce qui concerne l'vtilité du Public, & mesmes son ornement dans les choses belles & honestes. Car ie trouue beau que Pericles ait employé vne partie de ses richesses à orner la ville d'Athenes

DE LA MORALE CHREST. 457 de magnifiques bastimens: que Cimon ait acquis des possessions pour en donner l'vsage à ses citoyens: qu'vn autre ait dépensé vne partie de son bien à ceindre la mesme ville de murailles & à la remparer de fortifications: & que diuers autres grands personnages ayent entrepris quelque autre chose de mesme nature en faueur de leurs Republiques. De mesmes, ceux qui donnent pour la fondation des Colleges, pour la culture des lettres, & pour l'entretetenement des sçauans: ceux qui establissent des recompenses aux personnages excellentes dans les sciences & dans les arts : ceux qui proposent des prix aux exercices soit du corps soit de l'esprit, pour y exciter les hommes & leur donner quelque noble emulation, me semblent dignes de beaucoup de recommandation, & non indignes que la Prouidence de Dieu leur fist du bien, puis qu'ils le font seruir à de telles choses. La seconde est tout ce qui regarde la propagation de l'Enangile & la gloire

458 SVITE DE LA DERN. PART. de sa verité. Ie ne blasme donc pas ceux qui dépensent à faire bastir des Temples, & si l'Estat de l'Eglise le permet, qui donnent à l'exercice de la Religion Chrestienne quelques notables ornemens. Car pourueu qu'on ne mette point en cela l'essence de la pieté, comme quelques vns ont fait pendant l'ignorance de quelques siecles, où la structure des Basiliques, & les paremes des Eglises faisoiet le principal de la deuotio des Grands; & pourueu que le trop grand éclat des choses corporelles & sensibles n'attache point tellement les sens des hommes, que cela tire toute leur pieté au dehors, comme nous voyons que cela se fait en quelques lieux, il n'y a rien qui empesche que là où l'Eglise de Dieu iouït de prosperité & de repos, elle ne puisse tirer quelque rayon de la magnificence des Grands Seigneurs, & quelque embellissement de leur abondance. Mais i'estime qu'il est incomparablement plus necessaire & plus digne des Chrestiens, de pouruoir à l'en-

DE LA MORALE CHREST. 459 tretenement de la predication de l'Euangile, & à la subsistance des Escoles qui seruent à l'eclareissement de la verité: de trouuer les moyens d'en prouigner la connois-sance mesme parmy les Barbares, & de fournir à la dépense de ceux qui voyagent pour cela. le voy que ceux qui depuis cent cinquante ans ont entrepris la conqueste des Indes Orientales & Occidentales, ont tous fait profession d'y vouloir porter la Foy de Christ. Et de fait les Portugais enuoyerent des Predicateurs & à Ormus, & à Goa, & à Malaca, & aux Molucques, & aux Maldiues, & iusques à la Chine mesme, quelque difficulté qu'on ait trouvée à y entrer. Les Espagnols en ont enuoyé au Bresil, & au Perou, & à Mexique, & dans les Isles qu'ils ont conquises aux enuirons du Continent de l'Occident. Les François s'en sont aussi souvenus aux voyages de Canada, & les Anglois & les Holandois, qui voyagent beaucoup plus que nous, & qui ont embrassé

460 SVITE DE LA DERN. PART. la Reformation, n'ont pas voulu permettre que les autres les surmontassent en cette louange. Et ie ne veux point icy syndiquer leur zele, ny critiquer sur leurs actions. Qui examineroit la chose bien particulierement, ie craindrois qu'il ne se trouuast qu'aux vns ç'a esté vn pretexte, & aux autres vne seconde fin tout au plus : mais que la premiere & la principale a esté de se rendre maistres du commerce, de s'enrichir des dépouilles de ces miserables nations, & d'estendre son empire & sa domination. Dieu a departy des richesses spirituelles à ces contrées de l'Occident, en ce qu'il leur a donné la connoissance des Arts, des Lettres & des Sciences, & qu'il leur a reuelé son Euangile & le Nom de son Fils nostre Seigneur. Et d'ailleurs il les a pourueuës si abondamment de toutes les choses necessaires à la vie, & mesmes de celles qui seruent à ses commodités & à ses honnestes voluptés, qu'elles se passeroient fort bien de tout ce qu'on apporte des

DE LA MORALE CHREST. Indes, si nous voulions vn peu moderer nos passions. Il a d'autre costé fourni ces regions esloignées, de richesses temporelles, en ce qu'il y a mis les mines d'or & d'argent; qu'il y fait naistre les pierres precieuses & les perles; qu'il a voulu que la Nature y produisist les espiceries, & les choses odorantes que l'on mesle dans les delices des tables, & dont on compose les parfuns. Mais il les a destituées des choses absolument necessaires à l'obtention du salut, & mesmes il a permis qu'elles se soyent pour la pluspart plongées dans vne espouuantable barbarie, & qu'elles ayent abandonné iusques à l'humanité. En fin, il a mis la mer entre nous, & a donné à ces derniers siecles vne merueilleuse connoissance de ce dont on auoit besoin pour la nauigation. De sorte que desormais la communication est aisée, au moins certes en comparaison de tous les siecles precedens. Et neantmoins, ô renuersement de l'entendement humain ! ou nous ne nous seruons

462 SVITE DE LA DERN. PART. pas de cet admirable moyen de communiquer les vns auecque les autres, ou si nous nous en seruons ce n'est nullement comme nous le deurions. Car nous allons chés ces Barbares presque vniquement pour en rapporter les choses dont nous n'àuons point affaire, & qui ne seruent qu'à nostre luxe & à nostre vanité. Et nous ne leur portons pas les choses dont on ne se peut passer sans encourir vne malediction eternelle, ou si nous les leur portons, ce n'est que par maniere d'acquit. Quant à eux, ils ne viennent point vers nous pour en remporter les choses qui sont seules necessaires: & si nous taschons de leur en donner quelque communication, ils n'en veulent point. Il est vray que nous nuisons beaucoup nous melmes au dessein que nous témoignons auoir de les attirer à la connoissance de Iesus-Christ. Car non seulement on leut met en auant des doctrines qui leur paroissent absurdes & extrauagantes, & qui veri-tablement choquent & renuersent

DE LA MORALE CHREST. 463 l'vsage de la raison. Non seulement on les induit à diuerses actions superstitieuses qui leur font excuser leurs propres idolatries, & qui leur font croire qu'images pour images, il vaut autant auoir les leurs que celles des Chrestiens. Mais les vices des Chrestiens leur font auoir le Christianisme en haine, & cette vaste ambition, & cette infatiable auarice, qui nous fait enuahir leur pays & engloutir leurs richesses, leur persuade qu'il n'y peut rien auoir de diuin dans la Religion que nous professons. Mais cette pensée m'emporte trop loin: retournons à nostre matiere. La troisième chose donques à laquelle les Nobles à qui Dieu a donné de grandes richesses, sont obligés de les employer, est la nour-riture des poures, & les autres œuures charitables pour le soulagement de ceux qui en ont besoin. Il y a eu des gens qui ont fondé des hospitaux pour les malades, & d'autres qui ont basti des maisons & donné des rentes pour les orfelins: d'autres

464 SVITE DE LA DERN. PART. ont ordonné des fonds pour le dot des filles necessiteuses; & d'autres ont fait des aumosnes pour estre distribuées aux poures honteux. Qui sont toutes choses dignes de la charité du Christianisme, & qui portent auec elles beaucoup de recommandation. Que si les gens de liaute condition & de grands moyens tout ensemble, les employoient à de semblables actions, il y auroit vn grand sujet de satisfaction de voir qu'on les rapporteroit à leur droit vsage: sur tout si les personnes Ecclesiastiques, entre les mains desquelles sont les benefices, en vsoient selon leur ancienne institution. Car de ces grands biens que les Potentats, & les Republiques, & les personnes particulieres ont autresfois donnés à l'Eglise, il y en auoit bien vne par-tie destinée à l'entretenement de ceux qui les possedoient. Mais l'autre deuoit seruir à la fabrique des Eglises, & aux reparations des Eueschés & des Presbyteres, comme on parle, & des autres lieux ou les Ministres

DE LA MORALE CHREST. 469 nistres de l'Eglise auoient leur habitation. Et la troisième en fin estoit pour la nourriture des poures, & pour receuoir les estrangers auec hospitalité. A cette heure chacun sçait comment en cela aussi bien qu'ailleurs les choses ont degeneré de leur origine. Et c'est vne chose qui choque ceux-là mesme qui ont vne grande veneration pour les Prelats, & qui font profession de dependre de leur autorité en ce qui touche les choses diuines; de les voir marcher auec vn train de Princes, iouër & nourrir des chasses comme les grands Seigneurs du siecle, & viure comme des Potentats, cependant que les poures de leurs dioceses languissent, & que les Prestres des villages sont mesprisables par leur poureté. Mais pour laisser là ces Messieurs, qui ne prendront iamais ma Morale pour reigle de leurs actions, & pour addresser mes aduertissemens à ceux de nostre profession, ie dis que ceux d'entre les Nobles qui s'en veulent rendre dignes, retrancheront beau466 SVITE DE LA DERN. PART. coup plustost, non de leurs superfluités seulement & de leurs dépenses inutiles, mais mesmes de leurs commodités, que de manquer à ces trois choses quand les occasions de les pratiquer se presenteront. Car quoy? Seroit il digne des Chrestiens à qui Dieu a fait de si grandes graces que de les esseuer comme infiniment sur les autres en honneurs, en dignités & en biens, de bastir magnifiquement, de jouer desbordément, de viure auec profusion, de nourrir vne infinité de chiens & d'oiseaux & de cheuaux pour leur recreation, & de souffrir cependant ou que le Public deperist, ou que la lampe du san-Etuaire s'esteignist, ou que les poures membres de Christ eussent à lutter contre la famine & la nudité, & les autres necessités ou injures de la vic? Ceux-là sans doute, comme i'en connois, qui ont pendant la famine ouuerts leurs greniers, non pour vendre leurs blés qu'ils auoient amassés de plusieurs années, mais pour nourrir les miserables qui venoient pour cet

effect par bandes en leurs maisons, se sont acquis vn tresor au ciel, & vne reputation parmy les gens de bien icy bas, qui valent incomparablement mieux que toutes les richesses de la terre. Car les charançons se pouuoient mettre dans leuts blés, & les larrons emporter leur argent, & les maladies les empescher de iouïr de leurs reuenus quand ils leur sussent de mettre de leurs reuenus quand ils leur sussent de meurés. Mais la louange des gens de bien ne leur peut manquer, & la recompense de là haut est imperissable.

Quant à ceux qui n'ont point d'autre noblesse que celle que leur richesse leur donne, ils ont sans doute besoin de beaucoup d'aduertissemens. Car il est bien certain que c'est vn grand auantage que de posseder beaucoup de biens: & encore que de toutes les noblesses c'en soit la dernière, & mesmes qu'en beaucoup de lieux ce ne soit pas vne noblesse, come dans les Monarchies nommément, si est-ce que sans aucune difficulté la richesse met vne

468 SVITE DE LA DERN. PART. grande difference entre les humains. Car si vous la considerés en elle mesme, on l'appelle de ce nom de bien: c'est à dire qu'on la conte entre les choses qui sont bonnes en elles mesmes, & que l'on souhaitre naturellement. Elle sert donc à parfaire la felicité de l'homme: puis que la felicité est l'amas & l'assemblage des choses bonnes que nous pouuons raisonnablemet souhaitter. Et si vous la regardés en son vsage, on l'appelle du nom de moyens : c'est à dire qu'on la range entre les choses qui sont vtiles pour exercer les operations aufquelles nos facultés sont destinées, & pour venir au dessus de nos bonnes intentions. En effect il ya diuerses vertus qui ne se peuuent pratiquer sans elles, comme la magnificence & la liberalité. La charité a vne merueilleuse estenduë en tous les devoirs de la vie; mais celle qui cossite en la beneficence, ne se peut aisément exercer sans cette sorte de moyens. La pieté mesme a quelquesfois besoin de son ayde, y ayant

DE LA MORALE CHREST. 469 beaucoup de choses qui concernent la gloire de Dieu, qui ne se peuuent auancer sans l'assistance des biens. La generosité est souuent vaine en ses efforts si le soustien de la richesse luy manque, & souuent la pourcté en esteint mesmes les mouvemens. En vn mot, quand on se void enuironné des choses necessaires à l'execution des belles & hautes entreprises, & à la production des belles & nobles actions, cela donne quelque grandeur & quelque liberté d'ame, qui ne se peut pas rencontrer en ceux qui se sentent serrés de prés par la necessité. Et c'a esté fort ingenieusement que pour representer l'incommodité qu'elle donne, & l'obstacle qu'elle met aux belles produ-&ions, ont a peint vn homme qui a des ailes à la main droite à l'aide desquelles son corps essaye à s'esseuer de la terre, & à monter vers le ciel: mais vne grosse pierre qu'il a attachée à l'autre main, le tire au contraire contre-bas, & rend ses eslans inutiles. Et quoy que l'excésà desi-

470 SVITE DE LA DERN. PART. rer les richesses soit extremement vicieux, & qu'il n'y a peut estre cho-se où le Peché & le Malin dresse de plus dangereux pieges aux hommes, comme saince Paul l'a remarqué, si est-ce que ce desir ne seroit point si vniuersel qu'il est, ny si profondement enraciné, s'il n'y auoit dans les richesses quelques attraits qui donnent dans les yeux de la Nature. Et outre ce que i'ay desja dit de leur vsage à l'exercice de la vertu mesme, il n'est pas malaisé de rendre la raison de cette inclinatio. Car toute la vie se rapporte à trois especes de choses, à sçauoir les necessaires, les commodes, & celles qui outre la commodité donnent encore de la volupté. Quant aux necessaires, à la verité on y peut bien fournir sans estre riche, mais aussi la vie seroit elle bien seche & bien resserrée si on l'auoit reduite là. Le pain, & l'eau, & les vestemens de grosse toille, & l'habitation dans vne loge plantée sur quatre pieux, peuuent suffire à cela: si ce n'est qu'on y adjouste

DE LA MORALE CHREST. 471 pour les maladies quelques remedes de village, & quelques herbes des iardins. Mais cette grande & admirable abondance de choses que Dieu a creées pour l'vsage de la vie humaine, monstre bien que sa Prouidence n'a pas entendu que l'on s'en arrestast precisément là. Car il ne les a pas faites pour nous estre absolument inutiles, & elles le seroient presque toutes si nous nous estions reduits à si peu. Pour ce qui est des commodités, on ne sauroit en donner vne definition generale à cause de la diuersité des conditions. Car autres sont les commodités d'vn artifan, & autres celles d'vn Senateur, & autres celles d'vn grand Seigneur, & si vous auiés reduit vn Duc & Pair aux termes des commodités du plus accommodé Esperonnier de la ville de Paris; de ce dont celuy-cy s'estime riche & heureux, cet autre se reputeroit extremement miserable. Mais posé que chacun air ses commodités selon sa condition, si vous en demeurés là, il n'y en aura pas vn

Gg iiij

472 SVITE DE LA DERN. PART. qui ne voye au delà beaucoup de choses qu'il peut raisonnablement desirer, & dont il seroit injuste de luy interdire la possession, s'il la pouuoir acquerir par des voyes honestes & legitimes. La belle architecture qu'on employe dans les bastimens: là varieté des couleurs, des estoffes, des manufactures, des broderies & des autres ornemens dont on se sert à parer les meubles & à enrichir les habillemens: l'abondance des poissons, des bestes bonnes à la nourriture de l'homme, des oiseaux qu'on peut seruir sur la table, des fruits, des racines & des herbages dont on la couure, & les delices qu'on y mesle pour en releuer l'odeur & le goust; l'or, l'argent, les pierres precieuses & les perles qu'on apporte de l'Orient : les artifices des pais estranges, les porcelaines & les ouurages de la Chine, & les curiosités dont ont enrichit les Cabinets : les tapisseries, les peintures, les œuures de marqueterie dont on orne les parois & les lambris des Palais; les statuës anti-

DE LA MORALE CHREST. 473 ques, les pieces d'orfeurerie, les colomnes de marbre, & de iaspe, & de porphyre qui seruent à soustenir les galeries, & à decorer les entrées & les degrés des grandes Maisons : les grandes & magnifiques volieres, le concert des voix, l'harmonie des instrumens: les parfuns & les cassolettes, & generalement toutes les choses dont ceux qui sont extremement riches, font amas pour le contentement de leurs sens, sont bien loin au delà non seulement des necessités, mais mesme des commodités de la vie. De sorte que si on se contente de la rendre seulement commode, toutes ces choses là ont esté, ce semble, creées pour neant. Or est-il bien vray que les hommes en abusent à leur luxe, à leurs vanités, & à leurs desbauches, & que c'est bien souvent la matiere de leur vice & la pasture de leur orgueil. C'est pourquoy les Poëtes, & les Philosophes, & les Theologiens s'emportent quelques fois à des inuectiues, non pas seulement contre l'abus de ces cho-

474 SVITE DE LA DERN. PART. ses, mais mesmes contre leur vsage, &contre leurs inuenteurs. Pour moy i'estime auec l'Apostre saince Paul que toute creature de Dieu est bonne, & que pourueu qu'on en vse bien & auec actions de graces, l'intention du Createur n'a pas esté qu'elles demeurassent enfouies, mais qu'elles seruissent aux hommes à chacun se-Ion qu'il a pleu à la diuine Prouidence de leur en donner la ioüissance, & de les esleuer en condition. Arracher les vignes parce que les hommes s'enyurent; bannir l'or & l'argent d'vne Republique, comme Lycurgus fit de Sparte, parce que c'est le germe de l'auarice & de di-uers autres maux; defendre le commerce auec les nations estrangeres, parce qu'il apporte des marchandises qui ne seruent qu'à effeminer les hommes, & à ramollir leur humeur guerriere & l'austerité de leur vertu; est bien vne marque certaine du vice des hommes, qui abusent de toutes choses, & qui ne se tiennent iamais dan's vne juste mediocrité.

DE LA MORALE CHREST. 475 Mais ce ne sont pas des loix conformes à la Nature ny à l'institution de son auteur. Car le monde est comme vne grande Maison, bastie & meubléepar vn excellent Architecte, & par vn sage pere de famille, qui en a dispensé les parties & rempli les appartemens. Et il paroist bien sans doute qu'il y a esté riche & liberal à merueilles, mais il n'est pas à presumer qu'il ait rien fait inutilement. De sorte qu'il ne reste sinon de rapporter chaque chose à sa fin, & de l'employer sagement à l'vsage à quoy elle a esté destinée. Et parce que d'vn costé c'est ce mesme ouurier du monde qui a distribué aux nations à chacune leur habitation, & que de l'autre il a voulu quelles eussent communication entr'elles pour s'entre-fournir-les choses qui se trouuent l'vne en vne contrée, & l'autre en l'autre, comme si diuerses familles logées dans vn grand Palais, s'enuoyoient reciproquement de chambre en chambre les vtensiles qui seruiroient à leur mutuel conten-

476 SVITE DE LA DERN. PART. tement, il me semble que tant s'en faut qu'il faille absolument condamner les richesses l'abondance, que c'est au contraire vn grand argument de benedictions & de louanges pour celuy qui en est l'auteur. Mais comme on est sujet à y pecher, aussi est-il necessaire de donner icy vn peu exactement aux riches la tablature de leur conduite. Et pour remonter iusques à la source, le premier aduertissement que le Christianisme leur donne, est de considerer bien attentiuement les moyens par lesquels on s'enrichit. Car il y en a d'honnestes & de legitimes, qui rendent la possession des richesses iuste: & il y en a d'autres iniques, qui communiquent leur qualité aux richesses, & qui mesmes en l'Euangile leur donnent leur nom. Faites vous, dit nostre Seigneur, des amis des richesses iniques, sans doute, en grande partie, parce que le plus souuent elles s'acquierent par des voyes defendues par la Parole de Dieu. Ie mets au rang des legitimes

DE LA MORALE CHREST. 477 les gratifications faites par les Princes, soit pour recompenses de seruices, soit simplement comme gratifications. Car quant aux recompenses, il n'y peut auoir de doute qu'el-les ne se possedent tres-iustement; parce qu'encore qu'on doine toutes sortes de seruices à son Prince & à son pays, & qu'ainsi à proprement parler, l'on ne puisse rien meritet d'eux, la Nature des choses pourtant nous apprend assés qu'il est tres honneste & tres-legitime qu'on en rem-porte quelque notable reconnoissance, qui serue non seulement à l'entretenement de la vie, mais qui la rende & commode & honorable, afin que tout le monde voye l'estime qu'il faut faire de la vertu. Et quant aux simples gratifications, quand elles sont excessiues, & faites à des personnes qu'on n'en estime pas dignes, elles causent beaucoup d'indignation. De là sont toujours venus les murmures contre les fauoris que les Monarques ont esseués à vne grandeur prodigieuse, & du temps

478 SVITE DE LA DERN. PART. de Henry troissème, ce fut ou la cause ou le pretexte des ligues & des souleuemens. Mais quand il n'y a rien de fort excessif, ce seroit reduire la puissance des Souverains bien à l'estroit, s'il ne leur estoit pas permis dexercer leur liberalité enuers quelques vns qu'ils aiment en particulier, & dont ils veulent, comme on parle, faire la fortune. C'est yne des choses esquelles ils portent l'image de Dieu, qu'ils esleuent quelquesfois les hommes de la poudre pour les colloquer aux dignités, & qu'ils appellent les choses qui ne sont point comme si elles estoient, faisant de ce qui n'apparoissoit point des creatures qui se voyent & qui éclattent au monde. Apres cela le commerce est à mon aduis vne des plus belles manieres d'acquerir beaucoup de bien; mais i'entends le grand commerce, comme est celuy qui se fait aux Indes, & dans tous les autres lieux du nouueau monde, d'où on nous apporte les choses qu'autrement nostre Europe n'auroit

DE LA MORALE CHREST. 479 pas. Car soit qu'on face permutation de marchandise à marchandise auec les nations estrangeres, soit qu'on achete les leurs à deniers contans, ce negoce se fait volontairement, & en telle sorte que le vendeur & l'acheteur y trouuent leur satisfaction & leur auantage. En suite de cela qu'y a t-il de plus beau que de voir les ports de mer remplis de toutes sortes de choses necessaires, vtiles, commodes, belles & delicieuses, qui se portent puis apres dans les Prouinces, & se respandent comme vn suc de vie dans toutes les parties d'vn Estat, pour luy donner l'embonpoint, la vigueur & l'ornement? Que si ceux qui nous procurent cette abondance y font des profits si considerables qu'ils s'en esleuent bien haut, il ne le faut pas trouuer mauuais, non pas seulement à cause des risques qu'ils y courent, & des trauaux qu'il y faut subir, mais encore parce qu'il est iuste que les moyens dont la Prouidence de Dieu se sert pour nous communi-

480 SVITE DE LA DERN. PART. quer cette abondance, en soyent les premiers participans. Car la Loy de Dicu mesme, & la Nature nous apprennent à n'émuseler pas les bœufs qui foulent le grain, & à ne leur mesurer pas le fourage ny le foin à l'heure qu'ils le charrient dans les granges. Et s'il est vray que ce soit le foye qui fournisse le sang aux autres parties du corps, se qu'il en est le premier abreuué & coloré, nous est vn enseignement naturel que ceux qui font beaucoup de bien à la societé des humains, s'en peuuent bien raisonnablement remplir les premiers eux mesmes. C'est pourquoy l'estime que les autres mar-chands en gros qui ne s'exposent pas à ces longs voyages sur la mer, mais qui font vn grand & ample negoce pourtant, qui couurent les ri-uieres de batteaux, & les chemins de charettes de rouliers, & qui ont des magazins & des facteurs en quantité de Prouinces, tiénent vne route à peu prés semblable aux precedens en ce qui est de l'acquisition du bien. Tellement

DE LA MORALE CHREST. 481 Tellement que s'ils deuiennent extraordinairement riches, comme il leur arriue quelquesfois, il y a pareille raison d'estimer leur gain iuste & honneste, comme nous auons fait celuy des autres. Car s'ils ne sont dans vn Estat absolument ce qu'est le foye au corps humain, au moins font-ils comme les gros vaisseaux, qui comme ils contiennent beau-coup de sang, aussi le respandent-ils dans les autres comme en des rameaux, d'où puis apres il se distribuë par diuerses petites venules dans toute l'habitude des membres. Il y a vn autre troisiéme moyen d'acquerir de grandes richesses, de la iustice duquel ie ne sçay si tout le monde demeurera bien d'accord: c'est celuy des gens d'affaires & des Partisans, & generalement de tous ceux quo l'on appelle Traittans, parce qu'ils traittent auec les Roys & les Potentats de la perception de leurs droits, & des impositions qu'ils font sur leurs peuples. Il ne se peut pas nier que ce ne soit vne chose legitime

482 SVITE DE LA DERN. PART. que de traitter auecque les Roys. Si leurs affaires leurs permettoyent de recueillir leurs reuenus, leurs droits, & leurs tailles par leurs propres officiers, pour s'en faire rendre bon conte, comme l'on faisoit autresfois, asseurément ils en seroient eux mesmes plus riches, & leurs sujets en seroient moins foulés. Car leurs officiers se contenteroient de leurs gages, & il ne se feroit point de vexations, & au lieu que quelquesfois la creme du reuenu des Estats & le plus clair des finances va dans la bourse de ceux à qui la collecte en est commise, elle iroit directement dans les costres du Souuerain. Mais puis que les temps ont changé, & que la necessité des affaires a requis qu'on y suiuist desormais vne autre methode, comme il est en la puissance du Prince de faire recueillir ses reuenus ainsi qu'il luy plaist, il n'y a rien dans la nature & dans la justice de la chose qui empesche qu'il ne se trouue des gens auec qui il traitte pour en faire le recouure-

DE LA MORALE CHREST. 483 ment. Comme donques il y a vn certain droit commun estably par tout le reste du monde, selon lequel chacun peut prendre le bien d'vn autre à ferme, & profiter sur son ad-ministration, de sorte qu'il y en a qui font legitimement de bonnes maisons par cette sorte de trasic, le gain que l'on fait auecque le Roy en ce commerce là, peut estre bon & legitime. Car si l'abondance d'vne année, pour exemple, rend les Traittes si fecondes qu'elles enrichissent les Fermiers, il leur est permis de s'en preualoir, comme ils portent le dommage de l'infertilité quand elle arriue. Mais ce qui fait douter de la legitimité de ces profits, c'est la facon de laquelle plusieurs puis apres viennent à exiger ce qu'ils disent leur estre deu par les Contracts faits auec le Prince. La quatriéme voye d'acquerir du bien, qui ne peut estre sujette au blasme de qui que ce soit, est le trauail de chacun en sa vocation, pourueu qu'il s'en acquitte fidelement, & qu'il n'y commette ny

Hh ij

484 SVITE DE LA DERN. PART. concussions, ny extorsions, ny mauuaises pratiques, ny fraudes. le sçay bien qu'il est malaisé d'acquerir de grandes richesses par ce moyen là, s'il ne s'y rencontre quelque chose d'extraordinaire. Car on a bien veu des Advocats qui ont acquis vne telle reputation de sauoir & d'eloquence dans les Parlemens, qu'ayans à plaider & à conduire toutes les grandes causes de leur temps, ils se sont en fin trouués auoir treshonnestement remply leurs maisons de biens, par les recompenses volontaires que les grands Seigneurs leur en ont données. Il s'est trouvé des Medecins qui n'ayans eu que de forts mediocres commencemens, ont laissé des millions en heritage à leurs enfans, parce qu'ils ont heureusement exercé la Medecine dans les Cours des Princes. On a peut estre veu des Marchands qui n'ont rien fait que le détail, qui se sont trouués en des lieux & en des temps si a antageux, que leurs prosits se sont en fin egales au fruit du com-

DE LA MORALE CHREST. 485 merce des Indes. Se pourroit faire qu'il y auroit eu des artisans si excellens en leur mestier, & si industrieux & assidus à l'exercer, qu'ils en seroient venus à des richesses extraordinaires. Neantmoins il est certain que communément ces vacations là ne produisent pas de si grads biens qu'on les puisse égaler à ceux qui viennent de la faueur des Roys, ou qui coulent de ces autres sources que iay cy-dessus remarquées. Mais il est vray pourtant qu'il n'y a presque point d'employ dans la vie humaine, qui ne puisse mettre à son aise quand on s'en acquitte bien, si ce n'est ceux dont les profits consistent en appointemens reglés pour les choses necessaires à la vie. Car quant à ceux-là, il est à la verité impossible qu'on s'y puisse iamais enrichir, parce que le reuenu ne passe point la depense. Enfin, il y a vn dernier moyen que les Anciens ont extremement loué, comme le plus innocent de tous, & duquel Ciceron dit que c'est vn tres-grand tribut, asçauoir la parsi-Hh iij

SVITE DE LA DERN. PART. 486 monie. Veritablement ceux qui ont desja beaucoup de reuenu, & qui dépensent bien peu, peuuent en fin accumuler beaucoup de biens par leurs reserues. Adjoustant, comme ils font, de iour en iour à leur fonds, par cette multiplication ils se trouuent en fin fort riches. Mais outre qu'il faut desja estre vn peu riche pour le deuenir beaucoup par co moyen là, i'aduouë que ie trouue de la difficulté à l'adjuster auec les reigles des autres vertus, & beaucoup plus encore auec celles du Christianisme. Parce que cette grande espargne, qui seule est capable d'accumuler de grands biens, ne s'accorde pas auec vne vie honora-ble comme chacun la doit mener selon sa condition: & moins encore auecque la magnificence & la liberalité, qui luy semblent diametralement opposées; & moins encore finalement auec cette abondante charité qui nous est recommandée par l'Euangile de Christ, & qui nous oblige à auoir soin de toutes sortes

DE LA MORALE CHREST. 487 de souffreteux, & particulierement de ceux qui sont de mesme religion que nous, & que nous deuons considerer comme nos membres. Certainement cette exactitude si resserrée est ennemie non seulement de la ferueur de la charité des premiers Chrestiens, qui apportoient leurs biens aux pieds des Apostres, & qui vouloient que tout fust commun entr'eux, mais encore de cette tendresse de misericorde que la Religion du Sauueur imprime generalement en tous ses deuots, en quelque lieu & en quelque temps qu'ils pratiquent le Christianisme. Vous aurés, dit nostre Seigneur, toujours les po-ures auec vous. C'est donc vn object perpetuel de la compassion des gens de bien, & vn deuoir dont il est tresdifficile de s'acquitter come il faut, si vne fois on s'est proposé de deuenir riche par l'espargne. Mais quels que soyent les moyens honnestes par lesquels on acquiert beaucoup de bien, le second aduertissement qu'on doit donner à ceux qui ont des ri-

Hh iiij

488 SVITE DE LA DERN. PART. cesses de cette façon, est qu'ils se prennent garde bien soigneusement de l'orgueil qu'elles inspirent. Et de fait c'est proprement à l'egard de ceux-là que sainct Paul dit, denonce à ceux qui sont riches qu'ils ne soyent point hautains, ny ayant rien de si commun que cette enflure de l'esprit en ceux qui de petits commencemens sont venus à vne fortune extraordinaire. Car la naissance ne leur ayant pas donné la grandeur d'ame qui est necessaire pour cuire leur felicité, on ne sauroit dire combien la possession des biens leur enuoye de fumées au cerueau, ny quelles imaginations de vanité elle leur met en la teste. De là vient qu'ils regardent les autres hommes de haut en bas, qu'ils ne se souviennent plus de ceux auec lesquels ils auoient familiarité auparauant, croyans qu'ils les ont laissés bien loin derriere; qu'ils meconnoissent leurs parens; & sur tout s'ils entrent en quelque contestation, que leur esprit se gonfle & s'esseue d'vne façon merueil-

DE LA MORALE CHREST. 489 leuse. Car il y en a bien à la verité quelques vns qui ont ce pouuoir là fur eux, que de conseruer en apparence de la moderation & de la ciuilité enuers ceux auec qui ils n'ont rien à demesser. Mais au moindre sujet d'irritation, & à la moindre occasion qu'ils ont de faire des comparaisons de biens à biens & de condition à condition, c'est là où tout aussi-tost la gloire se manifeste. C'est vne merueilleusement belle acquisition que celle de la pieté & de la vraye vertu. Car elle n'enfle point l'esprit, & comme dit Aristote, il est impossible qu'on en abuse. Au contraire, plus il y a de pieté & de veritable vertu dans vn homme, & moins il y a de vanité, la pieté n'estant point sans l'humilité, ny la vertu sans la modestie. Les qualités intellectuelles, comme est la connoissance des lettres & des sciences, & la connoissance des arts, donne bien à la verité ordinairement quelque esleuation d'esprit : c'est pourquoy sainct Paul dit que la connoissance enfle.

490 SVITE DE LA DERN. PART. Mais au moins il y a cette excuse là, que ce sont des biens que l'on possede veritablement en soy mesme, & qui nous rendent en quelque sorte meilleurs. Parce qu'encore que la principale perfection de l'homme consiste dans les habitudes qui representent les proprietés morales de la diuinité, comme sont la justice, la misericorde, la bonté, & la sainteté, si est-ce que ces autres qualités là perfectionent aussi quelques puissances de nos ames. Les honneurs & les dignités nous sont beaucoup plus exterieures que ne sont ces habitudes de l'intellect: car à proprement parler elles ne sont pas en nous, & n'affectent pas elles mesmes aucune des puissances de nos esprits. Mais encore s'attachent elles à nos personnes comme des relations; de sorte que s'il arriue à quelcun de s'enorgueillir à leur occasion, c'est pour vne chose qui bien qu'elle ne luy soit pas intime, luy est toutesfois bien proche, & qui le touche de fort prés. Au lieu que quant aux

DE LA MORALE CHREST. 491 richesses, elles sont tout à fait au dehors de nous; de sorte que la vanité qu'on en conçoit en est d'autant plus impertinente. Si la vertu & la pieté donnoient de la presomption, ce seroit sans doute à tort: parce qu'en cette corruption de nostre nature dont nous sommes tous enueloppés, elles ne peuuent estre en nous que par quelque singuliere grace de Dieu. C'est pourquoy il nous faudroit dire comme fait sainct Paul : Qu'as-tu que tu n'ayes receu? & si tu l'as receu, pourquoy t'en glorifies tu? Iusques là que le Pharissen, tout orgueilleux qu'il estoit, aduouoit que s'il n'estoit pas si grand pecheur que le Peager, c'estoit Dieu qui l'auoit sanctifié, puis qu'il luy en rendoit la louange. Neantmoins, la possession de ces admirablement belles choses a cela de particulier, que ce qu'on appelle la Fortune n'y peut iamais auoir de part : c'est apres la grace de Dieu, au soin & à l'assiduité de ceux en qui nous les voyons, qu'il en faut rapporter la cause. C'est

DE LA MORALE CHREST. Dieu qui les a inspirés & dirigés par son bon Esprit: mais ce sont eux qui ont agi de leur entendement & de leur volonté, & qui en agissant & en s'appliquant au bien, ont confirmé de plus en plus les bonnes habitudes ausquelles l'Esprit de Dieu leur auoit donné la pente. Tellement qu'encore que ce soit luy qui face tout le bien qui est en nous, & qui procede de nous, si est-ce que luy mesme nous en done quelque louange & quelque recommandation en sa Parole. Les Chrestiens rapportent encore à Dieu & à la grace qu'il leur a faite de les acquerir, les vertus intellectuelles dans lesquelles ils ex-cellent. En effect c'est luy qui donne les facultés naturelles pour cela, & qui preside sut l'education, & qui fait que les estudes reussissent. Neantmoins il est certain que les moyens par lesquels nous y paruenons, sont aussi en quelque façon nostres, & iamais les Payens mesmes n'ont attri-bué à la Fortune, si vn homme estoit deuenu excellent artisan ou fort

DE LA MORALE CHREST. 493 sauant. Il ne se peut pas nier que les honneurs & les dignités ne dependent plus des causes externes: mais encore est-ce l'ordinaire qu'en les conferant on y fait quelque consideration des qualités personnelles & de la vertu. Quant aux richesses, on les appelle biens de fortune tout net, comme si la cause de leur possession n'estoit en aucune façon en celuy qui les possede. En effect, on peut bien dire que bien souuent c'est l'imprudence qui ruine les affaires des hommes : mais on ne peut pas dire egalement que c'est la prudence qui les establit. Car ce n'est pas d'elle que dependent les vents fauorables, ny le bonheur d'euiter les rencontres des pirates, ny toutes les choses necessaires pout faire qu'vn nauire arriue heureusement au port. Ce n'est pas d'elle que viennent les fertilités ny les sterilités, l'abondance ny la disette, d'où naissent les occasions de faire de grandes emplettes, & de debiter celles qu'on a faites, bien auantageusement. Ce

494 SVITE DE LA DERN. PART. n'est pas elle qui empesche qu'vn marchand ne soit ruiné par les banqueroutes des autres, ny qui fait que ses correspondans sont fidelles, & qu'on ne manque pas à ses payemens. En vn mor, il faut bien sans doute au negoce de la vigilance & de la dexterité pour y reussir : mais il n'y a personne qui n'aduoue qu'il y faur encore plus de bonheur. Et quant aux autres moyens de s'enrichir dont nous auons parlé cy-defsus, ce n'est pas la prudence non plus, ce sont les secrets ressorts de la Prouidence de Dieu qui y regnét. Carla faueur des Princes est souvent telle qu'on n'en sauroit rendre de raison, & c'est pourquoy plusieurs l'ont attribuée à quelque bonne constellation : la coustume estant quand on ne sçait pas la propre cause d'vn esset, de la rapporter à l'influence des astres. C'est encore bien souuent vn pur essect de la mesme Providence, que dans les Traittés qu'o fait auecque les Princes, les vns gaignent là où les autres ont perdus

DE LA MORALE CHREST. 495 & i'en ay veu quelques vns qui rapportoient à vn mouuement extraordinaire que Dieu leur auoit-suggeré, la resolution qu'ils auoient prise de laisser vne grade ferme où ils auoient toujours extraordinairement profité, iustement au point qu'il y arriua, sans que neantmoins on l'eust sceu preuoir, de si notables changemens, que ceux qui leur succederent y trouueront du dommage. Et quoy que les biens qu'on acquiert chacun en sa vocation, semblent auoir vne cause plus determinée dans le labeur, & l'industrie, & la vigilance de ceux qui les ont, ce que dit Dauid est pourtant vray, qu'on a beau bastir sa maison, & y apporter tout le soin dont on se peut aduiser : si Dieu n'y met luy mesme la main toutes nos peines sont inutiles. Au lieu que quand il plaist à nostre Seigneur benir le trauail de quelcun, le bien luy vient comme en dormant, de sorte que ses succés passent de bien loin ses esperances. Quel sujet ont donques les riches de tirer de la va-

496 SVITE DE LA DERN. PART. nité d'vne chose qui est si fort au dehors d'eux & dans sa possession dans ses causes? Apres cela c'est encore vn aduertissement du Christianisme, que quelques richesses que l'on ait, & de quelque façon qu'on les ait, il n'y faut point mettre sa confiance. Car la pieté & la vertu sont vn bien solide & permanent, & qui va mesmes iusques au delà de la vie. Le sauoir & les autres qualités intellectuelles durent iusques à la mort : & si quelque accident fortuit nous discrasse le cerueau, si quelque maladie nous trouble l'vsage de la raison, si la vieillesse nous desrobe la memoire & nous emporte nostre science quand & quand, c'est vne calamité extraordinaire & rare. Les charges & les dignités sont à la verité plus sujettes à changement: mais encore ordinairement on n'en est point dépouillé sinon volontairement ou pour crime. Mais les richesses perissent par vne infinité d'accidens, & fondent quelques-fois si estrangemet entre les mains de ceux qui

DE LA MORALE CHREST. 497 qui les ont, que c'est comme les torrens de Teman, dont on est tout estonné qu'on les void à sec, vn moment apres qu'on y a veu les eaux grandes & profondes. A la guerre les sacs des villes, les pilleries des soldats, les degasts & les incendies: dans le commerce les naufrages, l'infidelité des facteurs, la violence des brigands, les desastres des banqueroutes: dans les maisons les artifices des larrons, les embrasemens fortuits, la licence & l'abandonnement au ieu, l'opiniastreté dans les procés, les dépenses excessiues des enfans, & les excés de la table : à la campagne le débordement des riuieres, les gresses & les vimaires, les mortalités sur le bestail, & mille autres inconueniens, font quelquesfois de si grands rauages dans le bien, qu'il semble que les richesses s'enuolent d'entre les mains come auecque des aigles d'aigle. Tellement que quelque abondance que l'on se voye, les Chrestiens doiuent à l'imitation de Dauid, establir leurs rentes sur

498 SVITE DE LA DERN. PART. l'Eternel, & ne mettre pas leur esperance en la fallace des richesses. Il n'y a de tresors asseurés & permanens que ceux sur lesquels la tigne & la rouille ne peuvent rien, & qui sont dans le lieu où les larrons ne percent ny ne desrobent: & qui se mettra deuant les yeux combien on a veu de gens puissans, reduits à la mendicité, & combien de Princes mesmes dont les fortunes ont esté absolument renuersées, trouuera que Bias auoit raison quand il disoit qu'il n'y a rien proprement à nous que ce que nous pouuons emporter, & qu'il n'est pas possible de nous oster sinon en nous ostant la vie. C'est encore vn precepte du Christianisme, que quand les richesses ne seroient point si coulantes qu'elles sont, ny si sujettes à eschapper de nos mains, il ne seroit pas digne des Chrestiens, de se resjouir trop de leur iouissance. Car si vous les considerés comme des biens, le fruit qui nous en reuient ne regarde presque sinon le corps, c'est à dire, les necessités, &

DE LA MORALE CHREST. 499 les commodités, & les voluptés de la vie presente. De sorte que ce que i'ay dit cy-dessus qu'elles contribuent à la felicité de lhomme, se doit entendre de cette felicité que l'on se proposo icy bas, & encore de celle qui touche le corps proprement, & qui n'appartient quasi point à l'ame. Or les contentemens corporels sont-ils en eux mesmes de telle consideration, qu'à leur occasion, ie ne diray pas vn Chrestien, qui a bien de plus hautes eleuations d'esprit que n'ont les autres humains, mais vn hommo d'honneur & genereux, sous quelque discipline qu'il soit esseué, s'en laisse émouuoir & chatouiller, sinon d'vne maniere fort mediocre & fort reseruée? Ce sont les ioyes de l'esprit qui doiuent estre fort sensibles. aux honnestes gens, & non celles qui nous peuuent estre en quelque sorte communes auecque les bestes. Et si vous les considerés comme des moyens, c'est à dire des aides pour l'exercice de la vertu; il y a certes beaucoup plus de sujet de s'en res500 SVITE DE LA DERN. PART. jouir en cet egard, parce que c'est dans les operations de la vertu que consiste principalement le bon-heur de l'homme. Tellement que comme les gens de guerre aiment les armes, parce que ce sont les instrumens de leur valeur; & comme les gens sauans aiment les liures, dautant que ce sont, pour ainsi dire, les outils de leur mestier; les gens magnifiques & liberaux peuuent bien aimer les richesses, parce que ce sont les facultés auec lesquelles ils peu-uent pratiquer ces vertus là; & les Chrestiens mesmes en peuuent bien estimer la possession, dautant qu'elles seruent aux actions de pieté & aux œuures de misericorde. Neantmoins encore faut-il moderer la ioye qu'on en a en cet egard, parce que le lieu est glissant, & qu'il est extremement dissicile de ne s'y laisser pas aller à quelque emotion vicieuse. Car il y a certaines choses où le vice & la vertu sont si proches l'vn de l'autre qu'il est extremement difficile de les distinguer exactement, & de se main-

DE LA MORALE CHREST. 501 renir absolument dans les termes de celle-cy à cause du voisinage de l'autre. Cette noble emulation qui porte les belles ames aux choses grandes, ne se defend presque iamais du meslange de l'ambition : cette vertu heroïque qui transporte les hommes vaillans bien loin au delà de la valeur ordinaire, donne presque toujours vn peu iusques dans la temerité: & dans les vertus intellectuelles mesmes, l'extraordinaire viuacité & capacité d'entendement, a souuent, come quelques vns l'ont remarqué, quelque chose d'extrauagat & quelque veine de folie. Tant il est difficile à l'homme de se tenir si precisément dans les termes de ce qui est bien, qu'il-ne tire quelque chose du mauuais airqui en infecte levoisinage. Pour se garétir de cela les Chrestiens à qui Dieu a donné beaucoup de richesses, doiuent en faire comparaison auec celles de l'esprit. Car comme il arriue quelquesfois que nous estimons grandes, à les considerer en elles mesmes, des choses qui nous

502 SVITE DE LA DERN. PART. paroissent petites quand nous venons à les conferer à celles qui les excedent beaucoup en grandeur; ainsi prisons nous beaucoup la possession des choses de la terre, dont nous tiendrions neantmoins fort peu de conte si nous les comparions à celles du ciel : parce qu'il y a à peu prés pareille disproportion qu'il y a entre le Ciel & la terre mesme. La terre est à l'egard du ciel, quant à la grandeur, comme vn point. Elle est ronde, mais d'vne rondeur inegale & raboteuse, au lieu que celle du ciel est parfaite, & d'vne admirable vniformité. Elle est opaque, au lieu que le ciel est lumineux. Elle est corruptible en ses parties, & passe par vne infinité de variations, au'lieu que le ciel est immuable & ne souffre point de corruption. Elle a des fleurs, qui se fenent incontinent, au lieu que le ciel a des astres permanens. Elle est basse, & le ciel est haut: elle est sujette aux influences & à la domination des corps superieurs ; au lieu que le ciel regne vni-

DE LA MORALE CHREST. 503 uersellement sur toutes choses. Que peut-il donc sortir de la terre qui puisse entrer en comparaison des biens que nous esperons là haut, & dont la foy & la grace de nostre Seigneur, contient les auant gousts & les arres? Et c'est en partie à cause de cette comparaison que l'Escriture sainte parle quelquesfois fort dédaigneusement des tichesses du monde. A l'heure que celles du Ciel estoient encore fort peu connuës, elle en parloit quelquesfois assés auantageusement : car c'est en elles en partie que Dieu mesmes fait consister la felicité qu'il promet à son peuple d'Israël, s'il demeure perseuerant en l'observation de ses alliances. C'est dans la fertilité des vignobles, & des campagnes, & des pascages, & desarbres fruitiers, & du bestail; c'est dans les despouilles de ses ennemis, & dans l'abondance de toutes telles sortes de biens terriens, qu'il establie les benedictions dont il promet de recompenser la pieté & la vertu de ceux qui le craignent.

Ii iiij

504 SVITE DE LA DERN. PART. Mais à mesure que la lumiere de la connoissance est allée croissant, & qu'elle a mis les esperances des choses spirituelles & celestes en vn plus beau iour, le S. Esprit à décrié l'or & l'argent & les choses les plus precieuses de ce bas monde, comme si ce n'estoit que de la fange & de l'écume de la mer, tant elles ont de disproportion auec les veritables richesses. Si donques vn homme riche, mais qui sent en soy les vertus Chrestiennes fort petites, vient à se comparer auec vn autre en qui elles soyent en vn haut degré, celuy-cy fust il beaucoup moins auantagé des biens de fortune que luy, l'autre s'estimera pauure & necessiteux en comparaison: & s'il possede les vertus Chrestiennes en vn degré bien éminent, il estimera infiniment plus les biens de l'esprit que ceux du corps, & la possession des esperances du ciel, que ces chetiues productions de la mer & de la terre. Et de là viendront deux choses par lesquelles ie rermineray ce discours. L'vne est

DE LA MORALE CHREST. 505 que celuy qui sera bien imbu de l'esperance des biens de là haut, ne conuoitera pas ceux d'icy bas: chose de laquelle le Christianisme nous ordonne de nous garder soigneusement comme de la peste. Non pas seulement parce qu'il est indigne de ceux qui sont appellés à des choses aussi glorieuses que sont celles qui nous sont promises en Iesus Christ, qu'ils se laissent tenter du desir de celles qui sont si mesprisables en comparaison; mais encore parce que comme dit l'Apostre, la conuoitise des richesses est la racine de tous maux, & que ceux qui s'y laissent aller tombent aisement en tentation & aux pieges du Diable. En effect, depuis qu'vne fois vne homme s'est proposé pour but de deuenir riche, & qu'il a mis en cela son souuerain bien, il n'y a point de pratiques, bonnes ou mauuaises, qu'il n'employe pour y paruenir, point de fraudes ny d'extorsions dont cette malheureuse passion ne le rende susceptible. C'est pourquoy S. Paul

506 SVITE DE LA DERN. PART. voulant extraordinairement exaggerer la grandeur de ce peché là, dit que l'auarice est idolatrie. Non pas proprement parce que l'auare fait son Dieu de son argent : car encore que cette passion possede merueilleusement l'ame, si est-ce qu'on pourroit dire aussi que l'ambitieux fait vne idole de l'honneur, & le vo-Iuptueux du plaisir: mais par cette façon de parler par laquelle on donne à vn mal qu'on veut extraordinairement exagerer, le nom du plus grad de tous les maux, & qui est le plus odieux à Dieu & aux hommes. A peu pres comme il est dit que n'obeïr pas aux commandemens de Dieu, de quelque nature qu'ils soyent, c'est vn peché de deuinement. L'autre chose est que celuy qui ne prisera gueres les richesses d'icy bas, n'en sera pas chiche quand il faudra les employer à l'vtilité du public & au soulagement des necessités des particuliers. Et veritablement comme il n'y auroit rien de plus digne des Chrestiens qu'il a pleu à Dieu esle-

DE LA MORALE CHREST. 507 uer de petits commencemens à la possession de grands biens, que de se monstrer liberaux en toutes les choses qui concernent la pieté & la charité, aussi n'y a-t-il rien plus capable d'induire la bonté de Dieu à leur rendre permanentes les richesses qu'il leur a données. Il y a de grands defauts en toutes les Eglises Reformées, & l'on n'en peut pas exépter celles qui sont aux Paisbas. Ie ne sçay mesme si cette auidité come insatiable de gaigner qui regne presque vniuersellemet en ces lieux là, n'est point vn des plus signalés: car il est certain que Mammon y a vne merueilleuse vogue. Cela fait que la Picté n'y est pas si feruente qu'elle deuroit, estant malaisé, comme nostre Seigneur l'a remarqué, d'apporter vne égale affection au seruice de deux maistres. Neantmoins il faut donner cette louange aux Marchands de ces quartiers là, qu'ils vsent bien de leurs richesses enuers les indigens, & qu'il n'y a point de lieu au monde où on ait

508 SVITE DE LA DERN. PART. tant de soin des poures. De sorte qu'à mon aduis vne des principales choses qui gardent cette Republique, & qui la font subsister, c'est le grand ordre qu'on y donne pour l'en-tretenement des Hospitaux, & les offrandes secrettes, s'il les faut ainsi nommer, qu'on trouue tous les iours au Tronc, quand il a pleu à Dieu benir quelque negoce ou quelque voyage. Et comme ie ne veux pas oster à quelques gens d'affaires de nostre profession, la louange d'auoir fait quelques semblables reconnoissances de ce qu'il auoit pleu à Dieu les enrichir extraordinairement, aussi voudroy-ie bien que ce petit mot leur fust vn aiguillon à tous, pour les porter à contribuer libera-lement à la subsistance des poures, des Escoles, & des Eglises.



DV DEVOIR DES GENS de guerre , selon le Christianisme.

Deux choses me viennent d'a-bord en l'esprit à l'entrée de ce chapitre. La premiere est que dans l'heureuse conjoncture en laquelle nous nous trouuons maintenant, il pourra sembler à quelcun que cette meditation s'en va estre comme absolument inutile. Car premierement, nous sommes par la grande grace de Dieu venus à la fin de cette longue & cruelle guerro qui a comme acharné le France & l'Espagne l'vne contre l'autre fort long temps: & le Traitté de paix en estant comme seellé du mariage du Roy, il y a toute apparence que nous iouirons longuement de repos de ce costé là, & que rien ne nous separera plus que les Pyrenées. De

510 SVITE DE LA DERN. PART. forte que ma Morale estant escrite pour les François, elle ne leur peut pas estre desormais fort vtile en cet égard, puis qu'ils s'en vont mettre l'espée au croc, & faire des socs de leurs halebardes. Apres cela il semble que toutes choses se disposent à la paix au Septentrion, & il faut esperer que Dieu en benira la negotiation, pour procurer quelque tranquilité à la Suede & au Dannemark, à la Pologne & à l'Allemagne, apres tant d'agitations dont elles ont esté trauaillées. Car il y a presque vn demy siecle que la guerre s'y promene tantost en vn lieu tantost en l'autre : tellement qu'en tout ce Septentrion qui est deçà la mer Baltique, il n'y a Prouince où il ne se soit donné quelque bataille depuis ce temps là, ou fait quelque siege ruineux au pays, ou quoy qu'il en soit executé quelque espouuan-table rauage. En sin du costé de l'Angleterre toutes choses semblent promettre autant de calme qu'il y a cy-auant eu de troubles & de mal-

DE LA MORALE CHREST. 511 heurs. Car ce poure peuple ennuyé de ses miseres passées & de la domination de ses tyrans, rappelle son Prince souuerain & legitime pour luy remettre entre les mains les resnes de son gouvernement. Tellement que ces grandes flottes qu'on auoit equipées cotre luy ayant arboré ses armes, ces formidables armées de terre dont on auoit abusé pour le chasser de son Royaume, luy ayant par vne admirable conuersion des cœurs & des choses, prestéauecallegresse le serment de fidelité, & la Nation toute entiere le receuant auec de telles demonstrations de joye, qu'il semble plustost retourner porté sur leurs cœurs que sur ses vaisseaux, il y a tout sujet d'esperer qu'à l'aduenir on y voudra gouster longtemps la douceur d'vne bonne paix, tant auec ceux de dehors que dans les entrailles de l'Estat mesme. Par ce moyen si nos gens de guerre ont à exercer leur mestier, il semble qu'il faut que ce soit contre le Turc, qui oblige par sa barbarie les Chre-

512 SVITEDELA DERN. PART. stiens à luy faire la guerre de telle façon, que ie ne sçav si i'y pourrois bien adjuster les regles de ma Morale. La seconde chose est que la guerre & le Christianisme semblent auoir vne si forte antipathie, qu'auec qui que ce soit qu'on face l'vne, il semble qu'on ait en quelque sorte renoncé à l'autre, tant ce sont choses diametralement opposées entr'elles, & tant elles ont des suites incompatibles & ennemies reciproquemet. La guerre est vne dissension, & le Christianisme vne vnion de volontés. La guerre est vne dissension qui se vuide par la violence: & le Christianisme est la discipline de la Iustice & de la Raison. La guerre fait gloire d'oster la vie aux hommes, & le Christianisme de la leur conseruer. La guerre est ce qui renuerse les Loix, & le Christianisme est ce qui les donne. La guerre a pour arbitre des differens qui sont entre les Princes & entre les Estats, le sort des armes; & le Christianisme veut qu'ils soyent decidés par la Charité.

DE LA MORALE CHREST. 513 Charité. La guerre a pour but la victoire, & de se rendre superieur à son ennemy : au lieu que le Christianisme forme les hommes à l'humilité & à s'abaisser chacun au dessous de son prochain. Dans la guerre on pense estre fondé en droit de rauir le bien d'autruy, & le Christianisme nous porte à luy donner plustost le nostre. A la guerre on conteste sur des choses de peu d'importance, asin de ne paroistre pas inferieur à son ennemy : au lieu que le Christianisme nous enseigne à soufrir beaucoup plustost de considerables dommages, que d'entrer en contestation auec nos prochains. En vn mot, Ciceron mesme, quoy que Payen, dit que la guerre conuient mieux aux bestes qu'aux hommes; & le Christianisme est destiné à former en nous vne certaine disposition d'esprit, qui nous esseue au dessus de la condition des hommes mesmes, & qui nous approche de la sainteré des Anges des Cieux. Cependant, dans cette oppositio que ie viens de faire,

514 SVITE DE LA DERN. PART. ie n'ay rien mis que ce que tout le monde approuue dans la guerre, & qui mesmes est autorisé par le droit des gens. Que seroit ce donc si ie la considerois dans ses excés, & dans la façon selon laquelle on l'a presque toujours faite? Quelle communion peuvent avoir ses pilleries & ses brigandages, ses impietés & ses blasphemes, ses ordures & ses dissolutions, ses trahisons & ses cruautés, ses violences & ses incendies, & mille autres choses semblables, auec la Religion de nostre Sauueur, sinon celle qui est entre le Ciel & les enfers, entre Christ & Belial, c'est à dire vn esloignement infini, & vne auersion de choses opposées de but en blanc, & qu'vn vaste & immense abysme separe? Vouloir donques donner des preceptes tirés du Christianisme pour regler les actions des hommes qui ont les armes à la main, semble estro à peu prés mesme chose, que de vouloir, comme dit le Comique, donner vne conduite sage & reguliere aux extrauagances & aux bizarreries

DE LA MORALE CHREST. 515 de l'amour; c'est à dire vouloir estre fou en vsant de la raison; qui sont deux choses irreconciliables & contradictoires. Neantmoins, si 1e dis qu'absolument il est impossible d'estre tout ensemble homme de guerré & bon Chrestien, ie tomberay en divers inconveniens irremediables. Car premierement il faudra ainsi passer dans l'opinion des Anabaptistes, qui condamnent toutes prises d'armes, & qui defendent aux Chrestiens de les porter. Or iusques icy on a tenu cette opinion pour erronée, & moy-mesme ie l'ay combatue dans les volumes precedens. Puis apres, il faudra condamner les premiers Chrestiens, qui bien qu'ils ayent apporté beaucoup de circonspection en cette occurrence, n'ont pas laissé pourtant de s'enroller dans la milice des Empereurs. Or si nous auons quelques reigles de nos comportemens à prendre d'ailleurs que de la Parole de Dieu, nous ne les pouvons mieux former que sur le modelle de la vie de cette Eglise primitiue. De Kk

516 SVITE DE LA DERN. PART. plus, il faudra que ie face le procés à quantité de gens de toutes conditions, qui font profession de la religion chrestienne, & mesme de la Reformée, qui n'ont point d'autre employ que celuy des armes, soit par la condition de leur naissance ou par celle de leur vocation. Et toutesfois non seulement il ne seroit pas iuste de les accuser tous de n'estre pas bons Chrestiens, mais ie sçay bien qu'il y en a quelques-vns mesmes de ceux qui sont les plus grands guerriers, qui sont en exemple de pieté & de toutes autres vertus aux autres hommes. En fin, ce seroit vne doctrine odieuse aux Princes, parce qu'elle leur rendroit comme inutiles vne bonne partie de leurs sujets. Car dequoy seruiroit, pour exemple, la noblesse au Roy, si elle auoit tout à fait renoncé à la guerre? Et que pourroit-on attendre de tant d'esprits militaires & de courages martiaux, sinon du desordre & de la confusion, si on leur retrachoit toute esperance d'employ quand les occa-

DE LA MORALE CHREST. 517. sions en seront presentées par la diuine Prouidence ? En effect, comme il seroit bien à desirer que les hommes jouissent tousjours d'vne si parfaite santé, que l'on n'eust point befoin de medecins ny de Chirurgiens, il seroit pareillement bien à souhaitter que les Estats iouissent toujours d'vne si costante & si profonde paix, que l'on eust point besoin de Capitaines ny de gens de guerre. Mais telle est la condition de la vie humaine, que dans nostre plus grande prosperité, nous deuons nous preparer aux aduersités qui nous peuuent arriuer, faire des leçons en Medecine & en Chirurgie au temps qu'il n'y a point ny de malades ny de blefsés, & mesme bastir des Sanità dans les endroits où on ne void point encore de peste. Parce qu'il est ineuitable que ces choses seront vtiles ou mesmes necessaires quelque iour, l'estat du monde estant dans vne vicissitude continuelle du mal au bien & du bien au mal, & le mal y estant beaucoup plus ordinaire que

518 SVITE DE LA DERN. PART. son contraire. De sorte que ce grand calme que nous voyons maintenant presque par toute l'Europe ne nous doit pas si fort resjouir, que nous mesprissons absolument de faire prouision des choses qui sont necessaires pendant la tempeste. La conjonction de ces grands astres de la terre qui qui se sont vnis depuis peu de temps, des Monarques de France & d'Espagne, du Roy d'Angleterre & de son Parlement, du Roy de Dannemark & des autres puissances du Septentrion, a produit cette tranquilité & cette serenité d'air & d'affaires que nous voyons maintenant. Si l'on en croit quelques vns de ceux qui se messent de speculer les astres des cieux, ils se ioindront de telle façon dans deux ou trois ans, & leur conjonction durera si longtemps au prix de ce qu'elle a accoustumé, qu'elle doit apporter vne espece de bouleuersement dans toutes les affaires du monde. Et ie sçay bien qu'il y a certaines gens qui se messent d'expliquerles predictions du Vieil & du

DE LA MORALE CHREST. Nouueau Testament, qui se figurent de grades reuolutions dans les lieux où lon void les choses ce semble bien & solidement restablies. Mais ie ne me fie ny aux contemplateurs des astres, ny aux interpretes des Propheties. Les coniectures de ceux cy sont pleines d'incertitude, & la science de ceux là est remplie de vanité: & s'il m'est permis d'y adjouster encore cela, l'esprit des vns & des autres est indocile tout à fait, si tant d'experiences que leurs deuanciers & eux mesmes ont faites de la futilité de leurs raisonnemens, ne leur a appris à s'appliquer à des contemplations plus solides. Outre la connoissance que l'on peut puiser de la lecture des auteurs, où l'on void que les tireurs d'hOroscopes,& les expositeurs des Oracles, & toute cette sorte de deuins, se sont honteusement trompés en mille & mille occasions, il y a quarante cinq ans entiers que de temps en temps i'en oy toujours discourir quelcun, qui debite auec vne merueilleuse har520 SVITE DE LA DERN. PART. diesse des productions de son occupation, que i'ay toujours veu refuter par les euenemens des choses. Il y a deux sortes de constellations & de propheties, de la consideration desquelles on peut former des conje-Etures beaucoup plus certaines que ne sont toutes celles de ces messieurs. Les costellations sot celles des vertus &des vices, &les propheties sot celles des promesses & des menaces, par losquelles Dieua denocé sa malediction fur ceux-cy, & fait esperer ses benedictions sur la pratique de celles là. Des vnes & des autres respectiuemet l'execution est absolument indubitable en ce qui regarde le siecle à venir. Quant à ce qui concerne le present, Dieu s'est reserué d'en disposer comme il le iuge expedient pour la gloire de son Nom, & profitable au bien des hommes. Car il suspend assés souvent les effects de sa colere, bien que les pechés des hommes les meritent manifestement; & quelques-fois il exerce son Eglise par diuerses sortes d'afflictions, en

DE LA MORALE CHREST. 521 vn temps auquel il paroist asses clairement que c'est plustost pour prendre des espreuues de sa patience, que pour corriger sa corruption. Neantmoins il est certain que cette dispensation est plus rare, & que d'ordinaire ses chastimens suivent les vices, & ses benedictions les vertus. De sorte que lors que l'on void celles cy regner, il y a tout sujet d'esperer quelque bien fauorable traittement de la main de Dieu: & quand on void le desbordement de ceux-là, on a tout sujet d'apprehender quelque notable traict de son indignation, & quelque declaration extraordinaire de sa vengeance. Or ne veux je point faire de reslexion particuliere sur la constitution de ce temps; il me suffira de dire qu'en tout temps, si la guerre est vn sleau de Dieu, il n'y a point de si profonde paix où on n'ait sujet de la craindre. C'est pourquoy ie ne feray pas difficulté d'expliquer icy comment le Christianisme veut que ceux qui la sui-uent s'y comportent. Et la premiere

522 SVITE DE LA DERN. PART. chose que i'ay à dire là dessus est que ceux qui l'entreprennent, (or il n'y a que les puissances souveraines & establies de par Dieu, & les Republiques libres, qu'il faut conter entre les puissances, qui le puissent faire legitimement,) doiuent prendre garde de bien prés aux causes qui les-y meuuent. Car selon le dire de Demosthene en quelque lieu, comme quand on entreprend le bastiment d'vne maison, ou la construction d'vn nauire, on a principalement soin de rendre bien fermes les fondemens & les parties du bastiment qui doiuent soustenir les autres, ainsi faut-il en entreprenant des actions d'importance, regarder que les causes qu'on en a soyent vrayes, iustes, & solides, sil'on veut que le succés en soit bon. Il n'y a rien de si ordinaire au monde que de vouloir faire passer des pretextes pour des causes veritables, & nommément à la guerre, comme il ne se verisie que trop par l'histoire des Conquerans. La justice est vne si

DE LA MORALE CHREST. 523 belle chose qu'il n'y en a presque aucun d'entr'eux, qui auant que de prendre les armes pour vne conqueste, n'ayét fait quelques belles declarations & publié quelques Manifestes, pour rendre conte de leurs resolutions: & là ils ont desployé le plus plausiblement qu'ils ont peu les motifs de leurs entreprises, en y apportant toutes les couleurs imaginables de la justice & de la raison. Mais au fonds, c'est l'ambition de dominer, & la conuoitife d'auoir l'autruy, & la ialousie de la grandeur d'vn voisin, & l'ostentation de la sienne, & le desir d'acquerir de la gloire par les armes, & d'autres passions semblables, qui leur font ordinairement mettre l'Univers sans-dessus-dessous. Encore, d'entre les causes injustes qui les y portent, ce sont là les plus honorables; les grades guerres ayant quelquesfois des causes secrettes qui seroient pleines de honte & de deshonneur si on les sauoit. Vn grand personnage disoit autrefois qu'Homere auoit monstré en toutes choses

524 SVITE DE LA DERN. PART. qu'il estoit vn grand personnage, & parfaitement entendu, non seulement en la poësse, dont il est le pere & le maistre, non seulement dans les sciences & dans les arts, ayant ietté dans ses poëmes les fondemens de toutes les sectes des Philosophes, & donné quelques beaux enseignemens à toutes forres d'artisans; mais encore dans les affaires du monde & dans le mestier de la guerre, ayant fourny des preceptes aux politiques & aux Capitaines, & mesmes à Alexandre-le-Grand. Mais qu'il n'y a rien en quoy il ait plus fait paroistre son iugement, qu'en ce qu'il a mis pour fondement de cette grande guerre de Troye, qui a commis la Grece & l'Asie l'vne contre l'autre, & ruiné de fond en comble vn royaume bien florissant, l'enleuement de la belle Helene & la ialousie deMenelaus: parce que ce sont bien souuent des intrigues d'amourettes, & des ressentimens de cette nature, qui arment les Princes les vns contre les autres, & qui remplissent leurs

DE LA MORALE CHREST. 525 Estats de confusion. Cependant à bien parler, vne guerre entreprise pour vne cause vaine ou injuste, n'est rien sinon vn brigandage, qui est dautant plus pernicieux que ne sont ceux qu'on reprime seuerement par les loix publiques, qu'il est plus grand & autorisé. Ce n'a pas esté seulement vn Pirate qui a dit qu'Alexandre & luy ne differoient en rien sinon que l'yn couroit la mer auecque de grandes flottes, & luy auec vn seul brigantin. Les Scythes, dans la harangue qu'ils luy firent, luy parlerent à peu prés de la mesme sorte: Seneque le nomme vn voleur; & de quelques grandes vertus dont il fust doué d'ailleurs, quelques Sages luy ont donné la qualité de meschant, parce qu'ils ont creu que pour sa seule ambition il remplissoit toute la terre de desordres & de rauages. Et de fait les offenses que les Perses auoit faites aux Grecs estoient trop vieilles pour s'en ressentir de la façon : & quant aux autres nations qu'Alexadre disoit qu'il

526 SVITE DE LA DERN. PART. vouloit ciuiliser, les carnages qu'il en faisoit estoient vne estrange maniere de les guerir de leur barbarie. La vraye cause de ses armes estoit vne ambition si vaste & si démesurée, quelle se proposoit, non l'empire des Perses seulement, mais la domination de toute la terre habitable. C'est donc vne chose certaine, & qui a esté reconnuë par les Payens mesmes, que sans vne iuste cause la prise des armes est iniuste & odieuse aux hommes & à Dieu. Mais le Christianisme va plus auant. Il veut que les causes en soyet tres-iustes, & encore, qu'on ait fait toutes choses possibles & imaginables pour en euiter la necessité. Comme nous n'auons point de procés sinon en demandant ou en defendant, ainsi toutes les guerres que les puissances souveraines ont entr'elles, sont ou offensiues ou defensiues. Il est vray que comme il arriue souuent dans les procés, que le defendeur deuient incidemment demandeur, & au contraire; il arriue aussi dans la guerre, que celuy qui au com-

DE LA MORALE CHREST. 527 mencement se defendoit seulement, attaque, & que celuy qui auoit le premier attaqué, se dessend reciproquement. Mais les guerres qui dans leur progrés deuiennent ainsi meslées, sont ordinairement simples au commencement. Pour ce qui est des defensiues, si la cause de l'atta-quant est iniuste, il y a dans la defensiue vne incuitable necessité. Car outre qu'il est raisonnable que chaque Puissance souueraine conserue les interests de son Estat, l'attaquant ne donne point de lieu à la deliberation,&opprimeroit indubitablement son voisin, s'il ne se seruoit de ses moyens pour se defendre. Et quoy que comme nous l'auons veu ailleurs, vn homme qui est attaqué par son ennemy l'espée à la main, est aurorisé par la nature de garentir sa vie, mesmes aux despens de celle de son ennemy, si estce que la cause d'vne puissance souveraine qui est attaquée par vn voisin, est encore plus fauorable. Car celuy là n'en doit venir à l'extremité qu'apres auoir fait ho-

528 SVITE DE LA DERN. PART. norablement tout ce qui se peut pour l'euiter, estant mesmes permis ou commandé par le Christianisme de fuir, plustost que d'oster la vie au prochain, qui porte l'Image diuine. Encore auons nous remarqué qu'il n'est pas absolument interdit à vn Chrestien de se laisser plustost tuer, que d'oster la vie à son prochain pour la conseruation de la sienne propre. Mais tant s'en faut qu'vn Monarque soit obligé par la Religion Chrestien-ne, de laisser plustost ruiner son Estat, que de ruïner celuy par qui il est attaqué, que mesmes il ne luy est pas permis de fuir quand on l'attaque. Parce qu'il a esté preposé de Dieu pour la conservation de l'Estat sur lequel il est estably, & que de lascher le pied en vne telle occasion, c'est l'exposer en proye à son aduersaire. Et s'il y a des gens dont le courage ou la naissance & la condition ne permet pas de fuir deuant vn ennemy & vn aggresseur, il est encore moins permis à vn Prince souucrain qu'à vne personne priuée. Parce

DE LA MORALE CHREST. 529 Parce que la diminution de la reputation du courage en vne personne priuée, n'est peut estre pas preiudiciable à la conseruation de sa vie, y ayant beaucoup de gens qui viuent en paix sans estre en estime d'estre vaillans; au lieu que la conseruation des Princes & des Estats depend de la reputation de leur valeur & de leurs forces. Quant aux guerres offensiues il y a sans doute moins de necessité. Car quelque iuste cause que l'on ait de se plaindre d'vn voisin, si est-ce qu'on n'en est pas toujours reduit là , qu'il faille necessairement perir, ou en témoigner son ressentiment par la violence des armes. Neantmoins, la condition des Puissances est encore differente de celle des personnes particulieres en cet egard. Car vn homme n'est pas obligé à poursuiure la reparation de tous les torts qui luy sont faits, & il y en a beaucoup de legers qu'il vaut mieux dissimuler que d'en venir aux querelles. Et s'il luy en est fait de si grands qu'il ne foit ny iuste ny con-L. l

530 SVITE DE LA DERN. PART. uenable de les supporter, la necessité d'en poursuiure la reparation par les voyes de fait, ne luy est point imposée. Car il a les luges & les tribunaux deuant lesquels il se peut pouruoir, sans qu'il soit besoin qu'il se face raison à soy-mesme. En fin, là où il n'y a point de tribunaux dressés pour s'y pouruoir iuridiquement, encore peut-il s'abstenir en diuerses occasions de se ressentir des outrages qu'on luy fait, en se seruant des armes & de la main, parce qu'il n'a que son interest à conseruer, qu'il peut relascher quand il luy plaist, fans faire tort à personne. Au lieu que presque tous les torts qui sont faits ou aux Estats ou aux Puissances, doiuent estre estimés importans: qu'ils n'ont point de iuge au dessus d'cux ausquels ils se puissent addresser pour en auoir la raison: & que dans les torts qui leur sont faits sont souuent enclos les interests de plufieurs millions d'ames. Mais soit offensiue ou desensiue que soit la guerre, & quelques iustes que soyent

DE LA MORALE CHREST. 531 les causes qu'on a de la faire ou en attaquant ou en repoussant, le Christianisme a trois preceptes a y donner, l'vn pour le commencement, l'autre pour le progrés, & le dernier pour la fin, quand la guerre se ter-mine par la victoire. Et pour ce qui regarde le commencement de la guerre, on n'y vient pas d'ordinaire si brusquement, quelle ne soit precedée de quelques allées & venuës, de quelques plaintes & de quelques exceptions, & de quelques ambassades reciproques. Et les Anciens estoient si scrupuleux en cela, que quelques iustes que fussent leurs plaintes, ils eussent pourtant creu leurs guerres injustes, s'ils les eussent entreprises sans y auoir premierement employé toutes les ceremonies necessaires, tant pour se plaindre à ceux de qui ils auoient receu le tort & en auoir reparation sans en venir aux voyes de fait, que pour denoncer la guerre publiquement quand il y falloit venir, & par l'entremise des herauts d'armes. Et ie ne sçay s'il

Ll2

534 SVITE DE LA DERN. PART. n'y a point quelque chose de mysterieux dans cette coustume qu'Ho-mere fait pratiquer à ses heros, qui ayans la pique à la main, & la guerre declarée, & se trouuans en prosence les vns des autres pour vuider leurs querelles par le combat, ne le commencent iamais pourtant qu'ils ne se soyent premierement fait quelques harangues reciproques. Comme s'il vouloit donner à entendre que la nature ayant donné aux hommes la main pour les executions de fait, & la raison pour disputer entr'eux du droit, il n'en faut iamais venir au combat, que la raison n'ait premierement ioué son ieu. En essect les bestes mosmes grondent quelque temps auant que de se prendre mutuellement au poil; & s'il y en a quelques vnes qui en viennent d'abord au combat, il faut qu'il y ait en elles quelque ferocité extraordinaire. Il est donc du devoir des Princes Chrestiens, à qui Dieu a donné non la raison seulement, mais quelque chose de plus, de tascher d'euiter le

DE LA MORALE CHREST. 533 conflict auec leurs voisins, en employant toutes sortes de moyens auant que de rompre. Et comme l'Apostre saince Paul dit à ceux de Corinthe qu'il vaut mieux qu'ils endurent que tort leur soit fait, que d'aller plaider les vns contre les autres deuant les tribunaux des infideles, parce que cela deshonore l'Euangile de nostre Sauueur; il seroit plus expedient aux Princes Chrestiens de dissimuler & d'endurer diuerses choses, qui ne tendent pas à leur deshonneur ny à la ruine de leurs Estats, que d'en venir aux mains. Car il y a encore dans la guerre quelque chose de plus contraire au Christianisme, & qui en deshonore plus la profession, que non pas dans les procés que les particuliers peuuent auoir deuant les Iuges infideles. Car quoy qu'il en soit, c'est la raison qui agit deuant les tribunaux, & c'est à la justice que l'on s'addresse, & aux puissances instituées de Dieu pour la rendre, de quelque religion qu'el-les soyent; au lieu qu'à la guerre c'est L 1 3

534 SVITE DE LA DERN. PART. la force qui domine, ou, comme on dit, le hazard des armes, qui opprime quelquesfois la iustice, & qui mesme quand il la rend, fait vne infinité de choses qui ne s'y accordent pas. Et si les Magistrats infideles ont sujet de mal-parler de la Religion Chrestienne quand ils voyent ceux qui la professent se harceller les vns les autres pour ce qu'on appelle du bien, les nations Payennes, & les ennemis du nom de Christ, ont bien encore plus de matiere de scandale quand ils voyent les Princes & lès Peuples Chrestiens s'exterminer les vns les autres, pour des choses de peu d'importance, comme ils font ordinairement. Quant aux progrés de la guerre, il est sans doute plus difficile de l'arrester quand vne fois elle est commencée, que de l'empescher quand elle ne l'est pas. Les esprits s'échauffent en combattant; les bons succés esseuent les vns & les rendent siers & întraittables : les mauuais despitent les autres, & tandis qu'il leur reste quelques forces, ils veulent re-

DE LA MORALE CHREST. 535 parer leurs dommages & leur honneur. Auant que d'entrer dans le ieu, on peut considerer de sens-froid combien il est perilleux de s'y commettre, & comment plusieurs s'y sont ruinés. Mais lors qu'on en a vne fois goulté, il est malaisé de s'en retirer, parce que le gain alleche, & qu'on se pique par la perte, pour iouër à quitte ou à double, comme on parle; l'esprit de l'homme s'emportant à des excés merueilleusement estranges, quand vne fois il est aueuglé par la passion. Et neantmoins quand la raison ne dicteroit pas qu'il y faut mettre quelques bornes, quand l'experience n'enseigneroit pas qu'aussi bien à la guerre qu'au jeu, la chance tourne assés souuent, & qu'il arriue de grandes disgraces qui flestrissent tout l'honneur des victoires precedentes, & qui mettent bien loin au dessous celuy qui pensoit triompher de son ennemy, le Christianisme apprendroit aux Princes à moderer leurs passions, quel qu'eust esté le succés de leurs armes.

538 SVITE DE LA DERN. PART. Car il est de la pieté de celuy qui y a eu du desauantage, d'y reconnoistre la main de Dieu, & de s'humilier sous elle, pour consentir plustost à quelques conditions, fussent elles mesmes quelque peu desraisonna-bles, que de s'opiniastrer sierement à tout hasarder. Et il est de la charité & de la generosité de celuy dont les affaires vont le mieux, de relascher plustost de ses auantages & de ses pretentions, que de continuer vne guerre qui quand les succés en seroient toujours heureux, est toujours cause de beaucoup de desolations, & funeste à vne infinité de personnes. Et c'est ce que le Roy a fait depuis quelques mois. Car il estoit en tel estat que s'il eust voulu suiure le cours de ses victoires, & s'abandonner à l'ambion, il ne pouuoit encore auoir vne ou deux campagnes auffi fauorables que les precedentes, qu'il n'enleuast absolument au Roy d'Espagne de belles & fleurissantes Prouinces dans le cœur desquelles la guerre se faisoit. Et neantmoins il

DE LA MORALE CHREST. 537 a mieux aimé relascher quelque chose de ses conquestes, & laisser là les belles & grandes esperances qu'il auoit de les porter beaucoup plus auant, pour procurer la paix à la France & à tous les Estats voisins, & la moyenner encore par ses Ambassadeurs dans le reste de l'Europe. En quoy il a monstré qu'il sauoit premierement vaincre ses ennemis, & puis apres, cequi est beaucoup plus, qu'il se sauoit vaincre soy-mesme. En fin, c'est dans la victoire mesme, quand on a tout à fait terrassé son ennemy, que les Princes peuuent faire voir s'ils ont receu bien profondement dans le cœur l'impression du Christianisme. Scipion l'Africain, apres vne grande bataille gaignée en Asie contre Antiochus, ne luy proposa point d'autres conditions de paix que celles qu'il auoit offertes auant la victoire; & en allegua cette raison, que les Romains d'vn costé faisoient la guerre pour la iustice, & que de l'autre ils estoient comme asseurés de la victoire, mes-

538 SVITE DE LA DERN. PART. mes auant le combat. Que leurs pretentions n'en estoient pas deuenuës plus iustes par le gain de la bataille, & qu'ils n'en auoient pas le courage plus esleué pour voir effectiuement arriué ce que leur valeur & leur discipline militaire leur auoit fait esperer. C'estoit veritablement vne generosité digne de la grandeur des actions de ce personnage. Ale-xandre ayant défait Porus, luy rendit son Royaume, & y adjousta encore quelques dominations, parce qu'il l'auoit reconnu digne de regner, & que d'ailleurs quant à luy il ne combattoit que pour la gloire. Quand le Roy François premier eut esté fait prisonnier à la bataille de Pauie, & que la nouuelle en eut esté portée à l'Empereur Charles-Quint, vn des Euesques d'Espagne, à qui il auoit demandé aduis comment il deuoit vser de ce grand succes que Dieu luy auoit enuoyé, luy conseilla de mettre son prisonnier en liberté, sans en tirer autre auantage que d'auoir au dernier point obligé l'vn des plus

DE LA MORALE CHREST. 539 genereux Princes de l'vniuers, & qui luy en sauroit mieux témoigner son ressentiment; ce qui donneroit la paix à toute la Chrestienté, qui estoit troublée de tous costés par le mal-entendu de la France & de l'Espagne. Outre qu'il s'acquerroit parce moyen vne si grande gloire & qui dureroit si long-temps, que cela vaudroit mieux que tous les auantages qu'à la rigueur il pouuoit tirer de sa victoire. Et de fait s'il eust suiuy ce conseil il eust incomparablement plus fait pour luy, qu'il ne fit en preferant celuy du Duc d'Alue. Dans les duels ont tient ceux-là, non seulement pour plus Chrestiens, mais mesmes pour plus genereux, qui donnent la vieà l'heure qu'ils la peuuent oster, quand mesmes ils se mettroient au hasard d'estre une autrefois obligés à subir le sort des armes. Ainsi ie tiens pour indubitable qu'vn Prince qui se seroit absolument rendu le maistre & de la personne & de l'Estat de son voisin, feroit vne chose beaucoup plus digne de la pieté & de la

540 SVITE DE LA DERN. PART. generosité, s'il luy rendoit & la domination & la liberté, que s'il se preualoit autrement de la victoire. Car elle luy donne bien à la verité, par le consentemet des Nations, le droit d'en vser comme il luy plaist : mais il seroit beaucoup plus beau de n'en vser pas, & plus conuenable au Christianisme. Et neantmoins il y peut auoir deux raisons ou deux occasions d'en vser. L'vne est quand absolument la seureté de l'Estat du victorieux le requiert. Car la crainte qu'on a de la puissance d'vn voisin, n'est pas vne iuste cause d'entreprendre vne guerre offensiue contre luy, si on n'en a point d'autre sujet. Son droit de posseder & de gouverner son Estat estant absolument en son entier, il n'est pas iuste de l'y troubler, sous ombre que sa puissance vous fait ombrage. Mais quand la victoire a changé la constitution des choses, & qu'elle a fait passer ce droit là entre vos mains, la crainte iuste & legitime que vous pouués auoir que vostre generosité vous tourne à dom-

DE LA MORALE CHREST. 541 mage, & qu'elle arme vos ennemis contre vous, vous peut bien faire prendre le party de la prudence, pour vous asseurer contre eux. L'autre est, l'auancement de la Religion, quand vous le pouués notablement procurer par l'vsage de vostre victoire. Car quand Philippes second dressa cette grande armée nauale que l'on nomma l'inuincible, pour la conqueste de l'Angleterre, sans auoir aucun autre sujet d'y faire la guerre, sinon le restablissement de la Religion Romaine, qui en auoit esté expulsée par la Reyne Elisabet, il faisoit bien sans doute vne chose fort injuste, & dont aussi le succés fut à sa confusion. Comme ie l'ay dit ailleurs, la diuersité de la Religion n'est pas vne legitime cause d'entreprendre de telles inuasions: autrement il faudroit que la chrestienté fust en des combustions continuelles. Et si la difference de creance au fait de la religion, nempesche pas que les Payens & les Turcs ne possedent legitimement les parties de la terre &

542 SVITE DE LA DERN. PART. de la societé humaine, que la Prouidence de Dieu leur a affignées; beaucoup moins autorise-t-elle les entreprises des Princes chrestiens les vns contre les autres, quand ils n'ont point d'autre sujet de leurs querelles que la diuersité de leurs sentimens. Mais si la Reyne Elisabet, à qui on auoit ainsi declaré la guerre, se fust en consequence renduë maistresse du Portugal, ou de quelque autre partie considerable de l'Espagne, comme quelques vns le luy cofeilloient, elle eust ou peu ou deu vser du droit que sa victoire luy eust acquis, pour prouigner en ce pais là ce quelle croyoit estre la verité du sain & Euangile. Mais ie ne veux pas m'engager plus auant dans l'explication des causes pour lesquelles la prise des armes ou l'vsage de la victoire est legitime aux chrestiens, parce que cela me tircroit trop loin,& que c'est vne matiere plus messée de Politique que de Morale. Il me suffira de dire icy que si les Princes chrestiens veulent par leurs actions respondre à la

DE LA MORALE CHREST. 543 sainteté de cebeau nom,&garder leur conscience pure deuant Dieu,ils doiuent apporter vne merueilleuse circonspection à determiner en leurs conseils les causes de faire la guerre. Parce qu'ils sont establis pour l'administration de la justice, & il semble que la guerre soit son ennemie declarée. Ils sont preposés pour la conseruation de la societé des hommes entr'eux, & la guerre la renuerse. Ils sont les tuteurs & les protecteurs de la vie des humains, & la guerre en est l'ange exterminateur. Ils sont à la verité armés de l'espée pour faire vengeance en ire de ceux qui font mal; mais la guerre assés souvent emporte les gens de bien, & fait que les meschans triomphent. En fin, la puissance qui leur a esté donnée de par Dieu dans la Police, doit autant qu'il se peut faire raisonnablement, estre employée à l'auancement de la Religion; & la vraye pratique de la religion n'est que trop souuent incompatible auec celle de la guerre. Les esprits mili-

544 SVITE DE LA DERN. PART. taires se sont autrefois plaints de lacques Roy de la grand'Bretagne, de ce qu'il laissoit moisir leur vertu, & de ce qu'ayant eu de si belles occasions de faire la guerre en Alemagne, & aufquelles mesmes il sembloit estre inuité par tant de raisons, il les a laissé perir, & auec elles les affaires des Protestans & du Roy de Boheme son gendre. Il n'est ny de mon mestier ny de mon dessein, d'interposer icy mon iugement sur ses actions, ny de decider si la prudence politique l'obligeoit à s'opposer au torrent des victoires de l'Empereur. Ie diray seulement que s'il a creu mal sondée l'entreprise de son gendre contre l'Empereur, & si ç'a esté d'vn costé l'amour de la paix, qu'il portoit en sa deuise, & de l'autre celle de la iustice, dont il faisoit profession, qui l'a empesché de se mesler dans ces mouuemens, ce sont des motifs qu' ne se peuuent assés louer, quelque jugement que les esprits remuans & les courages militaires facent au contraire.

者指標機能能能能能能能能能能能

DV DEVOIR CHRESTIEN

des Generaux d'armée à qui les Souuerains commettent la conduite & l'administration de leurs guerres.

T'Ay dit en quelque autre lieu que quand vne fois la puissance Souueraine d'vn Estat a resolu de faire la guerre, ce n'est pas à ceux qui luy sont sujets à s'enquerir si les causes en sont iustes & legitimes, pour regler leurs actions par le iugement qu'ils en sont. Autrement, si cela estoit remis au iugement des particuliers, & que chacun se peust dispéserd'yseruir ou de n'y seruir passe Souuerain, selon l'opinion qu'il voudroit auoir de la justice de ses armes, on ouuriroit vne grade porte à la desobeissace & à la cosusion. C'est au Prince à iuger de ce qui est iuste & expedient

M m

546 SVITE DE LA DERN. PART. pour le bien de l'Estat : & aux sujets, chacun selon sa vocation, à contribuer de tout leurpouuoir à l'heureux succés de ses entreprises. Neantmoins, cela ainsi dit generalement ne laisse pas peut estre de souffrir quelque exception. Dans les guerres qui se font entre deux Princes qui sont de mesme sentiment en la matiere de la Foy, cette maxime doit passer sans aucune espece de reserue ny de limitation. Car ils ne peuuent auoir de dispute entre eux que pour des affaires politiques, puis qu'ils sont de mesme profession en la Religion. Or c'est aux Princes Souuerains à iuger dans les choses politiques du bien & de l'Interest de leurs Estats, & à leurs sujets de tenir pour iustes les resolutions qu'ils y ont prises. Dans les guerres qui se font entre vn Prince Chrestien & vn Infidelle, comme sont les Mahometans & les Payens, il en est encore de mesme. Car soit pour la Religion ou pour la Politique que les armes se prennent de part & d'autre, vn sujet doit croire

DE LA MORALE CHREST. 547 que son Prince y est bien fondé; & parce que du costé des Chrestiens on n'y employe pas des Turcs, & que du costé des Turcs on n'y employe pas des Chrestiens, les Capitaines & les soldats n'y peutient sentir de gesne dans la conscience. Dans les guerres qui se font de Prince Catholique à Protestant ou à Reformé, on peut bien entrer en quelque consideration de la diuersité des causes qui les y portent. Car si le demessé n'est que pour des interests d'Estat seulement, la question n'est pas malaisée à vuider, vn sujet qui est obligé par sa vocation à seruir son Prince à la guerre, n'est pas necessité pour sa conscience d'y mettre la religion en consideration. C'est à luy à faire ce qui est de son deuoir, en remetrant à la Prouidence de Dieu les choses qui peuuent concerner sa gloire. C'est pourquoy les Anglois ayant assisté ceux de la Religion aux premiers troubles, & ceux de la Religion leur ayant mis le Haure de Grace entre les mains, pour la seureté de leurs

548 SVITE DE LA DERN. PART. troupes & de la restitution de leur argent; quand apres la paix faite ils le voulurent retenir, le Prince de Condé, & ceux qui l'auoient suiuy à la guerre, allerent auecque les Catholiques mettre le siege deuat cette place, & l'arracherent d'entre les mains des Anglois. De mesmes, du temps de la Reyne Elisabet il y a eu des Anglois qui faisoient profession de la Religion Romaine, qui luy ont rendu service contre l'Espagnol dans les demessés politiques qu'elle a eus. auecque luy, & en Allemagne il y a eu des Princes Protestants qui ont pris le party de l'Empereur contre le feu Roy de Boheme, parce qu'ils ont eu cette opinion que l'entreprise de ce Prince sur la Boheme estoit vne iniuste vsurpation. Et la raison de cela doit estre prise de ce que i'ay estably ailleurs, assauoir, que les hommes ont entr'eux de trois sortes de droits : dont les vns sont fondés en la Nature; les autres dependent de la societé politique: & les troisiémes en fin, naissent de la communion

DE LA MORALE CHREST. 549 qu'ils ont en vne mesme religion. Quand tous ces droits là s'accordent dans vne mesme action, il en faut ioindre l'observation d'vn lien indissoluble. Mais quand il arriue que pour satisfaire au zele de religion, il faut violer les droits de la Nature & de la Police, alors si on s'y laisse emporter, ce n'est plus vn bon ny vn legime zele, mais il degenere en passion. Et cette passion est d'autant plus dangereuse, qu'elle se couure de l'apparence de la pieté, & que sous ce voile là elle pense mettre à couvert toutes sortes de crimes & de desordres. De sorte qu'on est contraint de dire apres; Tantum religio potuit suadere malorum! Apres la mort du Roy Henry III. il se trouua de plusieurs sortes de Catholiques en France. Car il y en auoit qu'on appelloit Ligueurs, que le pretexte ou le zele de la Religion armoit contre leur Prince legitime, & contre les loix de l'Estat. D'autres n'estoient pas Ligueurs à la verité:mais la consideration de la Religion pourtant leur fit tomber d'entre les mains

550 SVITE DE LA DERN. PART. les armes qu'ils auoient prises pour la desense de leur Prince, quand ils virent que œluy qui estoit venu en sa place, n'estoit pas de mesme profession. D'autres en fin, quoy que en beaucoup plus petit nombre, ne mirent pas cela en consideration, & laissans la religion de leur Prince à Dieu & à sa propre conscience, ils se proposerent seulement ce qu'ils devoient à sa personne, & aux anciennes & fondamentales loix du Royaume, qui l'aploient legitimement à la Royauté. Et ceux-cy sans doute estoient plus Chrestiens que ny les premiers ny les seconds, quelque pretexte qu'ils prissent. Car en cela aussi bien qu'en toute autre chose, ce sont les commandemens de Dieu, & non pas le zele que nous auons pour sa gloire, qui sont la regle de nos actions; & l'obeissance luy est incomparablement plus agreable que les sacrifices. En fin, dans les guerres qui ne s'entreprennent que pour la religion seulement, il se peut faire que la conscience d'vn sujet se trouue beaucoup em-

DE LA MORALE CHREST. barassée. Car s'il est de mesme profession auec le Prince qui est attaqué par son Souuerain, il a d'vn costé l'obeissance qu'il doit à son Prince qui le tire, & de l'autre la persuasion qu'il a que la cause qui luy fait entreprendre la guerre, est tres-iniuste, & contraire à la gloire de son Sauueur. Neantmoins ie ne pense pas qu'il y ait en la terre aucun Potentat si déraisonnable, s'il est Reformé au Protestant, qui vueille obliger ceux de ses sujets qui sont catholiques, à faire la guerre à des Catholiques pour leur religion seulement; ny, s'il est Catholique Romain, qui vueille contraindre ceux de ses sujets qui sont Reformés, à faire la guerre à la Religion reformée. Et ie ne diray pas seulement que la prudence l'en empesche, parce qu'il est impossible qu'ils s'y portent courageufement, leur conscience & leurs inclinations repugnant à la victoire: ie dis queles sentimens du Christianisme mesme l'en doiuent destourner. Car pour suiure ou pour seruir gayement son Prince à la guerre, il faut ou

SVITE DE LA DERN. PART. estre persuadé qu'il a bonne cause, ou au moins auoir cette satisfaction en son ame, qu'on n'est point tenu de iuger si elle est mauuaise, & qu'on suit simplement sa vocation. Or en cette occasion la conscience est profondement imbuë de cette persuasion, que la cause de la guerre est souveraine-ment iniuste, puis qu'elle est directement contre Dieu. Et il ne faut pas icy ny que les Princes Reformés disent que la Religion Romaine est mauuaise, ny que les Catholiques Romains diset que la Religion Reformée est heretique, & ennemie de la verité de nostre commun Sauueur. Il suffit que chacun de son costé est persuadé que la Religion qu'il professe est la seule bonne, & que la contraire ne vaut rien. Car la conscience estant vne fois teinte de cette persuasion, desormais toutes les actions qui se font au contraire sont vicieuses. Et il ne convient pas aux Princes Chrestiens de contraindre les hommes à pecher, ce qui en telle occasion est absolument ineuitable. Que s'il se trou-

DE LA MORALE CHREST. uoit quelque Prince ou si peu équitable, ou si peu prudent, que de passer par dessus ces considerations, la desobeissance qu'on luy rendroit ne seroit pas criminelle en vne telle occurrence. Carle respect que l'on doit aux Princes est fondé sur le commandement que Dieu nous a donné de leur obeir. Or tant s'en faut qu'il soit presumé nous auoir commandé de pecher en leur obeissant, qu'il est presumé auoir ordonné le contraire. Et quand il a estably les droicts des Souuerains sur leurs sujets, il s'est sans doute reserué les siens; en establissant, di-je, la domination des Potentats sur les biens & sur les corps, il a retenu tout entier l'empire sur la conscience. Cela ainsi posé, le premier deuoir d'vn Capitaine à qui vn Prince Souuerain donne la conduite de ses armées, est celuy de la fidelité. Car il en est de cela comme de toutes autres administations, où l'Apostre Saint Paul dit qu'il est requis en premier lieu que tout dispenfateur soit fidelle. Et i'appelle fidelilité maintenant cette disposition d'a-

SVITE DE LA DERN. PART. me qui fait qu'vn homme regarde que celuy qui luy a donné vne commission soit serui ponctuellement, & qu'il n'y ait aucune consideration, quelle qu'el-le soit, qui en diuertisse. Et cela enuelope particulierement trois choses. La premiere, de n'auoir aucune intelligence auecque l'ennemy, comme il est souuent arriué que des Generaux d'armée, & des Gouverneurs de places, & d'autres gens de commandement, se sont au preiudice de leurs maistres entendus auec ceux à qui ils deuoyent faire la guerre, soit en les espargnant dans les combats, ou en leur laissant prendre quelques places qu'ils eussent peu secourir s'ils eusfent voulu, ou en quelque autre maniere que ce soit, en conniuant à leurs desseins, & en leur laissat de propos deliberé prendre quelques auantages. Et par cela il ne faut pas entendre la seule persidie ouuerte, qui fait qu'vn homme se débauche du service de fon Prince, & qu'il liure ou ses armées ou ses places à l'ennemy, comme nous en auons veu quelques exemples de

DE LA MORALE CHREST. 555 nostre temps. Il y faut aussi comprendre les artifices qui font durer la guerre, afin d'auoir tousjours de l'employ: comme on dit du Mareschal de Biron le pere, qu'il aimoit tellement l'autorité du commandement, qu'il a de guet-à-pens laissé eschap-per diuerses belles occasions, à dessein de ne voir pas la fin des affaires. Quoy, dit-il vne fois à son fils, qui estoit ieune, & qui poussoit les choses plus viuement, veux tu donc que nous aillions planter des choux à Biron? Ces gens font proprement comme ces Chirurgiens dont on dit qu'ils ne demandent que playe & bosse, & qui font durer les viceres, parce qu'ils en tirent du profit. Certainement outre l'infidelité que lon commet contre son Prince quand on en vse de la sorte, on monstre qu'on a l'inclination barbare, d'aimer la guerre pour la querre, & de prendre plaisir à l'essussion du sang. La seconde est de conseruer ses mains nettes, & dene faire point son profit aux despens de son Souuerain. Ce qui ne se doit pas non plus en-

556 SVITE DE LA DERN. PART. tendre seulemet, de ne receuoir des ennemis ny cotributions ny gratificatios qui puissent preiudicier aux affaires, mais de ne faire point de griuelées sur les payemens des gens de guerre, & ne les tourner point à son profit particulier. Car le premier approche bien prés de la perfidie ouuerte: & l'autre affoiblit les troupes, & descourage ceux qui y demeurent, & cause quelques fois des mutineries, des seditions & des débandades, qui apportent d'étranges inconueniens. On creut au-trefois que la défaite de la Bicoque, qui gasta nos affaires en Italie, estoit venuë de là: & il est certain que la mutinerie des Suisses y arriua faute de payement. Mais le General de l'armée s'en iustifia, & le malheur en tomba sur ceux qui n'en estoient pas coupables. On reprocha au Conestable de Lesdiguieres que les affaires n'a-uoyent pas bien reussi en son expedition d'Italie, parce qu'il s'estoit approprié l'argent destiné au payement des troupes, & son humeur mes-nagere donnoit quelque couleur à

DE LA MORALE CHREST. 557 cette accusation. Mais il s'en defendit comme d'vne bassesse incapable de tomber en son courage, & la lettre qu'il en escriuit au Roy estoit pleine des caracteres d'vne treshaute magnanimité. Mais Monsieur le Prince de Turenne, à qui le Roy a donné depuis peu la qualité de Grand-Mareschal, n'a point eu besoin de se lauer de telles imputations, ayant toujours si fort éloigné de luy les soupçons de faire ce qui ne luy estoit pas permis, qu'il a mesme refusé de se preualoir des choses qui luy pouuoient estre licites. De forte qu'au lieu que si vn autre auoit eu les commandemens & les succés qu'il a eus depuis plusieurs années en Flandres, (& quant aux commandemens vn autre les pouuoit auoir, mais il estoit aussi difficile d'y auoir les mesmes succés, qu'on auroit de peine à trouuer vne vertu egale à la sienne,) il auroit peu s'y enrichir infiniment sans rien faire qui ne soit iugé permis en ce temps; il n'en a rien voulu remporter qu'vne reputation incompara-ble. La troisième finalement est de

518 SVITE DE LA DERN. PART. preferer le seruice de son Prince à tous ses interests quels qu'ils soyent. Car il y à des gens qui sont au dessus de l'auarice, & incorruptibles de ce costé là, qui se laissent aller à d'autres passions qui ne sont pas moins preiudiciables à leurs Maistres. Vous verrés deux Capitaines en vne armée, qui s'ils estoient separés, rendroient de grands seruices à l'Estat, à qui neantmoins l'ambition, & la fierté du courage, & la ialousie de l'honneur, fait faire quantité de choses preiudiciables au gros des affaires; & perdre de belles occasions. Il seroit plus à propos de ne commettre iamais le souuerain commandement d'vne armée à deux personnes egales, & l'histoire ancienne & moderne monstre qu'on s'en est toujours assés mal trouué. Mais quand cela arriue, il est du deuoir d'vn honneste homme de passer par dessus beaucoup de choses,&de ceder plûtost de son droit, que de se roidir pour ses interests au dommage de ceux de son. Prinee. Il y a vne merueilleuse difference entre les conquestes que les

DE LA MORALE CHREST. Apostres ont faites pour Iesus Christ, & celles que les Generaux-d'armée font pour les Princes de la terre. Et neantmoins des vnes ont peut tirer de bonnes instructions pour les autres. Quand il arriua de la contention entre Paul & Barnabas, ce ne fut pas parce que l'vn portast de l'enuie à l'autre, & qu'il ne peust supporter l'éclat de sa reputation. Outre les admirables dons de sanctification qui estoient en Paul, & qui estoient capables de mortisier en luy toutes ces mauuaises passions, il auoit de si merueilleux talens, qu'il n'auoit point de sujet d'auoir de la ialousie contre ceux d'vn autre. Et quant à Barnabas, il auoit assés monstré qu'il n'en estoit pas possedé non plus, lors que l'Eglise d'Antioche naissant, & Dieu y presentant à ses seruiteurs vne belle occasion de s'y employer, il alla luy mesme querir Paul en Cilicie pour y venir trauailler, quoy qu'il sçauoit assés que l'eminence de ses qualités luy donneroit indubitablement le premier lieu dans l'estime de cette Eglise. Ce fut vn autre sujet qui causa 560 SVITE DE LA DERN. PART. de l'irritation entr'eux, & s'il en est arriué entre deux Apostres de Iesus Christ, il en peut bien arriver aussi entre deux Generaux-d'armée. Mais tant y a que quand ils virent l'aigreur venuë à tel point qu'ils ne pouuoyent plus desormais seruir ensemble auec edification, & que leur mal-entendu trauerseroit l'auancement du regne de Iesus Christ, ils se separerent. Et si les choses politiques ont plus d'affinité auecque les militaires que non pas celles qui cocernent l'Eglise de Dieu, la douceur & l'equanimité auec saquelle Aristide supporta autrefois son' bannissement, peut encore fournir vn tres-bel enseignement à ceux que les Souuerains ont establis à la conduire de leurs armées- Car elle procedoit en partie de ce qu'il voyoit bien que la pique qui estoit entre luy & Themistocle au gouvernement de l'Estat, empeschoit le bien public, de sorte qu'il luy eschappa vne fois de dire que les affaires n'iroyent iamais bien si on ne les iettoit tous deux dans le Barathre. En telle occasion donques il

DE LA MORALE CHREST. 161 est entierement necessaire de ceder beaucoup de choses pour entretenir l'vnion; & si absolument il n'est pas possible de l'entretenir qu'en se separant, il faut tout à fait quitter la place. Que si celuy qui se sent le moins vtile à son Prince, prend cette resolution, il monstre qu'il a de l'affection,& se retirant du service de son maistre en cette façon, il luyen rend vn souuerainemet considerable. Apres la fidelité, cette charge demande en celuy qui l'exerce vne merueilleuse vigilance. Il est vray que c'est aussi vne qualité requise en tous ceux à qui on a commis quelque administration: mais elle l'est d'autant plus quand les charges sont d'vne extraordinaire importance. Vn Pilote a à rendre conte de son vaisseau & de tous ceux qui sont dedans, parce que l'on a commis leur salut à sa conduite. Mais s'il s'endort au gouuerhail, & que le nauire vienne à donner contre vn rocher & à s'y briser, ce n'est qu'vn vaisseau perdu, qui ne tire pas necessairement en consequence la ruine & le naufra562 SVITE DE A DERN. PART. ge de toute la flotte. Si celuy qui commande dans vne place frontiere la laisse par sa negligence surprendre à l'ennemy de l'Estat, il y fait vne bréche par laquelle il y peut entrer, & rauager vne Prouince toute entiere. Neantmoins tandis qu'il y a vne bonne armée sur-pied on se peut opposer aux progrés de l'ennemy, & reconquerir ce qu'il a pris, ou faire sur luy quelque entreprise dont le succés contrebalancera cette perte. Mais souuent dans vne armée est le rempart de tout vn Estat, de sorte que s'il luy arriue quelque desastre par la negligence du General, il n'y va pas seulement de la perte de ceux qui la composoient, il y va de la vie & de la liberté d'vn million d'autres. Et sous ce mot de vigilance, il faut aussi sans doute comprendre toute àutre circonspection, pour ne hasarder pas sans necessité, & sans y auoir bien regardé, ny vn combat general, ny vn siege grand & ruineux, ny vn assaut sanglant & meurtrier, ny aucune autre entreprise temeraire. A regarder par

DE LA MORALE CHREST: 553 vn visage l'action des Romains, quand apres la bataille de Cannes ils receurent Terentius Varro auec honneur; ce fut vn effect de leur magnanimité, de n'imputer pas les euenemens aux conseils, & de luy sauoir bon gré de ce qu'il n'auoir pas desesperé de la Republique. Mais à regarder l'action de Varro mesme par vn autre costé, il meritoit vn tout autre traittement; d'auoir par son inconsideration, perdu la plus belle armée que les Romains eurent iamais, esté cause de la mort de cinquante mille combattans, & mis l'empire Romain si pres du tombeau; qu'il n'y eut que son seul bon-heur; & cette vertu du conseil de Dieu qui auoit destiné Rome à commander à tout l'uniuers, qui en empescha la ruïne. Et bien que ce fust contre leur aduis que Pompée donna la ba-taille de Pharsale, & l'Admiral de Coligny celle de Moncontour, si est ce que puis qu'ils auoient tous deux le souverain commandement en la main, ils deuoient plustost, à quelque prix que ce fust, se tenir fermes dans

564 SVITE DE LA DERN. PART. leur bonne resolution de tirer la guerre en longueur, qu'en se laissant, com-me ils firent, emporter à l'impatience, & à la temerité de quelques-vns, mettre leurs partis dans l'estat où leurs défaites les reduisirent. Comme il ne faur pas nourrir les viceres quand on les peut guerir prontement sans met-tre le patient en peril, aussi faut-il differer l'vsage des incisions, & des grandes euacuations, & des remedes violens, quand on void manifestement qu'en les appliquant on luy fait courir risque de la vie. On dit qu'à mesure que Cesar vieillissoit il deuenoit plus retenu à hazarder des batailles generales. Ce qui ne venoit pas tant, à ce que l'on croid, du refroidissement de son sang, que de la crainte qu'il auoit que l'euenement des combats estant tousiours fort douteux, il ne lny ariuast quelque disgrace considerable, pour flestrir tous ses lauriers & toutes ses victoires precedentes. Et c'est pourquoy quelques-vns ont dit qu'en la bataille qu'il donna en Espagne contre les enfans de Pompée,

DE LA MORALE CHREST. 565 se voyant sur le point de la perdre, il fut en pensée de se donner de l'espée dans le corps, afin de ne voir point sa honte: ce qui arriua aussi au Prince d'Anguien à la bataille de Cerisoles. Si donc l'ambition d'vn homme, & le soin qu'il a de la conseruation de la reputation de sa gloire, l'oblige à estre ainsi consideratif, l'interest de tout vn Estat, doit encore beaucoup donner de la circonspection d'auantage. En troisième lieu, il est du deuoir Chrestien d'vn General, d'estre exact & scrupuleux en l'observation de la Discipline militaire. Ce que ie ne dis pas dautant que c'est de là, autant que d'aucune autre chose, que depend la conservation des armées & le succés des combats. Les Romains estoient vaillans: mais les Gaulois l'estoient peut estre autant qu'eux; & la façon de laquelle Cesar mesme les descrit,& la peine qu'il a euë à les subjuguer, en est vn sussissant témoignage. La Discipline presque seule a donné l'auantage à ces Conquerans, & les a rendus les dominateurs de toute la

566 SVITE DE LA DERN. PART. terre. Mais ce n'est pas à cela que ie regarde. Ie veux dire seulement que sans cette exactitude, les gens de guerre prennent vne telle licence en tous leurs comportemens, que c'est yn horrible débordement en toutes sortes de vices. C'est là que regne l'impieté, & qu'elle se témoigne principalement en toutes sortes d'épou-uantables blasphemes. C'est là qu'est l'ecole de l'insolence & de la dissolution, & que l'on se plonge en toutes sortes d'ordures. C'est là qu'on exerce toutes sortes de brigandes, de pilleries, & de picorées, tant sur amis que sur ennemis. C'est là que les hommes s'abandonnent à la cruauté, & qu'ils deuiennent plus impitoyables que les lions, si la seuerité d'vn General ne reprime leur violence. Il est vray que quelques fois les Generaux d'armée n'ont pas tout le pouuoir qui leur seroit necessaire pour bien pratiquer cette prudente seuerité. Car le nerf de la guerre c'est la discipline, mais le nerf de la discipline c'est l'argent. De sorte que quand on ne fournit pas à vn

DE LA MORALE CHREST. 767 Capitaine dequoy payer ses soldats regulierement, il est impossible qu'il les tienne absolument dans les termes de l'obeissance. Quelcun a dit autres fois qu'il y a deux points qu'vn Capitaine doit exactement obseruer, bien payer & bien pendre. Mais celuy cy depend tellement du premier, qu'il ne se peut pratiquer sans luy, de sorte que là où il y a faute de solde dans vne armée, il n'y a iamais faute de desordre, de mutinerie, & de licence. Et ceux de la Religion l'ont experimenté en France, pendant tout le temps des guerres ciuiles où ils ont fait vn party. Au commencement la vertu des Generaux, comme estoient le Prince de Condé, & l'Amiral de Coligny, grand ennemy de la licence militaire s'il en fut iamais: les exhortations des Ministres, qui preschoient sans cesse la iustice, la temperance, la modestie, & la pieté; & quelque zele de la soldatesque mesme, qui ne s'estoit point encore gastée par les armes, & en qui estoit toute fraische l'emprainte qu'y auoit faite la doctrine de 568 SVITE DE LA DERN. PART. la Reformation, tenoit toutes choses en tel estat que c'estoit le desordre le mieux ordonné du monde. Mais ces gens qui faisoient la guerre comme des Anges, deuinrent hommes incontinent: & en fin plusieurs degenererent de telle façon, qu'il y en eut qui firent tant de maux que des demons incarnés n'en feroient pas dauantage. Ce qu'il faut imputer à diuerses causes à la verité, & le messange de ceux de cette professió auecque les Politiques & les Malcontens, y a beaucoup contribué. Mais la principale source du mal a esté en la poureté des chefs, qui n'ont peu retenir l'autorité fur ceux à qui ils ne donnoyent point de paye. Quand l'Estat est reduit à vne telle necessité, qu'il n'a pas le moyen d'entretenir regulierement ses gens de guerre, de sorte que ses Capitaines sont contraints de souffrir beaucoup de choses d'eux qu'ils ne souffriroient point autrement, on est obligé de s'accommoder au temps, en attendant qu'il en vienne vn meilleur qui restablisse le bon ordre. Et

DE LA MORALE CHREST. 569 pendant la Ligue, que les grandes villes, & les bons Bureaux, & les principales sources des Finances estoient en la puissance de ceux qui portoient les armes contre le Roy, il fallut bien s'aider comme l'on pouuoit, & ne faire pas semblant de voir quantité de desordres. Et alors la conscience d'vn General d'armée en est deschargée, parce que, de quelque faço que ce soit, il faut tascher de sauuer l'Estat. Mais ie trouue qu'vn homme de bien est en peine, quand il est conuié par son Prince à prendre la conduite d'vne armée, dont il preuoid que par le peu d'ordre qu'on donne aux affaires, elle ne sera pas payée, desorte qu'il faudra qu'il conniue à vne infinité de brigandages, qui deuroient estre soigneusement reprimés. Car il est certain que les sentimens de la iustice & de l'honneur repugnent à prendre des emplois où on est contraint de fermer les yeux à tant de choses infames. Que si nonobstant ces considerations vn Capitaine se sent obligé par sa vocation, & par les seruices qu'il est ca-

570 . SVITE DE LA DERN. PART. pable de rendre à son Prince & à sa patrie, de prendre le commandement d'vne armée telle que cela, ie ne voy que deux moyens d'y satisfaire à sa conscience. L'vn est de faire, quoy qu'il en soit, tout ce qu'il pourra, si ce n'est pour empescher tout à fait les maux, parce que cela est hors de son pouuoir, au moins pour ne permettre pas qu'ils viennent à l'extremité. Parce que comme encore que quand vn vaisseau fait cau par diners endroits, il ne soit peut estre pas possible de l'en vuider entierement, ou de l'empescher d'y entrer, on ne laisse pas de pomper pourtant, parce qu'on le soulage toujours dautant, & que l'on gaigne le temps, en attendant qu'on arriue en quelque port, où lon pourra si bien le racommoder qu'à l'aduenir il vogue sans toutes ces peines; en toute societé où il y a de la corruption, il faut que ceux qui la gouuernent s'y conduisent de la façon, & que s'ils ne peuvent tout à fait la reformer, ils empeschet au moins qu'absolument elle ne se perde. Nous ne

DE LA MORALE CHREST. 571 fommes pas, disoit autresfois Ciceron de l'estat des affaires de son temps, dans la Republique de Platon, mais dans la lie de celle de Romulus, où nous auons beaucoup de sujet de nous louër de nostre condition, si nous pou-uons ou retenir ou mettre les affaires en telle constitution, que l'on puisse dire qu'elles ne sont pas desesperées. L'autre est de faire en sorte que puis que la guerre doit nourrir la guerre, comme disoit autresfois le vieux Caton, ce soit celle que nous faisons dans les terres de l'ennemy qui entretienne nos gés, & non pas celle qu'on n'exer-ce que trop souvent sur les amis mes-mes. Car quelle pitié est-ce que cela, que les armées qui sont destinées pour la defense de l'Estat, le rauagent & le ruïnent elles mesmes? Que l'on craigne autant l'arriuée de ses compatriotes, que les inuasions de l'estranger? Que nous viuions chés nous mesmes & chés nos concitoyens, comme dans vn pais de conqueste? Si donc il faut viure de rapine, s'il faut epuiser vne prouince de contributions, s'il

572 SVITE DE LA DERN. PART. faut permettre aux soldats de se payer de pilleries, il faut que ce soit de celles qui se font sur ceux contre qui nous auons les armes à la main, & de qui selon le droit des Gens nous pouuons nous approprier le bien par l'auantage de la victoire. Et pour cela vn Capitaine doit bander tous les nerfs de son courage & de son entendement, pour auoir tellement l'auantage de fon costé, que ce soit toujours aux despens de l'ennemy qu'il face la guerre. En fin, parce que cet auantage là depend de la benediction de Dieu, beaucoup plus que de la prudence & du courage de l'homme, & mesmes que c'est Dieu qui donne aux hommes & le cœur & l'entendement, & qui l'oste quand il luy plaist, le principal soin qu'vn General doit auoir, c'est qu'autant que cela est en son pouuoir, Dieu soit bien seruy en son armée. Il est vray que les premiers mouuemens à cela doiuent proceder du Prince mesme. C'est à luy à choisir les Capitaines en qui il y a de la pieté, & à donner les ordres generaux à ce

DE LA MORALE CHREST. 573 qu'elle ne soit pas negligée. Comme l'histoire nous rapporte de la Reyne Elisabet, qu'ayant equippé vne grande flotte pour enuoyer contre les ennemis de son Estat, elle prescriuit elle mesme les heures ausquelles ces saints exercices se deuoient faire en chaque vaisseau, & fournit en grande partie le formulaire des prieres. Mais parce que bien souuent les Princes n'ont pas ce soin là, & que quand ils les auroient, c'est à leurs Generaux d'armée à les faire bien executer, autrement ils deuiendroient inutiles, c'est à eux principalement que la Morale Chrestienne donne cet aduertissement. Et pour ce qui est des Capiraines qui commandent vne armée de mesme religion auec eux, la chose est sans difficulté. Chacun, selon la persuasion de la bonté de sa creance, est obligé en sa conscience d'en inspirer le sentiment à ses soldats, & de procurer que Dieu soit seruy par eux selon la forme qu'il estime la meilleure. Car outre que c'est vn deuoir dont tous les hommes, en quelque condition

574 SVITE DE LA DERN. PART. qu'ils soyent, se doivent religieusement acquitter, sila soldatesque n'est retenue par quelque crainte de la Di-uinité, elle se licencie incontinent à des excés & à des debordemens tout à fait estranges. De sorte qu'il est en quelque façon plus necessaire d'auoir vn soin particulier de faire pratiquer la pieté dans les troupes militaires; que l'on ne fait dans les autres lieux, parce que la licence de la guerre a plus besoin de ce correctif, & que les debauches ne sont pas ailleurs ny si ordinaires ny si violentes. Et bien que dans les guerres ciulles qui se sont faires en France pour la Religion autrefois, l'on ne puisse pas nier qu'il n'y air eu beaucoup de desordres dans le party des Reformés, il est neantmoins certain qu'on doit doner cette louange à leurs chefs, qu'ils ont fait ce qu'ils ont peu pour y entretenir la deuotion selon leur creance. Le Prince de Condé, l'Amiral, le Roy de Nauarre, tandis qu'il a esté dans cette profession, l'autre Prince de Condé son cousin, le Vicomte de Turenne, quand

DE LA MORALE CHREST. 575 vne fois il y fut instruit, La Nouë Bras-de-fer, le Plessis Mornay, & quantité d'autres gens de qualité qui ont eu part dans la conduite de leurs affaires & de leurs gens, auoient en grande recommandation la pratique de la pieté dans toutes les occasions & dans toutes les factions militaires. Et veritablement, comme il n'y a rien de plus beau qu'vne armée que la crainte de Dieu gouuerne, & qui a la deuotion à cœur, aussi n'y a t-il point de plus efficacieux motif aux actions de valeur, que la vraye pieté, point de choses sur lesquelles vn Capitaine se puisse si bien asseurer de la victoire. Les tambours & les trompettes, les fifres & les tymbales, animent & donnent de l'ardeur & de la hardiesse pour le combar. Mais l'ardeur martiale que cela inspire vient plustost des sens que de la raison, & de l'emotion de l'appetif sensitif, que de l'impression de l'idée du vray honneur dans les hautes puissances de de l'ame. Témoin en soit que les cheuaux en experimétent l'emotion,

576 SVITE DE LA DERN. PART. & se sentent par ces sens exciter à la bataille. Mais les prieres, le chant des Pseaumes, les viues exhortations, les representations bien expresses & bien pathetiques de la misericorde de Dieu en Iesus Christ, & des esperances du fiecle à venir, remplissent l'ame de hardiesse contre les pensées de la mort, & rendent les hommes inuincibles. Mais quand le Capitaine est d'vne religion, & son armée d'vne autre, comme cela arriue quelquesfois, il y peut auoir de la difficulté à iuger comment il faut qu'il s'y comporte. Car de laisser absolument le soin de cette partie de son deuoir; c'est abandonner quand & quand ses soldats à l'impieré, & en suite à toures fortes de debordemens : & neantmoins, il semble d'autre costé que de s'en vouloir acquitter, c'est faire quelque chose contre le mouuement de sa conscience. Parce que ce que nous improuuons vne religion, c'est que nous estimons qu'elle contient quelque chose contre la gloire de Dieu. Or comment se resoudre à procurer vne

DE LA MORALE CHREST. 577 vne chose en laquelle on a cette opinion que la gloire de Dieu est violée? A examiner les choses par la raison & sans passion, vn General-d'armée qui est Catholique Romain, se peut sans scrupule de conscience acquitter de ce deuoir, bien qu'il commande à des troupes Reformées. Car il y a dans nostre Culte trois choses. Dans l'vne nous parlons à Dieu en le priant & en luy chantant des Pseaumes. Dans l'autre il parle à nous par la bouche de ses seruiteurs qui nous preschent sa verité: & dans la troisième, qui est la celebration des Sacremens, le commerce entre Dieu & nous est en quelque façon reciproque, parce que nous y faisons à Dieu vne protestation solemnelle de nostre foy; & qu'il nous y ratifie ses promesses par vn gage exterieur de son amour; & qu'ainsi nous contractons comme tout de nouueau de part & d'autre l'alliance de nostre salut & de son seruice. Dans la premiere de ces choses il n'y a rien qui puisse raisonnablement choquer vn Catholique

578 SVITE DE LA DERN. PART. Romain. Car les Pseaumes que nous chantons sont les Cantiques de Dauid, dont toute la Cour retentissoit autre-fois du temps du Roy François premier, & au commencement du regne de Henry second, auant que nous les nous fussions appropriés pour l'vsage de nos Eglises. Et comme nous ne ferions point de scrupule de conscience de chanter les Pseaumes de Monsieur Godeau, parce qu'il n'y a rien que de conforme à nos sentimens, il paroist assés par la Preface qu'il a mise audeuant de cette belle composition, qu'il ne feroit point de scrupule de chanter les nostres. Ce qu'il y trouue à redire, ce sont quelques vieilles phrases & quelques mots surannés, qui ne corrompent point la pieté: comme ce que nous trouuons à redire dans les siens, c'est peut estre un peutrop de pompe & de curiosité, qui n'altere pas non plus la pureté de la doctrine contenuë en ce diuin liure. Et quant à nos prieres, elles sont composées de telle facon que tout catholique Romain les

DE LA MORALE CHREST. peut ouir sans offense. Pource qui est de la predication, on y fait ordinairement deux choses: on y explique la doctrine positiue de la Religion, & on y dispute contre les erreurs qui y sont contraires. Or est la doctrine positiue de la Religion reformée telle, qu'il n'y a point de catholique Romain; s'il ne veut renoncer au Christianisme, qui ne soit obligé de l'approuuer. Car nous auons rous les fondemens de la Religion & tous les articles fondamentaux de la Foy, cominuns, au moins si on se rapporte de nostre creance, non aux calomnies de quelques imposteurs & de quelques impertinens chicaneurs, qui nous font dire mille choses que nous ne croyons pas, ou qui donnent à ce que nous disons vn sens contraire à nos intentions; mais aux declarations publiques & authentiques de nostre creance. Quant aux erreurs que nous combattons, à la verité ceux de la communion de Rome y sont assés souuent messés: mais on les peut refuter en stile doux, & qui ne choque point vn

00 2

580 SVITE DE LA DERN. PART. General, ou mesmes on les peut alors laisser en arriere tout à fait, s'il est ainsi expedient pour la satisfaction du Capitaine. Et en telles occasions il est peut estre plus necessaire de fairo des inuectiues contre les vices des mœurs que contre les taches de la Foy, & d'affermir les esprits des hommes contre les pensées de la mort, que de les armer de raisons contre les subtilités des Sophistes. En fin, pour ce qui est de l'administration des Sacremens, puis que ceux de la communion de Rome ne sauroyent nier que la façon de laquelle nous les celebrons, tant eu egard à la simplicité des ceremonies, qu'à la plenitude essentielle des choses qui le composent, ne soit plus conforme à la premiere antiquité de l'Eglise, & à l'institution de nostre Seigneur, que n'est la maniere dont on les pratique parmy eux, qu'y peut trouuer vn General d'armée à redire, qui empesche qu'il n'en permette la celebration, ou qu'il ne la sollicite luy mesme? Mais à tourner la medaille de l'autre costé, il

DE LA MORALE CHREST. s'y trouuera de la difficulté beaucoup d'auantage. Car pour ne parler point des autres choses ausquelles vn Reformé se peut accrocher au culte Romain, son ame, s'il faut ainsi parler, & & le centre auquel il aboutit presque tout entier, c'est la Messe, dont la creance de ceux de la Religion est telle, qu'ils n'en peuuent ny procurer ny mesmes souffrir la pratique, où elle depend de leur autoriré, sans commettre quelque chose contre la gloire de Dieu & de leur Sauueur, l'honneur duquel, selon leur opinion, est transferé à vn morceau de pain dans ce pretendu sacrifice. Tellement que ny directement ny indirectement, ils n'y peuuent contribuer sans y ininteresser la gloire de Dieu & la pureté de leur conscience. Mais la constitution des choses humaines est telle, qu'en vne telle occasion vn General d'armée n'a point besoin de se mettre en peine. Là où toute vne armée, ou la beaucoup plus grande partie des troupes qui la composent, est de ca-tholiques Romains, le Souuerain est

582 SVITE DE LA DERN. PART. ordinairement de la mesme Religion, & les autres Officiers pareillement, qui ont assés de soin de faire pratiquer leur religion à leurs soldats sans qu'il s'en messe. Et quand il n'y auroit que les Ecclesiastiques & les Moines qui se rencontrent dans les armées à solliciter cela, ils deliurent asses le General du soin de cette partie de sa charge. De sorte qu'il n'a rien sinon à souffrir ce qu'il ne peut & qu'il ne doit pas empescher, parce que le Royne luy a pas en cet egard donné la puissance souveraine. Joint que quandil y auroit plus de pouuoir qu'il n'y a, ce ne seroit pas chose sans difficulté, de determiner lequel seroit le plus expedient, d'obliger vne armée à celebrer vn culte de Religion, quel qu'il foit, ou de la laisser sans aucun exercice de pieté, ce qui y engendreroic incontinent l'atheisme. Ce donc que la conscience requiert d'vn Capitaine « General en vne telle occasion, est d'y donner luy mesme à ses gens toutes forces de bons exemples. Car outro ce qui regarde sa personne, qui doit

DE LA MORALE CHREST. 583 estre profondement imbue des sentimens de la pieté; outre ce qui touche sa maison & ses domestiques, sur lesquels il doit auoir vne particuliere inspection; sa tente doit estre comme vn Temple, où ceux de sa creance se rassemblent pour y participer au seruice de Dieu, & par tout où l'occasion se presente de rendre l'Euangile de bonne odeur, il y doit faire paroistre son zele. Et s'il a quelque veritable soin de son salut, il se doit donner garde comme de la peste, d'vne cerraine opinion qui a la vogue entre les Grands & parmy les gens de guerre, que la deuotion est ordinairement vne marque de foiblesse. C'est pourquoy on la laisse aux femmes, & aux hommes en qui la condition & la naissance n'a rien mis de bien releué; comme si l'eminence de la condition soustrayoit - les Grands de la jurisdiction du Ciel, ou comme si la grandour du courage s'estendoit iusques à ne craindre pas Dieu meme. Iene sçay pas s'il y a aucun Grand, quel qu'il soit, qui osast se preferer à Dauid en dignité & en ma-

584 SVITE DE LA DERN. PART. gnanimité, & croy qu'ils auroient assés acquis d'honneur si on les luy pouvoit mettre raisonnablement en paralelle. Et toutesfois son histoire & ses Cantiques témoignent treshautement qu'il auoit la pieté souuerainement à cœur, & qu'en luy cette diuine vertu n'estoit nullement incompatible ny auec la grandeur de la dignité, ny auec celle du courage. Et comme la crainte de Dieu doit gouverner les actions d'vn General, tant en la conduite de l'armée que dans le combat, aussi, pour finir ce chapitre par cette consideration, la doit il prendre pour sa reigle dans les bons & dans les mauuais euenenemens, soit, dije, qu'il reçoiue quelque disgrace, ou que Dieu le fauorise de la victoire. Car quant aux disgraces, il en arriue quelquesfois aux plus gens de bien & aux plus experimentés capitaines. L'Amiral de Coligny perdit la bataille de Moncontour, & vid en cet accident le party dont il estoit chef, à deux doigs de sa ruine. La Nouë Bras-de fer fut défait

DE LA MORALE CHREST. 185 au siege d'Ingelmonster, & y perdit auec son armée la liberté, laquelle il ne reuid plus qu'apres vne rigoureuse prison de plusieurs années. Mombrun & Montgommery, perdirent en fin non seulement l'honneur du combat & la liberté, mais par vne rigueur extraordinaire en telles sortes d'accidens, il leur en cousta la vie. Mais il n'y eut pas vn de ceux là qui ne fist paroistre en de si funestes occasions vne excellente pieté coniointe auec vne inuincible grandeur d'ame. Car comme on emportoit le premier dans vne litiere, parce que ses playes ne luy permettoient pas de monter à cheual, on l'ouit qu'il prononçoit & qu'il repetoit ces paroles d'vn Pseaume à part-foy, Si eft ce que Dieu eft tres-doux A son I srael voire à tous, Qui gardent en toute droiture, Leur conscience entiere Gpure. Et s'estant entretenu & con-solé de ces bonnes pensées en particulier, il releua puis apres le courage de ceux qui se trouuerent autour de luy, tint, tout blessé qu'il estoit, conseil auec eux, soustint par son admi-

586 SVITE DE LA DERN. PART. rable constance, ceux qui paroissoient les plusbabbatus, remit l'esperance dans leurs cœurs par ses raisons & par ses exhortations, fit les ouvertures necessaires pour remettre les affaires sus, & par ses prudentes & vigoureufes resolutions, & par les actions dont luy & Piles, & quelques autres les se-conderent, il se vid peu de temps apres en estat d'estre aussi consideré. qu'il auoit esté auant la bataille. Le second supporta sa prison d'vne façon extraordinairement exemplaire. Car la douceur qui luy estoit comme propre & naturelle entre tous les hommes de ce mestier là, & la magnanimité en laquelle il ne cedoit à aucund'eux & la sagesse qui gouvernoit admira-blement toutes ses belles qualités, re-·luisirent toujours comme à l'enuy dans donnerent de l'admiration à ses ennemis: mais sa pieté sur tout s'y maintint si egale & en si haut point, que les lettres qu'il escriuit de sa prison à sa femme & à ses amis, & que i'ay entre les mains, en ont mis dans mon

DE LA MORALE CHREST. 587 esprit en les lisant une idée comme incomparable. En fin les deux derniers firent voir iusques dans la mort que comme la noblesse de leur naissance leur auoit donné yn courage intrepide dans les dangers, le Christianisme, dont ils auoient profondement imbu les dogmes dans la Reformation, les auoit remplis d'vne pieté à qui les eschaffauts ny les bourreaux n'estoient pas capables de faire pour vn moment perdre, comme on dit, la tramontane. Pource qui est de la victoire, ie ne sçay s'il n'est point aussi malaisé d'y maintenir sa vertu & sa pieté enuers Dieu, que das le désordre d'vne defaite. Car comme de tous les succés qui peuvent arriuer en la vie, le plus auantageux est celuy qui arriue à vn Capitaine general par la victoire en vn grad combat, aussi n'y en a-t-il point vn si capable de le transporter, & de luy donner quelque excés de joye & de vanité. Apres la bataille de Coutras il arriua ie ne sçay comment que le soupper du Roy de Nauarre luy fut appressé dans vne chambre haute que l'on auoit tapissée

SVITE DE A DERN. PART. des drappeaux qu'il auoit gaignés, & au dessous de laquelle on auoit mis le corps du Duc de Ioyeuse, & de plusieurs autres gens de condition qui auoient esté tués auec luy. N'estoit-ce pas vne grande tentation à la modestie de ce Prince, de voir ses ennemis sous ses pieds, & la sale de son souper tapissée de leurs despouilles? Il s'y mainting neanmoins dans vne fort belle trempe de douceur & de grauité, comme il auoit desja donné des témoignages de sa pieté, en faisant prier Dieu solemnellement auant le combat, & fait rendre graces sur le champ apres la bataille. Mais apres celle de Lipsic, où ce grand Gustaue demeura victorieux, quoy qu'il possedast la vertu au point des heros, il ne se peut empescher de laisser eschapper vne parole mal digerée- Car en se promenant entre les corps morts, & en monstrant au Duc de Saxe, qui se promenoit auec luy, les monceaux de leurs communs ennemis, il luy demanda, Mon cousin, ma besoigne vous plaist elle pas? non seulement,

DE LA MORALE CHREST. 589 comme s'attribuant ce grand fuccés, mais encore come goustant auecque plaisir le spectacle de ce carnage. Dans l'ardeur du combat, se défaire de ses ennemis & ne les espargner pas, c'est valeur. Hors de là, qui ne regarde ces massacres auec quelque espece d'horreur, non seulement il n'a pas les sentimens assés Chrestiens, mais il semble en quelque sorte degenerer de l'humanité; & tenir quelque chose du barbare. Et c'est ce qui sit qu'apres la bataille d'Iury, Henry le Grand destourna ses yeux de dessus son espée, qu'on luy presentoit telle qu'il l'auoit remise au soureau apres la défaite des ennemis, parce qu'elle estoit pleine de sang & de diuerses autres marques de la furie auec laquelle il l'auoit employée en cette Iournée. C'est aussi vn deuoir de l'humanité, & par consequent du Christianisme, d'auoir soin apres la victoire d'enterrer les corps, non des amis seulement, mais aussi des ennemis. Car il est bien certain que la guerre donne le droit d'vser de beaucoup de

590 SVITE DE LA DERN. PARTE rigueur contre les ennemis viuans? Mais ces droits là s'esteignent enuers les morts, qui d'autant qu'ils ne sont plus, ne peuvent plus estre ennemis: la mort esteignant les relations, qui ne peuvent subsister sinon dans les estres qui existent. Et de fait les Payens mesmes se sont acquittés de cette humanité, & le consentement des Grecs & des Romains y a esté si vniuersel, qu'ils en ont fait comme vne espece de loy ou de maxime generale. Les Carthaginois mesmes, dont la trempe estoit plus aigre, & le naturel plus enclin à la cruauté, ont eu soin d'enterrer leurs ennemis morts, afin qu'ils ne demeurassent pas en proye aux oiseaux carnaciers & aux bestes sauuages. Mais bien que la guerre donne plus de droit contre les viuans, si ne sont ils pas sans bornes: de sorte qu'vn Ca-pitaine chrestien, s'il veut remplir la magnificence de ce nom, les doit, à mon aduis, reigler par la condition, & l'estat, & l'aage, & le sexe des personnes. le dis la condition premieremet. Car il y en a quelques vns dont la

DE LA MORALE CHREST. 591 naissance & la dignité est tellement priuilegiée, que comme, s'il est possible, on les doit espargner dans le combat, aussi faut-il auoir vn soin tresparticulier de leur conservation apres la victoire. Tels sont les Roys, & les Princes qui le peuuent deuenir, dont il se faur, s'il y a moyen, destournes quand on se trouve deuant eux la pique à la main, de peur de respandro vn sang que Dieu à consacré par son onction, ou en quelque façon destiné à commander aux autres hommes. Et c'est à cela que regarda ce ieune & braue Capitaine qui defendit il y a quelque temps Mommedy contre le Roy, quand l'ayant veu paroistre en vn lieu où il y auoit du peril; parce que les coups y tomboient menu, il fit cesser la mousqueterie de ses gens, & enuoya supplier sa Majesté de ne hasarder pas ainsi sa personne. Ce donc que les Romains ont tant celebré l'action de Mucius Sauola contre Porsenne, c'est plustost vue marque de leur ferocité que de leur vraye vertu: & ce qu'apres auoir fait des Monar-

592 SVITE DE LA DERN. PART. ques prisonniers, ils les ont publiquement menés en triomphe, & puis apres estranglés en la prison, sert en grande partie de Commentaire à cet endroit de la Prophetie de Daniel, où l'empire Romain est representé comme vne beste cruelle & sauuage. Ie dis puis apres l'estar. Car quand vne ville est prise d'assaut, & que le victorieux est le plus fort entre ses murailles, s'il s'y rencontre encore quelques gens si temeraires que de se presenter à luy l'espée à la main, le droit de la guerre, mesmes entre les Chrestiens, luy permet de les tuer, & peut estre que la prudence le veut, afin d'asseurer sa victoire. Car comme Ciceron l'a remarqué en son oraison pour Milon, il arriue souuent à la guerre des reuers ausquels on ne s'attendoit pas, & celuy qui despouilloit son ennemy & qui luy pensoit tenir le pied sur le corps, s'est quelques fois veu renuersé par luy, tellement qu'il peut bien ne l'espargner pas tandis qu'il est en estat de faire quelque resistance. Car quant à ce qu'Edouard, Prince de Galles,

DE LA MORALE CHREST. 593 donna la vie à trois gentishommes François, qui eurent la hardiesse de soustenir tous seuls l'effort de son armée qui entroit victoriense par la bréche dans Limoges, & pardonna au reste des habitans pour l'amour d'eux, ce fut vn esset de la generosité de ce Prince, & de l'admiration en laquelle il eut vne si prodigieuse valeur, dont il ne pouuoit pas craindre d'auoir sujet de se repentir, parcè que c'estoit plustost en ces gentis-hommes vne resolution determinée de mourir en gens d'honneur, qu'vn essay de la fortune du combat pour restablir des affaires absolument desesperées. Hors cette consideration, qu'il ne faut pas laisser la certitude de sa victoire en suspens, il est du deuoir des Capitaines Chrestiens de donner la vie à ceux qui ont mis les armes bas, ou qui ne sont point en volonté ny en posture de les prendre. De sorte que le carnage des vieillards & des malades, & de ceux qui se rendent à la mercy du vainqueur, dans les villes prises d'assaut, crient vengeance de-

594 SVITE DE LA DERN. PART. uant Dieu, & sont autant d'opprobres pour le Nom de Chrestien, & autant de scandales contre nous parmy les nations infideles. Ie dis l'aage en troi-fième lieu. Car poséle cas que le droit de la guerre ou permist ou excusast le meurtre de ceux qui sont desarmés, parce que quoy qu'il en soit, ils ont eu vne volonté ennemie, (quoy qu'il y a quelque espece de fureur de pu-nir ainsi les volontés qui n'ont produit & qui ne peuuent produire aucun effect,) de quoy sont coupables les petits enfans sur qui s'estendent les sunestes suittes d'vne victoire? Ils sont, dit-on, partie de l'ennemy, & par consequent doiuent estre iugés de mesme condition que luy, & sujets aux mesmes rigueurs de la guerre. Io le veux. Mais ils ne sont partie de leurs peres sinon tandis que leurs peres sont viuas. Ou bien donc les massacre apres que leurs peres ont esté desja massacrés, & alors ils ne leur appartiennent plus : ou bien on les met à mort sous les yeux de leurs peres encore viuans, ce qui est sans contredit

DE LA MORALE CHREST. 595 vne horrible barbarie. Car si tu veux pardonner au pere, pourquoy meurtris tu son enfant? Et si tu attens à tuer le pere, quand tu auras espandu le sang de son enfant deuant ses yeux, y a-t-il beste sauuage qui puisse egaler ta cruauté, qui ne se contente pas d'oster la vie à celuy à qui la charité de Christ t'oblige de la conseruer, si auant que de luy donner la mort, tu ne luy as donné vn déplaisir qui luy est plus sensible que la mort mesme ? Mais encore que les enfans soyent parties de leurs peres, ils le sont aussi du genre humain. Comme donques quand deux maistres posse-dent vn esclaue par indiuis, il n'est pas raisonnable que le delict de l'vn, qui luy fait perdre son droit, lo face perdre aussi à l'autre qui n'y a point participé; là où le genre humain tout entier a tant d'interest en la conservation des petits enfans, il n'est pas iuste que la faute des peres qui les ont engendrés ait tant de pouvoir, que d'esteindre le droit de la commune societé, qui n'en est nullement cou596 SVITE DE LA DERN. PART. pable. Certainement les loix de la guerre, & l'auantage de la victoire, ne peuuet iamais donner aux homes tant de puissance les vns sur les autres, qu'ils en ont naturellement sur les aueres animaux. Car la difference infinie de la nature oste absolument toute communion de droit entre les hommes & les bestes, qui comme elles ne sont pas capables d'exercer la vertu de la iustice, aussi ne le sont elles pas non plus que les hommes l'exercent enuers elles, parce qu'elles n'ont point de raison. A proprement parler, elles ne peuuent pas mesmes estre vn object de misericorde : parce que la misericorde est vn mouuement de l'ame, lequel s'engendre dans les hommes par la reflexion que l'on fait sur soy-mesme, de ce qu'estant de mesme nature auec ceux que l'on iuge miferables, on peut tomber en mesmes inconueniens qu'eux. Et neantmoins Salomon dit que le juste a pitié de sa beste, & le sentiment de tous les honnestes gens confirme tellement ce dire du Sage, que si nous voyons

DE LA MORALE CHREST. 597 quelcun qui maltraitte & qui massacre les poures bestes, sans en auoir quelque sujet bien euidet, nous l'accusons d'inhumanité. Quad donques le droit que la societé des hommes a sur la vie des petits enfans ne seroit point si manifeste & si inuiolable qu'il est, le meurtre qui s'en fait dans les villes prises d'assaut, deuroit indubitablement passer pour vne horrible barbarie. C'est pourquoy l'on ne doit pas tirer à consequence le souhait que l'Eglise ancienne fait au Pseaume 137. contre la ville de Babylon. Fille de Babylon, dit elle, qui t'en vas destruite, O que bien-heureux sera celuy qui te rendra la pareille de ce que tu nous as fait! O que bien heureux sera celuy qui empoignera tes petits enfans, & les froissera contre les pierres! Comme Dieu a le droit d'vser des hommes comme il luy plaist, & comme la corruption de la nature des petits enfans les rend l'object de sa justice, personne ne peut douter qu'il n'ait le droit de leur oster la vie à quelque occasion que ce soit. Et quand il a resolu de le faire, com-Pp 3

598 SVITE DE LA DERN. PART. me il auoit fait à l'egard de Babylon, il le fait aussi quelquesfois predire, afin que quand il arriue on reconoisse mieux son iugement. Or fait il faire quelquesfois aussi ces predictions par forme d'inprecation, comme cela est assés ordinaire dans les Pseaumes. En fin i'ay dit le sexe. Parce que quand les hommmes y deuroient estre moins espargnés, il en faudroit pourtant exempter les femmes, soit qu'on ait egard à la violence qui peut concer-ner leur vie, ou bien celle qui regarde leur honneur. Car quant à leur vie,si on en trouue quelques vnes les armes à la main, comme cela se void quelques fois, puis qu'elles font le mestier des hommes en combattant, elles peuuent bien subir leur fortune. Ce n'est pas le sexe de l'homme entant qu'homme, qui l'expose aux accidens de la guerre & qui luy en fait subir les droits : c'est que luy mesme la fait,& que par consequent il est raisonnable qu'il soit sujet aux loix par lesquels elle est gouvernée. De sorte que si la femme sort hors des termes de son

DE LA MORALE CHREST. sexe pour faire ce mestier là, elle s'assujetttit à ses loix par la mesme regle. Mais hors cela, c'est vne cruauté que d'exercer les rigueurs de la guerre sur des personnes non seulement desarmées, mais naturellement incapables de defense, & qui ont ces voyes de fait en horreur. Et quant à leur honneur, ie ne sçay comment il s'est peu trouuer des Politiques qui ont creu qu'on le leur pouuoit iustement rauir par les loix de la victoire. Car la raison qu'ils alleguent, que c'est vne partie de la vengeance que la guerre permet d'exercer contre leurs maris, parce qu'elles sont à eux, elle est tout à fait extrauagante. Quel dereglement en la nature est-ce là, que le desir de la vengeance estant une emotion de cette partie de l'appetit sensitif que l'on appelle l'Irascible ou la Courageuse, elle s'exerce par l'autre partie où la Conuoitise a son siege, & dont les mouuemens & les objets sont tout à fait differens? Quelle raison que sous ombre que la victoire das toute sa seuerité, vous donnant le

600 SVITE DE LA DERN. PART. droit d'oster la vie à vostre ennemy, ce qui est le dernier des maux que vous luy pouués faire endurer, vous estendiés encore vostre vengeance apres sa mort sur la pudicité de sa femme ? Quelle iniustice que pour vous venger de vostre ennemy, vous rauissiés à sa femme ce qui n'est plus à luy puis qu'il est mort, ou qui est tel, que si vous y attentés à l'heure qu'il est encore viuant, il est incomparablement moins à luy qu'il n'est à sa femme? La paillardise commise auec vne femme qui s'y laisse aller volontairement, est vn grand peché. L'adultere en est encore vn plus grand, bien qu'on n'y apporte point de violence. Mais la paillardise & l'adultere commis par le violement, est l'extremité de la fureur, & vn crime qui de toutes parts crie vne terrible vengeance. Tellement que les Capitaines qui les permettet, & qui neantmoins font profession d'estre Chrestiens, se rendent indignes de ce nom, & diffament à leur eternelle condamnation la religion qu'ils professent.

DE LA MORALE CHREST. 601

DV DEVOIR CHRESTIEN

des autres gens qui suiuent les armes.

Es gens entendus dans la Politique, & qui ont tout ensemble les sentimens humains & Chrestiens, dans le denombrement qu'ils font de ceux qu'il est conuenable d'espargner dans la fureur de la guerre, particularisent dauantage ce que ie viens de dire plus generalement. Car ils distinguent entre les auteurs de la guerre, & ceux qui les ont suiuis, & disent que ceuxlà meritent d'estre punis, tant à cause de l'audace de leur crime, que pour empescher les autres de les imiter: & qu'au contraire ceux-cy sont des objects de la compassion humaine, qui ne prend pas à la rigueur ce qui se fait par inconsideration. Et de fait les Princes, dans les rebellions de leurs sujets, où ils semblent estre fondés à vser de plus de seuerité qu'on ne fait

602 SVITE DE LA DERN. PART. en vne guerre estrangere, se contentent ordinairemet de punir les port'enseignes de la reuolte, & pardonent à la multitude qui s'y est laissée emporter. Et l'histoire des Romains, qui estoient seueres à maintenir la maiesté de leur empire, monstre que neantmoins ils en ont vsé de la sorte en diuerses occasions. On distingue mesme entre les auteurs de la guerre, ceux qui l'ont suscitée par haine, par vengeance, par esprit de rebellion, par simple desir de remuer dans vn Estat & d'y abbaisser l'autorité du Gouvernement, & qui, ce qui arriue ordinairement en consequence, y ont manié les armes auec insolence & cruauté; d'auec ceux qui y ont esté portés par des mouuemens qui peuuent trouuer de l'excuse entre les hommes equitables. Car quand c'est pour la liberté de sa conscience, & pour la dessense de sa religion, ou parce qu'on est engagé d'al-liance, & d'amitié, & de parenté auec ceux que lon croid estre iniustement opprimés, bien qu'il y eust de l'erreur & de la temerité, si est-ce que cela est

DE LA MORALE CHREST. 603 messé de quelque sentiment ou de pieté ou de generosité, qui rend la faute mesme des chefs aucunement pardonnable. Et de fait, parce que dans les guerres que nos peres ont fai-tes en France pour la religion, c'estoit le seul mouuement de la conscience qui les y portoit, nos Rois s'y font ordinairement monstrés plus enclins à la douceur, que si les souleuemens eussent esté pour quelque autre cause. Et ce sut veritablent vn grad exemple de clemence, quand le seu Roy ayant reduit les Rochelois aux derniers abbois, non seulement il leur pardonna, mais mesmes il eut soin de les cosoler & de les foulager en leur calamité, parce qu'il sçeur qu'ils ne luy auoient desobey que par la crainte qu'ils auoient euë d'estre violentés en leur conscience. On va mesmes iusques là, que quand dans le chef d'vne guerre on ne void point d'autre motif qui l'ait porté à l'entreprendre, sinon quelque noble ambition, vice qui tombe volontiers dans les grandes ames, & qui se sentent nées pour le commandement,

604 SVITE DE A DERN. PART. il est bien de la prudence d'un vainqueur de luy oster le moyen de remuer à l'aduenir: mais qu'il est aussi de sa bonté & de sa generosité de luy par-donner, & de le conseruer pour des occasions où il pourra estre vtile. Et parce que nos Roys en ont presque toujours ainsi vsé, au lieu que dans les Estats voisins on suit des maximes differentes, presque toute la France s'imagina qu'on pardonneroit au dernier Duc de Montmorency, dont on auoit cette opinion que c'estoit le seul desir de se signaler en quelque illustre occasion, qui luy auoit fait prendre les armes. Mais à la verité, de les luy trouuer à la main contre son Souuerain, dans vne Prouince dont il luy auoit commis le gouvernement, c'estoit vne circonstance fort considerable en son action, & qui iointe à quelques autres raisons du temps, determinerent le feu Roy à laisser agir sa iustice. Et veritablement il y a bien de la difference entre cette ambition, quad elle se trouue en des personnes qui vont à peu prés du pair auec ceux à qui on

DE LA MORALE CHREST. 605 fe prend, & quand elle pousse vn sujet à entreprendre contre son Prince. Car là il sied parfaittement bien d'vser de generosité, comme dans la guerre d'entre les Romains & Pyrrhus, où ce Prince n'ayant point d'autre sujet de la faire que la ialousie de l'Empire, & la gloire de la victoire & de la domination, il s'ycomportoit aussi auec vne merueilleuse magnanimité, à laquelle les Romains respondoient de leur costé. Icy, il est quelques-fois necessaire de faire sentir aux esprits entreprenans, que l'autorité de leurs Souuerains, & la tranquilité de l'Estat, leur doit estre en plus de consideration que la satisfaction de leur ambition, & que la manifestation de l'eleuation de leur courage. On y adjouste encore non pas seulement ceux qui se sont rendus à condition de vie sauue; mais aussi ceux qui se sont absolument remis à la mercy du victorieux. Car en ceux là c'est la foy publique qui agit, & on neleur peut sans crime fausser celle qu'on leur a donnée: En ceux-cy c'est la clemence & l'huma-

606 SVITE D LA DERN. PART. nité qui doit regner, si ce n'est que ceux qui se sont remis à vostre dis-cretion, soyent coupables de quelque grand crime. Hors cela, massacrer ceux qui se iettent à vos pieds pour vous demander pardon, ou les faire ignominieusemet attacher à vn gibbet, c'est vne chose qui a tout à fait l'air de la cruauré, bien qu'on la peust aucunement defendre par les loix ordinaires de la guerre. Et si Marius & quelques autres en ont vsé de la façon, les Payens mesmes ont remarqué que c'estoit vne tache en leur histoire. On va mesmes iusques à espargner les ostages, s'ils ne se sont eux mesmes rendus coupables par leurs actions. Parce qu'encore qu'ils ayent esté donnés pour seureté des conuentions, si est ce que quandils n'ontrien contribué à la violation de la foy, il y a ce semble trop de rigueur de leur im-puter la faute des autres. Car il est bien vray qu'ils sont comme absolument inutiles, s'il n'est pas permis de les faire mourir quand ceux qui les ont liurés manquent à ce qu'ils ont pro-

DE LA MORALE CHREST. 607 mis. Mais il vaudroit mieux prendre quelques autres seuretés de l'ennemy, que de s'engager dans la necessité de commettre vne espece de barbarie, contre des personnes qui n'ont point d'autre crime sinon qu'ils sont cau-tions de gens persides & meschans, & encores cautions qui ne s'y sont pas ordinairement obligés volontairemet, mais qui y ont estés contraints par ceux qui les auoient en leur puissance. Et quand il y auroit eu quelque chose de volontaire de leur part, toujours est il merueilleusement dur que la generosité d'vn homme, ou l'amour qu'il a pour son pays, ou le zele qu'il a pour le service de son Prince, ou l'honneste affection qui l'attache à son party, l'expose miserablement à la mort à cause du delict d'vn autre. Autrefois, que lon croyoit qu'vn homme est maistre de sa vie, & qu'il la peut engager, Scipion, par pure grandeur de courage, & par bonté du naturel, n'a pas voulu faire mourir des ostages qui s'y estoient volontairement soumis, en disant qu'il pardonnoit aux inno-

608 SVITE DE LA DERN. PART. cens, mais qu'il se vangeroit des coupables. Aujourd'huy, que le Christianisme nous apprend que nul n'est seigneur de ses membres, & que la vie des hommes est à Dieu, il ne faut pas prendre au pied leué l'inconsidera-tion de ceux que quelque trop grande ardeur de courage & de bonne volon-té, a portés à se rendre pleiges d'autruy au peril de leur propre vie. Que s'il faut vser de clemence mesmes enuers les ostages qui se sont ainsi obligés, que dirons nous de la calamité de ceux sur qui on exercé quelquesfois de terribles represailles ? Vn Gentilhomme de belle naissance, & qui estoit plein de vertu, de la maison de Villarnoul, ayant esté pris par le Duc do Mercœur, & ayant desja, comme pri-fonnier de guerre, composé pour sa rançon, comme il attendoit son argent, & qu'il iouoit aux eschecs contre celuy qui le gardoit, receut la nou-uelle qu'il falloit qu'il fust pendu, parce que le Roy auoit fait pendre quelcun du party de la Ligue. Ce sut vne surprise bien estonnante, & qui

DE LA MORALE CHREST: 609 luy donna de merueilleuses agitations d'esprit. Neantmoins il en reschapa par quelque bonheur, & particulierement par la generosité de celuy qui l'auoit en garde. Mais on en a veu de nos iours vn autre perir miserablement de cette façon là. Ie n'oserois pas dire que c'est cruauté, parce qu'il semble que cela est quelquessois absolument necessaire pour arrester le cours d'vne autre, à laquelle vos gens seroient autrement continuellement exposés. Et le Baron des Adrets excusoit ainsi quelques inhumanités qu'il commettoit à la guerre. Mais ie ne puis que ie ne déplore le malheur des personnes à qui ces accidens arriuent, & que ie n'aye en horreur la guerre, qui oblige les Capitaines à de semblables actions. O Dieu, à quelles horreurs faut-il que les hommes se portent quelquesfois malgré qu'ils en ayent? parce qu'indubitablement vn honneste homme se fait vne grande violence à soy-mesme, quand il faut necessairement qu'il en vienne à de si estranges extremités. Autrement ceux

Qq

610 SVITE DE LA DERN. PART. qui y prennent plaisir, ou mesmes qui le font sans vne extreme auersion, ne sont pas dignes du nom Chrestien, & meritent plustost celuy de Tartares. Et quand ie lis en nostre histoire co que Louys de Bourbon Prince de Condé, fut obligé de faire à Orleans. à l'occasion de ce qui s'estoit passé à Rouën en la mort de Marlorat & de quelques autres, ie sens quelque fremissement, de voir que ceux de nostre profession se soient sentis necessités à de si sanglantes actions, par la rigueur du traittement que lon faisoit à leurs freres. Toutes ces considerations, & autres semblables, tiennent beaucoup de la Morale à la verité; & neantmoins parce qu'elles sont messées de la Politique & des loix de la Guerre, & que ce dernier Volume de mon ouurage tend à sa fin, ie me restraindray icy de plus prés à l'explication des deuoirs Chrestiens de ceux qui, outre les Capitaines generaux, suiuent le mestier, des armes, & les reduiray aux Gouverneurs des Prouinces & des places, qui font des charges militaires: aux Offi-

DE LA MORALE CHRST. 611 ciers qui commandent sous eux ; & aux foldats qui sont sous la conduipart de ce que l'ay dit à l'occasion des Generaux-d'armée, convient aussi aux Gouuerneurs des Prouinces & des places, de sorte qu'il n'est pas besoin de le repeter : mais il y faut adjouster la confideration des choses qui leur peuuent estre particulieres. Dans les guerres eltrangeres, la commission des Generaux d'armée regarde les estrangers & les ennemis : mais la charge des Gouverneurs des Provinces & des places, regarde les regnicoles & les sujets du Souuerain. Contre ceuxlà donques mille choses sont permises, qui ne le peuuent estre enuers ceuxcy. Car la guerre qui se fait contre les ennemis est, ce semble, pour les destruire, au lieu que l'autorité de gouuerner les citoyens & les sujets, est pour leur bienfaire & les proteger. Comme donques le Roy est le pere de tout son peuple, les Gouuerneurs qu'il establit sont autant de tuteurs qu'il donne à ses Prouinces & à ses

612 SVITE DE LA DERN. PART. villes, pour auoir soin de leur conseruation? Ainsi tout ce qui ne choque point l'autorité du Souuerain, & qui peut estre fait pour le bien du peuple, doit estre embrasse auec chaleur par les gouverneurs. Le ne sçay s'il est vray qu'vniuersellement tous les astres qui sont au ciel, tirent leur lumiere du Soleil, & qu'ils font en quelque forte la nuit sa fonction en son absence. Mais c'est vne chose indubitable que les gouverneurs ont toute leur autorité du Roy, & que parce qu'il ne peut pas estre par tout, il les ordonne pour respandre sur ses sujets, l'yn icy & l'autre là, sa lumiere & ses influences. Ainsi dans la conduite ordinaire de leur administration, tous ceux qui sont sous leur puissance doiuent sentir leur protection; & dans les occasions extraordinaires, où ils ont besoin de leur secours, ils le leur doiuent faire sentir auec toute sorte d'affection & de vigilance. Et certes on doit cela à la memoire de Monsieur du Plessis Mornay, de faire quelque mention de la façon de laquelle il s'est conduit en ces

DELA MORALE CHREST. quartiers tandis qu'il en a eu le gouuernement. Aucun pere n'a plus de soin de sa famille, qu'il auoit de tous ceux qui luy auoient esté commis & il me souvient que dans les espouuantables rauages que firent les inondations de la riuiere de Loire l'an mil fix cens quinze, & quelques années après, il n'oublia rien à consoler les affligés, à soulager la necessité de ceux que ce deluge tenoit assiegés, à enuoyer de tous les costés des viures & des commodités à ceux qui en auoient besoin, & à reparer autant qu'il se pouuoit les dommages soufferts par les particuliers & par le public, auec vne sollicitude vrayement paternelle. Et si les habitans d'vne grande ville de ce voisinage ont témoigné depuis peu d'années vne affection extraordinaire à leur gouverneur guiusques à luy estre trop complaisans en des affaires qui concernoient le seruice du Souuerain, c'est qu'il auoit fait quelque chose de semblable en vne pareille occasion, iufques à y courir quelque risque de sa

614 SVITE DE LA DERN. PART. personne. Apres cela, il arriue asses fouuent que les volontes du Prince, & les inclinations des peuples, ne s'accordent pas trop bien: parce que les affaires de l'yn & de son Estat en general, l'obligent à demander ce que celles des autres ne leur permet pas de donner, finon auec beaucoup. d'incomodité qui les menace de ruine. Là il n'yapoint de doute que le gouuerneur ne doiue tenir la main aux intentions du Souuerain : il est preposé pour cela, & sa charge l'y oblige. Mais parce qu'il est plus pré des peu-ples qu'il gouverne, il connoist aussi mieux leurs necessités, & s'il y a quelque impossibilité en l'execution des volontés qui viennent d'enhant, ou quelque si grande incommodité que le poure peuple en soit epuise, il en doit faire remonstrance au Souverain, & procurer ainsi le soulagement de ceux qui sont sous sa conduire. En effect, il y a telles occasions où vn gouuerneur ne sauroit faire vn meilleur seruice au Prince qui l'a estably, qu'en luy faisant sauoir au vray l'estat des

DE LA MORALE CHREST. 615 affaires de les sujets, qui se portent quelquesfois au desespoir & à des mounemens déreiglés, pour avoir esté poussés à bout par des rigueurs hors de saison, & par des exactions excessiues. Et quand vne fois vn Gouuerneur a acquis cette creance entre les sujers du Roy, qu'il les aime & qu'il prend à cœur leurs interests, il les contient mieux en leur deuoir, il les manie plus aisément, & les empesche beaucoup plus efficacément de faire quelques mauuaises équippées. Que si nonobstant tous ses soins il ne peut arrester l'extrauagance de leurs mouuemens, ny empescher qu'ils ne se portent au sousseuement, son deuoir est bien d'employer toute son autorité à les reduire, & à n'y espargner pas mesmes la seuerité. Mais quand ils ont esté soumis & ramenés à la raison, il n'y a rien de si digne d'vn gouuer-neur, que de se rendre intercesseur pour eux enuers la clemence de son Prince. Tandis qu'ils resistent, il se doit souvenir qu'il est estably par le Roy pour maintenir son autorité.

616 SVITE DE LA DERN. PART. Mais quand elle est restablie, l'affection qu'il a pour le peuple se doit réueiller's pour exciter enuers luy la misericorde du Prince. Il est malaisé que dans vn gouvernement il n'arrive quelquesfois du mal entendu entre ceux qui sont en son estenduë, soit d'vne ville contre l'autre, si c'est vn gouvernement de Province, soit entre les habitans d'vn mesme lien, comme cela se void assés souvent. Or en telles occasions, si le Prince n'y a point de particulier interest, qui determine necessairemet vn Gouverneur à prendre plustost vn party que l'autre ; ilsy doit estre quant à ses affections absolument indifferent, & se partager egalement entre ceux qui ont à son egard vne relation egale. De sorte que tenant la balance en equilibre pour entendre les vns & les autres sans preoccupation, fans passion, & sans preiugé, il n'y ait rien que la instice & le droit qui le face pancher d'vn costé, quand vne fois, par la deduction reciproque des raisons, il en a pris vne exacte connoissance. Alors il se doit

DE LA MORALE CHREST. 617 à la verité declarer comme vn Iuge pour ceux qui se trouuent auoir le droit : & neantmoins il se doit gouuerner comme vn pere & enuers ceux & pour ceux qui se trouuent auoir le tort. Enuers eux premierement, pour leur representer leur deuoir, & les y ramener par ses remonstrances. Pour eux aussi, en representant aux autres qu'il faut qu'ils les traittent comme freres, pour relascher quelque chose de leurs interests, & ceder de leurs auantages, si la trop grande exactitude à les retenir ou à les poursuiure, peut causer quelque grande incommodité à leurs concitoyens, ou nourrir quelque aigreur dans leurs esprits, qui empesche l'entretenement de leur paix & de leur concorde. Car vn gouuerd'où celuy à qui la conduite en est commise, doit bannir, s'il est possible, toutes sortes de dissensions. Surtout, quand dans vn gouuernement il'y a deux religions differentes, vn gouuerneur est obligé d'y apporter vne moderation extreme, & vn esprit dégagé

618 SVITE DE LA DERN. PART. de toutes sortes de passions. Parce que d'eux mesmes les peuples s'eschauffent ordinairement plus pour leurs denotions que pour aucune autre chose, & an lieu qu'assés souvent les autres causes de dissension sont passageres, & naissent de quelques occasions qui ne durent pas, celle-cy est constante & perpetuelle, & capable de tenir les esprits dans vne continuelle trempe d'aigreur. De forțe que si les deux partis sont à peu prés egaux en force, ils ne s'entr'aiment pas tant qu'ils s'entrecraignent, & sont toujours sur leurs gardes pour se preseruer des entreprises de leurs contraires, & se preualoir des occasions. Et si l'vn des deux partis est de beaucoup plus fort que l'autre, la concorde y est beaucoup plus malaisée à entretenir. Parce que les plus forts sont ordinairement insolens & entreprenans, & les plus foibles soupçonneux, & mesme quelquesfois vn peu chagrins, ce qui cause vne infinité de desordres. Quelques-vns disent qu'en telles rencontres il seroit expedient

DE LA MORALE CHREST. 619 qu'vn Gouverneur n'eust du tout point de religion, ou au moins que s'il en auoit vne, elle fust entre les deux qui causent la contestation, & indifference à l'vne & à l'autre. Comme seroit celle d'vn Chrestien s'il audit à reigler les differens d'entre les Turcs & les Payens: ou comme seroit celle d'vn Turc, s'il estoit estably sur des Chrestiens qui sont de diuerses communions, comme sont la Grecque & la Romaine, ou la Romaine & la Protestante. Et tel est à peu pres l'Empereur à l'egard de ceux qu'en Allemagne on appelle Calvinistes & Lutheriens, si ce n'est que la Religion de ceux-cy ait quelque peu plus d'affinité auec la Romaine. La raison de ceux qui sont de ce sentiment est, qu'il est comme absolument impossible qu'vn homme qui tient l'vne des deux religions qui produisent le debat, ne soit plus enclin à fauoriser les interests de la forme de deuotion qu'il a embrassée: & plus il y a de zele & d'affection, plus semble-t-il qu'il doine estre porté de

620 SVITE DE LA DERN. PART. ce costé-là, non par inclination seule ment, mais encore par conscience. Et neantmoins ce sentiment est clairement refuté par l'experience qu'on en a faite en ces quartiers depuis enui-ron soixante & dix ans. Car chacun sçait quel estoit M. du Plessis Mornay, & que comme de son remps il n'y auoit homme qui entendist mieux que luy la Religion qu'il professoit, aussi n'y auoit il aucun qui eust plus de zele à l'auancer, ny qui en embrassaltalt les occasions auec plus d'affection, quand elles estoient raisonnables. Et neantmoins par l'espace de trente deux ans qu'il a esté gouverneur de Saumur, il s'y est comporté de telle façon, que iamais les Catholiques n'y ont eu le moindre sujet de plainte. Et s'il fust arriué à ceux de la Religion de s'emanciper au delà de ce que les Edicts leur permertoient, il eustresté le premier à exprimer leurs entreprises. Depuis, nous auons eu Monsieur le Mareschal de Brezé, qui estoit dans l'autre communion, non de profession exterieure seulement, mais encore de

DE LA MORALE CHREST? 625 creance. Car il n'y estoit pas comme l'on dit de beaucoup de gens de la Cour, par complaisance seulement, & sans aucune persuasion de la verité de sa creance. Il croyoit sa religion bonne, & y auoit de l'affection, & neantmoins il y estoit si equitable en matiere de gouvernement, qu'il estoit icy pour nous ce que M. du Plessis y auoit esté pour les Catholiques. De forte que soit pour le general; ceux de la religion y ont esté en pareille liberté qu'auparauant: soit pour le particulier, il en a aimé quelques vns de telle façon & si constamment, qu'ils n'ont point eu de sujet d'enuier la bonne affection qu'il monstroit à qui que ce fust de la communion Romaine. A cette heure nous sommes sous la conduite de Messieurs de Guitaut & de Comenge, que nous considerons comme nos gouverneurs par indivis, & comme ayans sur nous vne autorité toute egale. Ces deux Seigneurs sont Catholiques Romains de creace comme de profession : & l'vn s'y est confirmé par vne vie de quatre-vingts ans

622 SVITE DE LA DERN. PARC. l'autre, comme il a loint les lettres auec les armes en vn degré fort eminent, est capable de la defendre autant que la nature de la chose le peut permettre. Et toutesfois leur administration à tous deux est icy pleine de tant d'equité, que dans les prieres que nous faisons continuellement à Dieu pour eux, nous ne demandons, apres la prosperité de leurs personnes & de leurs maisons, sinon qu'il plaise à nostre Seigneur presider toujours tellement sur leur conduite par la sienne, que nous puissions à l'aduenir, comme nous auons fait par le passé, mener vne viel paisible & tranquille, en rendant seruice à Dieu sous la douceur de leur gouvernement. En effect ; vn sage gouuerneur comme eux met icy di uerses choses en consideration. La premiere est qu'en cette charge il n'agit pas de son chef, mais comme Lieutenant du Prince. De sorte qu'il y doit prendre conseil, non de ses propres sentimens, mais des interests de son Souverain, dont la volonté est que

ses sujets viuent en paix, parce que

DE LA MORALE CHREST. 62 c'est le bien de son Estat & de son seruice. Et c'estoit la maxime du Mareschal d'Ornano, quoy qu'il fust grand zelateur de sa Religion, que puis que le Roy le vouloit, il maintien droit absolument ceux de nostre profession dans toutes leurs libertés, & qu'à ceux qui les y voudroient trauerser il feroit boire la Garonne. Car comme en toute autre chose, celuy qui tient la place d'vn autre,& qui est preposé par son autorité pour cela, doit agir comme feroit celuy qui l'a estably, s'il exerçoit ses fonctions en personne: icy vn Gouuerneur pour le Roy ne doit point auoir de volonté sinon celle. de son Prince. L'autre est, que dans les differens de cette nature, comme en tous autres, il ne faut estre que pour la justice & pour la raison. Or ce n'est pas de la comparaison d'vne religion auec l'autre, ny de l'opinion que lon a de leur vice ou de leur bonté, qu'il faut rere la connoissance de ce qui est iuste & raisonnable en telles occasions. Chacun est persuadé de la bonté de sa creance, autrement il

624 SVITE DE A DERN. PART. n'en feroit pas profession. Ainsi, où le Gouverneur seroit Catholique; il faudroit faire estat que ceux de la Religion perdroient leur procés: & au contraire, où il seroit de la Religion, les affaires n'iroient iamais bien pour les Catholiques. La reigle du droit en cela c'est la Loy publique, dont il faut ponctuellement suiure les decisions. Autre chose est de considerer la religion en elle mesme, & autre de la regarder entant qu'elle concerne la Police, & qu'elle fait partie de l'E4 stat. Chacun la doit considerer en ce premier egard pour ce qui regarde son particulier, & prier Dieu qu'il luy vueille donner les inspirations necessaires pour pouuoir embrasser la bonne, & pour paruenir parce moyen au salut. Mais les personnes publiques, qui sont establies sur les choses ciuiles & politiques, la doiuent dans les fonctions de leurs charges, confiderer au fecond, & ne desirer ny ne connoistre point d'autres inspirations, que celles que donnent les Ordonnances des Roys, & les loix des Estats & des Republiques.

DE LA MORALE CHREST: 625 publiques. Comme donc entre les Protestans, celuy qui peruertit ces Loix en faueur de ceux de sa profession, doit estre tenu pour passionnés entre les Catholiques celuy là doit aussi passer pour bigot, qui fait violence aux Edicts de pacification en faueur de la religion Romaine: & ny I'vn ny l'autre n'est pas propre pour se bien acquitter d'vn gouuernement. Et comme ceux qui sont en ces charges font bien d'essoigner vn peu d'eux les Moines, & les personnes Ecclesiastiques, que leurs maximes portent ordinairement à mettre tout en desordre sous pretexte de pieté; aussi sont ils bien de ne prester pas l'oreille aux Ministres, s'il s'en trouue quelques yns d'entr'eux que leur zele emporte au delà de la raison. Mais on peut voir parce que i'en dis quels sont leurs sentimens en cette matiere: & si les Ecclesiastiques & les Moines s'en declarent de la sorte, ie retracteray tresvolontiers ce que ie viens de dire d'eux. La troisième finalement est, que comme cette procedure n'est pas

esupitdua

616 STITE DE LA DERN. PART. iuste, de faire violence aux Loix sous pretexte de deuotion, aussi n'est elle ny charitable ny prudente pour l'auancement de la Religion. Car d'vn costé-l'injustice donne de tres-mauuais preiugés contre la religion qui la fomente : & de l'autre, elle irrite les esprits, & les rend incapables de receuoir les choses qu'on leur dit pour les convertir. Et c'est la raison-pourquoy lors que les Apostres ont presché l'Euangile de lesus-Christ, ils n'y ont employé autre chose que l'euidence de la verité, & la merueille de leurs miracles, dont la premiere change doucement l'entendement, l'autre le rauit veritablement, mais c'est d'vne merueillensement douce & agreable violence. D'ailleurs, ils ont laissé les hommes dans vne entiere liberte, sachant bien qu'il n'y a rien de si, importun ny de siennemy de l'esprit humain, que la necessité de la contrainte. Et de fair, si la verité, toute belle & agreable qu'elle est, si la magnificence des miracles, qui donne, au moins pour quelque peu de temps, dans la veuë

DE LA MORALE CHREST. 627 des plus mécreans, ne sont pas capables de convertir les hommes si Dicu ny déploye quand & quand quelque efficace de son Esprit, que peut on esperer d'vne religion qui ne se prou-ue point par de vrays miracles, qui ne se fie point en l'enidence de sa verité. & qui se veut faire embrasser par l'injustice & parla violence? Eticy ie ne puis m'empescher de faire vne digresfion. Nous voyons depuis quelqué remps en diuers endroits de ce royaume, que le zele de quelques vis des Catholiques Romains, les porte à ra-uir les enfans de ceux de la Religion, pour les faire instruire dans les cloistres: & quand on s'en plaint aux Iuges &aux Magistrats des lieux, on y trouue de la rigueur, que l'on couure & que l'on colore du soin de l'education de ces enfans, & du salut de leurs ames: Certainement quand ils sont venus en aage de dire s'ils veulent changer de religion ou non, il doit estre absolument en leur liberté de le faire. Comme ceux de nostre profession ne trouueroient pas bon que les peres Catho-

Rrz

628 SVITE DE LA DERN. PART. liques vsassent de violèce enuers leurs enfans; pour les empescher de passer dans nostre communion, quand ils font en estat de le faire auec connoissance de cause: ils ne doiuent pas trouuer mauuais qu'on permette aux leurs qui sont en cet estat là, de passer volontairement dans la communion Romaine. L'Edict doit estre pour les vns & pour les autres egalement, & ce seroit chagrin & iniustice que de s'en plaindre. Mais ceux de nostre profession se plaignent auec raison en telles occasions de deux choses nomément. L'vne est qu'on abuse de la foiblesse de leurs enfans en vn aage auquel ils ne sont pas encore capables de choisir vne religion, & qu'on les leur débauche par des cajoleries & par des promesses. Chacun sçait quelle est la foiblesse de la ieunesse, & comment elle se laisse mener à ses passions. C'est pourquoy dans les choses qui sont de quelque importance à la vie humaine, on ne souffre pas que les ieunes gens y entreprennent quelque chose de leur chef, sans le consentemen

DE LA MORALE CHREST. 629 exprés de leurs peres ou de leurs tuteurs, de peur qu'ils ne se laissent aller à des actions qui leur soyent preiudiciables. Car il est bien de la Iustice publique d'vn Estat, dont les citoyens ne sont pas esclaues, de leur laisser la liberté toute entiere de leurs actions en ce qui ne regarde point le Public; mais il est de la prudence aussi d'estimer que cette liberté n'a point de lieu sinon où est l'vsage de la raison, quand elle est dégagée des empeschemes des passions, & de la foiblesse de l'aage. Quelle iustice donques y peut il auoir qu'on oste à leurs peres des enfans qui ne font pas encore paruenus à la puberté, pour leur faire donner telles impressions que l'on veut par des Nonnains & par des Moines? Il est vray qu'on a accoustumé d'alleguer en ces occamissions les inspirations de l'Esprit de Dieu, qui n'attend pas l'aage de ces enfans pour éclairer leurs entendemens, & pour les rendre capables de discerner laquelle des deux religions est la meilleure. Mais veritablement cette allegation est bien estrange. 630 SVITE DE LA DERN. PART.

Ceux qui la mettent en auant trouveroient ils bon qu'on s'y fondalt pour tirer leurs enfans de dessous leur aile? Ne voyent ils pas bien que c'est vne raison commune aux Catholiques & aux Reformés, pour s'en seruir chacun selon qu'il a la force en la main; les vns icy & les autres là, ainfi que le Magistrat fait profession de la Religion qu'on appelle dominante? Encore certes auroit elle meilleure grace en la bouche de ceux de nostre profession, que non pas en celle de la contraire. Car quand nous disons que c'est l'Esprit de Dieu qui nous illumine, & qui nous rend capables de discerner la Parole de Dieu d'auec les escrits humains, la vraye Eglise d'auecque la fausse, la bonne religion d'auec la manuaise, ils nous accusent de nous vanter d'auoir vn Esprit particulier, & peu s'en faut qu'ils ne crient contre nous comme si nous estions des fanatiques. Et neantme ins ceux d'entre nous qui parlet ainsi sont des gens capables de la raison, instruits en la religion, & asses auancés en aage pour

DE LA MORALE CHREST. pounoir discerner en cux l'ogeration de l'Esprit qui leur fait juger des objets selon la diversité de leurs qualités, d'anec les monumens irreguliers & fantastiqués des enthousiastes. Comment donques ceux qui dans cette difpute qu'ils ont contre nous, ne reconnoissent presque aucun: operation do l'Esprit de Dieu en l'ame des particuliers, quoy qu'adultes & bien instruits, s'imaginent-ils qu'il y en a de si extraordinaires dans l'esprit des enfans, qui n'ont encore aucune solide instru-&tion, & en qui la raison est si embrouillée? Mais quelle que soit l'efficace de l'Esprit de Dieu en eux, (car c'est vne chose que ie ne me propose pas d'expliquer ny d'aprofondir icy,) ce ne doit pas estre de la qu'on prenne les reigles de sa conduitte en cette occurrence. C'est de la loy de la Nature & de la Raison, qui nous oblige de croire que les enfans ont besoin de la conduite de leurs peres, & que c'est à eux qu'il en faut laisser l'education, & non pas les leur dérober sous pretexte de deuotion & de zele. Si Dieu

632 SVITE DE LA DERN. PART. veut effectiuement agir en eux par la vertu de son Esprit, il ne laissera pas de le faire indubitablement en temps & lieu, sans que nous y facions quant à nous des contretemps, des iniustices, & des violences. L'autre chose est, que s'il y a quelcun à qui l'aage ait peu donner la faculté du discernement, & le moyen de juger solidement de la difference des Religions, aussi-rost qu'il en a fait sa declaration, on le soustrait en quelque façon à l'autorité paternelle. On luy permet de ne demeurer pas dans la maison de son pere, on luy ordonne des pensions pour viure ailleurs qu'en sa maison à sa volonté, & on l'affranchit tellement de sa iuste & naturelle domination, que si c'estoit vn estranger on ne luy donneroit pas plus de liberté d'agir contre ceux qui l'ont engendré, auec toute la licence du Palais, & toute la rigueur de la Iustice. Et ce qui seroit trouué insupportable en vne autre occasion, de voir vn ieune homme de vingt ans plaider contre son pere à toute outrance, & le pro-

DE LA MORALE CHREST. 633 mener dans les sieges Presidiaux & dans les Parlemens; où il s'agit de la Religion, non seulement ont le tole-re, mais mesmes on le fauorise. Si vn pere vsoit de quelque inhumanité enuers son fils à cause de ce changement, on auroit raison d'y pouruoir: car c'est à la puissance politique à reigler les particuliers, quand ils abusent de la leur contre l'institution de la Nature. Mais quand vn pere laisse son fils en la liberté de ses sentimens, quelle raison y a t-il de luy en oster le gouvernement, & d'incommoder pour cela les affaires de sa maison, sous ombre qu'il fait profession d'vne religion contraire ? C'està ceux qui sont veritablement Chrestiens à supporter courageusement toutes les persecutions qu'on leur fait pour la verité de Christ, & à ne s'emanciper iamais de l'obeissance qu'ils doiuent à leurs superieurs, quelque chose qu'on leur face. Mais il n'y a personne qui n'aduouë qu'il est malaisé de se retenir en telles occasions, & d'empescher que la douleur, iuste & ineuitable qu'elle est,

634 SVITE DE LA DERN. PART. n'emporte les plus moderés au de là des bornes. Les animaux les plus doux s'irritent quand on leur ofte leurs perits; les farouches en deuienment furioux; & tous generalement y sentent de violentes emotions de leurs entrailles & de la nature. De sorte qu'il ne faut pas s'estonner si les hommes y suivent quelquesois de, mouuemens de ce mesme principe-là, & s'il predomine en leurs cœurs sur les sentimens de la Raison, & sur l'instinct de la Grace mesme. Pour donques retourner à mon propos, s'ilse trouve des affaires de cette sorte où les Gouuerneurs des Prouinces & des places puissent faire valoir leur autorité, ils La y doiuent employer pour l'amour de la iustice & de l'equité, & mesmes par la confideration du service de leur Prince. Car il luy importe que ses sujets ne sovent pas mis au desespoir, qui est toujours vn tres-mauuais conseiller de l'obeissance. Et bien que la barbarie du Turc rende son loug merueilleusement rigoureux, & que ce gouvernement despotique ait quel-

DE LA MORALE CHRECT. que chose de si choquat, & de si ennemy des ames où il y a de la generosité, qu'il y a quelque sujet de s'estonner comment on le peut supporter, si estce que puis que les Chrestiens qui font sous sa domination, y sont nés, ou qu'ils luy ont presté le serment de sideliré, ie les estime obligés par la conscience às'y assujetir, excepté que le tribut des enfans me semble si horrible & si inhumain, que ie ne puis m'empescher de dire que c'est vn fort excusable sujet de revolte. Car quand vn Prince en est venu à ce degré de tyrannie, que de violer tous les droits de la Nature si hautement, il met ses sujets hors des termes de la Raison, & les oblige en quelque façon à en oublier les axiomes & les reigles. C'est pourquoy la volonté du Roy estant que nous iouissions de nos enfans selon que la Nature le prescrit, ceux là sans doute vont directement contre son service & son interest, qui fournissent à ses sujets vne telle occasion d'irritation, qu'il est malaisé qu'ils se contiennent entre les termes du respect,

336 SVITE DE LA DERN. PART. qu'ils doiuent aux loix publiques.

Ie nem'estendray pasicy beaucoup à descrire vne autre sorte de denoir auquel les Gouverneurs font obligés, parce que l'en ay parlé dans l'explicazion de ceux qui concernent les Capitaines & les Generaux d'armée: c'est qu'il faut qu'ils ayent les mains nettes, & qu'ils ne facent pas de leurs gouvernemens vn pillage ou vn brigandage. On doute s'il est plus expedient de laisser toujours vn mesme gouuernement entre les mains d'vn homme, ou s'il est plus à propos de ne l'y laisser pas long-temps. Car quand vn homme prend racines dans vn païs, & qu'il ne craint pas d'en estre reuoqué par celuy qui l'y a estably, il a, ce semble, plus de moyen d'y commettre ses extorsions & ses pilleries, s'il est d'humeur à cela : & au lieu qu'il y en pourroit venir vn autre apres luy qui en vseroit auec plus de moderation, de sorte que le peuple auroit loisir de se remettre de ses souffrances; la continuation de ses iniustices est vn chanere qui ronge sans cesse, & qui en sin

DE LA MORALE CHREST. 637 reduit les choses à la derniere extremité. Car comme yn cautere appliqué à vne partie du corps, s'il n'y demeure pas long-temps, ne fait qu'ne petite escare, qui, si on l'en oste de bonne heure, se peut aisément cicatriser; au lieu que si on l'y laisse toujours, il brusle au long & au large, & descend mesmes iusques aux os : ainsi vn homme qui a l'inclination à brigander vn gouvernement, plus'il y sejourne longuement, & plus y fait il de rauages. D'autre costé aussi, il y a tel qui parce qu'il preuoit qu'il sera bien tost retiré de son administration, s'en veut preualoir tandis qu'il y est, & raffle s'il peut tout d'vn coup, ce qu'il n'auroit emporté que peu à peu, si on luy auoit donné le loisir de dispenser vn peu autrement ses griuelées. Et comme les peres de famille ne tirent pas d'vne terre tout ce qu'ils pourroient en deux ou trois ans, mais ils la mesnagent & l'entretiennent afin qu'elle puisse tonjours fournir aux besoins de leur maison : au lieu que les fermiers, qui n'esperent pas de la gar-

638 SVITE DE LA DERN. PART. der au delà du terme de leur bail, l'épuisent & la desolent : de mesmes vn gouuerneur tyrannique & violent, broute & rauage vne Prouince, & la met en peu d'années au dernier point de sa de solation, quand il preuoit qu'il en sera bien-tost rappellé; là où si le gouvernement luy eust esté donné pour toujours, il en eust vsé plus moderément, & come de son patrimoine. Les Romains, pendant le temps de la Republique, ne donnoient au com-mencement les gouvernemens que pour vn an seulement: & quand on vint à les prolonger, ce fut vn commencemet de la corruption de l'Estar, qui en fin en apporta la ruine. Car fi ny Pompée ny Cesar n'eussent point esté si puissans ny si ancrés dans les Prouinces qui leur auoient esté données à conquester & à gouverner, ils n'eusset point eu ny l'vn ny l'autre de si hautes esleuations d'esprit, & n'eussent pas conceu & nourry des esperances si ambitieuses. Et neantmoins dés auant la guerre ciuile qu'ils firent tous deux, & qui changea la Republique

DE LA MORALE CHREST. 639 en Monarchie par la Dictature perperuelle du vainqueur, & par la puissance de ses successeurs, les choses en estoient venuës à tel point, que la plus part des couverneurs exerçoiet d'horribles extorsions dans toutes les parties de l'Empire. Et bien qu'il y eust de fort bonnes loix faites contre le peculat, & qu'on donnast aux Prouinciaux la liberté d'accuser ceux qui les auoient pillés, c'estoit pourtant le plus souuent tres-inutilement qu'ils le faisoient, tant les accusés trouvoient de support, & tant il y auoit peu de iustice dans les iugemens à Rome. Les oraisons de Ciceron, & particulierement celles qu'il a faites cotre Verres, rendent vn authentique témoignage, & de l'auarice insatiable des Preteurs & des Proconsuls, & de la confiance qu'ils auoient en la corruption de la Ville. Car si, pour exemple, on eust enuoyé en Sicile vn torrent pour la rauager, & pour en emporter, comme par vne espouuantable rauine, tout ce qu'il y auoit de beau & de bon, en or & en argent monnoyé & non mon-

640 SVITE DE LA DERN. PART. noyé, en vaisselle exquise & en meus bles precieux, en tapisseries, en statuës & en tableaux, & generalement en tout cela en quoy les hommes vn peu accommodés mettent leur satisfaction & leurs delices, il n'y eust pas plus fait de desordres que Verres fit au peu de temps qu'il y fut. Mais il le faisoit auec vne si grande licence & vne si profonde securité, que preuoyant bien qu'il ne pourroit pas euiter d'estre accusé par les Siciliens, il disoit tout hautement qu'il emporteroit tant de bien de cette Isle là, qu'il en auroit assés pour remplir les maisons de ses amis dont il attendoit du support; pour corrompre tous les Iuges deuant qui il auroit à comparoir; & pour demeurer encore apres cela prodigieusement riche. Quelque chose que l'on face & quelque prudence qu'on employe en telles occurrences, si les Gouuerneurs sont d'humeur à tormenter & à piller le poure peuple, ils taschent toujours d'y trouuer leur conte, soit qu'on rende leur puissance perpetuelle, ou qu'on la limite à peu de temps.

DE LA MORALE CHREST. 641 Car le vice de l'home trouue toujours assés de moyens de se contenter, & quand il est vne fois armé de l'autorité du Public, il n'y a rien qu'il n'entreprenne auce vne licence effrenée. Et bien que la façon de laquelle l'Estat de ce royaume est gouverné, ne laisse pas à ceux qui sont establis dans les Prouinces & dans les places, tant de moyens de vexer le peuple, qu'en. auoient autrefois à Rome les Proconfuls & les Preteurs, si est-ce qu'ils trouueroient toujours asses d'appuy dans la faueur de leurs parens & de leurs amis, pour esperer de le faire impunément, s'ils n'en estoient retenus par la consideration de l'honneur, & si leur propre vertu ne leur estoit loy. à eux mesmes. C'est donc à cela qu'il faut qu'ils regardent pour reigler leur administration, & les maximes de la Morale chrestienne y doiuent auoir plus d'efficace enuers eux, que l'autorité des Parlemens, ou l'indignation des Princes. Ils doiuent donc considerer que leurs Charges leur estant commise, d'vn costé, pour le seruice

642 SVITE DE LA DERN. PART. du Roy, & de l'autre costé pour le bien du peuple, c'est vne chose prepostere que de les estimer destinées à leur profit particulier. Car il est bien vray qu'ils y doiuent estre entretenus honorablement, & d'vne façon conuenable, tant à la splendeur de leur naisfance, qu'à la dignité de leur administration. Mais les gages qui leur sont assignés doiuent suffire pour cela, & tout ce qu'ils prennent au delà, est vne concussion, qui merite du chastiment dans vne Republique bien policée. Que si la moindre chose au de là des pensions, est vne faute digne de correction, que deura-t-on estimer d'eux quand toute leur administration fera vn manifeste brigandage? Ceux qui sont establis dans vne charge de cette nature, sont sujers à subir quatre sortes de iugemens. Le premier est celuy du Roy & de ses Officiers, qui est reiglé par les Ordonnances. Car la mort & l'ignominic est la peine du peculat, quandil est tant soit peu considerable de soy, ou qu'il a esté preiudiciable au seruice du Prince. Et ce

DE LA MORALE CHREST. 643 iugement là s'exerce rarement à la verité, soit que les Gouuerneurs n'en donnent aucun sujet, ou que le Roy y vueille vser de quelque indulgence. Et ce que nous auons veu de nostre temps vn Officier de la Couronne condamné à perdre la teste sur vne telle accusation, sembla presque à toute la France vn trait extraordinaire de rigueur, & fit soupçonner qu'il y auoit quelque autre crime plus secret, à la vengeance duquel le peculat seruoit de pretexte. Le second, qui ne s'euite pas si aisément, est des Grands & des petits, & de toutes sortes de gens, qui ont quelque connoissance de la personne & de son crime. Et ce iugement à la verité, ne met iamais vn homme sur vn echaffaut, ny ne ruine point sa maison, ny ne des-honore point sa race. Mais neantmoins il ne laisse pas d'estre fort sensible à ceux à qui il reste dans l'ame quelque chose de genereux & de grand; & quand on pense en son ame que les peuples qui vous regardent, disent tacitemet, Voila ce voleur, Voila ce fleau des 644 SVITE DE LA DERN. PART. sujets du Roy, Voila cet insatiable pirate, ie ne sçay s'il y a quelcun qui soit si endurcy au mal, qui n'en sente quelque douleur, quelque componction, & quelque honte. Le troisième est celuy de la posterité, à laquelle sans doute ne paruient pas la connoissance de la pluspart de ces crimes là, mais s'il arriue qu'elle y paruienne, il est seuere tout ce qui se peut, & imprime sur la memoire du delinquant, vne flestrissure inesfaçable. Or est il bien vray qu'on ne sent rien de cela quand on est mort : mais la pensée fait anticiper la honte de cette condamnation aux viuans, & elle s'estend insques sur leur race. Ils sont, dit-on de leurs énfans, riches des dépouilles de nos ayeuls, & les murailles de ces parcs, & ces magnifiques bastimens, ont esté cimentés du sang du peuple. Mais enfin il en reste vn qui est incomparablement plus terrible que tous ceux là, & absolument ineuitable. C'est le iugement du dernier iour, auquel il faudra que tout le monde rende conte de ses actions, & particulieremet ceux

DE LA MORALE CHREST. 645 qui ont esté establis en quelque puissance. Peut estre que c'est celuy auquel les hommes pensent le moins; mais c'est neantmoins celuy auquel ils deuroient le plus penser, s'il leur re-Loit quelque soin de leur salut, & quelque sentiment dans la conscience. Car la richesse n'y seruira de rien: la noblesse de la naissance ne s'y considerera du tout point : les amis n'y seront en aucun support : les actions ne s'y pourront ny cacher ny déguiser: les témoins ne s'y pourront recuser: & il ne sera pas possible d'y sléchir le Iuge, & encore moins de le corrompre. Quant aux peines; c'est beaucoup que de perdre la teste sur vn eschaffaut : mais cela est fait en vn moment. C'est beaucoup encore que de laisser sa memoire flestrie & diffamée apres soy: mais la mort en oste le sentiment, aussi bien que des autres choses Au lieu que quant à ce dernier iugement, les tormens en doi-uent estre eternels, & l'infamie ineffaçable aux siecles des siecles. Quant à ceux qui prennent en ces hautes administrations, pour reigle de leur conduite, les maximes du Christianisme & du vray honneur, ils ont en cette vie pour leur recompense, l'approbation de leurs Souuerains, l'applaudissement des peuples, la loüange de la posterité, la benediction de Dieu sur leurs enfans, la gloire & la prosperité de leurs maisons; & quand tout cela leur manqueroit, ils auront au siecle à venir, le témoignage de nostre Seigneur, & la participation de sa felicité dans les lieux celestes.

Le reste des gens de guerre qui sont sous les Generaux d'armée & sous les Gouverneurs, sont les Officiers & la soldates que , à qui ie donneray icy quelques preceptes separément. Et quant aux Officiers, comme le rang qu'ils tiennent dans la Milice leur donne beaucoup d'avantage sur les simples soldats, aussi se doivent ils souvenir de leur estre en bon exemple. Et il est bien vray que d'ordinaire ils leur en sournissent de beaux en ce qui regarde la valeur, & que s'il y a quelque belle occasion, ce sont ordi-

DE LA MORALE CHREST. 647 mairement les gens de commande-ment qui s'y signalent. Leur naissan-ce; car le plus souuent ils sont nobles; ou leur vertu, qui les a esleués aux grades; ou les grades mesmes, dont il faut tascher de se rendre dignes par de belles actions, leur inspirent ces beaux mouvemens sur lesquels se forment ceux qui les suiuent. Mais i'entens que cet exemple s'estende iusques aux autres vertus, de pieté enuers Dieu, de charité enuers le prochain, de mode'stie & de temperance. Car encore qu'ils ne soyent pas directement establis pour tenir escole de ces belles qualités, & que les Capitaines, les Gouuerneurs & les Generaux, ne requierent d'eux sinon qu'ils prennent garde à ce que chaque soldat face son deuoir dans toutes les factions de la guerre, qu'il ne manque pas à l'exercice quand on le fait, qu'il tienne ses armes en bon estar, & qu'il obeisse ponctuellement à tous les ordres qu'on luy donne; neantmoins comme ils ne sont pas seulement Officiers de milice, mais aussi Chrestiens,

948 SVITE DE LA DERN. PART. cette derniere relation ne doit pas estre vtile à eux seuls, mais encore à tous ceux qu'on a mis sous leur conduite. Et si leurs soldats se portent à la desbauche, & à la violence, & à l'iniustice, & aux autres vices de cette nature, à leur imitation, ils auront à en rendre conte à Dieu, quand cela leur demeureroit impuni à l'egard des hommes. Sur tout doiuent ils tant. qu'ils pourront reprimer en leurs soldats cette horrible licence de blasphemer à laquelle ils s'abandonnent. Car les reglemens de la Discipline militaire, & les descnses de iurer, ise font à la verité & se publient par l'autorité des Generaux : mais l'observation & l'execution en despend plus de ceux qui commandent sous eux, & qui sont plus messés parmy les soldats, dans les lignes & dans les forts, dans les redoutes & les corps-de-garde. De sorte que s'ils laissent violer ces bonnes loix en leur presence sans s'en emouuoir, ou si eux-mesmes les transgressent les premiers, comme cela n'arriue que trop souvent, ils en sont

DE LA MORALE CHREST. 649 responsables à Dieu & aux hommes. Quant aux soldats, c'est, comme ils sont à cette heure faits, vne sorte de gens peu disciplinables. Autrefois, au commencement de ces illustres Republiques d'Athenes, de Lacedemone, de Thebes & de Rome, qui ont remply les histoires de la memoire de leur vertu, c'estoit la plus belle chose du monde que leur soldatesque. Car c'estoient les citoyens mesmes de ces villes qui alloient aux occasions, & de quelque condition qu'ils fussent, il faloit qu'ils s'enrollassent sous les enseignes de leurs Capitaines. Et celuy qui auoit commandé l'année passée en quelque degré bien eminent, obeis-soit en celle cy comme le moindre de l'armée. Ie vous prie, ne faisoit il pas bon voir Epaminondas, le premier homme du monde, marcher comme vn simple piquier, & garder religieusement son rang, & obeir au commandement, & faire où il luy estoit ordonné la faction de sentinelle? Figurés vous Socrate, ce Prince & ce pere des Philosophes, cet exemple incom-

650 SVITE DE LA DERN. PART. parable de sagesse & de vertu, marcher coste à coste d'vn boulanger ou d'vn cordonnier, dans les troupes des Atheniens qui alloient au siege de Potidée. Mettés vous vn peu deuant les yeux de l'esprit Caton, qu'on nomme le Censeur, ou Fabius Maximus, ou ces fameux Scipions, l'admiration des Romains, & les miracles de leur Republique, donner leur nom à vn Capitaine qui dresse sa compagnie, ou qui fait vne recreuë, & respondre quand on les appelle pour les ranger comme soldats dans les legions. En fin, ima-ginés vous vn peu ce que c'estoit qu'vn regiment de soldats Spartains, dont il n'y en auoit pas vn qui ne peust seruir de General à plusieurs autres peuples de la Grece. C'estoient des gens sans doute à qui les preceptes de la Morale estoient bien aisés à pratiquer, & quoy que tous leurs compagnons ne fussent pas si emi-nens en belles qualités, c'estoient neantmoins des gens capables de se former sur ces beaux modelles. I'ay dit ailleurs qu'au commencement des

DE LA MORALE CHREST. 651 guerres ciuiles qui se firent pour la Religion en France, la soldatesque qui tenoit pour la Reformation, donnoit de l'estonnement à tous ceux qui la voyoient, ou qui entendoient parler de l'integrité de sa conduite. Car les escadrons & les bataillons estoient plus purs que ne sont les cloistres des Religieuses, & la Morale chrestienne y estoit, non pas en preceptes ny en papier, mais viuante, incarnée, & animée. Aujourd'huy, comme la guerre se fait, ie ne sçay si l'on peut dire que la plus-part des soldats soyent capables de raison. Outre quelques Gentis-hommes, qui veulent apprendre le mestier, & quelques ieunes hommes d'honneste naissance, à qui le sang boult dans les veines, & que leur courage porte à s'auancer par la reputation de la valeur, il y en a peu qui suiuent les armes sinon en esperance de picorer; & hors quelque fermeté de cœur, qui en quelques vns est plustost vn effect de brutalité, qu'vne qualité qui merite le nom de vertu, la plus-part sont des ges perdus qui s'a652 SVITE DE LA DERN. PART. donnent à toutes sortes de vices. Si donc Aristote dit que les ieunes gens, & ceux qui sont sujets à leurs passions, ne sont pas bons pour receuoir les preceptes de la Morale, parce que c'est vne discipline practique, à l'exercice de laquelle leurs mauuaises affections les empeschent de se ranger, ie pourrois bien penser que les enseignemens que ie donne icy, seroient inutiles à ces gens là, puis que la coustume de pecher leur a presque osté l'vsage de la raison, tant s'en faut qu'elle leur. ait laissé les sentimens du Christianisme. Neantmoins, puis que ce sont des hommes, ils sont susceptibles de quelques meilleures inclinations, si on y apporte du soin, & s'il plaist à Dieu d'épadre sa benediction sur les instructios qu'on leur donne. Et comme plus les ieunes hommes sont sujets à leurs passions, plus ont ils besoin de la Morale, quoy qu'Aristote dise qu'ils ne sont pas propres à l'écouter; plus les mauuaises habitudes ont emporté ces gens loin hors des termes de la pieté & del'Euangile de I. Christ, plus fau-

DE LA MORALE CHREST. 653 droit-il essayer de les guerir, & de les ramener en la bonne voye. Ie voudrois donc que toutes sortes de personnes y contribuassent. Les Officiers, comme i'ay dit, par le bon exemple de leur vertu : les Ecclesiastiques & les Ministres qui se trouuent dans les garnisons & dans les armées, par leurs continuelles exhortations: les Generaux par leurs bons reiglemens, & par l'exactitude & la seuerité de leurs chastimens: les Princes, par le soin de leur faire donner regulierement leur paye, afin que les Capitaines peussent exercer la Discipline militaire auec plus d'autorité; & generalement tous ceux de qui cela depend, leur soin & leur assiduité, afin de reformer. les garnisons & les camps, qui depuis asses long-temps sont pleins de dissolutions & de licence. Parce donc qu'ils sont desbauches apres les femmes, il leur faudreit donner & de bonnes instructions & de bons exemples à la chasteté. Parce qu'il y en a beau-coup d'yurognes, il faudroit tascher de les former à la temperance & à la

654 SVITE DE LA DERN. PART. sobrieté. Parce qu'ils sont ordinairement picoreurs, & rauisseurs du bien d'autruy, il leur faudroit mettre continuellement deuant les yeux l'idée de la justice, & leur en imprimer le res-pect & la veneration. Parce que pour exercer leurs picorées ils font souuent des violences & des cruautés, il les faudroit ployer à l'humanité, & leur donner cette impression, que hors la chaleur du combat, toute violence qui s'exerce sur les corps, est le fair, non des chrestiens, mais des barbares. Parce qu'ils sont ioueurs, & que pour fouruir à cette manie dont les esprits de la plus-part des gens de guerre sont saiss, il faut qu'ils facent mille rapines, il faudroit essayer de les diuertir à d'autres occupations & à d'autres recreations, qui exerçafsent le corps, & qui ne corrompissent pas l'ame. Parce qu'ils sont ordinairement oiseux, il faudroit à l'heure qu'on ne fait pas la guerre tout de bon, les tenir perpetuellement en haleine par l'exercice des armes, par le maneige des cheuaux, & par les fem-

DE LA MORALE CHREST. blans des combats, où, sans effusion de sang, ils fissent paroistre la vigueur & l'addresse de leurs corps, &, autant que la chose le pourroit souffrir, quelque ardeur de leur courage. Sur tout, parce qu'ils sont presque tous iureurs & blasphemateurs du nom de Dieu, il faudroit tascher de leur inspirer le respect de la Diuinité, & la pensée d'vne autre vie que celle-cy, & de cet épouuatable iugement où il faudra quo tous les homes comparoissent. Quand, pour ainsi dire, vne armée seroit compo!ée de bestes sauuages, si on y procedoit de la sorte, on gaigneroit quelque chose sur leur naturelle ferocité: & il n'y a point de si grande corruption parmy cette nature de gens, que l'on n'amendast & qu'on ne corrigeast, ou en partie ou absolument, si on y employoit comme il faut les bonnes loix & les bons exemples. Du temps de la Ligue le débordement estoit estrange entre les gens de guerre en France, & le desordre n'estoit gueres moindre chés les estrangers. Principalement, où il y auoit des François,

656 SVITE DE LA DERN. PART. il sembloit qu'ils portassent la licence & le déreiglement auec eux, comme nommément au Pays-bas, quand nous commençasmes à nous messer dans les troupes de Hollande. Et toutesfois quand la Nouë Bras-de-fer y eut l'autorité du Commandement, il y apporta de si bons reiglemes, il vsa d'vne si merueilleuse prudence à la conduite de ses gens, & leur donna luy mesme de si admirablement beaux exemples en sa vertu, que le plus illustre de nos Historiens'luy en donne cette lou, nge. Certainement, dit-il, la France estoit grandement obligée à ce personnage, qui pendant que les autres Grands du Royaume, & les autres Capitaines de fon temps, soit qu'ils fussent corrompus par les vices du siecle ou par ceux de la Cour, diffamoient l'honneur de leur nation, conseruoit & maintenoit seul la gloire du nom François, & en son pays & parmy les estrangers, par l'innocence de sa vie, par la valeur de sa personne, par l'observation exacte de la Discipline militaire, & par la prudence. Vertus qu'il adjouste auoir esté en luy incomparables

DE LA MORALE CHREST. 657 parables & sans fard. Et combien cela est efficacieux enuers des soldats, il en a luy mesme fourny les preuues. Car comme il estoit en vne expedition où il falloit vser de diligence pour ne perdre pas l'occasion, on luy apporta l'aduis que l'argent destiné au payement de ses gens de guerre, estoit arriué à Menin, place essoignée & de-stournée du lieu de son entreprise. Parce doc qu'il y auoit quelque temps qu'ils l'attendoient, & que d'ailleurs assés souuent l'argent anime ces genslà, au lieu que la faute de payement les décourage, il les assembla pour leur annoncer cette nouuelle, & leur offrit de les mener à Menin. Mais ils luy firent vne response que les Escriuains du temps ont à bon droit estimée digne d'estre chroniquée. Monsieur, dirent-ils, ce n'est pas icy le temps de conter de l'argent : C'est le temps de combattre, & de faire de belles actions, & qui soyent dignes de ceux qui ont appris la vertu sous vostre discipline. On a remarqué dans les histoires, comme vn effect d'vne autorité extr

Ţ

38 SVITE DE LA DERN. PART. re de Iules Cesar & de l'Admiral de Coligny sur leurs soldats, qu'ils ont eu le credit enuers ceux d'entr'eux qui auoient de l'argent, de leur faire mettre la main à la bourse pour fournir à la paye de leurs compagnons. Et veritablement c'est vn grand effort de pouuoir, enuers des gens qui d'ordinaire ont l'ame vn peu mercenaire. Neantmoins, puis qu'ils auoient de l'argent, il ne leur estoit pas impossible d'en donner; & peut estre que la necessité les y obligeoit, parce qu'autrement leurs compagnons se fussent retirés ou desbandés, & eux mesmes fussent ainsi demeurés à la mercy de leurs ennemis. En effect, sans cet acte de magnanimité, les Allemans s'en fussent retournés, & les François se fussent trouvés exposés à toutes sortes de malheurs sur les frontieres de Lorraine, où le Prince de Condé & l'Amiral estoient allés pour les ioindre. Mais les foldats de la Nouë, en l'occasion dont ie parle, manquoient de commodités, & l'execution de l'entreprise à laquelle on les menoit, pou-

DE LA MORALE CHREST. 659 noit estre differée ou laissée tout à fait, sans aucun peril pour eux, & sans la ruine des affaires. Tellement que cette response procedoit d'vne pure generosité, & de l'admiration en laquelle ils auoient la vertu de leur capitaine. Si donc en vn siecle si corrompu, & dans vne si grande licence qui regnoit dans toutes les autres armées de ces temps là, la Discipline & le bon exemple d'vn Chef, a peu donner de si belles eleuations d'esprit à ces braues gens, il ne faut pas desesperer qu'en y apportant du soin, l'on ne puisse restablir l'estime de la vertu parmy la soldatesque de ce téps, quelque déreiglement qui s'y voye. Et certes tous ceux qui y ont vocation, ou qui y peuuent contribuer, s'ils ont quelque sentiment de pieté, & quelque affection pour le vray honneur, s'y doiuent employer de tout leur pouuoir, pour s'acquitter de leur deuoir, & pour la gloire du Christianisme. Car c'est veritablement vn estrange diffame pour les Chrestiens, que les Payens d'autresfois, & que les Mahometans

Tt2

660 SVITE DE LA DERN. PART. de maintenant, ayent esté & soyent plus reiglés sans comparaison, en leur maniere de faire la guerre, que ne sont ceux qui font profession de l'E-uangile du Sauueur du monde. Ces Aigles, dont les vns reueroient la consecration, ce Croissant, pour qui les autres ont de la veneration, se leueront quelque iour en iugement contre les Croix que nous arborons par tout pour signal de la profession que nous faisons exterieurement, mais que nostre vie & nostre conuersation renonce. Quand on apporteroit à la guerre toute la moderation qui se peut, & qu'on tascheroit d'y saire fleurir toutes les bonnes loix qui sont capables de la reigler, elle auroir neantmoins toujours quelque chose de mauuais & d'odieux à Dieu & aux hommes. En quelle horreur doit elle doc estre enuers le Ciel, en quelle exe-cration enuers les gens de bien d'entre les Mortels, si on y laisse regner l'impieté, le desordre, & le debordementanec vne si abandonnée & si prodigieuse licence?

DE LA MORALE CHREST. 661

DV DEVOIR CHRESTIEN

de tous ceux qui ont quelque part en l'exercice de la Medecine.

C'Est, ce semble, passer immedia-tement d'vne extremité à l'autre, que de venir de la consideration des gens de guerre, à celle des Medecins. Car au lieu que la guerre est faite pour oster la vie aux hommes, la Medecine est instituée pour la leur conseruer. Au lieu qu'à la guerre on ne void que playes, meurtrisseures, mutilations & dislocations de membres, toutes les parties de la Medecine sont ordonnées à en procurer le restablissement & la guerison. Et peut estre qu'il eust esté plus conuenable de venir de la veritable Milice, qui est celle dont nous auons parlé iusqu'à maintenant, à ce conflict qui se void dans les Palais, où il semble qu'il y ait quelque representation de la guerre. Parce

662 SVITE DE LA DERN. PART. que si on n'y respand pas du sang; on y espand de l'argent; si on n'yren-uerse pas les villes & les bastimens à coups de canon, on y ruine souuent les maisons & les affaires des familles. Si on n'y fait pas des incendies, des rauages & des desolations, comme sont celles que produisent les passages des armées, & les incursions en pays ennemy; il ne laisse pas de s'y allumer de terribles embrasemens de haines & de passions, dont les effects sont quelquesfois fort funestes & fort lamentables. Mais nous en auons def-ja parlé dans les discours precedens, & quand il resteroit quelque chose à dire sur ce sujet, il est desormais temps de mettre la fin à cet ouurage. loint qu'encore la guerre & la Medecine ne sont elles pas si diametralement opposées, qu'il ne s'y puisse rencontrer quelque espece de conformité. Car pour ne rappeller point icy la raillerie de Diogene, qui disoit à vn mauuais luitteur qui s'estoit fait Medecin, qu'il porteroit desormais à terre ceux qui l'y mettoient auparauant, la Me-

DE LA MORALE CHREST. 663 decine se popose les maladies comme des ennemis à vaincre, & les remedes sont les armes auec lesquelles elle les combat. L'exercice de l'vne & de l'autre de ces deux professions, est le plus souvent fondé sur des conjectures, & icy aussi bien que là le bon-heur a beaucoup de part dans les bons euenemens. Les fautes qu'on y commet font d'extremement grande importance, & les Medecins aussi bien que les Capitaines sont estimés entre les hommes à cause de la necessité. Or y a-t-il de deux sortes de gens qui se messent de l'exercice de la Medecine, dont les vns y suiuent certaines reigles ordinaires, & sont appellés à cela par quelques formes legitimes; les autres s'y ingerent d'eux-mesmes, & n'ont rien que leurs pretendus secrets, & l'autorité de leurs experiences pour tiltre de leur vocation. Pour ceux cy, on les appelle ordinairement des Operateurs ou des Charlatans; & quant à ceux-là le nom de Medecins, d'Apothicaires & de Chirurgiens, leur est demeuré, qui sont des qualités plus

Tt4

664 SVITE DE LA DERN. PART. honorables. Ce n'est pas moy à decider icy s'il est expedient de permettre aux charlatans de debiter leurs drogues & leurs remedes fur les theatres, & d'entreprendre la cure des maladies en particulier dans les maisons. C'est vne chose qui se pratique si vniuersellement en toute l'Europe, que quand il y auroit du mal, ma Morale ne seroit pas capable de le reformer. Il s'en faut remettre à la prudence des Magistrats, à qui il appartient de donner ces vocations extraordinaires comme bon leur semblable, & il faut bien qu'on en retire quelque vtilité puis que c'est vn vsage vniuersellement receu. En effect, il leur arriue quelquesfois de distribuer des remedes qui sont fort bons & fort efficaces en eux mesmes; & s'il s'y commet quelque faute, c'est qu'ils les appliquent indifferemment à toutes sortes de personnes, sans auoir beaucoup d'egard aux circonstances, & à la diuersité des temperamens. Quant à ceux qu'on appelle plus proprement Operateurs, à cause de quel-

DE LA MORALE CHREST. 665 ques operations de la main aufquelles ils se sont specialement exercés, il n'y a point de doute que le Public n'en recueille de grands auantages. Car il y a certaines cures de maladies, comme l'extraction de la pierre, qui requierent vne experience toute particuliere, & que ceux-là seuls peuuent acquerir qui se donnent presque tous entiers à cette sorte d'actions. Et pour ce qui est des dissocations de membres, il est certain qu'il y a des gens qui sont sans estude de l'anatomie, & sans autre vocation que celle de leur dexterité naturelle & de leurs inclinations, qui reuffissent admirablement à les restablir, & mesmes qui laissent cette habilité à leurs enfans, comme ils en ont herité de leurs peres. De sorte que ce seroit preiudicier manifestement à l'vtilité du Public, que de les empescher de seruir aux occasions. Generalement à tous ceux là l'on peut donner ce precepte icy, que moins ils ont de vocation dans l'autorité de l'ordre public, plus doiuent ils apporter de circonspection en

666 SVITE DE LA DERN. PART. l'exercice d'vn mestier dans lequel ils s'ingerent en quelque façon d'eux-mesmes. Car celuy qui trauaille dans vne vocation à laquelle il a esté legi-timement appellé, & qui s'y comporte fidelement & auecque soin, s'il n'y reussit pas aussi heureusement qu'il voudroit, n'en reçoit le blasme de qui que ce soit, & ne se reproche rien à foy mesme. Les euenemens, dit on, sont en la main de Dieu seul; cet homme a fait ce qu'il a deu selon les reigles de son art; mais le mal n'est que trop souuent plus puissant que les remedes. Et luy mesme se console par cette consideration, qu'il n'a à respondre que de ses conseils qu'il a donnés en conscience. Au lieu que quand vn homme qui n'a point d'autres tiltres pour autoriser ses actions, sinon ses propres experiences, dont encore bien souuent il n'a que luy mesme pour témoin, vient à mal rencontrer en quelque chose, & à auoir quelque défauorable succés, outre l'auersion qu'on a pour luy, & qu'il deuient l'object de l'indignation de

DE LA MORALE CHREST. 667 ceux qui ont perdu seurs amis, il a à essuyer les reproches que sa conscience luy fait, d'auoir entrepris de foy mesme vne chose de si grande importance qu'est le restablissement de la santé, & la conseruation de la vie des hommes. Et pour ce qui est des Empiriques, la componction en est d'aurant plus grande, si ces gens sont capables d'en auoir, qu'ils sauent bien ordinairement que ce n'est pas le bien public, ny le soulagement des poures humains qui les a portés à la pratique de ce mestier, mais seulement le defir d'acquerir du bien, &, comme on parle, de faire fortune. Et de fait, si c'estoit l'amour des hommes & la charité qui les incitast, ils ne tiendroient pas leurs secrets si secrets qu'ils font, & en donneroient l'vsage & la connoissance à tout le monde. Ils se vantent d'auoir des compositions merueilleuses, & qui font des effects incomparables & surprenans, iusques à egaler, ou peu s'en faut, les vertus des Intelligences celestes. Ils disent qu'il n'y a qu'eux à qui Dieu en ait donné

668 SVITE DE LA DERN. PART. la reuelation, & que tous les remedes dont on s'est seruy auant eux, ne sont en comparaison sinon de pures bagatelles. Et neantmoins ils tiennent ces mysteres clos & couuerts, comme ceux qui promettent de faire trouuer la Pierre-philosophale. S'il est vray que Dieu les ait extraordinairement suscités pour le bien des autres mortels, & pour nous deliurer de tant de tormens qui exercent miserablement nostre vie, pourquoy nous enuient ils ce present des cieux, & pourquoy le tournent-ils à leur vtilité particulière? Où est la charité & la generosité ? Où est cette naturelle inclination du Bien, de se communiquer liberalement, & de se respandre par tout où les occasions s'en presentent? Le Soleil resserre-t-il sa lumiere autour de soy, pour ne la donner qu'escharsement? les riuieres retiennent elles dans leur sein l'humeur & le rafraischissement que la Nature leur a donné pour en abbreuuer le monde? Et ces grands genies de l'Antiquité, que Dieu a expressément formés pour remplir l'vni-

DE LA MORALE CHREST. 669 uers d'vne infinité de connoissances, pour l'vrilité & pour l'ornement du genre humain, ont ils enfoui ce talent, ou s'ils l'ont desployé magnisiquement à la veuë de toute la terre? La Medecine de l'ame est meilleure que celle du corps: & par consequent s'il est permis d'en garder la possession pardeuers soy comme vn thresor, ces grands Philosophes que Dieu a suscités autresfois pour estre les fondateurs ou les reformateurs des Republiques, & les distributeurs d'antidotes cotre la corruption chacun de leur temps, en deuoient estre chiches à leurs concitoyens, & ne les départit qu'à bonnes enseignes. Et neantmoins Socrate, de qui l'ame estoit comme vne source de beaux enseignemens politiques & moraux, ne cherchoit que les occasions d'en arrouser les Atheniens, & alloit de maison en maison, de boutique en boutique & de ruë en ruë pour cela, & accostoit à ce dessein toutes sortes de personnes dans les assemblées & dans les places. Et tant s'en faut qu'il fust homme à retenir ses secrets pour

670 SVITE DE LA DERN. PART. son auantage particulier, qu'il témoigne expressément en son Apologie dans Platon, que parce qu'il estoit suscité de Dieu pour solliciter ses concitoyens à la vertu, ny le desir de la vie, ny la crainte de la mort, n'estoit pas capable de l'empescher de conuerser pour cela continuellement auec la ieunesse d'Athenes. Pourquoy donques, où il s'agit de la vie & de la santé de nos corps, est on si reservé à nous communiquer les secrets qui y peu uent estre si salutaires? S'ils ne sont pas tels qu'on les vante, comme d'ordinaire ce sont des choses de peu d'efficace dont on fait mystere, & à qui la seule ignorance donne de la recommandation, c'est vne filouterie que d'en faire tant de parade, & de les prosner sur les theatres, pour attraper l'arget des credules, & pour affronter les ignoras. Quant à ceux qui exercent la Medecine auec plus de reigle, & qui y font plus legitimement appellés, ie ne les distingueray pas icy selon les diuerses maximes qu'ils y suivent, & selon les divers remedes

DE LA MORALE CHREST. 671 qu'ils employent à la pratiquer. Les vns y tiennent les dogmes de Galien. & se seruent des remedes des Anciens, qui sont les eaux & les sucs des herbes, & les compositions qui s'en font par des preparations ordinaires & où il y a peu de façon. Les autres deferent beaucoup à la doctrine de Paracelse, & se seruent des remedes preparés par la Chimie, aufquels ils attribuent incomparablement plus de vertu. Les autres en fin messent ces deux choses l'une auec l'autre, & deferant presque tout à Galien en ce qui touche la connoissance des maladies, des symptomes quily arrivent, & des prognostics qu'on en peut tirer, se destournent de sa Therapeutique en ce point, qu'ils croyent que les medicamens Chimiques sont de beaucoup plus facile vsage,& d'vne incomparablement plus grande vigueur. Ie m'en rapporte à ceux qui y sont entendus, & comme le iugement de cela n'est pas icy de mon sujet, aussi reconnois-je bien qu'il n'est pas non plus de ma portée. Vne chose pourroy-je dire auec le

672 SVITE DE LA DERN. PART. support des sçauans, que comme cette derniere sorte de remedes a sans doute plus d'efficace, aussi s'administrent-ils auec beaucoup plus de peril. Parce que d'ordinaire ils sont tirés de choses qui sont dangereuses en elles mesmes, & à qui on n'oste le venin qu'auecque des preparations laborieuses, & où il faut apporter vn soin merueilleux. Tellement que si on y a manqué, l'vsage en fait courir risque au malade, & produit quelquessois de fort funestes accidens. Et c'est ce qui a fait dire à vn grand Medecin de ma connoissance, que les malades qui se seruent de l'antimoine, & des autres medicamens de cette nature, sont à peu prés comme ceux qui gouuernent les lions. Ils seront peut estre quelques années auec eux, qu'ils semblent les auoir appriuoisés, iusques à manier leurs ongles, & à mettre la teste dans leurs gueules & entre leurs espouuantables dens. Mais, comme ces bestes ne perdent iamais tout à fait leur ferocité naturelle, ils s'irritent à la fin à quelque occasion impreueuë, & defchirent

DE LA MORALE CHREST. 673 chirent ou deuorent ceux qu'ils caressoyent auparauant. Ainsi croit-on quelquesfois s'estre habitué à l'vsage de ces drogues violentes, & en pouuoir tousjours tirer quelque notable vtilité, quand vn defaut en la preparation, vn manquement en la dose, vn contre-temps en leur administration; vn changement dans le temperament du malade, vne circonstance mal obseruée, y rompt tellement les mesures, & y déconcerte les affaires de telle fuçon, qu'on est tout estonné qu'on en void des essects tout à fait contraires à l'esperance qu'on en auoit euë, & aux experiences qu'on en auoit faites auparauant. Quelque methode que l'on suiue, si ie n'escriuois icy simplement qu'vne Morale, qui ne portast point le nom de celle de Christ, ie n'aurois qu'à copier les enseignemens qu'Hipocrate donne aux Medecins, tant en ce petit escrit qu'il a nommé le Serment, qu'en vn autre qu'il nomme la Loy, & en vn excellent traitté qu'il a fait du deuoir du Medecin, & du decorum qu'il faut qu'il obserue en

674 SVITE DE LA DERN. PART. toutes rencontres. Car il iure premierement par Apollon, & par Esculape, & par la Santé, & par la Panacée, & par tous les Dieux & toutes les Deesses dont il auoit connoissance, qu'il honorera comme son pere celuy à qui il aura l'obligation d'auoir appris la Medecine, & que pour luy en témoigner sa reconnoissance il luy fournira liberalement tout ce dont il aura besoin. Qu'il aimera comme si c'estoient ses freres, les enfans de son precepteur en cet Art, & que s'ils le veulent appredre de luy, il le leur enseignera gratuitement & sans salaire. Qu'à ses propres enfans, & à ceux de son Precepteur, il ne cachera rien du tout des enseignemens de la Medecine, & qu'il ne sc reseruera aucun secret. Qu'il ordonnera en conscience à ses malades, & les alimens & les remedes qu'il iugera les plus villes, & qu'autout mal. Que ny de son propre mouuement, ny à la priere de qui que ce soit, il ne donnera iamais de poison, & ne suggerera iamais de conseil, ny ne

DE LA MORALE CHREST: 675 prestera de consentement à ce qu'vn autre en donne. Qu'il ne fournira iamais aux mauuaises femmes chose aucune pour faire perir leur fruit; mais qu'il conseruera son art pur, exempt, & non contaminé de ces façons de faire damnables. Qu'il n'entreprendra point de tailler ceux qui sont malades de la pierre; mais qu'il laissera cette operation à ceux qui sont particulierement experimentés en cela. Qu'en quelque maison qu'il entre pour y exercer la Medecine, il s'y comportera auec toute forte d'honneur, fuyant de tout son pouvoir les mauvais soupcons d'y vouloir corrompre les femmes, ou d'y faire quelque action defhonneste & de dissolution. Que soit qu'effectiuement il pratique la Medecine, ou qu'il se rencontre en quelque autre occasion que ce soit, s'il void ou s'il entend quelque chose qui ne doine pas estre dinulguée, il sera tresreligieux en l'observation du secret. Et comme il desire que s'il garde son serment, il puisse remporter du bien, de l'honneur & de la louange de l'exer-

676 SVITE DE LA DERN. PART. cice de son art, aussi fait il des imprecations contre soy-mesme, que le contraire luy puisse arriver, s'il viole la religion d'vne promesse si solennel-le. C'est là le serment qu'il a voulu que chaque Medecin sist, & qui monstre combien ce personnage auoit l'ame belle, noble, & genereuse. Dans l'Escrit nommé la Loy, il se plaint d'abord de ce que la Medecine estant à son aduis le plus noble de tous les Arts, neantmoins l'ignorance de ceux qui le pratiquoyent, l'auilissoit tellement, que de son temps il estoit presque sans estime. Et il en rend cette raison, que dans les villes & les Republiques il n'y auoit point d'autre peine establie à ceux qui s'en acquittoyent mal, finon l'ignominie des mauuais succés, & la honte d'estre recognu pour vn ignorant, chose qui ne tou-che point ceux qui semblent estre tous composés d'ignominie & de honte. Puis il accompare ces gens-là aux personnages qui se produisent sur les theatres des tragedies, pour y tenir le rang d'Acteurs, & qui neant.

DE LA MORALE CHREST. 677 moins ne le sont pas. Tellement qu'encore qu'ils en reuestent tant qu'ils peuuet la mine & l'habillement, si est-ce que quand il faut venir à l'action, leurs paroles & leurs gestes les démentent. Ainsi dit-il qu'il y a beaucoup de Medecins de nom, mais peu d'effect, la plus-part se produisans sous cette qualité, sans auoir les choses qui la soustiennent. Pour donques respondre à vn tel tiltre que celuy-là, & pour acquerir vne connoissance de la Medecine qui en puisse remplir la dignité, il dit qu'il faut qu'vn homme ait toutes ces choses ensemble: la nature, la doctrine, le lieu propre à vacquer aux contemplations & à la recherche des choses naturelles; l'institution dés l'enfance; l'assiduité au trauail, & le temps necessaire pour cuire ses estudes & pour les amener à vne iuste maturité. Parce qu'il est impossible de rien faire contre l'instinct & les inclinations de la nature, & que c'est elle qui fournit les premieres ouuertures à toutes sortes de connoissances, & qui nous y meine

V v 3

678 SVITE DE LA DERN. PART. comme par la main. Mais quant à la perfection de chaque art, c'est l'endoctrinement qui la donne, la nature toute seule n'estant pas capable de nous y faire paruenir. Et dautant que cet art est long, il est necessaire d'en receuoir les premieres teintures dés qu'on est encore ieune, parce que ceux qui se mettent tard à quelque estude, n'ont pas d'ordinaire assés de temps pour s'y perfectionner. En fin, que tous lieux ne sont pas propres pour vacquer à toutes choses, & qu'il faut en choisir vn dans lequel il ne manque rien, soit de ce dont il faut auoir la science, soit des moyens & des instrumens necessaires pour l'acquerir. Puis il adjouste cette belle comparaison, qu'il en est à peu prés de cela comme des fruits qui se produisent de la terre. Dautant que nostre nature est comme le champ, & les preceptes comme les semences qu'on y iette. Que l'institution dés la ieunesse est comme la semaille qui se fait en bonne saison, tellement que le grain à loisir de s'enraciner. Que

DE LA MORALE CHREST. 679 le lieu propre à cette institution est comme l'air ambient, ainsi qu'on parle dans les Escoles, qui sert à nourrir & à fomenter le iect de la terre. Que l'assiduité à l'estude est comme l'agriculture; & enfin, que le remps est ce qui donne au fruict la perfection de sa nourriture & son entiere maturité. Ailleurs il fait ainsi la description d'vn Medecin. Pour acquerir du credit & de l'autorité, dit-il, il faut premierement qu'il ait soin de se porter bien luy mesme, & qu'on reconnoisse sa santé à son embonpoint & à son teint. Car d'ordinaire on n'estime pas que ceux là soyent fort capables de prendre soin de la vie & de la bonne disposition des autres, qui ne reuflissent pas en celuy qu'ils prennent eux-mesmes de la leur. Apres cela, tout le maintien de son corps & mesme son vestement, doiuent estre honnestes & dans vne juste bienseance, & s'il vse d'oignemens, (comme c'estoit la coustume de ce temps-là) il faut que l'odeur en soit agreable, mais en telle sorte pourtant qu'il n'y

680 SVITE DE LA DERN. PART. ait point d'affectation. Car d'ailleurs, de sentir bon, c'est vne chose qui est agreable aux malades. Il faut aussi qu'il prenne garde à se maintenir en toutes choses dans vne telle temperature, que non seulement en son peu parler, mais aussi en toute le reste de sa vie, il paroisse qu'il est homme sage, & modeste, & retenu. Et cela ser-uira beaucoup à luy acquerir & à luy conseruer la reputation & la gloire qui doit accompagner l'exercice de son art. Ses mœurs doiuent estre bonnes & honnestes, & messées de douceur & de grauité dans vn iuste temperament. Car l'humeur pronte & precipitée, bien que quelquesfois elle pourroit sembler auoir quelques auantages, tourne neantmoins à mes-pris. Et s'il est necessaire d'en vser, pourueu que ce soit rarement, ceux qui la mespriseroient autrement, la trouuent quelquefois agreable. Quant à son geste, il doit auoir quelque peu de seuerité dans le visage, comme ont ordinairement les hommes prudens; mais il ne faut pas pourtant qu'il soit

DE LA MORALE CHREST. 685 austere ny tetrique, afin de ne passer pas pour presomptueux & pour inciuil. Mais de rire démesurément, & de paroistre trop gay & trop emancipé dans les compagnies, c'est vne chose malseante & importune, & qu'il faut euiter tres - soigneusement. Il doit aussi prendre garde à estre equitable en toute la conduite desa vie, & qu'on ne luy puisse pas reprocher qu'il est trop sujet à ses interests. Car en toutes sortes de conditions & d'occurrences, la Iustice donne vn merueilleux auantage: mais vn Medecin entre les autres a besoin d'en acquerir la reputation, parce qu'il a beaucoup. d'affaires auec les malades, où il faut que cette vertu regne pour les de-mesler. Car ils se resignent entre ses mains, & se soumettent à luy; les femmes & les filles se commettent à sa conduite, & on luy confie souuent des choses fort precieuses, en l'administration & en la garde desquelles il faut beaucoup de prudence & de bonne foy. En fin, il dit en quelque lieu que la Medecine & la Philosophie,

682 SVITE DE LA DERN. PART. qu'il appelle du nom de Sagesse ou de Sapience, selon le stile des Anciens. se doiuent assister l'vne l'autre en telle forte, que celuy qui exerce la premiere, soit recommandable par l'autre, & qu'il ne soit pas moins sage & veritable Philosophe, que sauant & experimenté Medecin. Et comme dans l'ignorance du Paganisme on se donnoit autrefois cette licence de parler, il adjouste qu'vn Medecin qui est Philosophe, est vne personne si auguste & si venerable entre le reste des hommes, qu'on le peut dire egal à Dieu : tellement qu'il n'y a pas grande difference entre eux deux. Que tout ce qui est requis en la sa-pience dans la possession de laquelle consiste le souverain bien de l'homme, & le souuerain point de sa ressemblance auec la Diuinité, se trouve dans la Medecine, quand on l'exerce comme il faut: à sçauoir le mespris de l'argent & des richesses: la pudeur & l'honnesteté dans l'ame; la modestie dans les vestemens: la reputation & la gloire : l'exactitude & la lumiere

DE LA MORALE CHREST. 683 du jugement : l'humeur complaisante & paisible : la facilité dans la rencontre & l'affabilité: la pureté en toutes choses : les propos sages & sententieux: la connoissance des choses vtiles & necessaires pour la pureté de la vie : la deliurance des vaines terreurs que sentent les ames foibles & superstitieuses pour n'estre pas assés bien instruites de la nature des Dieux : & cette haute esleuation de courage que donne le sentiment d'vne excellente vertu, & qui a quelque chose de heroïque, d'extraordinaire, & de diuin. A considerer la Medecine, comme elle se pratique d'ordinaire, & à en faire comparaison auec cette image qu'Hippocrate forme en ces beaux passages, de la vertu & de la constitution de ceux qui la doiuent exercer, il y a peut estre quelque sujet de s'estonner qu'il les represente sous vne si belle & si magnifique idée. Car quelle proportion y à-t-il entre cette description d'vn homme en qui se trouuent toutes ces hautes & eminentes qualités, & celuy que vous

684 SVITE DE LA DERN. PART. voyés entrer dans la boutique d'vn Apoticaire, & y griffonner l'ordon-nance d'vne saignée & d'vn lauement, en caracteres hieroglyphiques qu'il n'y a que l'Apoticaire qui entende, & puis prendre vn demy teston de la main d'vn poure paisan? Mais Hippocrate descrit là sans doute vn Medecin tel qu'il estoit, c'est à dire, vn hommePayen à la verité, mais au reste vn personnage doué de tres-excel-lentes conditions iusques au miracle. Car pour ce qui est des vertus intellectuelles, c'est luy qui semble auoir donné la premiere tablature de la Physique, comme Aristote l'a expliquée depuis, & qui les comparera tous deux vn peu attentiuement, il verra que ce dernier a edifié en cet egard sur les principes de l'autre. Quant à la Morale, parce qu'elle a peu d'affi-nité auec la Medecine, il n'en a pas traitté fort particulieremet. Et neantmoins, où l'occasion s'en est offerte, comme dans les liures dont ie viens de toucher quelques endroits, & dans quelques vnes de ses Epistres, nom-

DE LA MORALE CHREST. 685 mément en celle qu'il a escrite à Damagetus à l'occasion de Democrite & des Abderitains, il a monstré qu'il y estoit souuerainement entendu pour le temps, & il n'y a gueres de pieces plus fortes que celles là entre les anciennes. Pour ce qui est de la Medecine, c'est vn prodige de la connoisfance qu'il en auoit, & vne merueille comment il l'a tout d'vn coup portée à sa perfection dés sa naissance. Car ses decisions sont des oracles qui se verifient en tous lieux & en tous siecles, nonobstant la difference que les coustumes & les diuerses façons de viure, & tant d'autres variations qui arriuent au Monde & en la Nature, on mise entre le temperament de nos corps, & celuy des hommes de ce temps là; & qui ne defere pas à son autorité, passe dans la Medecine pour vn ignorant ou pour un bizarre. De sorte que ie me suis diuerses fois estonné d'Hippocrate, aussi bien que quelques vns ont fait d'Homere, comment les Payens n'en ont point fait vn des plus celebres de leurs Dieux.

686 SVITE DE LA DERN. PART. Et peut estre qu'il se trouveroit dans les histoires, qu'on a consacré quel-ques temples à l'honeur de ce pere de la poësie, & s'il m'en souuient bien il y en a quelques enseignemens dans Ciceron. Mais ie n'ay point de memoire qu'on en ait basti à l'honneur de ce Prince des Medecins: quoy que si on les peut tous deux en quelque sorte comparer en abondance de connoissance, & en lumiere de genie & d'entendement, il est neantmoins certain que pour ce qui est de l'vtilité; les hommes en ont beaucoup plus tiré des Escrits d'Hippocrate que de ceux d'Homere. Les feuls Atheniens, que ie sache, ont fait quelques decrets pour luy qui le mettent à peu prés en rang egal auec Hercule, pour l'action ce me semble, la moins belle de sa vie, qui est de n'auoir pas voulu secourir les Perses dans leurs maladies, à la priere de leur Roy, & d'auoir refusé de luy de grands & signalés auantages, parce que les Perses a-uoient toujours esté ennemis des Grecs. Quant au reste de sa vertu;

DE LA MORALE CHREST. 687 nous auons peu de monumens de l'histoire de sa vie, c'est pourquoy nous n'en pouuons pas parler du tout si auantageusement. Neantmoins co qui nous en reste nous apprend qu'il a esté en honneur extraordinaire dans toute la Grece en son temps, & que Roys, & peuples libres, & Cités illustres & populeuses, luy en ont donné des preuues bien eclattantes & bien authentiques, par maniere de dire, à l'enuy. Ce qui ne peut auoir esté qu'il n'ait accompagné ses admirables vertus intellectuelles, d'vne grando integrité de couersation & de mœurs. Et qui lira bien attentiuement ses Escrits, trouuera sans doute qu'outre la profondeur du bon sens, & le sauoir incomparable, ils respirent quelque chose de noble & de genereux, qui ne sauroit compatir auec la bassesse & la lascheté des vices. C'est ce qui a fait qu'il nous a formé l'idée des Medecins, telle que ie l'ay rapportée cy-dessus, mesurant ce qu'ils doiuent estre à ce qu'il sentoit qu'il estoit, & se figurant qu'ils s'efforceroient d'ega-

688 SVITE DE LA DERN. PART. ler le modelle qu'il leur fournissoit en sa personne. Ie voudrois donques qu'ils taschassent de s'y conformer; & qu'ils y adjoustassent encore com-me ils y sont obligés, l'essect des instructions du Christianisme. Car cette pensée là, qu'ils sont seruiteurs de Dieu, employés par luy pour le soulagement des hommes dans les plus sensibles de leurs afflictions, & pour leur conseruer la vie autant que cela se peut faire par les medicamens & par l'art, leur inspirera sans doute des mouuemens de pieté, pour demander à nostre Seigneur sa benediction sur leurs soins & sur leurs remedes, sans quoy il est impossible de reussir; & leur donnera quelque tendresse de charité, pour estre touchés de compassion dans la misere de leurs freres. En effect, on les accuse ordinairement de deux choses. L'vne, de deferer tout à la Nature, & d'auoir peu de religion. L'autre, de seruir à leurs propres interests, & de les auoir autant & plus en recomandation qu'aucune autre chose. La premiere fait quo

DE LA MORALE CHREST: 689 que ceux qui en sont coupables ne leuent iamais les yeux au ciel, ny quand ils se mettent à escrire leurs ordonnances, pour demander à Dieu qu'il les y vueille addresser; ny quand ils donnét leurs medicamens, pour obtenir de celuy qui en est l'auteur; qu'il les rende efficaces & salutaires. Dans les cosultations & das leurs conseils, ils n'ont recours qu'à leur sauoir, qui, quelque grand & vaste qu'il soit, se trouue asses souuent trop court pour penetrer dans la connoissance des maux, & pour demesser l'obscurité & l'ambiguité de leurs symptomes. Et dans l'employ des remedes mesmes, ils s'en rapportent à la vertu qu'ils ont receuë en leur creation, & aux dispositions qui se trouveront dans le corps pour en tirer de l'vsage. Et cependant, ny leurs entendemens n'ont de lumiere sinon ce qu'il plaist à Dieu de leur en fournir de iour à autre & de moment en moment : ny les herbes & leurs racines, les metaux & les mineraux, n'ont d'efficace que ce que la Prouidence leur en donnes

690 SVITE DE LA DERN. PART. comme il luy plaist de la dispenser aux occasions: ny les corps des hommes n'ont de vigueur pour se seruir veilement des medicamens & des alimens, sinon comme l'auteur de nostre vie la leur inspire La seconde produit quantité de mauuais effects dans les occurrences. Car s'il y en a quelques vns d'entr'eux qui soyent ambitieux & opiniastres, vous les voyés dans les consultations s'aheurter tellement à leurs aduis, que plustost que d'en rien relascher, & de rien ceder aux opinions d'autry, quelque bien fondées qu'elles soyent, ils aimeront mieux que le patient coure risque de la vie. Si l'aduis d'vn autre a preualu, & que le succés en ait esté bon, ils imputent ce fauorable euenement à vne autre cause. C'est que la nature a esté plus forte: c'est que le mal estoit dans son declin: c'est quelque epitheme qu'on a appliqué fur la region du cœur qui a penetré iusques au dedans, & qui a empesché que la saignée qui auoit esté faite mal à propos, ou que la medecine qui auoit esté

DE LA MORALE CHREST. donnée à contre-temps, n'air emporté le malade. En vn mor, c'est, à leur dire, plustost toute autre chose que le remede qu'vn autre a ordonné, qui a esté salutaire au patient. Si au cotraire il arriue que le medicament ne profite pas, ou qu'il survienne quelque fascheux accident à l'heure de son operation, ils crient que le malade à esté tué, & disent qu'ils s'en lauent les mains, comme d'vne chose à laquelle non seulement ils n'ont pas consenty, mais qu'ils ont tasché d'empescher par leur resistance. Sil y en a quelques vns auares, c'est vne honte que de voir les bassesses ausquelles ils se laissent aller pour satisfaire à cette inclination. Ils cajolent les seruiteurs, les nourrices, &les sages-femmes, pour les induire à leur procurer des pratiques & à leur doner entrée dans les maisons. Ils s'entendent auecque les Apoticaires, & ordonnent plus pour eux qu'ils ne font pour les malades, qu'ils chargent de remedes inutiles, & de visites sans necessité. Ils s'enquierent si les patiens ont du bien, & ne ten-X x 2

692 SVITE DE LA DERN. PART. dent point leurs mains secourables; si de l'autre costé on ne les leur tend pleines d'argent. Ils ordonnent autrement pour leurs amis qu'ils ne font pour les estrangers qu'ils ne connoissent point, afin de soulager la bourse des vns, & d'épuiser celle des autres. En vn mot, ils vsent d'vne infinité d'artifices, pour attrapper de l'argent, & ie ne puis m'empescher de mettre icy vne petite histoire en passant. Dans vne grande ville de ce royaume, vn ieune Gentilhomme nommé des Gorris, tomba malade en vne hostelerie, & enuoya querir vn fameux Medecin qui estoit là. Quand le Medecin l'eut veu il se mit à escrire vne ordonnance dans la chambre du malade, & puis il s'enquit de son nom pour le mettre au bas: ce qui ayant esté fait, il prend congé & se retire. Comme il descendoit les degrés, il fit reflexion sur le nom de des Gorris, auquel il n'auoit pas pris garde auparauant, & luy estant tombé quelque scrupule dans l'esprit, il remonte brusquement, & s'approchant du list du malade il luy de-

DE LA MORALE CHREST. manda s'il estoit parent de ces celebres des Gorris qui ont exercé la Medecine à Paris auec tant d'honneur. Sur quoy luy ayant esté respondu qu'oui, & qu'il estoit petit fils de l'auteur des Definitions de Medecine, ouurage qui ne pouuoit estre inconnu à ce Docteur, il luy dit, Monsieur, vous estes de race à n'estre pas traitté comme le commun ; & sur le champ il changea toute l'œconomie de son ordonnance, la deschargea de tout ce qui pouvoit enfler les parties de l'Apoticaire, & la reduisit à fort peu de choses qui se pouuoient executer sans beaucoup de frais. Pour moy, i'en ay connu vn en ces quartiers, qui quad on racontoit cette histoire, & quelques autres semblables en sa presence, disoit hardimet qu'il ne trouuoit point cela estrage, & que comme dans les hosteleries la bonne-chere est differente selon les diuerses conditions, la Medecine pouuoit bien auoir des remedes propres pour les Contes & pour les Marquis, & d'autres bons pour les artisans. Non que les maladies ne

694 SVITE DE LA DERN. PART. fussent semblables, & les medicamens de mesme vertu: mais qu'il falloit que chacun vesquist de son mestier, & que ce n'estoit pas auecque les gueux, mais auecque les grands Seigneurs, que lon pouvoit faire ses affaires. le suis pourtant de ce sentiment, que cette façon de faire est indigne d'vn honneste homme, & particulierement d'vn homme Chrestien, & que la iusti-ce & la charité doiuent donner d'autres sentimens à ceux qui pratiquent la Medecine. Celuy qui disoit que ceux-là se trompent qui n'en font que trois parties, dont la premiere est la Siagrossun, qui iuge des causes des maladies, de leur nature & de leurs accidens; la seconde la megyvosini, qui preuoit & qui predit les euenemens: Ja troisième la regmeunui, qui ordon-ne des remedes; & qu'il y en falloit adjouster vne quatrième qui n'est gueres moins essentielle, à sçauoir la easparmui, ne s'est pas mal trouvé de la pratiquer: car il a par ce moyen amassé des richesses extraordinaires. Mais i'en ay connu vn en cette ville

DE LA MORALE CHREST. 695 qui est mort depuis enuiron vingt ans, qui comme il auoit des maximes toutes contraires, aussi a-t-il laissé peu de bien à ses enfans. Son sauoir estoit sublime, & c'est de tous les hommes qui sont venus à ma connoissance, celuy qui entendoit le mieux Hippocrate & Aristote, outre les autres belles connoissances qu'il auoit dans toute sorte de literature, qu'il possedoit en vn degré fort eminent. Il auoit l'ame genereuse & en qui reluisoit ce beau genie d'honeur, de bonté, & de vertu qu'Hippocrate nons a fait voir cy-dessus. Et comme il estoit sauant en Theologie, aussi messoit-il la pratique du Christianisme dans celle de la Medecine, auec beaucoup de louange & de recommandation. Car non seulement il faisoit gratuitement des ordonnances pour les poures auec pareil soin qu'il faisoit pour les Mareschaux de France, & pour les enfans des Ducs & Pairs: mais il donnoit de l'argent à ceux qui n'en auoient point, pour acheter des remedes & des alimens. Et comme il

696 SVITE DE LA DERN. PART. auoit le courage haut, & le raisonne, ment éclairé & penetrant, & le langa-ge latin elegant, & les textes d'Hippocrate & de Galien fort à son commandement, il vouloit bien paroistre dans les Consultations, & s'y faisoit valoir autant qu'aucun autre. Mais neantmoins c'estoit sans presomption & sans opiniastreté, tellement que si vn autre aduis que le sien l'emportoit, il y cedoit volontiers, & s'il reuffissoit mal, il auoit la bonté d'en excuser les defauts, & d'en rejetter plustost le blasme sur la nature du mal, que sur l'imperitie & l'inconsideration de ses Collegues. En vn mot, hors vn petit defaut qu'il auoit, qui est que pour pratiquer le precepte d'Auguste, il se hastoit quelquesfois vn peu trop lentement, c'estoit vn des hommes de son temps qui auoit les plus belles qualités pour rendre cette profession honorable.

Quant à ceux à qui les autres parties de la Medecine ont esté laissées en partage, à sçauoir les Apoticaires & les Chirurgiens, (car au lieu que

DE LA MORALE CHREST. 697 du temps d'Hippocrate c'estoit vn mesme homme qui faisoit ces fon-ctions auec celle de Medecin, on les a partagées depuis quelques siecles,) il ne seroit pas raisonnable de requerir d'eux, ny d'aussi belles connoissances, ny vn si grand éclat de vertu, ny tant de generosité, qu'on en requiert de celuy qui tient vne place plus eminente. Quoy que leur profession ne soit pas abjecte, & qu'elle est quelquesfois exercée par des gens qui valent beaucoup, si est-ce qu'elle est tellement subalterne à celle des Medecins, qu'ils sont comme leurs instrumens, qui n'agissent & ne se remuent que selon l'impulsion qu'on leur donne. Vray est que quant aux Chirurgiens, leur art a quelque chose de plus détaché, & qui depend plus d'eux-mesmes. Car il y a quantité de playes, & d'vlceres, & de tumeurs, & de loupes, & de fractures, & de dislocations, qu'on leur commet absolument sans que les Medecins s'en meslent. Mais quant aux remedes qu'on appelle generaux, où on a be-

698 SVITE DE LA DERN. PART. foin de l'operation de la main, ils dependent des ordonnances des Medecins; comme font les Apoticaires en l'administration des autres medicamens qui consistent en potions, & en toutes les autres choses que lon tire de leurs boutiques. De sorte que comme ils sont sous-ordonnes aux Medecins en dignité & en autorité, en ce qui touche leur administration, il est à presumer qu'ils leur sont inferieurs dans les inclinations de l'esprit, & qu'ils n'ont pas des qualités si nobles ny si releuées. Neantmoins i'ay icy à dire deux ou trois choses d'eux. La premiere est qu'encore qu'ils ne peussent pas atteindre à la perfection de vertu dont Hippocrate a donné le modelle dans les endroits de ses Escrits que i'ay rapportés cy-dessus, c'est là dessus pourtant qu'il faut qu'ils essayent de se mouler, en exprimant le mieux qu'ils pourront l'idée de l'honneur, de l'integrité, & de la probité qu'il y propose & qu'il y recommande. Car en quelque profession que ce soit, il faut faire estat qu'il y a

DE LA MORALE CHREST. des exemples de vertu si loin au dessus de nous, que nous ny faurions atteindre. Les Ministres de l'Euangile n'arriueront iamais à la parfaite imitation des qualités de sainct Paul; & d'entre les nobles ie voy bien qu'il est malaisé deparuenirà l'egal de ces heros du Plessis Mornay, de la Nouë Bras-de-fer, & du Cheualier Bayard : comme d'entre les Generaux-d'armée ie ne sçay pas qui se pourroit ou vanter ou asseurer de deuoir quelque iour estre mis en paralelle auec les Scipions & les Epaminondas. Et toutesfois on ne laisse pas de se les proposer à imiter, si au moins, chacun en sa profession, on a quelque chose de beau & de bon dans l'ame. Et comme quand on veut apprendre à quelque ieune sculpteur à faire de belles statuës, on luy met deuant les yeux certaines antiques qui sont hors de toute imitation; ainsi pour former les hommes à la vertu chacun en sa condition, il les faut exhorter à se mouler sur les plus beaux exemples qu'on peut auoir, encore qu'ils soyent inimitables. Car

700 SVITE DE LA DERN. PART. quoy qu'il en soit, on tire toûjours quelque air du patron qu'on a deuant les yeux, quand on le contemple attentiuement, & plus il est illustre & parfait, plus excite-t-il de bons & louables mouuemens en l'ame. La seconde est que pour ce qui regarde la iustice & la charité, les preceptes du christianisme regardent egalement les vns & les autres. De sorte qu'il n'est pas moins requis de ces Ministres subalternes de la Medécine, de n'y faire point de friponneries, que de ceux qui sont au dessus: ny moins de leur deuoir aussi, quand Dieu leur en donne le moyen, de secourir gratuitement les poures. On a dit de quelques vns d'eux, qu'ils nourrissoient, par maniere de dire, les vlceres, & qu'ils entretenoient les maladies, quand ils auoient affaire à des patiens riches & commodes, auec lesquels ils pouuoient faire beaucoup de prosit. Ces gens ne sont pas seulement auares, ils sont aussi larrons: & ils ne sont pas feulement larrons, ils sont quand & quand bourreaux; encore ne say-ie si

DE LA MORALE CHREST. 701 les bourreaux prennent plaisir à faire durer les tormens des hommes. On a dit de quelques autres qu'ils secouroient volontiers les poures sans leur en demander de salaire; mais qu'ils se faisoient payer aux riches de leurs remedes & de leur trauail. C'est vno estrange sorte de charité que de donner l'aumosne aux despens d'autruy; & vne iustice bien irreguliere que de se la faire ainsi à soy-mesme, en condamnant de payer pour ceux qui doiuent, ceux qui ne doiuent du tout rien. Ou s'ils doiuent quelque chose pour les remedes & les secours qui leur ont esté donnés à eux-mesmes, au moins ne doiuent-ils pas l'excés auquel on taxe leurs parties, pour se recompenser des peines que l'on a prises, & des drogues qu'on a fournies aux poures & aux indigens. Si ceux qui sont en cette condition n'ont pas le moyen de fournir aux poures ce qui leur est necessaire dans leurs maladies, ils ne sont pas tenus de le faire: c'est au public à y pouruoir. Si le public n'y pouruoit pas, & que

702 SVITE DE LA DERN. PART. leur charité & leurs compassions les incitent à n'abandonner pas les poures en leurs souffrances; sans leur donner quelques assistances de leur art, ils en doiuent aduertir les personnes riches, & tascher d'émouvoir leurs entrailles, à ce qu'ils se portent à les secourir volontairement. Car s'il faut que ce soit de leur bien que ces liberalités là se facent, (comme il est certes bien raisonnable, & parfaitement convenable à la charité du Christianisme, que ceux à qui Dieu a donné beaucoup de commodités en aident à ceux qui n'en ont pas,) il faut que comme dit sainct Paul, leurs ausmones soyent volontaires, & non pas faites par contrainte, ou emportées subrepticement. En fin, s'ils ne trouuent pas les riches disposés à s'eslargir enuers les poures pour les faire secourir, il ne faut pas qu'ils les abandonnent pour cela, mais qu'ils les considerent comme des objects que Dieu leur presonte pour esprouuer leur charité, & la confiance qu'ils ont en sa bonne Pronidence qu'il ne permettra pas

DE LA MORALE CHREST. 703 que leurs liberalités en telles occasions tournent à la ruine ou à l'incommodité de leurs affaires, & qu'il trouuera bien le moyen de les en recompenser. En effect, en telles occasions on preste à Dieu à vsure, & co qui semble estre perdu, parce qu'il a esté fouruy à ceux qui n'ont pas moyen de le rendre, se retrouue à quelque temps de là sans qu'on y pense, Dieu faisant plantureusement multiplier les fruicts de la iustice & de la misericorde des gens de bien. Et quand pour quelques raisons re-seruées en sa sagesse, il resserreroit cette recompense, & qu'il permettroit que ces aumosnes apportassent quelque incommodité à ceux qui les font : c'est vne grande satisfaction à vne ame veritablement Chrestienne que de s'estre acquitée de son deuoir, & d'auoir tiré de son suc pour en nourrir & pour en assister ceux que nous deuons estimer & considerer comme nos membres. Et la Nature mesme nous donne icy des enseignemens. Car selon son institution, si

704 SVITE DE LA DERN. PART. I'vn de nos membres est malade les autres compatissent à sa douleur : & s'il souffre de l'amaigrissement, tout le corps s'en sent par la mesme sympathie. Que si l'yne des parties de nos corps tombe en atrophie, tandis que les autres conservent leur embonpoint, il faut qu'il y ait quelque déreiglement dans l'economie de la personne. Ainsi en est-il du corps de Christ. C'est sans doute vn desordre en l'Eglise de Dieu, que les vis abondent en ce qui est des commodités de la vie, tandis que les autres souffrent les dernières extremités de la necessité: & si nous estions tous animés de la charité de nostre benin Sauueur comme nous le deurions, plustost que d'endurer ce reproche là, nous vendrions nos possessions, pour en mettre le prix entre les mains des Diacres & des autres dispensateurs des aumosnes, comme les premiers Chrestiens portoient leurs biens aux pieds des Apostres pour en estre les distributeurs. Mais comme dans la souffrance d'vn de nos membres, les parties qui eni

DE LA MORALE CHREST. 705 en sont les plus proches en sentent les premieres la douleur par participation; & comme c'est de là que se communiquent premierement les esprits & le suc de la vie au membre dolent, en attendant qu'il s'en face attraction de tous les autres endroits du corps, selon l'institution de la Nature; c'est en l'occasion dont il s'agit maintenant, aux Apoticaires & aux Chirurgiens qui veulent porter à bonnes enseignes la qualité de fideles de Iesus-Christ, à fournir de leurs boutiques & des operations de leurs mains, ce qui est necessaire pour la guerison des malades indigens, en attendant que le sentiment de dilection qui est dans les autres fideles se réueillant, ils ennoyent aussi chacun de leur part de ce costé là ce qui est necessaire pour la subsistance de leurs poures membres. Pour le reste, les richesses que nous esperons tous là haut au ciel, doiuent auoir tellement rempli nos entendemens, qu'en attendant que nous en venions en possession, nous ne nous tormentions pas beaucoup

Υy

706 SVITE DF LA DERN. PART. pour en acquerir en la terre Pourueu, dit l'Apostre, que nous ayons le viure & le vestement, cela nous suffira, si nous auons l'ame veritablement & profondement imbuë du Christianis-me. La troisième chose sinalement est, que ceux à qui ces deux parties de la Medecine sont commises, doiuent religieusement considerer de quelle consequence est la vocation à laquelle ils sont appelles. Les Ministres de l'Euangile ont la charge des ames, & c'est à eux qu'appartient le soin de procurer aux humains la jouifsance du salut. C'est sans doute la chose du monde la plus importante, & en comparaison de laquelle toutes les autres ne doiuent estre en aucune consideration. C'est pourquoy de toutes les vocations publiques il n'y en a aucune où on doiue auoir tant de soin de se mettre bien en estat de pouvoir rendrebon cote de son administration. Les Magistrats sont establis pour la conservation de la societé des hommes, & pour les rendre participans de la felicité humaine, autant qu'il

DE LA MORALE CHREST. 707 est possible de la posseder icy bas. Et cela comprend la protection de la vie contre les attentats des meschaus! la consegnation de l'honneur de chaque famille en ce qui touche la pudicité des femmes & des enfans : la conservation du bien qui est necessaire pour le soulifen des familles, & pour leur donner outre la vie, quelque splendeur & quelque ornement : & celle de la reputation, fans quoy il est impossible d'estre bien vuile à la Republique, ny de iouir soy-mesme d'aucun folide contentement. Cela donc estant tel & d'vne si haute importance, com-me chacun void, ceux à qui par la Proudence de Dieu est commise vne telle fonction, ne sauroyent trop serieusement penser à la façon de laquelle il en faudra rendre raison, lors que nous verrons apparoir le grand & souverain juge du monde. Ceux à qui dans les Republiques est commis le maniment des armes pour la de-fente de l'Estat, sont comme la haye ou le rempart dressé alentour de la felicité publique, afin qu'elle ne soit

Yij

SVITE DE LA DERN. PART. point troublée par les ennemis du dehors & du dedans. "Et puis que cette felicité comprend tout ce donc le viens de faire le denombrement auecque plusieurs autres choses qui entrent dans la societé ou qui en resultent; ils ont à peu prés la mesme obligation à se bien acquitter de seur devoir que les Magistrats, bien que ce soit en vn autre egard, parce que les fondions qui leur sont assignées sont fort differentes. Mais ceux qui pratiquent la Medecine ont proprement la vie des hommes entre les mains, qui dans le siecle present est le fondement de tous les autres biens dont on peut auoir la iouissance. Et c'est pourquoy nostre Seigneur, en composant vn formulaire d'oraison pour ses disciples, en arrangea les demandes de telle faq çon, qu'apres auoir mis celles qui concernent la gloire de Dieu, quand il vient à ce qui touche nostre propre bien, il place la demande du pain quotidien au premier rang; auant celles de la remission des pechés & de la sanetification, parce que la vie, dont la

DE LA MORALE CHREST. 709 Nature nous a inuiolablement imprime le soin & le desir, va naturellement deuant tous les auantages de la Grace. Puis donc que ces Messieurs ont entre les mains vn si precieux depost, & que leur conscience est chargée d'en rendre conte à celuy qui en est l'auteur, ils peuvent bien juger d'eux mesmes ce qu'ils doiuent en cet égard à la religion Chrestienne: c'est que non seulement ils doiuent auoir en horreur les attentats des empoisonneurs, qui seroient d'autant plus horriblesen eux qu'on se commet à leur bonne foy a non seulement ils ne doiuent point pratiquer ceux des charlatans, qui hazardent toutes choses sans discretion, & qui ne font point de conscience de mettre les hommes en peril pourueu qu'ils facent des experiences: non seulement ils ne doiuent pas faire leurs charges negligemment, comme il arrive quelque fois qu'on fait en co mestier là de terribles qui-pro-quo, dont les suittes sont lamentables: mais ils y doiuent apporter vn soin extraordinairement vigilant, & vne affection

719 SVITE DE LA DERN. PART. toute entiere. On dit d'vn Romain, que parce qu'il estoit arriue à vn de ses esclaues de casser un verre de cristal en le maniant ou en le rinfant, il le fit ietter dans son vivier, & le fit deuorer vif à ses murenes. C'estoir veritablement vne estrange inhumanité, & qui meritoit vn beaucoup plus seuere chastiment que celuy que l'Empereur en fit, quand il fit casser tous ses vases de cristal en sa presence. Mais quantà la vie des hommes, c'est vne chose de si grand prix, que s'il en arriue faute par inconsideration, ou par manque de diligence & d'affection, c'est à Dieu qu'on aura à en respondre. le voudrois donc que ceux qui choifissent cette sorte de vocation, cussent tousjours deuant les yeux cette regle generale de la charité, qui se doit pratiquer en toutes occasions, mais qui doit auoir lieu nommément en cellecy, de faire exactement à autruy ce que l'on desire estre fait à soy mesme. Quand les Ministres de la Medecine font malades, parce qu'ils aiment leur vie, ils desirent qu'on en ait bien soin,

pe La Morale Chrest. 718
& qu'on n'espargnerien à la conseruer.
Or celle de leurs patiens ne vaut peut
estre pas moins que la leur : &, quoy
qu'il en soit, il n'y en a pas vn qui no
l'aime, autant que Galien ou Hippocrate faisoit la sienne.

- Emple के असे से से से से से से के के के के के

DV nDEVOIR CHRESTIEN
DV nDEVOIR CHRESTIEN
es des Marchands, des Artisans,
es des Laboureurs.
es center des Laboureurs.
es center des controllers des controlle

Plen que les vocations de ces trois fortes de gens soyent fort dissertentes, si est-ce que parce qu'il me reste peu de chose à dire de chacun d'eux, se les comprendray tous dans ce chapitre, asin qu'il ne soit pas trop disproportionné d'auecque les precedens. Et le commenceray par les marchands, dont la condition a accoustumé d'estre estimée la plus honorable. En esset la marchandife, à la regarder en elle mesme, est vhe occupation merueilleusement vti-

712 SVITE DE LA DERN. PART. le au public, & à l'egard de tout le corps de la societé, elle a quelque rapport auec l'exercice de la Medecine. Car quelcun a autrefois defini cellecy comme si c'estoit l'art de soulager le corps humain de ce qu'il a de trop & qui luy nuist, & d'y adjouster ce qui luy manque. Or c'est proprement ce que fait le commerce en vn Estat. Car il en emporte chés les estrangers ce dont il a trop, & il y apporte de ches les estrangers ce dont il a besoin : d'où. refulte sa vigueur & son embonpoint qui ne se pourroit pas maintenire y si d'vn costé il estoit chargé de ses superfluitez, & que de l'autre il manqualt de ce qui luy est necessaire. Et comme qui n'enleueroit du sein de la France t vne partie de ses bleds, de ses vins, de ses toiles, de son sel, & des autres marchandises qui y abondent, elle en regorgeroit à son propre detriment : ainsi qui n'y apporteroit d'ailleurs les fuccres, les epiceries, les drogues ments decinales, l'or, & l'argent, & le cuiure, in & quelques autres metaux, auec les !! foyes, & les mineraux, & vne infini-

DE LA MORALE CHREST. 713 té de manufactures qui se font mieux ailleurs que parmy nous, ce Royaume seroit priue de mille commodités, & de mille beaux ornemens qui le rendent pompeux & magnifique entre cous les autres. D'ailleurs, comme la Medecine est vne science fort conie-Eturale, & où souvent il faut deuiner & pressentir l'aduenir auec beaucoup de clairuoyances encore, quelque foin qu'on y apporte; s'y trompe-t-on fort souvent sainsi le commerce est plein d'egards, de raisonnemens & de conjectures qui sont comme des deuinemens, où quelque penetrant que l'on foit yiline peut qu'il n'arriue fort souuent des mécontes & des beueuës, qui font qu'on se trouve bien esloigné de ses esperances & de ses pretentions. Et comme Hippocrate dir au commencement de ses Aphorismes, que pour reuffir en la Medecine, il ne faut pas seulement que le Medecin face son deuoir; il fauraussi que le malade y contribuë, & ceux qui sont ordonnés pour luy assister, & pareillement soutes les choses qui sont alentour de luy: ainsi le

714 SVITE DE LA DERN, PART. bon succés du negoce ne depend pas seulement de celuy qui l'entreprend; la bonne constitution de l'Estat mesme y a bonne part : la fidelité des Commissionnaires, & la vigilance des Facleurs, la terre mesme & l'air, & l'opportunité des vens, & celle de la mer & des rivieres, y sont si absolument necessaires, que sans cela bien souuent les desseins tournent au rebours de ce qu'on s'y estoit proposé, Quand les soins d'vn medecin luy succedent, & luy & le malade s'en trouvent bien : parce que l'vn y recouure sa santé, & que l'autre y fait ses affaires : & demesmes, quand la marchandise va bien, c'est à l'avantage & du marchand & du public, dautant que celuy-cy y trouue ses commodités, & celuy là son profit, le commerce estant vne des plus lucratiues de toutes les vocations, quand vne fois on y renrencontre. Il y a cette difference entre ces deux arts, que quand yn marchand ne reussit pas, le dommage en tombe sur luy, sans que le public s'en sente beaucoup: là où quand vn me-

DE LA MORALE CHREST. 715 decin fait quelque faute, ou que quelque autre chose empesche qu'il ne guerisse son parient, il nelaisse pas d'étre payé; tout le mal heur de l'euenement tombe sur le pauure malade. Neantmoins, comme i'ay dit des Mimistres de la Medecine, que les prières à Dieu leur sont necessaires, pour obtenir la lumière de son Esprit en leurs consultations, & sa benediction fur leurs remedes, sans quoy rien ne peut prosperer; les marchands ont encore cette conuenance auec eux, que sans cet exercice de la pieté, celuy du commerce est non seulement hazardeux, mais assés souvent ruineux à ceux la qui l'entreprennent. Il est du deu dir de tous les Chrestiens de reconnoistre que Dieu est l'auteur de toutes choses, & que sa Prouidence est l'administratrice de tous les euenemens qui arriuent en l'Vniuers. C'est pourquoy ils doiuent auoir recours à luy à quelque chose qu'ils s'employent, pour y obtenir l'affistance de sa main. Quand donques il s'agiroit des choses qui sont les plus determinées par leur

716 SVITE DE LA DERN. PART. nature, & où la contingence a le moins de lieu, comme lors qu'on veut apprendre quelque science bien certaine & qui gist en de claires demonstrations, encore faudroit il auoir recours à Dieu pour obtenir de bons maistres, & du loisir pour y vaquer, & de la clarté d'entendement pour les bien comprendre, & de la memoire pour les retenir. Car on n'y fauroit auancer sans toutes ces aides, & siles viss y rebouchent, comme les idiots ou les Sceptiques, & si les autres, comme les Euclides & les Archimedes y y font des progrés miraculeux, cela vient de la seule Prousdence de Dieu, qui dispense ses faueurs comme bon luy semble. Auec quel soin donques y doit on auoir recours lors qu'il s'agit de choses qui sont, en comparaison, si fortuites, & qui despendent empartie de l'instabilité des choses humaines, en partie de l'infidelité des hommes, en partie de l'inconstance des vens & de la bonne ou manuaise temperature des elemens ? Et la vie & la santé estas sinccessaires au commer-

DE LA MORALE CHREST. 717 ce, que quelquefois vne maladie, ou vne cheute de cheual, fait perdre de bonnes occasions, & nostre vie, & nostre santé estant en la main du Createur, qui en dispose comme il luy plaist, quelle certitude y peut il auoir dans l'euenement de nos desseins, si Dieu ne nous y gratifie de Ion affistance fauorable? C'est sur cela que Saint lacques faisoit reflexion quand il disoit : Or ça maintenant, vous qui dites, Allons aujourd'huy & demain en une telle ville, & demeurons là un an, & y trafiquens & gaignons: (Qui toutesfois ne fanés ce qui arrinera le lendemain: car qu'est ce de vostre vie? ce n'est certes qu'une vapeur qui apparoist pour vn peu, & puis s'esuanouit:) Au lieu que vous deuiez dire; si le Seigneur le vent, & si nous vinons, nous ferons cecy ou cela. On leur peut encore donner aussi bien qu'aux medecins, cette instruction Chrestienne, de se garder de toutes sortes d'iniustices, & de toutes mauuaises pratiques, qui seruent à attrapper illegitimement le bien d'autruy. Et cet aduertissement

718 SVITE DE LA DERN. PART. leur convient dautant mieux qu'à qui ce soit, que la pente qu'y a cette professió, y est enquelque sorte plus glissante. Car il est bien vray qu'vne bonne partie des Aduocats & des Medecins, & des autres hommes qui s'attachent à quelque vocation que ce foit, s'y propolent pour but, non le bien public, mais leur interest particulier, & l'auancement de leurs personnes & de leurs familles. Mais neantmoins il s'en peut rencontrer quelques vns en qui il y a quelque generosité, qui leur y fait plus considerer le bien general de la societé que le leur, ou à qui l'inclination naturelle qu'ils sont à sauoir, donne de l'attachement saux vns à Hippocrate, aux autes à Iusti-nien, aux autres à Aristote, ou à quelque autre Prince de leur profession, non proprement qu'il seruent à leur acquerir du bien, mais parce qu'on y apprend la Philosophie, ou la Iurisprudence, ou la Medecine. Mais quant aux marchands, ie ne pense pas qu'il y en ait aucun qui se propose ny en tout ny en partie, autre sin de son ne-

DE LA MORALE CHRETS. 719 goce, sinon de deuenir riche, & de loger Mammon chés luy. Or quand vne fois on s'est proposé ce but là, il faut vne merueilleuse circonspection pour le donergarde de l'iniustice auecque laquelle Mammon semble estre inseparablemet attaché. Et par l'iniustice le n'entens pas seulement l'infidelité dans les contes, la substitution de mauuaises marchandises pour de bonnes, les faux poids & les fausses mesures, dont Salomom disoit autrefois qu'elles sont en abomination à l'Eternel, & les autres choses de cette nature, qui crient vengeance deuant Dieu. l'entens les tours de soupplesse; par lesquels les marchands se supplantent bien souuent les vns les autres contre les reigles de la charité; le prix excessif que l'on met aux marchandises, quand on s'en est rendu en quelque façon le maistre, & qu'on y peut donner la loy: les monopoles, qui s'appellent ainsi proprement, quand vn seul marchand, qui a assés de credit pour tout embrasser, ou deux ou trois, qui agissent de complot, arrent toutes les

720 SVITE DE LA DERN. PART. marchandises de plusieurs Prouinces, afin qu'on n'en puisse auoir que par leurs mains, & selo le prix qu'ils y mettent; ce qu'ils font apres cela d'vne facon exorbitante, parce que l'on ne s'en peut passer. Car encore que l'on permette aux marchands plus qu'on ne fait à plusieurs autres, de se proposer leur propre interest pour vnique but en leur vocation, il n'est pourtant pas raisonnable qu'ils le facent en telle façon qu'ils ruinent absolument la fin naturelle de la chose mesme. Le but du commerce, à le considerer en luy mesme, est le bien general de la societé. Quand donques par ces monopo-les vne infinité de particuliers souffrent de l'incommodité dans leurs affaires, parce qu'ils ne peuuent auoir ce qui leur est necessaire sinon pour vn prix excessif, c'est renuerser l'ordre naturel des choses, d'espuiser la substance d'vne ou deux Prouinces, pour enrichir extraordinairement vn ou deux hommes seulement. Ie conte aussi entre les pratiques iniustes la façon de faire de beaucoup de ceux qui vendent

DE LA MORALE CHREST. 721 dent en détail, & qui surfont leurs marchandises bien loin au delà de ce qu'il les faut vendre raisonnablement, afin de circonuenir s'ils peuuent ceux qui ne s'y connoissent pas. Ie sçay bien que les loix ciuiles permettent cette forte de circonventions, & que quand vn homme a esté affronté en l'achapt de quelque chose; on ne le restitué point s'il ne prouue qu'il y a esté lesé de plus de moitié de iuste prix. Encore cette restitution n'a t-elle lieu sinon dans les ventes du fonds d'heritage, ou si on l'étend iusques aux choses mobiliaires, il faut qu'elles soient bien precieuses; comme sont les pierreries & les joyaux. Et la raison de cela est que si on permettoit la rescission de tous ces petits contracts qui se font, pour exemple, dans les galeries du Palais, à toutes les fois que quelque Prouincial s'y est laisse attrapper, cela engendreroit vn milion de procez, & mettroit vne horrible confusion dans les affaires humaines. De sorte qu'il vaut mieux femetire à la prudence de chacun; de se defendre de l'artifice & de la cajo-

Zz

722 SVITE DE LA DERN. PART. lerie de ces vendeurs de bijoux, & souffrir plustost qu'ils plument quelquesfois les oyseaux niais qui leur tombent entre les mains, que non pas mettre presque toutes les affaires en desordre. Mais comme nostre Seigneur disoit autrefois à ses Disciples, que si leur iustice n'estoit plus grande que celle des Scribes & des Pharissens, ils n'entreroient point au Royaume des Cieux, ie puis dire icy que si celle des marchands ne passe de bien loin cette mesure qui leur est taillée par les loix ciuiles, ils ne peuuent iustement porter la qualité de Chrestiens. L'Apostre nous enseigne que la charité de Christ nous oblige à procurer plustost l'auantage d'autruy que le nostre. Que s'il est malaisé qu'en l'exercice de la marchandise l'on paruienne à ce haut degré de perfection, au moins y faut-il pratiquer cette regle generale & inuiolable de la charité & de la iustice, qui est de ne faire à personne sinon ce que nous voudrions qu'on nous fist. Or il n'y a pas vn de ces gens là, qui s'il n'estoit pas bien experimenté dans la

DE LA MORALE CHREST. 723 connoissance des marchandises; & dans le prix qu'il en faut donner, trouuast bon qu'on abusast de sa simplicité pour luy couper ainsi sa bourse. C'est encore vne iniustice, à monaduis, ou au moins certes vn defaut de charité, que d'aller, comme on dir, sur le marché d'autruy, c'est à dire, détourner par sousmain le profit qu'vn autre peut faire, & à la poursuite duquel il est, pour se l'attirer par quelquesubtilité. Quand on est à vn encan, il doit estre en la liberté de chacun d'encherir ce que bon luy semble, pourueu que ce ne soir point expressement pour saire depit à vn autre, & pour luy faire suracheter ce que l'on void qu'il desire auec quelque passion. Vne grand' Dame de co Royaume, s'estant trouuée à vne vente publique, où il y auoit diuerses pieces de Cabinet, jetta l'œil sur vn morceau de crystal de roche, dans le milieu duquel au fond, on voyoit vne cauité ou flottoit vne goutte d'eau claire à merueilles, ce qui rauissoit tous les assistans. Cette Dame l'ayant mise à quelque prix, vi homme de moindre con-

Zz ij

SVITE DE LA DERN. PART. dition qu'elle, mais qui luy vouloit faire déplaisir, encherit en sa presence, & mit deux sols au dessus. Elle s'en estat piquée, & la couleur luy en estant montée au visage, elle augmenta le prix de cette goutte d'eau, de deux ou trois cens francs tout d'vn coup. Sur cela l'autre auança sa teste par dessus les épaules de ceux qui estoient deuant luy, & encherit de deux sols. Ce qui ayant tout à fait mis la Dame en colere, la contestation alla si auant, qu'elle allant toujours à l'enchere, & luy augmentant de deux fols, le prix de cette petite piece vint enfin à six mille liures deux sols, & fut ajugée à cet homme, qui pour contrecarrer la passion d'vn autre, contenta la sienne à ses dépens. C'estoit veritablement abuser auec quelque malignité de la liberté que les encans donnent: mais tanty a qu'elles la donnent, & personne n'est fondé à la retrancher. Hors cela, comme quand vn chasseura leué vne beste, & qu'il est surses voyes pour la suiure, il n'est pas permis de la détourner; quand vn marchand a commencé vn

DE LA MORALE CHREST. 725 traitté, bien qu'il ne l'ait pas encore acheué, si est-ce que iusques à ce qu'il l'abandonne, & qu'on en ait des preuues certaines, il n'est pas juste de l'y trauerser. On pourroit alleguer encore quelques autres choses, que ie laisse pour n'estre pas long, & qu'vne conscience Chrestienne connoist & fait assez d'elle-mesme sans autres instru-&ions, & diray seulement quelque chose de la façon dont il faut que les marchands se gouvernent selon les divers succés qu'il plaist à Dieu de leur donner. Il arriue donc quelques fois que leurs affaires vont mal, soit que leurs nauires se perdent par les naufrages, ou qu'ils soient pris par les pirates, comme il arriue assez souuent: soit que les grandes emplettes qu'ils ont faites & où ils ont mis tout leur credit & tout leur argent, ne rencontrent pas leur debit : soit que ceux auec qui ils ont leurs correspondances & leurs affaires meslées, viennent à manquer, & à les tirer auec eux en mesme ruine, comme les exemples en sont frequens : soit enfin que quelque autre reuers de la Zz iii

726 SVITE DE LA DERN. PART. Prouidence divine leur rompe toutes leurs mesures, & mette leurs affaires en desordre & leurs esperances à l'enuers. On dit qu'il y en a quelques vns qui se seruent de ces occasions-là pour s'enrichir, en soustrayant leurs effets, en brouillant leurs liures & leurs contes, & en mettant tous les enseignemens de leur commerce dans vne confusion si épouuantable, que plûtost que de tout perdre, leurs creanciers sont obligez de venir à des compositions si desauantageuses, qu'il se trouue enfin que le banqueroutier demeure riche aux dépens de leurs familles, & qu'il se pare de leurs ornemens, Puis que les loix ciuiles, qui sont en telles choses beaucoup plus indulgentes que celles du Christianisme, punissent ces fraudes-là rigoureusement, il n'est pas besoin que le m'arreste icy à faire des inuectives à l'encontre, pour en imprimer l'horreur dans l'esprit de

mes lecteurs. C'est vn furieux brigandage, & qui est d'au ant plus à reprimer par la seuerité des supplices, qu'il s'exerce par des gens en qui on auoit mis

DE LA MORALE CHREST. 727 sa confiance, & auec qui on auoit en quelque sorte contracté societé. Car entre le detteur & le creancier il y a vne relation de bonne foy, qui ne se peut ainsi violer que par vn épouuantable crime. Le deuoir d'vn homme Chrestien dans vne si lamentable occasion, est de découurir à ses creanciers ses affaires iusques au fond, & ne leur. celer ny effets, ny liures, ny chose aucune dont la connoissance soit necessaire pour voir si c'est ou fraude ou malheur. S'il y a des effets suffisamment pour satisfaire aux creanciers, il est de la iustice de les acquitter, ne deust-il rester que peu de chose ou rien du tout pour soustenir la famille, ou pour releuer les affaires de celuy qui est tombé. Ie sçay bien que c'est vne grande tentation, de se voir apres de hautes esperances, & mesmes apres auoir beaucoup possedé, reduit à la mendicité: Mais vne bonne ame doit surmonter toutes les pensées qui s'éleuent contre la iustice, & en s'abaissant sous la main de Dieu qui l'humilie, s'asseurer en sa bonté qui redresse quand il est temps.

Zz iiii

728 SVITE DE LA DERN. PART. Car cette consideration que quelques vns mettent en auant, que quand la ruine est arriuée par simple malheur, sans qu'on y puisse estre accusé de fraude, ny de quelque trop notable imprudence & qui approche de dol, il est raisonnable que chacun des creanciers en porte sa part, est bonne à faire aux creanciers mesmes, qui dans vne si triste occurrence doiuent vser de generosité & de charité. Peut-estre mesme qu'il est en quelque sorte iuste que le public y interuienne, & qu'il oblige ceux qui le peuuent sans incommodité de leurs affaires, à y exercer quelque humanité. Car vne famille, dans les affaires de laquelle plusieurs creanciers ont interest, est comme un vaisseau chargé de diuerses marchandises qui appartiennent. à beaucoup degens. Comme donc dans vn peril de naufrage, on foulage le nauire pour empescher qu'il ne perisse,

& chacun permet pour cela qu'on jette en la mer vne partie de sa marchandise, en y gardant, s'il est possible, quelque raisonnable mesure, qui distribuë la perte également & proportionnément

DE LA MORALE CHREST. 729 à tous: ainsi peut-on bien sauuer vne famille que sa charge accable, & qui est preste de submerger, en égalant sur les creanciers le plus justement qu'il se peut, à chacun sa portion de la perte generale, afin qu'elle en soit plus aisée à porter. En esset les loix y pouruoyent pour l'interest de la societé. Car il est plus expedient au public, que plusieurs partagent entr'eux vne perte, pour se la rendre commune, & pour s'entr'aider à la supporter; ce qu'ils peuuent faire aisément & presque sans la sentir, si elle leur est bien distribuée; que non pas qu'vne famille & toute seule & toute entiere, demeure accrauantée sous le faix. C'est la pratique de la Medecine, quand vne grande fluxion est tombée sur vne partie, où elle cause quelque perilleuse inflammation, de faire quelques saignées, soit pour en descharger la matiere ou pour en faire reuulsion. Et en l'vne & en l'autre toutes les autres parties du corps compatis-sent à la dolente. Car s'il est question de descharge, c'est le sang de

730. SVITE DE LA DERN. PART. tout le corps qui s'en va : & si c'est pour faire diuersion, c'est en general sur tous les membres qu'on deriue l'humeur peccante, afin quequand elle sera esparse, la chaleur naturelle qui est espanduë partout le corps, ait plus de facilité à la digerer. Enfin, c'est le precepte de la Parole de Dieu, que nous portions les charges les vns des autres, & qu'ainsi nous accomplissions la Loy. de Christ. Et bien qu'en cet aduertissement Saint Paul air principalement égard à la charité dont il faut vser à supporter doucement les fautes qui arriuent à nos freres, & à les y redresser auer vn esprit de bonté, la raison en est par tout generale, & s'estend vniuersellement à toutes occasions. Et s'il faut auoir de la charité enuers nos freres où il s'agit de fautes morales, & qui sont blasmables deuant les hommes, & vicieuses deuant Dieus ceux-là sans doute en sont encore plus dignes, dans les desordres desquels il ne paroist qu'vn pur malheur. Si cette raison qu'allegue l'Apostre, & te considere toy-mesme, que tu ne sois

DE LA MORALE CHREST. 731 ausi tenté, doit auoir lieu en ce qui regarde les pechés, la condition de pecheur ne nous rend gueres plus sujets à commettre des fautes grieues & scandaleuses, comme sont celles dont il s'agit là, que celle d'hommes nous assujettit aux accidens qui renuersent nos familles & nos affaires. Enfin, si la Loy de Christ, que l'Apostre nous exhorte d'accomplir, nous oblige à vne si grande charité, que pour en suiure les mouuemens il nous faille surmonter l'indignation que l'amour de la sanctification produit naturellement en nous contre les scandaleux & les scandales; cette mesme loy nous doit obliger en plus forts termes' à furmonter les inclinations que nous auons naturellement à posseder & à retenir nostre bien, afin de soulager nos freres qui sont tombés en calamité. Et pour moy j'estime qu'vne ame veritablement Chrestienne, & qui a quelque chose de noble & de releué, trouuera sans comparaison plus de facilité en soy-mesme à n'estre pasatta-chée à l'interest d'vn peu de bien,

732 SVITE DE LA DERN. PART. qu'à ne sentir pas de la douleur & de l'indignation contre des pechés signalés, & qui tournent au scandale de l'Eglise. Mais, comme ie l'ay desja dit, c'est aux creanciers ou au public à faire ces considerations : & quant à celuy à qui ce malheur est arriué, il doit auoir d'autres visées. N'eust-il que l'honneur du monde deuant les yeux, il doit éuiter les soupçons d'auoir voulu faire son profit au dommage de son prochain. Mais la iustice, qui est vne constante volonté de rendre à chacun ce qui luy appartient, l'oblige à se dépouiller plustost de toutes choses, que de retenir rien du bien d'autruy par deuers soy; & la charité Chrestienne luy doit mettre cette pensée dans l'esprit, que si Dieu l'a voulu affliger, il ne faut pas qu'il communique son affliction aux autres malgré qu'ils en ayent. Tellement, que s'ils y doiuent auoir part, il faut qu'ils la y prennent volontairement: & s'il est expedient de les y ranger par autorité, il seroit incomparablement plus à propos que ce fust à la solicita-

DE LA MORALE CHREST. tion du Procureur du Roy, qui a les interests du public entre les mains, que non pas à la requeste de celuy qui ne peut gueres bien se garentir du soupeon de dol, en implorat ainsi l'au-torité du Souuerain pour ses affaires particulieres. Que si absolument il n'a pas dans ses effects de quoy contenter ceux à qui il doit, alors il peut bien auoir luy mesme recours à la protection du souuerain contre l'inhumanité de ceux qui se montrent implacables. Les anciens Romains liuroyent vn detteur à ses creanciers, & leur permettoient de le déchirer, & d'en emporter chacun sa piece. C'estoit vne coustume barbare, & qui aussi ne dura pas long temps. Depuis on s'est contenté de leur abandonner ses biens, pour se vanger dessus s'il y a de quoy. Et bien qu'il est indigne d'vn homme Chrestien de s'ymonstrer rigoureux, neantmoins il est certain que la cruauté n'y est pas semblable. Mais quand il n'y a pas de quoy, & qu'il est bien iustifié que ce n'est pas par mauuaises pratiques mais par malheur, il n'est ny

734 SVITE DE LA DERN. PART. de la Iustice ciuile, n'y de la charité des Chrestiens, de laisser perpetuelment vn homme exposé à la persecution de gens intraittables & déraisonnables. Il peut donques luy mesme poursuiure sa liberté par deuant le Magistrat; tant parce que la prison perpetuelle est ennemie de l'esprit humain, que pour trauailler à l'entretenement de sa femme & de ses enfans, & au restablissement de sa maison; s'il plaist à Dieu d'espandre plus de benediction sur son trauail qu'il h'à fait par le passé; & pour laisser à l'Estat l'vsage d'vn de ses citoyens, qui suy demeureroit autrement absolument inutile. Mais cependant il doit aubit cette resolution formée dans l'ame, que si Dieu luy donne le moyen de remettre ses affaires en trauaillant, il rendra tant qu'il luy sera possible à ses creanciers, ou à leurs enfans & à leurs heritiers, ce dont par leur accommodement il sera demeuré en arriere! Car pour les gens de bien & d'honneur, le temps n'engendre point de prescrit ption; & les fins de non receuoir,

DE LA MORALE CHREST. 735 quand on sçait bien que lon doit, sont à mon aduis vne exception tres-indigne & tres-infame. Et quant au consentement qu'on a presté à vn accommodement en perdant, vn honneste homme, en faueur de qui il a esté donné en vne telle occasion, le doit reputer comme forcé, & en releuer luy mesme son creancier, s'il n'y persiste volontairement à l'heure qu'il void son detteur en estat de luy satisfaire. Et bien que ce soit vne chose rare de voir vn homme auec qui ses creanciers ont composé, leur payer de bonne foy, quand Dieu luy en donne le moyen, ce qu'ils luy ont relaissé dans le desordre de ses affaires; quelques vns neantmoins l'ont fait, & vniuersellement tous le doiuent faire, s'ils veulent satisfaire à la Loy du Christianisme, & garder la qualité de veritablement gens d'honneur. Quant à ceux de qui le negoce a prosperé par la benediction de Dieu, c'est à eux à luy en rendre louange, & à reconnoistre qu'ils tiennent leur bien de sa liberalité. L'Escriture Saincte se

736 SVITE DE LA DERN. PART. sert d'vne façon de parler fort remarquable, quand elle defend aux hommes de sacrifier à leur ré. Soit que la metaphore soit prise de la pes-che, ou de la chasse aux oiseaux, la raison en est pareille. Il semble bien à la verité qu'il depende en grande partie de l'industrie & du soin de l'homme, de tendre le ré bien à propos. Il y a du chois au temps & au lieu; & la façon mesme de le dresser, & de le ramener quand la proye a donné dedans, est reiglée par l'experience & par l'art, & ne se fait pas à la volée. Mais quant à y conduire ou les oiseaux oules poissons, c'est comme les hommes du monde ont accoutumé de parler, vn pur effect du hafard; & selon le sentiment des Chretiens, & le stile de la Parole de Dieu, c'est vn œuure de la Prouidence. Quand donques les hommes auroient à se donner quelque louange d'auoir bien tendu leurs filés, (quoy que toute nostre industrie & nostre vigilance vient de Dieu) c'est neantmoins à Dieu qu'il faut rendre tout l'honneur du

DE LA MORALE CHREST. du succés & de la capture. Et bien que cela se puisse appliquer à toutes sortes de professions, parce qu'il n'y en a aucune dont l'éuenement ne depende de sa benediction, la marchandise a pourtant plus de ressemblance à la pesche & à cette sorte de chasse, que n'ont pas les autres vocations : les rencontres y estant si fortuites, & dépendant de tant d'accidens impreueus, que c'est manifestement la seule Prouidence de Dieu qui y domine. Or n'est-ce pas seulemet des mouvemens du cœur que les marchands que Dieu à benits, en doiuent témoigner leur reconnoissance. L'Eglise se doit sentir de leurs richesses, l'Estat y doit participer: les poures doiuent tirer du secours de leur abondance : ils doiuent s'élargir enuers leurs amis incommodez : les filles sans dot & sans patrimoine doiuent estre l'objet de leurs liberalitez: & par tout où les occasions se presentent de contribuer au bien ou à l'ornement du public & au soulagement des particuliers, si les marchands que Dieu - a enrichis sont veritablement

738 SVITE DE LA DERN. PART. Chrestiens, il faut qu'ils y déploient leurs biens à porportion de la grace qui leura esté faite. Car comme quand vn fontenier conduit plusieurs tuyaux d'eau vers vn seul & mesme bassin, ce n'est pas afin qu'elles y demeurent cachées come en des cauernes, ou qu'elles y croupissent & qu'elles s'y corrompét faute d'agitation & de mouuement: c'est pour y faire plusieurs jets qui jaillissent de tous costez, & qui se répandent à l'entour, pour l'humectation,& le rafraichissement, & la decoration des lieux & des plantes qui les enuironnent; cette confluence de biens qui se fait entre les mains d'vn seul par la benediction du Seigneur, n'est pas afin qu'ils s'y rouillent en des coffres, ou qu'ils s'y consument par l'vsage de celuy seul à qui Dieu les a donnés, c'est pour l'utilité des prochains, & pour l'auantage de la Republique. Au reste, comme encore que le bassin se vuide sans cesse, il n'estiamais vuide pourtant, parce que les mesmes tuyaux qui l'ont rempli la premiere fois, y conduisent toujours de nouvelles eaux; la charité

DE LA MORALE CHREST. & la liberalité de ceux qui vsent bien de leurs grands biens ne les épuise jamais, parce que les mesmes sources & les mesmes veines de la benediction de Dieu, les remplissent & les rafraischissent sans cesse. Que s'il en arriuoit autrement, comme la Prouidence a des raisons d'affliger les gens de bien que nous ne pouuons pas toujours sonder, il en reste au moins cette consolation que nostre Seigneur mesme promet, c'est que l'ons'est fait des amis des richesses d'icy bas, qui nous reçoiuent apres dans les celestes & eternels tabernacles.

Quant aux Artisans, il y en a quelques-vns qui approchent tant de la condition des marchans, qu'il les faut presque ranger en mesme categorie. Tels sont, par exemple, les orséures, qui bien qu'ils trauaillent de la main, font neantmoins ordinairement vn trafic d'argent, de perles & de pierreries, où ils ne contribuënt rien de leur art sinon achepter & reuendre, ee qui est proprement le fait des marchans. Et s'ils vendent quelques pieces où ils

Aaa ij

740 SVITE DE LA DERN. PART. avent trauaillé, la matiere mesme qu'ils ont achetée, y estant beaucoup plus considerée que la façon, l'ouurage en est plustost consideré comme marchandise simplement, que comme manufa-&ure d'artisan, & l'argent qu'en donne l'acheteur, est plustost consideré comme prix d'acquisition, que non pas comme salaire. De sorte qu'ils doivent receuoir les enseignemens que j'ay cydessus expliqués, comme s'ils auoient esté donnés pour eux, à cause de la ressemblance du sujet & de la matiere. Et s'il y a quelque instruction qui les concerne en particulier, c'est qu'en cette sorte de marchandise il est plus aisé de tromper, à cause du messange des metaux, qui ne se discerne pas aisement, & que les fausses perles & les hapelourdes ressemblent quelques fois de telle façon aux vrais joyaux & aux fins diamans, qu'il y faut estre expert & intelligent pour ne s'y laisser pas affronter par ceux qui s'en messet. Parce donc que le pas y est plus glissant, que le gain, quand on y trompe, est plus grand, & qu'ainsi cette sorte de com-

DE LA MORALE CHREST. merce est accompagné de plus de tentations, ceux qui l'exercent y doiuent prendre garde de plus prés, pour y garder vne fidelité plus exemplaire & plus acheuée. Pour ce qui est des au-tres à qui le nom d'artisan couient proprement, ce n'est pas seulement dans les choses de leur mestier que la Morale Chrestienne leur doit donner quelques auertissemens, c'est aussi à l'égard des inclinarions aufquelles cette profession est communément sujette. Le vice qui y regne le plus ordinairement, & qui touche de plus prés cette sorte de vocation, c'est le peu de fidelité, soit au chois de la matiere qu'ils fournifsent & qu'ils employent, soit en la soustraction de celle qu'on leur baille pour y trauailler, soit en l'ouurage mesme & en la façon qui depend de leur main, soit au prix qu'ils mettent à leur trauail,où, comme on parle assez souuent, ils rançonnent ceux auec qui ils ont affaire. Car c'est vne chose estrange de la varieté des formes de tromperie qui se pratiquent par les artisans chacun en sa vocation, si la crainte de Dieu, Aaa iij

742 SVITE DE LA DERN. PART. & les bonnes impressions du Christianisme ne les gouvernent. Et si, pour exemple, il y auoit moyen d'aller par toutes les boutiques de Paris où on ges & de manufactures de toutes especes qui s'y font, & tenir vn registre bien particulier de toutes les ruses & de toutes les finesses qui s'y pratiquent pour gaigner injustement, & pour abuser de la simplicité des personnes qui n'y regardent pas d'affez prés : ie ne di-ray pas que la pluspart se trouueroient estre des cauernes de brigands : car on n'y vole pas le pistolet à la main, & n'y a cajolerie au monde dont on ne se serue poury faire son profit : mais bien diray- je qu'il y en a vne tres grande quantité qui sont comme autant de buifsons, où l'on seroit émerueille de voir les differences façons qu'on y employe pour prendre les oyseaux à la pipée II est vray qu'on ne les y retient pas long remps, & on ne leur y ofte ny lavie ny la liberté. Mais on les y plume le plus qu'on peut, & celuy-là est bien sin qui peut s'en retourner sans y laisser beau-

DE LA MORALE CHREST. coup plus qu'il n'en remporte. La condition de la vie humaine est telle, quò ie ne sçay s'il seroit à desirer que la charité Chrestienne eust en ces lieux-là pris absolument la place de l'auidité du gain; parce que si on n'en estoit plus animé, & qu'il n'y eust que la seule charité qui y regnast, ie croy que l'on verroit en vn moment tomber à terre la pluspart des arts qui apportent, nonseulement beaucoup d'ornement, mais encore beaucoup d'vtilités & de commoditez, tant à cette grande Ville en particulier, qu'en general à tout le Royaume. Car le desir de gaigner est comme vn esprit de Mammon, qui est épandu là dedans, & qui viuifie & remuë tant de milliers de pieds & de mains, qui trauaillent à ces ouurages, & qu'vn incurable engourdissement saisiroit, si l'exorcisme de la charité auoit expulsé ce demon. Mais au moins certesseroit il à souhaitter que cette insatiable conuoitise de gagner fust vn peu temperée de l'amour de la vertu, & de la dilection qui doit estre entre les Chrestiens, pour n'auoir pas en si grande re-Aaa iiij

SVITE DE LA DERN. PART. commandation l'interest particulier, & qu'on y fist vn peu plus de consideration chacun de l'interest de son prochain & de son frere. Qu'on y mesle donc à la bonne heure l'affection de gaigner, puis qu'il n'y a pas moyen de faire autrement en cette infirmité de la chair: qu'on s'y propose d'accommoder ses affaires, & d'auancer sesenfans au dessus de sa propre condition. qu'on y passe les iours & les nuits à trauailler, & qu'on n'y laisse échapper aucune occasion de profiter que l'on. n'embrasse & dont on nivse a son auantage: mais que cela soit au moins toujours dirigé par la bonne foy spar la loyauté; par la loy dela charité, & qu'on se souvienne qu'il y a de meilleures ride ne perdre pas l'esperace ny le droir, en affectant trop ses affections à celles de la terre. Apres cela, ie voy que dans les petites villes ordinairement, cen'est pas tant cette ardente passion de faire son profit, mesmes aux dépens d'autruy, qui domine les artisans, que la débauche du vin, & la frequentation

DE LA MORALE CHREST. 745 des cabarets, où ces gens noyent dans l'oubli le soin de leurs familles & de leurs affaires. Car l'homme est vn animal si bizarre & si ennemi de la mediocrité, que s'il ne se jette à vne extremité; il ne peut éuiter de donner dans l'autre, si la pieté & la vertu ne le conduit. En vn lieu les artisans se tuent de trauailler, & en vn autre ils ne trauaillent qu'à l'extréme necessité, & se moisissent de ne rien faire. S. Paul dit que celuy qui ne trauaille point n'est pas digne de manger. Que s'il n'est pas digne de manger pour se soustenir & pour subsister, beaucoup moins est-il conuenable qu'il boine tant, & qu'il submerge dans le vin la substance de sa famille. Ie ne sçay quelle vtilité les cabaretsipenuent apporter à l'Estat, ny quelles sont les raisons politiques pour lesquelles on les y souffre en nombre si prodigieux qu'ils font ordinairement presque le quart d'vne Ville. Et peutestre que s'il n'y en auoit point en Bretagne, on y auroit plus de peine à recueillir les deniers que l'on y fournit au Roy; comme ailleurs c'est de là princi-

746 SVITE DE LA DERN. PART. palement que lon retire ses droicts que l'on appelle du nom d'Aides, Et ie ne sçay si quand on les auroit tous rasez, la débauche & la dissolution seroit bannie pour cela, tant le vice de l'esprit humain est naturellement incorrigible. Mais il est vray pourtant qu'il n'y a pas moyen de se figurer combien cette horrible licence de frequenter ces lieux-là, produit de malheurs & de desordres. La bile s'y échauffant par le vin, on y void arriver des batteries & des meurtres : la conuoitise s'y allumant par les sales discours & par les objets, il s'y commet vne infinité d'impuretés; lá perte du temps, chose d'vn prix inestimable, y est si continuelle & si grande, qu'on ne sçauroit reparer le dommage qu'on en reçoit: s'il y auoit naturellement dans les sentimens de l'ame quelque generosité, elle s'auilit & s'abastardit en la frequentation de ces lieux : s'il y auoit quelque honneste seuerité, quelque grauité louable & recommandable dans les mœurs, elle se fond dans le vin & dans les voluptez des sens char-

DE LA MORALE CHREST. nels, au contentement desquels ces maisons la sont destinées : la dépense yest si grande, quand vine fois on s'y abandonne que c'est l'écueil où se ruinent les artifans: &, ce qui est le comble du malheur, c'est la cause ineuitable des scandales qui arrivent ordinairement dans leurs mesnages. Car les femmes, qui ne peuuent pas auoir toute la constance ny toute la moderation necessaire, pour supporter doucement la ruine de leurs affaires & la débauche de leurs maris, quand elles les voyent reuenir du cabaret pleins de vin, s'emportent par la colere à des paroles injurieuses & capables d'irriter les plus retenus. Tellement que ces gens ayans desia dans la teste la chaleun qu'y portent les fumées du vin, > s'emflamment incontinent de colere, & se laissent aller à des violences qui emplissent la maison & tout le voisinage de vacarmes & de clameurs. Et si les Turcs quine boiuent point de vin, venoient quelquesfois à passer au long denos ruës, & qu'ils y vissent les tempestes & les desordres que ce breuuage

748 SVITE DE LA DERN. PART. y produit, ils se confirmeroient en cette opinion, que leur Mahomet a esté plus sage que nostre Christ, en ce qu'il leur a interdit l'vsage d'vne chose si pestilente. De sorte que l'abus que nous faisons de la liberté que nostre Seigneur nous a donnée d'vser de cette creature de Dieu, tourne à la honte de nostre profession, & au deshonneur du Sauueur du monde. Ie voudrois donques de bon cœur, puis que la seule predication de l'Euangile n'est pas capable de reformer la vie des artisans, que les Magistrats Chrestiens y apportassent vn peu du leur, & qu'ils retranchassent quelque chose de cette prodigieuse licence de boire. Car si l'authorité des loix politiques, & la suppression des cabarets, ostoit aux hommes le moyen & l'occasion de se laisser allerà de si estranges débordemens, ils en seroient plus susceptibles des impressions du Christianisme.

Restent maintenant les laboureurs, & generalement rous ceux dont la vocation est de viure de leur trauail en la culture de la terre. Horace dit que

DE LA MORALE CHREST. 749 ceux-là sont bien heureux qui peuuent passer leur vie à ce mestier-là, & Virgile encore, que s'ils sçauoient con-noistre les auantages de leur condition; ils en estimeroient tant le bonheur, qu'ils ne porteroient point d'enuie à celle des autres. Et veritablement qui pourroit mener cette vie à peu prés comme faisoiet les anciens, qui auoient à eux leurs champs, leurs bœufs & leurs instrumens de labourage; qui possedoiet pour eux-mesmes le bestail qu'ils nourrissoient; qui ne deuoient rien aux creanciers, & qui n'estoient point vexés de trop grandes exactions ny de contributions publiques; que les gens de guerre ne mangeoient point, & qui jouissoient en repos du reuenu de leur trauail; il ne se peut pas nier qu'ils ne l'emportassent en beaucoup d'égards sur les habitans des Villes. Ils seroient loin de l'enuie & de l'ambition, qui sont les pettes ordinaires de la tranquilité de l'esprit humain : l'auarice ne les domineroit point; le luxe & la superfluité ne corromproit point l'integrité de leur vertu: ils seroiet exempts

SVITE DE LA DERN. PART. du tracas & de l'agitation des Palais; la chicane ne les rongeroit & ne les harceleroit point, & s'ils auoient moins de politesse qu'on n'en void ailleurs, ils auroient aussi plus de candeur, de sin-cerité & d'innocence. La vertu militaire ne s'abastardiroit pas entr'eux par l'vsage des voluptez, & leur corps durci au trauail, se trouueroit aux occasions capable de toutes les factions & de toutes les fatigues militaires. Et s'ils n'auoient pas la connoissance de tant de sciences & de tant d'arts qu'on en appred & qu'on en pratique dans cette autre forme de vie que le reste du monde suit, ils n'ignoreroient pourtant pas les choses absolument necessaires. Tels estoient ces Romains de l'ancienne Republique, qu'on alloir tirer du labourage pour les faire Dictateurs, & qui de la mesme main dont ils gouuernoient le soc, donnoient des batailles & remportoient des victoires glorieuses. Mais à cette heure les laboureurs sont d'autres gens. La pluspart n'ont rien à eux, & sont comme des fermiers, ou des merayers, ou des mer-

DE LA MORALE CHREST. 751 cenaires en la culture des terres d'aurruy: & s'il y en a quelqu'vn qui possede quelque terre, c'est peu de chose que de son bien, & pour soustenir sa famille & employer ses enfans, il faut qu'auecque son bien il cultiue encoro celuy des autres. A ceux là felon la connoissance que ie puis auoir d'eux en ces quartiers, ie n'ay à donner que deux ou trois instructions seulement, mais qui leur sont absolument necessaires. La premiere est de vaquer à leur tranail auec assiduité, & garder soigneusement à la maison ce qu'ils peuuent auoir amassé, & non pas le dé. penser, comme quelques-vns d'entr'eux font, dans l'yurognerie des tauernes. Car c'est chose ordinaire de les voir les iours de Dimanche & de Feste, retourner soit de la ville ou du village vn peu hors de leur bon fens, & s'ils ne sont pas si violens dans le vin comme sont ordinairement les artisans, ils ne laissent pourtant pas quelquesfois de porter en cet estat quelque tempeste dans leurs familles. Mais quand leurs femmes feroient plus pa-

752 SVITE DE LA DERN. L'ART. rientes que ne sont d'ordinaire celles des gens de mestier : comme il se peut faire qu'elles ayent plus de modera-tion : ou qu'ils les ayment dauan-tage que les artisans ne font les leurs; comme cela ne se peut pas nier; tellement que de leur mauuais gouuet-nement en celail en arriuast moins souuent de scandaleux demessés; tant y à que par la dépense qu'ils font là, ils incommodent ou ruinent tout à fait les affaires de leurs familles. A ceux-là doncques se peut appliquer en particulier ce que S. Paul dit en general: c'est que qui n'a soin des siens est pire qu'un insidelle. La seconde instruction est celle de la sidelité. Car j'ay dit que la pluspart des paysans & des labou-reurs sont reduits à la culture des terres d'autruy, soit en qualité de fermiers, ou en celle de metayers & de mercenaires. Or est-il certain qu'il se commet vne infinité de fraudes en cette administration, & que c'est vne chose rare de voir des gens de cette condition qui s'en acquittent commé ils doiuent. Les fermiers succent toute la graisse

DE LA MORALE CHREST. la graisse des terres, & ne se soucient pas de les laisser toutes tomber en decadence, pourueu qu'ils y facent leur conte pendant les années de leur bail: Les metayers desrobent le reuenu qui appartient à leurs maistres, & s'aproprient en cachette ce qu'ils deuroyent apporter de bonne foy en commun ; & presque generalement toute cette sorte de mercenaires font laschement la besogne de ceux qui les employent; où s'ils y apportent de la vigilance, c'est pour en tirer tout le profit. Toutes ces façons de faire sont autant de pechés commis contre le commandement, Tu ne déroberas point; & par consequent contre les loix du Christianisme. On se plaint des gelées qui gastent les vignes, & des brouées qui perdent les bleds : on s'étonne de voir les esperances des laboureurs fauchées bien souuent en vn moment, & au lieu de l'abondance à laquelle on s'estoit attendu, l'on void souuent auec beaucoup d'estonnement & de douleur, venir la disette & la famine. Les pluyes hors de sai-

Bbb

754 SVITE DE LA DERN. PART. son, les inondations des riuieres, les gresses, les orages, & les autres cala-mités de cette nature, perdent le fruit des vendanges & ruïnent les moissons. Et puis on en accuse les astres, ou l'on murmure contre la fortune, ou l'on s'en prend ouvertement à la prouidence de Dieu. C'est iniustement qu'on le fait, puis que ce sont les seuls pechés des homesqui en sont la cause. Et comme ie ne nie pas que les habitãs des villes n'y contribuent beaucoup, aussi suisje tres asseuré qu'il en faut imputer vne partie aux hommes de la campagne. Parce qu'ils soustrayent à leurs maistres les fruits de la terre, Dieu leur soustrait aussi de sa partles bonnes influences du ciel, & s'il leur reste encore quelque chose de leur larcin, la Prouidence permet qu'il leur soit raui par les exacteurs en diuerses sortes de brigandages. De sorte qu'il n'y a point de moyen de ramener la felicité sur la terre & dans la campagne, qu'en y ramenant quand & quand la iustice & la charité, qui en sont presque vniuersellement bannies.

DE LA MORALE CHREST. Enfin, la troisième instruction est, de corriger cette humeur accariastre & chicaneuse qui possede presque generalement tous les paysans. Car ils font des procés sur des vetilles & parpure opiniastreté; & plustost que de ceder la moindre chose à leurs voisins, ils s'entrerongent en frais de iustice. Entrés dans les estudes des Procureurs, vous les y trouués. Montés dans les sales des Palais ou dans les chambres des audiances, vous les y rencontrés à foules. Promenés vous par les ruës les iours des plaids, vous les voyés à bandes à la suite des Aduocats. Si quelque necessité vous oblige de mettre le pied dans vn cabaret, ils y sont à longues rangées, où ils parlent de leurs procés. Enfin reuenés vous de la campagne, les grands chemins en sont couverts, où en s'en retournant en leurs maisons ils parlent d'intimations & de presentations, d'appointemens & de requestes. Car c'est vne chose estrange, que la plus part de ces gens, que l'on estime ordinairement auoir autant de cal sur l'esprit en ce qui re-Bbbij

756 SVITE DE LA DERN. PART. garde les belles choses, que le rrauail de la terre leur en a durci sur les mains, neantmoins, soit par l'affection qu'ils apportent à la chicane, soit par la coustume & par l'assiduité de la pratiquer, se rendent intelligens dans les matieres du Palais, & versés dans les termes de jurisprudence. On excuse d'ordinaire leur ignorance en ce qui touche la religion, parce qu'ils ne sont pas capables d'en comprendre les mysteres, & que n'ayans esté nourris qu'à manier le soc & la beche, la doctrine de la Iustification, & de la Predestination, & de l'efficace des Sacremens, est infiniment au dessus de la portée de leur esprit. Mais ie maintiens que puis que sans autre docteur que la coustume de plaider. l'ardeur qu'ils y apportent suffit pour leur apprendre la pratique, & pour leur donner la connoissance des termes du Droict, s'ils auoient autant d'affection à s'instruire en la religion, & que les Ministres qui y seruent eussent le soin de les en informer selon leur deupir, ils s'y rendroient assés

DE LA MORALE CHREST. 757. sçauans pour l'édification du Public, & pour la satisfaction particuliere de leurs consciences. Car nonseulement les mysteres absolument necessaires au salut, mais la pluspart des doctrines de la Religion Chrestienne qui ne sont pas en pareil degré de necessité, ne sont pas en elles-mesmes si difficiles à conceuoir, que les matieres de la plaidoyerie. De sorte qu'en cet égard ils sont inexcusables deuant Dieu, & condamnables deuant les hommes. Mais outre que cette science qu'ils acquierent dans la chicane, les condamnera quelque iour de ce qu'ils n'auront pas appris la Religion de Iesus Christ, elle leur couste bon dés maintenant, par les incommoditez & par les ruïnes qu'elle apporte dans leurs familles. Car quad la Iustice s'exerceroit auec toute l'integrité que demande le nom qu'elle porte & qui est souuerainement glo-rieux, ils ne laisseroient pas d'y perdre leur temps, & d'y consumer leur arger, & d'y trouuer l'occasion de se détourner de leurs occupations, & de commettre mille débauches. Mais chacun B bb iii

758 SVITE DE LA DERN. PART. sçait la corruption qui s'est glissée en cette profession-là; & les Ordonnances de nos Rois ont de temps en temps tasché de la reprimer; mais ce n'a point esté auec tant d'effet, que les gens de bien qui suiuent cette sorte de vocation en grand nombre, ne la deplorent eux-melmes. De sorte qu'en partie par l'artifice de plusieurs gens de Palais, en partie par l'opiniastreté des parties, les procés durent si long-temps, & pullulent de telle façon les vns des autres, & s'embarassent de tant d'incidens, & s'enflent de tant de poursuittes, & d'vn simple petit exploit par où ils commencent, paruiennent à vne si prodigieuse grosseur, que pour nourrir ceux qui gouvernent ces monstres, les habitans de la campagne fournissent toute leur fubstance & épuisent tout leur sang. Ie voudrois donques qu'il eust pleu à Dieu mette au cœur des hommes de cette sorte, le desir de pratiquer le precepte de S. Paul, qui est de souffrir plustost du dommage en leurs affaires, que non pas se porter à la resolution de plaider : car cela est sans doute plus

DE LA MORALE CHREST. expedient, & plus digne du Christianisme. Ou bien s'il ne se peut éuiter d'entrer en quelques contentions les vns contre les autres, qu'ils les vuidassent par arbitrage, & qu'ils choisissent pour cela des gens de bien vn peu en-tendus. Car ie croy que de cent procés il y en a toujours quatrevingts sur lesquels le bon sens naturel d'vn homme, joint auec vne bonne conscience, prononceroit sans Rubriques & sans Paragraphes, de fort équitables Arrests. Pour le reste, où le droit est plus douteux, on s'est fort moqué d'vn certain Iuge d'vne Prouince voissne de cellecy, qui jugea vn procés en faisant tirer les parties à la courte busche, parce qu'il ne pouvoit penetrer où estoit le nœud de leur disserent. C'est à la verité vne façon de juger fort estrange & fort ridicule, pour vn homme de ce mestier-là. Mais peut-estre qu'il seroit plus expedient à la pluspart de ceux qui plaident, de commettre la deci-sion de leurs differens au hasard, que de la poursuiure par les voyes du droit, où souvent il faut laisser les habille760 SVITE DE LA DERN. PART. mens, & quelque chose de la peau, entre les épines qui s'y rencontrent.

CONCLVSION DE tout l'Ouurage.

Les devoirs de la vie d'un homme Chrestien s'estendent à tant de choses, que si ie les voulois tous examiner, & ne rien laisser en arriere de ce qui se peut dire là dessus, ie ne viendrois iamais au bout de mes meditations. Et bien que le tour que i'ay fait prendre à l'explication de la Morale, soit si grand, & embrasse tant de considerations, que ie doute qu'il y ait eu aucun auant moy qui ait poussé cette matiere plus auant, ny qui ait employé plus de volumes à la traitter, ie voy bien qu'il me resteroit encore beaucoup de choses à dire, si ie voulois tour à fait suiure mes pensées, & tascher de mettre cet. Ouurage en tel estat qu'on le peust dire acheué. La façon de laquelle ie l'ay composé, a empesché

DE LA MORALECHREST. que ie n'y peusse suiure vne methode si exacte que ie n'oubliasse rien du tout de ce qui s'y pouuoit examiner. Car j'en avois bien dés le commencement le dessein vniuersel formé dans l'entendement, & j'ay donné à ses parties les plus generales la place qu'elles y deuoient auoir. Mais quand il a falu venir à particularifer chaque chose, j'ay écrit ce qui m'est venu dans la pensée, sans aucune meditation precedente, sans assistance de liures, & sans en auoir fait aucun plan, pour me conduire en la deduction des matieres & dans leur disposition. De sorte que ce que j'y ay emprunté des Auteurs & des sciences, est venu de ce qui m'est resté de mes anciennes estudes, dans lesquelles ne m'estant point proposé de paroistre entre les Sçauans, je n'ay jamais fait une ligne de recueils ny de lieux communs, & m'en suis fié à ma memoire, que ie n'ay pas fort bonne naturellement. Pour le reste, ce sont toutes pures productions de mon esprit, qui à mesure que j'écriuois me sont nées sur le champ. De quoy les

762 SVITE DE LA DERN. PART. Imprimeurs se plaignent de n'estre que trop bons témoins, parce que souuent il leur a falu attendre que ie fusse quitte de mes autres occupations, pour entrer dans mon cabinet, & prendre la plume en la main, pour fournir de la matiere à ceux qui arrangeoient leurs caracteres. Tout cela donquesse faisant auec quelque espece de precipitation, ce seroit vne merueille si ie n'y auois rien oublié, ou si ie n'y auois rien repeté, ou enfin si ie n'y auois placé quelque chose hors de son ordre. Veu mesmes qu'aux autres defauts qui se sont rencontrés en cette Composition, s'est encore joint celuy-cy, qu'en l'espace de huist années que cet ouurage a tenu la presse des Imprimeurs, il ne m'est point encore arriué d'en prendre aucun volume en la main, pour le repasser & le relire. Il mesouuient pourtant bien en general que mon premier dessein a esté de considerer les quatre diuers estats de l'homme, & de monstrer qu'elles ont esté les reigles de ses actions en chacun d'eux. Parce donc que le premiera esté celuy d'Adam en

DE LA MORALE CHREST. 763 son integrité, la premiere partie de cette Morale a esté employée à expliquer iusques où ont peu monter les connois-sances d'Adam en l'estat de son innocence, & comment de ces connoissances il a peu tirer les enseignemens qui concernoient ses deportemens. I'y ay donques premieremet traitté de l'homme & de ses principales facultés, parce qu'encore qu'on ait accoustumé dans les meditations de l'Ethique, de parler d'abord du souuerain bien, comme de la derniere fin de nos actions, j'ay pourtant creu qu'il estoit en quelque sorte necessaire de sçauoir auparauant ce que c'est que l'homme mesme, afin de luy establir puis apres vne fin conuenable à sa nature, & vn bonheur qui luy fust raisonnablement proportionné. Et parce que cela se pouvoit expliquer en des considerations generales & particulieres, j'ay premierement monstré que l'homme a de deux sortes de Puissances, à sçauoir les Raisonnables, & celles qui d'elles-mesmes ne sont point participantes de la Raison; & puis ie suis venu à l'examen de chacune

764 SVITE DE LA DERN. PART. d'elles, & ay commencé par les operations de la premiere & plus excellente, que l'on nomme l'Intellect. Sur ce sujet i'ay traitté de la façon de laquelle cette admirable faculté se déploye sur ses objets: & parce qu'il y en a de deux façons, & que dans les vns l'entendement se doit contenter d'en auoir la connoissance, & que la connoissance des autres le doit porter à certaine sorte d'actions, il a fallu premierement dire quelque chose de l'intellect theoretique, dont toutes les fonctions consistent en la comtemplation: puis venir à la consideration du practique, dont l'office naturel est de determiner l'homme à agir d'vne façon conuenable à l'exellence de sa nature, & autant qu'il se peut proportionnément à la condition de ses objets. De là l'ay passé à vne meditation que tout le monde a toujours creuë absolument necessaire en l'explication de la Morale. Car les actions de l'homme qui s'y rapportent, n'ayant point accoust umé d'estre estimées dignes ny de blasme ny de louange,

DE LA MORALE CHREST. 765 si elles ne sont faites volontairement & auecque liberté, i'ay donné vn chapitre tout entier à monstrer en quoy la liberté consiste, & comment les actions humaines peuuent estre ou n'estre pas dites entreprises & faites volontairement. Ce qui ayant esté assés particulierement expliqué, ie viens en fin à la methode ordinaire des Philosophes, & apres auoir parlé dans vne consideration expressément destinée à cette matiere, touchant la fin des actions des hommes, & nommément touchant la principale & la derniere; parce qu'il ne faut pas, pour estre bonnes & raisonnables, qu'elles soyent faites à la volée, & comme tirées à coup perdu; ie passe à la consideration du souverain bien de l'homme, qui n'est autre chose que la derniere fin de ses actions. Là ie prouue par la raison qu'il ne peut estre establi ny dans les richesses, ny dans ce qu'on appelle ordinairement du nom d'honneur, ny encore moins dans la volupté du corps; & puis faisant reflexion sur l'estat du premier

766 SVITE DE LA DERN. PART. homme, ie monstre qu'il estoit dans vne constitution trop-excellente, pour auoir cette imagination, que son souuerain bien se peust trouuer en aucune de ces choses, & pour l'establir ailleurs que dans les plus belles & les plus parfaites operations de son entendement, & de toutes les autres facultés qui luy sont sousordonnés dans la Morale, & qu'on appelle du nom d'appetits. Et parce que cela ainsi dit generalement, ne suffit pas entierement pour la description du souuerain bien de l'homme en l'estat de son integrité, ie m'y estends puis apres plus amplement, & monstre de combien de sortes de biens il y 2,& coment peuuent concouriràla composition du bonheur, ceux du corps auec ceux de l'ame. Dautant que l'homme estant essentiellement composé de l'ame & du corps, il ne peut estre souuerainement & parfaitement heureux, si ces deux parties de son estre ne iouissent de ce bonheur; & que l'ame estant d'ailleurs incomparablement plus excellente que le corps, & la directrice

DE LA MORALE CHREST. 767 de ses actions, elle le doit regler en la production des operations d'où dé-pend sa felicité, & la prendre quant à elle dans quelque chose de meilleur infiniment que ne peuuent estre les corporelles. Or cela ne se trouue sinon en la connoissance des objets les plus dignes d'estre contemplés, assauoir Dieu, & le prochain, & l'homme qui se restéchit sur soy-mesme : & dans l'exercice des actions les plus dignes d'estre pratiquées, qui sont celles de la pieté & de la vertu. Et iusques là peuuent aller les pensées que nous donne la Morale d'Aristore, & la raison telle qu'il l'auoit. Mais la reuelation de la Parole de Dieu nous conduisant beaucoup plus auant, & rendant nostre Raison beaucoup plus droicte & plus lumineuse qu'elle n'estoit dans Aristote ny dans quelque autre Philosophe que ce soit, ie tire puis apres de là des considerations pour la constitution du souuerain bien, comme l'immortalité du corps, & la communion auecque la Diuinité, ausquelles les Philosophes n'ont point

768 SVITE DE LA DERN. PART. pensé, ou qu'ils ont tres imparfaitement expliquées. Cela fait, apres auoir dit quelque chose, comme par forme de preparatif, sur les objets des actions morales de l'homme, ie commence l'explication des deuoirs aufquels le premier estoit obligé enuers la Diuinité, & recherche pour cela ce que la Natureluy a peu enseigner des proprietés du souuerain estre, & en premier lieu de son vnité. l'adjouste puis apres à cela ce qui concerne sa nature spirituelle, & inuisible, & entie-rement separée de la condition des corps, auec l'explication des deuoirs qui en peuuent resulter. Ie deduis ensuite assés particulierement ce qui touche la Prouidence laquelle gouuerne le monde, & ce qui concerné les instructions que l'homme en a peu recueillir pour les deuoirs de la Pieté. Et parce que pour les luy rendre conuenablement, il y faut obseruer quelques circonstances du lieu, du temps, & de la maniere en laquelle cela so deuoit faire en l'estat de l'innocence; ie recherche en consequence les enseignemens

DE LA MORALE CHREST. seignemens que la Nature y donnoit à l'homme pour l'y reigler & pour l'y determiner: & là par occasion ie discours de l'observation du Sabbat, & de ce qu'il y peut auoir de naturel & de ceremoniel en elle. De ce premier objet des actions de l'homme, à scauoir Dieu, ie passe incontinent au second, qui est le prochain, & fais sur la nature des deuoirs aufquels les hommes eussent esté obligez entr'eux en l'estat de l'integrité, diuerses reflexions generales. Puis venant à la consideration plus particuliere des relations qu'ils cussent eus les vns enuers les autres, ie discours premierement des deuoirs du mary & de la femme, parce que c'est la premiere de toutes les societés, & la source d'où découlent toutes les autres relations; & puis de ceux des peres enuers les enfans, & des enfans envers les peres, qui est la seule relation de superiorité & d'inferiorité qui se sust trouvée en cet innocent estat. En suite ie viens à considerer les deuoirs ausquels sont reciproquement obligés ceux qui sont entr'eux

Ccc

770 SVITE DE LA DERN. PART. en relation d'égalité, & les poursuis assez au long, selon les choses à l'égard desquelles il est necessaire de les pratiquer, & selon l'ordre auquel Dieu mesme les a mises dans la seconde Table de la Loy Morale. Là donques i'explique premierement le Commandement qui concerne la conseruation de la vie du prochain: puis apres celuy qui touche l'honneur de sa pudicité: en suite vient celuy qui regarde la iustice naturelle qu'il faut exercer enuers luy à l'égard de ses biens : ce qui est sujui de la consideration du soin que l'on doit auoir de sa reputation : puis ie conclus par l'interpretation du precepte, Tu ne convoiteras point, & explique soigneusement ce qu'il y a de naturel & ce qu'il ya de vicieux dans les mouuemensde la conuoitise. Enfin, le dernier objet de l'exercice de la vertu de l'homme, c'est luy-mesme, parce qu'il doit viure conuenablement à l'excellence de sa nature, quand il n'auroit relation auec personne, & qu'il luy fau-droit viure tout seul. Encore donques que la modestie, & les vertus homi-

DE LA MORALE CHREST. letiques & qui se pratiquent en la conversation, ayent quelque rapport à nos prochains en la compagnie desquels nous les pratiquons, si est-ce que parce qu'on les considere plûtost comme des qualitez de ceux en qui elles se rencontrent, que comme des choses esquelles les autres ayent quelque interest, ie les explique vers la fin de cetto premiere partie de ma Morale, comme des vertus détachées d'auecque la Charité. Ainsi le monstre quelles elles eussent deu estre en l'integrité de la Nature, & traitte en suitte de l'Vrbanité & de l'vsage de la Volupté. Puis retournant à dire quelque chose de la liberté de l'homme en l'integrité de la Nature, & de la felicité qu'il y pouvoit esperer, ie decide en quel égard cette felicité eust deu estre contemplatiue & se rapporter à l'intellect, & en quel autre elle eust deu estre pratique & dependre des actions; & là ie termine mes considerations touchant ce premier periode de la dispensation de Dieu enuers les hommes, & touchant la Morale qui luy conuenoit.

772 SVITE DE LA DERN. PART.

Dans la seconde partie ie me suis proposé en general de representer le changement que le peché auoit apporté dans l'economie de la Morale, afin d'en expliquer les enseignemens d'vne façon conuenable à cet estat là. Car il est bien vray que quand l'hom-me est decheu de son integrité, les parties qui le constituent essentiellement luy sont demeurées. Mais neantmoins, la constitution de ses facultés ayant esté fort changée, & son souuerain bien ayant deu estre colloqué en quelques choses differentes de celles dans lesquelles il l'estoit auparauant, il faut necessairement qu'encore que les enseignemens que la Nature luy auoit desia donnés pour ses deportemens, luy soyent restés pour fondement immuable de sa conduite, il y soit neantmoins arriué dans les circonstances beaucoup de notables variations. I'examine donc premierement quelles ont esté les facultés de l'homme depuis le peché, & monstre comment s'estant corrompu, & comment ayant communiqué sa corrup-

DE LA MORALE CHREST. tion à ses descendans, il est impossible que desormais les operations de ses facultés soyent telles qu'elles estoyent pendant le temps de son innocence. Et parce que comme il auoit desia esté monstré dans la premiere partie, pour estre veritablement morales, il faut que les actions de l'homme soyent libres, & qu'il semble que la corruption leur ait osté leur liberté, ie montre dans les considerations qui suiuent, en quoy l'essence de la liberté consiste, & comment les mauuaises habitudes la destruisent ou ne la destruisent pas. En quoy, bien qu'Aristote n'ait rien sceuny rien soupçonné de la corruption de l'homme, telle que nous l'auons connuë par la Parole de Dieu, ie tire pourtant de ses principes les veritables maximes par lesquelles il faut decider cette question. Car encore que par le peché nos facultés soyent tellemet engagées fous la domination du vice, qu'il nous est impossible de nous en défaire sans vne assistance particuliere de la grace de nostre Seigneur, nos actions, quel774 SVITE OF LA DERN. PART. que mauuaises qu'elle soyent, ne laissent pas d'estre libres, quand elles ne se font point par la contrainte de quelque principe externe dont la violence nous emporte, ou que nous n'y sommes point circonuenus par vne igno-rance excusable des choses singulieres ou particulieres, & que l'on nomme de fuit. Cela ainsi brieuement exposé, ie passe à la consideration du souuerain bien, tel qu'il faut que l'homme se le propose, & tel que la bonté de Dieu le luy reuele, depuis qu'il est decheu de l'esperance de la possession de celuy qui estoit establi pour recompense de sa perseuerance en integrité. Etlà ie m'estens à rechercher & à expliquer, premierement en quoy il consiste, & quel est le lieu où il le faut chercher. Puis apres, quelle est la connoissance que les hommes en ont peu & deu auoir, nonobstant les tenebres de leur ignorance, & le trouble de leurs passions. Et enfin quels sont les moyens qui nous meinent à en auoir la possession, & quels font les objets de la connoissance des-

DE LA MORALE CHREST. quels ils dependent. Ce qui ayant esté ainsi traitté generalement, ie viens à considerer ces objets en particulier, & premierement ie parle de Dieu, non plus proprement comme il se manifestoit en l'estat de l'integrité de la nature; car cela a esté expliqué dans le volume precedent, & demeure, comme i'ay dit, pour immuable fondement de la Morale de l'homme: mais comme il luy a pleu de se reueler en sa Prouidence, en dispensant & en meslant par vne sagesse admirable, les demonstrations de sa clemence, & & l'exercice de ses iugemens. Et de cette consideration dependent les deuoirs de la Pieté, que l'home en l'estat auquel il est maintenant, a deu adjouster à ceux qu'exigeoit de luy l'innocence de la nature. L'autre obiet de la connoissance duquel depend celle des moyens de paruenir au souuerain bien, c'est le prochain, dans lequel ie considere d'abord l'inclination que nous auons naturellement à la societé; & des reflexions que i'y fais ie tire l'explication des deuoirs qui obli-Ccc iiij

776 SVITE DE LA DERN. PART. gent en cet égard les hommes les vns aux autres. Et parce que cette societé ne peut point subsister autrement que par l'entrenement de l'ordre, & que l'ordre n'y subsiste que par la conservation des relations de superieurs & d'inferieurs, & des deuoirs qui en resultent, ie m'attache premierement à l'explication de ces relations & de ces deuoirs en general, & puis de là ie viens à des instructions plus particulieres. Le discours donques vn peu amplement de la relation du mary & de la femme entr'eux, & sur les changemens ou les innouations que le peché y a apporté, ie leur donne des instructions sclonleur obligations reciproques. En suite ie passe à examiner l'estat de ceux qui sont comme absolument egaux entr'eux; (car dans la societé du mariage l'excellence d'vn fexe par dessus l'autre, empesche qu'il n'y ait vne entiere egalité,) & montre ce qu'ils se doiuent rendre mutuellement, pour s'acquitter des deuoirs que la societé leur demande. D'autant donc que cette egalité paroist

DE LA MORALE CHREST. principalement entre les citoyens d'vne mesme ville, quand ils n'y ont point d'autre qualité que celle de citoyens, ie fais vne particuliere reflexion sur cette relation là, & parce que c'est principalement la Iustice qui regne là, j'explique en cet endroit en quoy cette excellente vertu consiste. Puis l'ayant, selon la doctrine d'Aristote, distinguée en Distributiue & Commutatiue, dautant que la Distributiue ne s'é-xerce que par les personnes qui sont en degré de superieurs, ie m'arreste dans la consideration suiuante à examiner particulieremet en quoy la Commutative gift, & quelles sont les choses qui resultent de son exercice. La verité dans les paroles, la fidelité dans les promesses, la constance & la bonne foy dans les pactions volontaires & dans les conuentions, font vne partie de la Iustice, ouen sont le fondement. Ayant donc commencé à parler de cette vertu, pour n'en laisser pas l'explication imparfaite, ie traitte en suite detoutes ces choses, & monstre cobien elles contribuent à faire vn homme de

SVITE DE LA DERN. PART. bien & d'honneur. Et là se terminent les considerations de cette societé qui est renfermée dans la relation de citoyens: c'est pourquoy ie passe incontinent à vne autre, qui ne s'oublie iamais dans la Morale, & qui a quelque chose de beaucoup plus précis & de plus estroit, qui est celle de l'Amitié. Là donques ie m'estens vn peu à en distinguer les especes, & à rechercher quelle est la vraye; puis apres l'auoir rencontrée, & auoir establi son fondement en la Vertu, j'insiste assez long temps à la décrire, & à particulariser exactement & ses deuoirs & ses effets. Et parce que les choses contraires se donnent de la lumiere les vnes aux autres quand on les oppose entr'elles, & que d'ailleurs il y a certains droicts & certains deuoirs d'ennemy à ennemy, ie prensoccasion de là de parler de l'inimitié & de la haine, &de dire ce que ie pense de la façon de laquelle se doiuent comporter ceux qui ont entr'eux vne si triste & si importune relation. Enfin, comme la vertu est le fondement de la vraye Amitié,

DE LA MORALE CHREST. la vraye & propre cause de l'inimitié & de la haine c'est le Vice. C'est pourquoy, afin d'acheuer tout ce qui appartient à cette matiere, la derniere consideration de ce second volume de la Morale, traitte du vice & de la vertu du prochain, & des deuoirs ausquels la connoissance que nous en auons, nous oblige; & d'autant que soit qu'il foit ou vicieux ou vertueux, la prosperité & l'aduersité le nous presentent à confiderer sous des faces fort differentes; tout ce discours se termine par l'explication des choses que nous luy deuons ou que nous ne luy deuons pas, selon ces differends égards. Et là il est dit quelque chose de ce qu'Aristote appelle Nemesis, & les Latins Indignatio, & comment cette passion peut estre estimée ou recommandable ou vicieuse.

Cette partie de la Morale qui regarde l'estat de l'homme depuis le peché, bien que l'on n'y comprenne point encore ce que Dieu en a autrefois reuelé à Moyse, & ce qui en a esté particulieremet enseigné par Iesus Christ,

780 SVITE DE LA DERN. PART. embrasse tant de choses considerables, qu'vn volume de ceux que j'y auois destinés ne les a peu toutes contenir. Estant donc obligé d'en faire deux, & me proposant de traitter au commencement du second, des vertus intelle-Auelles, que ceux qui traittent l'Ethique n'oublient jamais, ie repasse d'abord vn peu sur la consideration de l'ame & de ses principales facultés, afin de me frayer le chemin à l'explication des habitudes qui seruent à perfectionner l'Entendement. Sur ce sujet ie parle premierement en general des vertus intellectuelles, & puis ie viens nommément à discourir de la Science, qui est vne matiere sur laquelle ie m'étens assés amplement. Car ie ne me contente pas de dire en quoy cette habitude consiste, ny de monstrer qu'elle est sa clarté & sa certitude contre la folie des Pyrrhoniens, & quels sont les vices qu'il faut éuiter en la recherchant. Parce qu'encore que la science, qui merite veritablement ce nom, soit vne chose parfaitement digne del'homme, & qu'il y ait de la brutalité à la mépri-

DE LA MORALE CHREST: 781 fer, si est-ce qu'il y en a quelques-vnes faussement ainsi appellées, dont l'acquisition est plus dommageable qu'vtile, & qu'entre celles mesmes qui sont vtiles il y peut auoir du chois, comme il faut garder certaine reigle & certaine moderation au desir de les posseder. Dans la continuation de ce propos, & dans vne consideration expressément destinée à cette matiere, ie parle de la Sagesse, & apres auoir expliqué qui sont ceux que l'on a premierement appellés sages, & d'où est venue cette denomination à cette excellente habitude de l'entendement humain, ie considere ses objets en general, & monstre combien cette vertu, à la regarder ainsi, est d'vne vaste étenduë. Et dautant que la Metaphysique porte ce nom de Sagesse comme par quelque espece de precipu, ie m'y attache puis apres plus particulierement, & reconnoissant qu'elle a des objets merueilleusement illustres & releués dans les Estres spirituels & intelligens, ie donne neantmoins à mes lecteurs quelques aduer782 SVITE DE LA DERN. PART. tissemens touchant l'inutilité de quelques questions qu'on y traitte ordinairement, & touchant la bizarrerie de la façon dont quelques Philosophes, & les Scholastiques nommément, se prennent à en donner l'ex-plication & la traditive. De là ie passe à la consideration de l'Art, & apres auoir dit en quoy il consiste, & declarémon sentiment touchant ceux qui font veritablement liberaux & dignes d'estre sçeus par tous, & ceux qui ne le sont pas, ie laisse cette matiere comme moins vtile dans l'Ethique, & m'estensà dire ce que c'est que la Prudence, quels sont les objets de son employ, quelle est la liaison qu'elle peut auoir auec les vertus morales, quel est son vsage & son efficace à les gous uerner, & enfin quels sont ses plus beaux efforts, & en quoy elle paroist principalement éclattante. Les vertus intellectuelles ainsi expliquées, (car quant à celle qu'Aristote appelle Intelligence, ic me contente d'en dire vn mot en l'explication des autres & comme en passant,) auant que de

DE LA MORALE CHREST. passer à la consideration des morales, ie traitte vne question importante & qui a de la difficulté: asçauoir, si cette sorte de vertus ont toutes leur siege dans cette partie de l'ame que lon nomme sensitiue, ou s'il y en a quelcune qui reside dans la volonté. Puis apres auoir monstré par bonnes raisons, au moins certes comme il me semble, qu'il y en a quelques vnes qui ne peuuent loger sinon dans l'appetit raisonnable, comme nommément l'amour de la verité, ie donne vn long chapitre tout entier à la consideration de cette vertu, & y traitte la question du mensonge officieux, & la resous autant qu'elle le doit estre dans cette dispensation, remettant à en dire plus précisément mon sentiment lors que ie seray arriué à cette partie de la Morale qui s'appelle proprement Chrestienne. Quoy donc, dira icy quelcun: Tu as donné deux volumes tous entiers à l'explication de la Morale de Christ, & te voicy à la conclusion du second, sans y auoir pourtant ouuert tes sentimens sur cette matiere. A

784 SVITE DE LA DERN. PART. quand differes-tu à la nous expliquer? As tu quelque chose de plus précis à nous dire dans quelque autre ouurage? A cela ie respons deux ou trois choses. La premiere est, que i'en ay encore parlé dans la Morale de Moyse, & que ce que l'en ay dit là sert à en expliquer mes sentimens. La seconde, que dans tout le cours de la Mo-rale de Christ l'ay tasché de respandre des enseignemens à la Pieté & à la Charité qui sont tels, que qui les pratiquera bien, de quelque condition qu'il soit, il ne manquera iamais d'auoir le mensonge en horreur autant que l'y doit auoir vn homme excellemment vertueux, & de faire paroistre vne ardente & inuariable amour de la verité en toutes occasions: tellement qu'en cet égard il n'a pas esté besoin de donner des instructions particulieres. Enfin, il y a quelquesfois des occurrences, où quoy que l'Euangile nous appelle à vne sainteté plus éminente que n'est celle dont la Natu-re nous donne les enseignemens, il nous permet pourtant de nous conduis

re

DE LA MORALE CHREST. 785 re selon les reigles de celle-cy, parce que les circonstances ne permettent pas que nous y suicions exactement les reigles de la perfection de la Gra-ce. Or le iugement de ces circonstances depend de la prudence Chrestienne de chaque particulier, & ne peut estre reiglé par des considerations generales. De certe question ie viens à celle de l'vsage de la verité quand il faut parler chacun de soy-mesme, soit à l'egard de nos vices, foit à l'egard de nos vertus. Et parce que c'est là proprement le lieu de traitter de la modestie, i'explique ensuite enquoy cette vertu consiste, & si c'est vne mesme chose auec ce qu'on nomme l'Humili-té: puis ie monstre en quoy consistent les vices qui luy sont opposés, & donne les preceptes necessaires pour s'en donner garde. Cela fait, ie passe à la consideration des autres belles qualités dont Aristote forme les gens d'honneur, & dautant qu'il semble que la Modestie à quelque chose d'opposé à la Magnanimité, comme ce Philosophe la descrit, de l'explication de l'vne

D dd

SVITE DE LA DERN. PART. ie prens occasion de parler de l'autre. Ie mets donc là, comme Aristote, le caractere d'vn Magnanime, parce que j'estime que cette vertu, aussi bien que les deux ou trois autres precedentes, a son siege dans la Volonté; puis ayant à passer à la consideration de celles qui resident en l'Appetit sensitif, & qui reiglent ses passions, ie traitte assezau long en general de la nature des Passions mesmes. Ie donne donc premierement vn chapitre à cette matiere; puis dans vn autre ie traitte la question si elles sont bonnes ou mauuaises, comment elles sont naturelles & comment elles ne le sont pas, & dispute contre les Stoiques qui les condamnent absolument, & qui disent qu'il les faut retrancher de nostre nature dés la racine. Cette difficulté estant démessée, ie viens au particulier, & traitte premierement de la Colere, qui est peut-estre la plus naturelle de toutes les Passions: & parce que tous les hommes y sont sujets, & que d'vn costé Aristote dic que c'est l'infirmité des honestes gens, & que de l'autre, quand on s'y laisse

DE LA MORALE CHREST. 787 trop emporter, elle produit des effets fort estranges & fort funestes, ie donne, s'il faut ainsi dire, l'essor à ma plume sur cette matiere, & me donne carriere dans vn si beau champ. Puis apresauoir dans vne conderation assés longue, parcouru tous les endroits & toutes les choses où cette passion se fait voir, ie m'étens encore dans vne autre à deduire les remedes qui servent à en corriger les excés, & découure les moyens dont il se faut seruir pour la reduiré à vne iuste moderation. A l'explication. de ce qui concerne cette passion, ie fais immediatement succeder celle do la Crainte, qui est vne autre passion merueilleusement naturelle à l'homme, & luy oppose l'Asseurance, qui est son legitime correctif. De là ie passe à la Honte & à l'Impudence, expliquant en quoy consiste ce qu'il y peur auoir de louable dans la premiere, & monstrantle vice de la seconde pour en imprimer de l'horreur. Viennent en suitte la Pitié, & la dureté de cœur, qui luy est directement opposée, & vne consideration toute entiere est

· Para Darke M. 788 SVITE DE LA DERN. PART. employée à l'examen de ce qu'il y a de bon & de mauuais dans ces qualitez. Et dautant que sur la fin du volume precedent le n'auois fait que toucher legerement la nature de la Nemesis où de l'Indignation, ie reprens cette matiere en cet endroit, & la traitte beaucoup plus à fonds, découurant quels en peuuent estre les legitimes motifs, & iusques où cette passion peut estre ou supportée ou mesmes louée dans la Morale. En consequence de cela ie viens à considerer quelle est la nature de l'Envie, & parce que c'est vn vice merueilleusement infame, & que toutes fortes de gens d'honneur doiuent auoir en vne extrême detestation, ie ne me contente pas d'en décrire la nature, comme ie fais des autres vices, mais à la façon de Theophraste forme le caractere d'vn Enuieux : & là ie tasche de le reuestir de toutes ses plumes, & de luy donner toutes ses couleurs. Puis à cause de l'affinité de la matiere, ie coule à l'Emulation, de laquelle j'explique les differences d'auecque l'Enuie, & monstre à quoy

DE LA MORALE CHREST. 789 elle est vtile, & en quoy on la peut louer. Et jusques-là toutes mes reflexions morales sont en telle façon generales, qu'elles ne mettent point de distinction entre les hommes selon la difference de leurs âges ny de leurs conditions. Parce donc que ces differences sont fort importantes en l'Ethique, ie conclus ce troisième Tome par la consideration' que j'en fais. Ie distingue premierement les hommes selon leurs âges, & parle en suite des mœurs des jeunes gens, & puis de celles des Vieillards. Puis apres ie discerne encore les hommes selon leurs conditions, & traitte des mœurs des Nobles, des Riches & de ceux qui sont en autorité, puis de celles des Ignobles, & des personnes priuées & de bas estat. Et au lieu que les reflexions qu'Aristote fait dans sa Rhetorique sur ces choses, seruent à former vn Orateur, ie les rapporte à former vn homme de bien & d'honneur, & termine ainsi dans ce Volume la seconde partiede la Morale.

La troisième est la Morale de Moyse, que le quatrieme volume contient. La

SVITE DE LA DERN. PART. ienem'arreste pas, comme i'ay fait dans les precedens, à traitter des facultés de l'ame de l'homme, parce que cette matiere est desormais assezéclaircie, & que la nature n'estoit pas autre entre les Iuifs qu'entre les Gentils. Mais apres vne petite Preface, qui donne à l'ordinaire quelque entrée dans la matiere, ie pose pour fondement des meditations suivantes, la description du souuerain bien, tel que Moyse la reuelé. Et là ie monstre de combien cette reuelation a esté plus excellente que les precedentes, & combien les Israëlites yont eu d'auantage par dessus les autres nations. Et dautant que leur auantage n'a pas seulement consisté en la constitution de la fin, mais aussi en la declaration des moyens necessaires pour y paruenir, ie les propose dans la consideration suivate, tels que Moyse les enseigne, & mets'à la teste de l'explication que j'en donne, celle de la nature de la Foy. Car dautant que la Foy ne se produit que par la Parole de Dieu, & que d'entre tous les peuples de la terre les seuls Juifs, auant l'adue-

DE LA MORALE CHREST. nement de Christ, ont esté honorés de sa predication, j'ay reserué à parler de cette diuine habitude là, quand ie ferois venu à cette dispensation qui en a mis en auant l'objet & la cause. En suite de cela, selon ma methode accoustumée, de parler de la Pieté enuers Dieu auant que de traitter des autres vertus, incontinent apres auoir parlé de la Foy, qui est la source d'où elles coulent, ie passe à la consideration de la Pieté, qui est le premier & le plus noble de ses ruisseaux. Ic comprens donc premierement dans vn chapitre toute celle qui est contenuë dans les quatre Commandemens de la premiere Table, & nem'y arreste pas long-temps, parce qu'ils ont esté examinez dans les Difcours precedens: & puis, dautant que dans toute cette Economie de Moyse, il ya plusieurs doctrines Euangeliques meslées, qui sont éparses dans l'Alliance dont il estoit mediateur, j'examine quelle a deu estre la pieté des Anciens en cet égard, comme vne chose absolument necessaire & qui ne se pouuoit passer sous silence. Toute cette dispen-

Ddd iiij

SVITE DE LA DERN. PART. sation estoit pleine de ceremonies; & vne grande partie consistoit alors en leur observation. Et iene les épluche pastoutes, parce que cela fust allé à l'infini. Mais j'en choisis les principales, dont j'explique premierement la nature, puis j'en declare briefuement les raisons typiques, & enfin ie découure les motifs à la pieté qu'elles contenoient. Parce donc que le Sabbat a-! uoit quelque fondement dans l'institution de la Nature, ce que la pluspart! des autres n'auoient pas ; qu'il estoit: consacré entre les Commandemens de la Loy Morale, ce que les attres n'étoier pas; & que son observation estoit d'vne rigueur & d'vne austerité extraordinaire, ie l'explique le premier, & monstre en quoy il a peu seruir à la Pieté. Apres auoir fait en suite quelques considerations generales sur les autres ceremonies, & sur le fruit de pieté qui s'en pouvoit recueillir, ie me! restrains dans le chapitre suiuant a cause de leur multitude, aux sacrisices, aux laucmens, aux parfuns, & aux festes solennelles, que j'examine aussi parti-

DE LA MORALE CHREST. 793 culierement les vnes apres les autres, & en explique les raisons, les mysteres, & les vsages, auec autant d'exactitude que le dessein general de mon Ouurage le pouuoit souffrir. Mais ie donne en suite vn chapitre à part à deux ceremonies Iudaiques dans lesquelles il y auoit quelque chose de particulier, asçauoir la Circoncisson & l'Agneau de la Pasque, dont l'vne se pratiquoit vne seule seule fois en. la vie, & l'autre se reiteroit d'an en an. le monstre donc quelle a esté leur raison typique, & quelleur vsage sacramentel, & de quelle vtilité elles pouuoyent estre en ce qui touchoit la pieré enuers Dieu. Cela fait, bien que les principaux motifs de la Pieté des Anciens, en ce qui touchoit les choses sensibles, estoyent contenus dans les ceremonies expliquées dans les chapitres precedens, ie ne laisse pas d'en employer encore vn à la consideration de quelques autres choses lesquelles y pouuoient contri-buer, comme estoit la magnificence du Tabernacle, l'ordre de son seruice

794 SVITE DF LA DERN. PART. & de sa musique, la splendeur des mi? racles que Dieu faisoit de temps en temps, les rayons de l'Eprit de Prophetie dont cette dispensation estoit éclairée, & quelques autres telles merueilles, qui estoient capables de donner à l'ame de vehementes emotions. Puis de là ie viens à la consideration des vœux & des jeusnes, esquels consistoit vne partie de l'exercice de la deuotion des Israëlites, & de la pratique de leur Religion. Comme i'estois sur cette meditation il y atantost trois ans, il m'arriua vn accident qui me donna l'occasion de traitter de la Patience des Anciens fideles, & de passer ainsi de la consideration de leur pieté à celle de leurs autres vertus. Et bien que l'occasion m'en fust merueilleusemet douloureuse, la meditation neantmoins m'en fut tres-vtile; & cette transition d'vne matiere à l'autre estoit fort propre & fort conuenable, parce qu'encore que la patience puisse estre cotée entre les vertus morales, si est-ce que les vrais motifs en sont dans ceux qui produisent la pieté. le les explique

DE LA MORALE CHREST. donques là fort particulierement, & mesmes j'en prens occasion de traitter de quelques preceptes meslés, par les-quels Moyse a autre sois formé les Israë-lites à la pieté & à la charité tout ensemble, comme estoient ceux qui concernoient la vie & la conuersation des Sacrificateurs, & quelques autres choses semblables, qui sont contenuës dans vn chapitre particulier. Et de là enfin ie viens à l'examen des motifs qui portoient les Israëlites à la Charité, enrant que c'est vne vertu que l'on peut considerer à part de la pieté, & dans les relations toutes pures que nous auons auec nos prochains. l'examine donc encore vne fois le premier Commandement de la seconde Table, pour voir ce qu'il contenoit de particulier à l'égard des Iuifs. En suite j'examine le second, & fais voir pareillement en quoy consistoit son observation à l'égard de la nation Iudaïque. Parce qu'elle auoit certaines loix politiques qui luy estoient particulieres sur la matiere du meurtre qui est defendu dans ce Commandement là. Et ainsi conse-

796 SVITE DE LA DERN. PART. cutiuement ie donne à la consideration de tous les Commandemens suiuans, à chacun vn chapitre particulier, afin dene rien laisser en arriere de ce qui pouuoit seruir à la charité des Iuifs, & mesmes contribuer à la nostre. le parcours donques toutes les choses esquelles les hommes pechent contre la Pudicité. le fais vne longue deduction de toutes celles qui peuuent approcher de la nature du larcin. Je fais vne anatomie assez particuliere de la Calomnie & de ses diuerses especes, & m'étens sur la defense qui concerne le faux témoignage, comme absolument necessaire à la conservation de la societé. Mais neantmoins ie ne m'épuise pas là, & reserue d'autres choses sur cette matiere. Enfin, ie fais sur la Convoitise, & sur ses emotions & naturelles & vicieuses, & sur la nature & l'étenduë du Commandement qui la concerne, diuerses reflexions que je n'auois point encore faites dans les volumes precedens. Là j'eusse peut-estre peu finir la Morale de Moyse. Neantmoins, tous ces preceptes estans gene-

DE LA MORALE CHREST. 797 raux, j'ay creu que pour la rendre plus complette, ilestoit necessaire d'y adjoû, ter diuerses instructions particulieres, qui se tirent des liures de ce grand Prophete, & des autres qui l'ont suiui. Ie donne donc premierement vn chapitre tout entier à la consideration des enseignemens que Moyse auoit donnés aux Israëlites touchant la charité qu'ils devoient exercer enuers les poures & les estrangers. Car la Morale & la Politique de cette nation auoit quelque chose de singulier pour cela; mais dont pourtant les Chrestiens peuuent tirer des instructions. Et d'autant que dans cette Loy il y auoit encore diuerses constitutions qui cocernoient les passans, les mercenaires, les esclaues, & quelques autres personnes semblables, qui faisoient aussi vne partie de l'objet de la Charité, ie n'ay pas creu deuoir laisser ces enseignemens en arriere, & ay employé vn chapitre à les debiter. It semble qu'il n'y ait rien de si opposé que la charité & la guerre : & neantmoins Moyse auoit trouué le moyen de les accorder. C'est pourquoy

798 SVITE DE LA DERN. PART apres auoir formé l'vne, il afallu venir àl'autre, & examiner les ordonnances par lesquelles ce grand Prophete la regle, pour ne détruire pas la premiere,& afin qu'elles peussent copatir ensemble aux occasions. Ie donne donc à cela vne consideration, pour seruir en quelque sorte de tablature à ceux qui sont autorisez de par Dieu, forcés par la necessité, & appellez par leur vocation à prendre les armes. Et puis cela fait, ie parle dans vn autre chapitre, de la vertu militaire des Anciens, & montre en quoy elle s'accordoit, & en quoy elle ne s'accordoit pas auec la Vaillance décrite par les Philosophes. A cette occasion, parce qu'encore que la vertu Heroïque s'étende à plusieurs sortes d'objets, si est-ce qu'elle est beaucoup plus illustre dans les actions militaires qu'elle n'est ailleurs, & que ie n'auois point encore expliqué dans les volumes precedens en quoy elle consiste, ie le dis en cet endroit, & remplis toute vne consideration de la vertu Heroïque des Anciens fidelles, & en produis quelques exéples que le Vieux

DE LA MORALE CHREST. 799 Testament nous fournit. Puis apres auoir parlé de la Magnificence, matiere que ie n'auois point encore traittée, & fait voir, nommément en Salomon, en quoy celle des Anciens Iuifs a confisté, j'acheue par vne reflexion fouuerainement importante, touchant l'efficace par laquelle les Anciens fidelles ont esté rendus capables de la Pieté & de toutes les autres vertus. Car ie dis que les Iuifs deuant estre considerez ou comme hommes, ou comme Iuifs, ou comme fidelles, il a fallu necessairement que Dieu, pour rendre ses instructions efficaces, ce qu'elles n'auroient peu estre autrement, ait déployé en eux quelque vertu de sa Prouidence, de l'Esprit de seruitude, & de son Esprit d'adoption & de sanctification, selon ces differentes relations, & selon les diuers degrez & les diuerses mesures qu'il luy a pleu donner à sa Grace ..

Adam, Aristote, Moyse, sont ceux qui commencent & qui continuënt ma Morale; mais elle est acheuée par nostre Seigneur Iesus Christ. Car c'est 800 SVITE DE LA DERN. PART. de ses enseignemens que ie donne la perfection à cet ouurage, & que ie tire la plenitude des deuoirs d'vn homme de bien. l'entre donques premierement dans cette derniere partie par vne Preface, où apres auoir parlé du souuerain bien, selon la description que l'Euangile nous en donne, ie fais quelques considerations qui lient en quelque sorte ce volume auec les precedens: & parce que les vertus Chrestiennes, aussi bien que les Philosophi-ques, peuvent estre distinguées en Intellectuelles & Morales, ie suppose dansle premier chapitre qu'il faut faire cette distinction, & traite premierement des habitudes de l'Entédement. Or le Nouveau Testament nous en fait voir de deux sortes: dont les vnes ont cours pendant tout le temps du Christianisme, & les autres n'ont eu d'vsage que dans ses commencemens. le traitte donc d'abord ces dernieres selon que S. Paul nous en a fait le denombrement, & dis ce que c'est que la Sapience, la Connoissance, la Foy, entant qu'elle auoit quelque chose d'extraordinaire,

DE LA MORALE CHREST. 801 ordinaire, & les autres choses de cette nature, qui dans la naissance de l'Église donnoient de l'admiration. De là ie passe à l'examen de cette vertu de l'Intellect que S. Paul appelle Science, qui consiste en l'intelligence des mysteres de la religion Chrestienne, & qui comme elle a des objets fort differens, aussi a-t-elle diuers degrez, tant en ce qui est de son estenduë, qu'en ce qui touche la profondeur & l'éuidence de sa persuasion. le fais donc diuerses applications d'esprit là dessus, & puis ie viens à la consideration de la Prudence Chrestienne, dont le décris autant que ie puis exactement l'étenduë & les differentesoperations. Car c'est vn champ fertile en pensées, & extraordinairement vtile en instructions. Mais la vertu qui vient apres n'y est pas moins abondante. Les Theologiens font de quatre fortes de foy; l'Historique; celle des Miracless celle qui n'est qu'à temps, & la vraye qui nous obtient la Iustification. Mais ie ne m'arreste pas aux trois premieres, parce que l'on peur assez entendre quelle est leur nature

Eec

802 SVITE DE LA DERN. PART. par les discours precedens: & ie m'étens seulement en la deduction des choses qui concernent la derniere, comme estant incomparablement plus necessaire & plus excellente, & partant aussi plus digne d'vne attentiue consideration. Et dautant qu'elle a deux vsages generaux, l'vn Theologique & l'autre moral, ie laisse le premier en arriere, parce qu'il n'est pas proprement de ma matiere, & insiste sur le fecond. Iele considere donc premierement en diuers égards, & puis ie viens apres, dans vn chapitre particulier, à l'examen du plus vtile des effets qu'elle peut produire dans la Morale Chrestienne, qui est la Confiance que nous deuons auoir en Dieu. En quoy ie conduis l'esprit du Chrestien par tous les endroits où cette vertuluy est necessaire, pour en remporter les fruicks auec vne finguliere consolation. La Foy, la Confiance, & l'Esperance ont tant. d'affinité entr'elles, que souuent elles se prennét pour vne mesme chose en l'Ecriture, & qu'elles s'y appellent I'vn mesme nom. C'est pourquoy il

DE LA MORALE CHREST. 803 n'a pas fallu plus long temps remettre à parler de l'Esperance, apres auoir expliqué en quoy consiste tant la Con-siance que la Foy. Ie luy donne donc aussi en suite vn chapitre exprés, & monstre en quoy elle est plus excellente quel'Esperance dont la Philosophie Morale a accoustumé de faire vn traitté. Or est il bien vray que dans la pratique de ces vertus, est non pas seulement la racine, mais encore mesme l'exercice de la Pieté Chrestienne, de sorte qu'il eust peu sembler qu'il n'eust pas esté necessaire d'en rien dire plus expressément. Mais neantmoins ie ne me contente pas de l'auoir regardée par ce visage, & me propose de la presenter à contempler à mes lecteurs en diuers autres égards. le traitte donc premierement en general de la Pieté des Chrestiens; & dautant que les excercices où on la pratique sont publics ou particuliers, ie la considere premierement dans les publics; où elle se manifeste au dehors en actions qui frappent les sens, & où les fidelles font voir leur sainte

804 SVITE DE LA DERN. PART. communion, & l'vnité de leur Foy, de leur religion, & de leur esperance. Dans la consideration suivante ie continuë le mesme propos, & venant à des meditations vn peu plus particulieres, l'explique quelle est la Pieré que les Chrestiens doiuent faire paroistre en l'ouïe de la predication & de la lecture de la Parole de Dieu, tant en ce qui est de la disposition interieure de l'esprit, que des gestes & des contenances exterieures. Vne partie du culte diuin consiste en la celebration des Sacremens, dont ie definis le nombre selon la creance de la Communion dans laquelle ie suis, & apres auoir, autant que ie l'ay creu necessaire, expliqué quelle est leur nature & la force de leur institution, ie traicte de leur vsage, & de la maniere en laquelle on y doit participer pour s'acquitter comme il faut des deuoirs de la Pieté. Et parce que ce Culte public se rend à Dieu à certains iours & à certaines heures determinées, & nommément que selon l'institution des Apostres, le Dimanche y

DE LA MORALE CHREST. 805 est singulierement employé: ie donne bien quelques enseignemens touchant les autres iours que l'on y confacre sur semaine; mais ie m'estens exactement en la deduction des choses qui sont necessaires pour bien sanctifier le iour du repos. Sur quoy ie traitte quelques questions qui ne sont pas inutiles, & de la decision desquelles on a besoin en ce temps. Des exercices publics de la Pieté ie viens aux particuliers, qui consistent principalement en la Priere, au chant des Pseaumes, & en la lecture & meditation de la Parole de Dieu, qui ont certaines heures reiglées pour les familles & pour les personnes qui les composent, auecque les pieux mouuemens de l'ame qui peuuent & qui doi-uent naistre en vne infinité d'occasions. Encore donques que les choses que i'ay dites sur ces matieres dans les considerations precedentes, y ayent beaucoup donné d'eclaircissement, ie ne laisse pas pourtant de m'y arrester encore icy, autant que ie l'ay iugé expedient pour l'instruction de ceux qui

806 SVITE DE LA DER N. PART. veulent vacquer à ces actes priués de la Pieté, à l'edification & à la consolation de leurs consciences. Et parce que soit en public soit en particulier que nous pratiquions nostre pieté, elle doit estre pure, & feruente, & vehemente, & constante, à proportion de l'excellence des motifs par lesquels nous y sommes portés selon l'Euangile de Christ, ie fais en cet endroit en quelque sorte vn effort extraordinaire de mon esprit, pour expliquer quels sont ces motifs & quelle doit estre leur efficace. l'employe donc trois considerations consecutiues à parcourir toutes les plus belles parties de l'Euangile, & tous les principaux dogmes qui esleuent la Religion de Christ au dessus de la Mosaique, & de toutes les connoissances que Dieu auoit reuelées aux hommes dans les autres dispensations; & de-là le tire quantité d'instructions à la Pieté, qui, si nous sommes veritablement Chrestiens, doiuent faire vne merueilleuse impression sur nous, & porter nostre pieté à vn aussi haut

DE LA MORALE CHREST. 807 point par dessus celle des Anciens, que la lumiere obscure & imparfaite de leur reuelation, a esté surmontée par la merueilleuse splendeur de la nostre, De cette esleuation d'esprit, ie redescens puis apres vn peu à la consideration du prochain & de la charité que nous luy deuons, & specialement de celle par laquelle les Chrestiens se doiuent embrasser les vns les autres. Ie discours premierement de la charité des Chrestiens en general; & parce que le nom de prochain enueloppe vniuersellement tous les hommesde quelque codition qu'ils soient, j'explique qu'elle doit estre nostre amour enuers les Payens, enuers les Turs, enuers les Iuifs, enuers les diuerses especes de mauuais Chrestiens, & puis enfin enuers les bons, sur qui nostre charité se doit porter auec vne tendresse & vneardeur tout à fait extraordinaire. De là ie viens à particulariser ses deuoirs selon les diuerses relations sous lesquelles les hommess'entreconsiderent, & premierement ie monstre quelle elle doit estre dans la Eee iiii

808 SVITE DF LA DERN. PART. relation d'inferieurs à superieurs, & m'étens singulierement à recommander & à expliquer les enseignemens que les Apostres nous ont donnés tou-chant nostre sujetion à l'autorité des Puissances. Puis en suivant l'ordre de la nature des choses & des commandemens de la Loy de Dieu, ie traitte des deuoirs du Chrestien en ce qui regarde la conservation de la vie du prochain, selon que la Religion de Christ adiouste quelque chose de considerable au poids des reuelations & des Dispensations precedentes. Ie sui la mesme methode au troisiéme commandement, & monstre comment l'Euangile aen horreur toutes sortes d'impuretés, & comment il appelle ses deuots à vne admirable netteté de vie. D'vn mesme train ie passe au quatriéme Commadement, & monstre ce que l'Euangile de nostre Seigneur a adiousté à l'exactitude de la Iustice & de la Charité qui regarde la conseruation du bien du prochain, non seulement pour ne luy faire point de tort, mais encore pour éuiter jusques aux soupçons de vouloir rien at-

DE LA MORALE CHREST. 809 tenter à son prejudice. Vient en suite le cinquiesme Commandement, qui concerne le soin que nous de uons auoir de sa reputation, où ie reprens la description de la Calomnie, que j'auois commencée & comme ébauchée ailleurs, & que ie tasche de representer dans son air le plus effroyable. Que s'il semble que ie m'emporte vn peu dans l'inuectiue que ie fais contre elle en cet endroit, ce n'est pas pour l'interest que i'y ay en ce qu'elle m'a persecuté, mais parce que j'en ay voulu imprimer l'horreur dans toutessortes de bonnes ames. Le sixiesme Commandement, qui concerne la Conuoitise, a aussi sa place en ces Considerations, & ce dautant plus qu'il est conuenable au Chrestien d'auoir jusques au fond l'ame nette de toutes mauuaises dispositions, & de ne sentir pas en ses appetits les moindres emotions qui contreuiennent à l'excellence de l'Euangile. C'est pourquoy ie fais encore là quelques reflexions sur ce Commandement que ie n'auois pas faites ailleurs, & qui conviennent particulierement à cette

Sio Svite de la dern. Part. Dispensation Euangelique. Enfin, ce cinquiéme Volume de la Morale estant paruenu à sa iuste grosseur, ie le ferme par vn chapitre où ie traitte de la Charité Heroïque des Chrestiens, & où distinguant cette vertu en certains degrés, ie l'ameine à ce haut point de perfection où S. Paul l'a portée en quelques occasions, comme quad il a desiré d'estre fait anathême pour ses freres se-lon la chair, en quoy ie la trouue quant

à moy tout à fait inimitable.

Ces enseignemens que j'ay tirez de la conoissance du Christianisme, pourroient sussine à regler la vie de toutes sortes de personnes, de quelque condition qu'elles soient, si leurs esprits en estoient solidement & prosondement imbus. Car comme encore qu'vn homme ne se seruist que d'vn aliment fort simple, il ne laisseroit pas de s'en faire assimilation à toutes les parties du corps, à chacune selon sa naturelle constitution; tellemement que quelque disserence qu'il y ait entre la chair & les os, les visceres & les arteres, les mouelles & les ners, elles ne laisse-

DE LA MORALE CHREST. roient pas d'en tirer tout ce qui leur seroit necessaire pour entretenir chacune son estre & conseruer sa vigueur: Ainsi la bonne conscience de chaque Chrestien s'approprieroit si bien ces preceptes vniuersels, que quelque diuersité qu'il y ait entre leurs conditions, le corps de l'Eglise en sentiroit l'efficace & la vertu en tous ses membres. Neantmoins i'ay creu que pour rendrecette Morale plus acheuée, ie deuois distribuer les Chrestiens en diuerses classes, & leur appliquer à chacune les choses qui leur conuiendroient. C'est à cela que ce sixiesme Volume est destiné, & le dessein en est expliqué dans la Preface. Sur le plan que j'y en ay mis, ie commence par la description des deuoirs d'vn Ministre de l'Euangile, & les explique si exactement & parle menu, que pour ce qui regarde sa vocatio, tant en ce qu'il y a d'interieur & d'exterieur, d'ordinaire & d'extraordinaire, qu'en ce qui touche les fonctions publiques de sa Charge, & les bons offices qu'il doit à ses brebis en particulier; ie croy n'y

812 SVITE DE LA DERN. PART. auoir rien oublié de ce qui y est absolument necessaire. Et dautant que les bons exemples sont efficaces en toutes conditions, & qu'ils sont particulierement requis en celle d'vn Pasteur, pour rendre son ministere vtile & d'edification, ie donne puis apres vn chapitre tout entier à la consideration des qualités que S. Paul requiert en l'Euesque, dont ie forme vne telle idée, & l'illustre de tels exemples, qu'il me semble que pour paruenir à la perfeation dont l'infirmité humaine est capable, il ne faut que s'y conformer. C'est pourquoy iene suisnysi long ny si exact dans le chapitre suiuant où sont contenus les devoirs des autres Ministres de la Religion Chrestienne, asçauoir les Diacres & les Anciens, parce que l'Apostre requiert à peu prés mesmes vertus dans les vns & dans les autres, & que d'ailleurs, bien qu'il n'y ait rien de petit dans le Ministere de l'Eglise, si est-ce que celuy des Pasteurs est in comparablement plus considerable & plus important. La seconde classe d'hommes à qui j'ay destiné les

DE LA MORALE CHREST. enseignemens du dernier Volume de cette Morale, sont les Nobles, dont il y a de differentes façons. Mais la premiere que ie considere sont les Nobles de naissance, & qui suivent la vie militaire, dont ie fais diuers degrés. Car ie parle premierement de la noblesse des Souuerains, & puis de celle des Princes issus de Souuerains à la verité, mais qui neantmoins eux-mesmes ne le sont pas; & puis de celle des grands Seigneurs qui ne sont pas Princes: & puis de celle des Gentils-hommes qualifiés, mais vassaux de ces grads Seigneurs; & enfin de celle des simples Gentils-hommes, qui n'ont rien que cette naissance qui les éleue sur le commun: & à chacun ie distribue les enseignemens du Christianisme, selon que l'ay creu qu'ils conuenoient à leurs conditions. De là ie passe à ceux qui font nobles par leurs Charges, & m'arreste particulierement à la consideration de ceux à qui les Puissances souueraines attribuent iurisdiction pour iendre la iustice à leurs sujets. Et de ceux-là j'explique les deuoirs assez

S14 SVITE DE LA DERN. PART. au long, tant à l'égard des Sou-uerains de qui ils tiennent leur puif-fance, qu'à l'égard des inferieurs sur qui ils la doiuent exercer. Et dau-tant que les differens dont ils iugent, font fort divers, & que d'ailleurs l'administration de ce pouvoir est de singulierement grande importance, parce que les luges ont les biens, & l'honneur, & la vie des hommes entre les mains, j'infiste sur leurs deuoirs, pour ne rien oublier de ce qui les touche. Puis par occasion ie parle des Aduocats & des Procureurs, & fais diuerses considerations sur leurs fonctions & sur leur conduite. Le chapitre qui vient apres dit en son tiltre qu'il parlera de la richesse des Nobles, & de la noblesse des Riches, parce qu'il y a des gens nobles d'extraction à qui Dieu a donné de fort grands biens quand & quand & d'autres à qui Dieu a fait acquerir de si grands biens, qu'encore qu'il n'y ait du tout rien d'illustre en leur exstraction, si est ce que leurs richesses les fonten quelque sorte passer pour Nobles. Les deuoirs Chrestiens de ceux-là

DE LA MORALE CHREST. SIC en l'vsage de leurs richesses, ont quelque chose de comun, & quelque chose de particulier, & c'est à les leur assigner que cette consideration est employée. le viens apres à considerer la condition de ceux qui sont de profession à faire la guerre, soit de leur chef, comme les Souuerains, soit par l'ordre des Souuerains, comme les Generaux d'armée, les Capitaines, & les autres Officiers, auec la soldatesque. Et auant toute chose, ie donne cet aduertissement aux Souuerains qui font profession du nom de Christ, que soit qu'ils fassent la guerre en attaquant ou en defendant, le Christianisme les oblige tres-étroittement à n'en entreprendre point que pour des causes tres-justes & tres-necessaires. Parce qu'il y a vne si grande antipathie entre la guerre & la Charité de Christ, que sans cela elles seroient absolument incompatibles. En suite du deuoir des Souuerains, ie traitte de celuy des Generaux à qui ils commettent la conduite de leurs armées. Car apres auoir expliqué iusques où vn sujet doit prendre la.

816 SVITE DE LA DERN. PART. liberté de juger des causes de la guerro entreprise ou soustenuë par son Souuerain, pour receuoir en bonne conscience le commandemeot de ses armées quand il luy est deferé, ie monstre quelle doit estre sa fidelité, son zele, sa vigilance, son exactitude à faire observer la Discipline militaire à ses gens, & sa Pieté à procurer que le seruice de Dieu soit soigneusement pratiqué parmy ses troupes. Et parce que le succés des batailles est hasardeux & different, j'adiouste pour la fin de cette consideration, comment vn General d'armée se doit comporter, tant dans les disgraces qui luy peuuent arriuer, qu'en l'vsage des victoires que Dieu luy enuoye. Les Gouvernemens des Provinces & des places, sont des Charges militaires, c'est pourquoy ie range les enseignemens qui les concernent à la suite des precedens. Ie discours donc dans le commencement d'vn chapitre destiné à cette meditation, tant de leur deuoir enuers le Prince qui les establit, qu'enuers les peuples qu'ils gouvernet, soit que ces peuples

DE LA MORALE CHREST. 817 ples viuent en concorde, ou qu'ils se diuisent entr'eux, & qu'il faille iuger de leurs differens. En suite de quoy j'employe le reste de ce chapitre à monstrer aux autres Officiers de Milice comment ils sont obligés de fournir de bons exemples à la Soldatesque, de laquelle ie prens occasion de deplorer la corruption, & de dire quelque chose des moyens qu'il faudroit suiure pour y restablir l'amour de la pieté & de la vertu. Selon la disposition quo j'ay donnée aux diverses conditions des personnes de qui j'auois à parler en ce dernier Volume icy, ceux qui seruent à la Medecine, en quelque qualité que ce soit, viennent icy sur les rangs. le parle donc premierement au chapitre suiuant, de la Medecine en general; puis ie dis quelque chose d'Hippocrate, & des preceptes qu'il a donnés aux Medecins: & enfin, io distingue d'auec eux les Chirurgiens & les Apoticaires, & leur donne à tous les aduertissemens que j'ay estimé leur conuenir. Sur tout ie les exhorte à la pieté & à la generosité, & tasche de

Fff

818 SVITE DE LA DERN. PART. leur imprimer les sentimens de la charité que requiert l'exercice d'vn si bel art & si vtile aux hommes qu'est la Medecine. Enfin, les Marchands, les Artisans, & les Laboureurs, sont ceux qui mettent la closture à cet Ouurage. Quantaux Marchands, apres auoir dit quelque chose des mauuaises façons de faire dont le Christianisme veut qu'ils s'abstiennent, ie leur donne les aduertissemens de ce qu'ils sont obligés de faire selon les differens succés qu'il plaist à la Prouidence de leur donner. Car s'il arriue du desordre dans leurs affaires, cette mauuaise conjoncture requiert qu'ils se monstrent de bonne foy. Et si Dieu les a benits, la religion Chrestienne veut qu'ils vsent genereusement & charitablement des fruicts de la benediction qu'il a épanduë sur leur negoce. Pour ce qui est des Artisans qui sont proprement ainsi nommés, la loyauté, la vigilance, l'ab-

stinence de la débauche, contiennent presque tous les deuoirs que ma Morale exige d'eux: & pour la fin, ce qui y concerne les Laboureurs consiste

DE LA MORALE CHREST. 819 principalement en l'abstinence de l'yurongnerie, en la fidelité de leur conduite, & à corriger en eux cette humeur naturellement contentieuse & chicaneuse, qui leur fait consumer leur temps & leur argent à la poursuite de leurs procés. Voila en gros le contenu d'vn Ouurage duquel ie ne sçaurois deuiner quelle sera l'vtilité. Si les autres en retirent autant de salecture, que j'en ay recueilly de sa meditation, ce ne sera pas sans fruit qu'ils y donnerot de bonnes heures. Car j'auouë que l'application d'esprit que i'ay apportée à cette Composition m'a beaucoup serui. Outre la varieté des choses qui se sont presentées à ma pensée dans ces quatre Dispensations que j'ay considerées l'vne apres l'autre, & que ie n'ay peu enuisager qu'auecque beaucoup de contentement, j'y ay trouué mille fois les occasions de faire reflexion sur moymesme, & de rapporter les enseignemens que j'ay voulu donner aux autres à ma propre instruction. De sorté qu'en cet égard ie n'ay point de sujet de me repetit d'auoir employétant de temps

820 SVITE DE LA DERN. PART. à l'explicatio de cette matiere. Et parce que quant à ce quiest de la Nature, tous les hommes se ressemblent; que la cor-ruption du Peché est égale en tous si Dieu ne la corrige par son Esprit; que les instructions qui se tirent du Vieux Testament, appartiennent egalement à tous ceux qui en pequent auoir la le-Aure: & que pour ce qui est du Nouueau, nous viuous tous desormais sous vne mesme Dispensation de l'Euangile de Christ; quiconque ap-portera quelque attention à la lecture de cet Escrit, n'aura pas, comme l'espere, sujet de s'en repentir non plus, puis qu'il y a le chemin ouuert à vacquer aux mesmes contemplations, & à puiser des mesmes sources. Et comme ie sçay qu'il y en a grand nombre qui ont le genie plus grand & plus pene-trant que moy, & qui d'ailleurs ont plus de temps à donner à ces belles meditations, ie ne doute pas aussi qu'il n'y en puisse auoir beaucoup qui porteront leurs pensées plus auant, & qui adiousterontà cette nouvelle forme que i'ay donnée à la Morale, des ornemens

DE LA MORALE CHREST. agreables, & de bonnes observations, quin'ont pas peu me venir ny dans l'efprit ny sous la plume. Or tant s'en faut que ceux qui s'y employeront apres moy, me facent quelque déplaisir s'ils entreprennent d'enrichir cette diuine matiere, & dela rendre plus vtile & plus attrayante que ie n'ay fait, que ie voudrois de tout mon cœur que mon Ouurage ne fust plus, & que quelque autre plus parfait & plus auantageux eust pris sa place. Dieu vueille mettre au cœur de ses seruireurs d'y donner vne bonno partie de leur trauail: & cependant ie le supplie de toutes mes affections qu'il luy plaise d'épadre sa sainte benedictio sur le mien, pour le rendre efficacieux à l'amendemet de ce siecle. C'est vne chose deplorable que non seulemet les mœurs y soient si corropuës, mais mesmes que la doctrine de la Morale y soit si horriblement deprauée par quelques vns, que neantmoins le nom de Iesus qu'ils portet, & la professió du Christianisme qu'ils font, deuroit particulierement obliger à en pratiquer les preceptes & à en conseruer la pureté. Quant Fff iii

822 SVITE DE LA DERN. PART. à ceux de nostre profession, cet Ouurage témoignera quels en sont leurs sentimens: Dieu nous vueille faire la grace à tous que nostre conversation y soit conforme. Cependant, graces immorrelles luy soient rendues de ce qu'ilm'a donné de mettre la derniere main à ce dessein, Amen.

FIN.

ERRATA.

Page 15. lin. 3. offacez deux, pag 21. lin. 13. lifez, le plus noble. pag. 24. lin. 3. lifez, Apollon. pag 31. lin. 4. lifez, recueillir. pag. 39. lin 14. lifez, se demester des actions. pag. 88. lin 20 lifez, commis. pag. 110. lin 4. & s. lifez & l'Eglise. p. 131. lin. derniere, lifez, d'autrespag. 155. lin. premiere, lifez, de Cornaro. p.190 lin. 21. lifez, aiment moins. pag. 233 lin. 7. lifez, fouuiendra. pag. 240. lin. 10 lifez, de desapprendre pag. 271. lin. 14 lifez, censures. pag. 295. lin. 24. lifez, vieil pag. 338. lin. 20 lifez, de nostre Seigneur. pag. 346. lin. 5. & 6. lifez, conserue.pag.349. lin. dern. lifez, qu'entre celles. pag 367, lin 10. lifez, la race. pag. 409. lin 10. lifez, à sa nourriture & à celle de. pag. 413 lin. 13. lifez, peuuent, & lin. 14. lifez, humeur. pag. 497 lin. 24. li/ez, ailes d'aigle. pag 523- lin. 2. lifez , aucuns. pag pag. 555. lin. 22. lisez, pour la guerre. pag. 580. lig. 18: lisez. qui les composent. pag. 188. lin. 15. lifez, & failant. pag. 594 lin.22. lifez, on les massacre. pag. 620. lin.23. lifeze reprimer. pag 664. lin. r. lifez, à moy. pag. 744. lin. Mr. lilez , attachant trop.

KAKKKKKKKKKKKKKKKK

TABLE DES CHAPITRES.

PREFACE. Du devoir d'vn gile, selon le	page 3.
Du deuoir d'vn	Ministre de l'Euan-
gile, selon l	es preceptes du Chri-
	pag. 30.
Du bon exemple que	les Pasteurs doinent
	hoses. pag. 132.
Du deuoir des autres	
stianisme, asçauoir	des Anciens & des
Diacres.	pag. 250.
Du denoir des Nobles	, selon le Christia-
Diacres. Du deuoir des Nobles nisme. Du deuoir Chrestien de	pag. 283.
Du deuoir Chrestien de	e ceux qui sont No-
bles par leurs Char	ges. pag 370.
De la Richesse des Nob	les, & de la Noblesse
des Riches.	pag. 447.
des Riches. Du deuoir des gens de	guerre selon le Chri-
stianisme.	pag. 509.
Du deuoir Chrestien	des Generaux d'ar-
mée, à qui les Son	uerains commettent
la conduite & l'ad	ministration de leurs
querres.	pag. sas.

Du devoir Chrestien des autres gens qui fuinent les armes. pag. 601.

Du devoir Chrestien de tous ceux qui ont quelque part en l'exercice de la Medecine. pag. 661.

Du devoir Chrestien des Marchands, des Artisans & des Laboureurs. pag. 711.

Conclusion de tout l'Ouurage. pag. 760.



Es six Volumes de cette Morale ont esté veus & approuuez par les Examinateurs des Liures de Religion qui sont ordonnez en cette Prouince, de quoy les Attestations sont entre les mains de l'Auteur.







